

नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

१

आयारो-पढमं अंगसुत्तं

मुनि दीपरत्नसागर

Date : / / 2012

Jain Aagam Online Series-1

१

गंथाणुक्कमो

० पढमो सुयक्खंधो ०

कमंको	विसय	उद्देसगा	सुत्तं	गाहा	अणुक्कमो	पिड्डको
१	सत्थ परिण्णा	१-७	१-६२	-	१-६२	२
२	लोगविजओ	१-६	६३-१०५	१-३	६३-१०८	७
३	सीओसणिज्जं	१-४	१०६-१२६	४-१२	१०९-१३८	११
४	सम्मत्तं	१-४	१२७-१४०	-	१३९-१५३	१४
५	लोगसारो	१-६	१४१-१७२	१३-	१५४-१८५	१६
६	धुयं	१-५	१७३-१९३	१४-१६	१८६-२०९	१९
७	अज्झयणं विवन्नं	-	-	-	-	-
८	विमोक्खो	१-८	१९४-२२३	१७-४१	२१०-२६४	२२
९	उवहाण सुयं	१-४	-	४२-१११	२६५-३३४	२८

० बीओ सुयक्खंधो ०

१	पिंडेसणा	१-११	२२४-२८६	-	३३५-३९७	३३
२	सेज्जा	१-३	२८७-३३३	-	३९७-४४४	४८
३	इरिया	१-३	३३४-३५४	-	४४५-४६५	५७
४	भासज्जातं	१-२	३५५-३६३	-	४६६-४७४	६४
५	वत्थेसणा	१-२	३६४-३७४	-	४७५-४८५	६८
६	पाणेसणा	१-२	३७५-३७७	-	४८६-४८८	७३
७	ओग्गह पडिमा	१-२	३७८-३८५	-	४८९-४९६	७६
८	ठाण सत्तिक्कयं	-	३८६-	-	-४९७	८०
९	निसिहिया सत्तिक्कयं	-	३८७	-	-४९८	८१
१०	उच्चार पासवण सत्तिक्कयं	-	३८८-३९०	-	४९९-५०१	८१
११	सद्द सत्तिक्कयं	-	३९१-३९३	-	५०२-५०४	८४
१२	रूव सत्तिक्कयं	-	३९४	-	-५०५	८६
१३	परकिरिया सत्तिक्कयं	-	३९५-३९६	-	५०६-५०७	८६
१४	अणण्णकिरिया सत्तिक्कयं	-	३९७	-	-५०८	८८
१५	भावना	-	३९८-४०२	११२-१३५	-५४०	८९
१६	विमुत्ति	-	-	१३६-१४७	५४१-५५२	९८

१

आयारो-पढमं अंगसुत्तं

पढमं अज्झयणं-सत्थपरिण्णा

० पढमो उद्देशो ०

[१] सुयं मे आउसं! तेणं भगवया एवमक्खायं इहमेगेसिं नो सण्णा भवइ ।

[२] तं जहा - पुरत्थिमाओ वा दिसाओ आगओ अहमंसि, दाहिणाओ वा दिसाओ आगओ अहमंसि, पच्चत्थिमाओ वा दिसाओ आगओ अहमंसि, उत्तराओ वा दिसाओ आगओ अहमंसि, उड्ढाओ वा दिसाओ आगओ अहमंसि, अहे वा दिसाओ आगओ अहमंसि, अन्नयरीओ वा दिसाओ अनुदिसाओ वा आगओ अहमंसि, एवमेगेसिं नो नातं भवति ।

[३] अत्थि मे आया उववाइए, नत्थि मे आया उववाइए, के अहं आसी ? के वा इओ चुए इह पेच्चा भविस्सामि ? ।

[४] से ज्जं पुण जाणेज्जा-सहसम्मइयाए परवागरणेणं अन्नेसिं वा अंतिए सोच्चा, तं जहा- पुरत्थिमाओ वा दिसाओ आगओ अहमंसि, दक्खिणाओ वा दिसाओ आगओ अहमंसि, पच्चत्थिमाओ वा दिसाओ आगओ अहमंसि, उत्तराओ वा दिसाओ आगओ अहमंसि उड्ढाओ वा दिसाओ आगओ अहमंसि अहे वा दिसाओ आगओ अहमंसि, अन्नयरीओ वा दिसाओ अनुदिसाओ वा आगओ अहमंसि

एवमेगेसिं जं नायं भवइ अत्थि मे आया उववाइए, जो इमाओ दिसाओ अनुदिसाओ वा अनुसंचरइ सव्वाओ दिसाओ सव्वाओ अनुदिसाओ, सोऽहं ।

[५] से आयावादी लोगावादी कम्मावादी किरियावादी ।

[६] अकरिस्सं चऽहं, कारवेसु चऽहं, करओ यावि समणुण्णे भविस्सामि ।

[७] एयावंति सव्वावंति लोगंसि कम्म-समारंभा परिजाणियव्वा भवंति ।

[८] अपरिण्णायकम्मे खलु अयं पुरिसे जो इमाओ दिसाओ वा अनुदिसाओ वा अनुसंचरइ, सव्वाओ दिसाओ सव्वाओ अनुदिसाओ साहेति ।

[९] अनेगरुवाओ जोणीओ संधेइ विरुवरुवे फासे पडिसंवेदेइ ।

[१०] तत्थ खलु भगवता परिण्णा पवेइया ।

[११] इमस्स चेव जीवियस्स परिवंदन-मानन-पूयणाए जाई-मरण-मोयणाए दुक्ख-पडिघायहेउं

।

[१२] एयावंति सव्वावंति लोगंसि कम्म-समारंभा परिजाणियव्वा भवंति ।

[१३] जस्सेते लोगंसि कम्मसमारंभा परिण्णाया भवंति से हु मुनी परिण्णायकम्मे ।

त्तिबेमि

पढमे अज्झयणे पढमो उद्देशो समत्तो

० बीओ-उद्देशो ०

[१४] अट्टे लोए परिजुण्णे दुस्संबोहे अविजाणए अस्सि लोए पव्वहिए तत्थ तत्थ पुढो

सुयक्खंधो-१, अज्झयणं-१, उद्देसो-२

पास आतुरा परितावैति ।

[१५] संति पाणा पुढो सिया लज्जमाणा पुढो पास अनगारा मोत्ति एगे पवयमाणा जमिणं विरुवरुवेहिं सत्थेहिं पुढवि-कम्म-समारंभेणं पुढवि-सत्थं समारंभेमाणा अनेगरुवे पाणे विहिंसति ।

[१६] तत्थ खलु भगवया परिण्णा पवेइया, इमस्स चेव जीवियस्स परिवंदन-मानन-पूयणाए जाई-मरण-मोयणाए दुक्खपडिघायहेउं से सयमेव पुढवि-सत्थं समारंभइ अन्नेहिं वा पुढवि-सत्थं समारंभावेइ अन्ने वा पुढवि-सत्थं समारंभंते समणुजाणइ ।

[१७] तं से अहिआए तं से अबोहीए से तं संबुज्झमाणे आयाणीयं समुद्धाए सोच्चा खलु भगवओ अनगाराणं वा अंतिए इहमेगेसिं नातं भवति एस खलु गंथे एस खलु मोहे एस खलु मारे एस खलु निरए इच्चत्थं गइडिए लोए जमिणं विरुवरुवेहिं सत्थेहिं पुढवि-कम्म-समारंभेणं पुढवि-सत्थं समारंभेमाणे अन्ने अनेगरुवे पाणे विहिंसइ,

से बेमि-अप्पेगे अंधमब्भे अप्पेगे अंधमच्छे अप्पेगे पायमब्भे अप्पेगे पायमच्छे अप्पेगे गुप्फमब्भे अप्पेगे गुप्फमच्छे, अप्पेगे जंधमब्भे (२), अप्पेगे जानुमब्भे (२), अप्पेगे ऊरुमब्भे (२), अप्पेगे कडिमब्भे (२), अप्पेगे नाभिमब्भे (२), अप्पेगे उदरमब्भे (२), अप्पेगे पासमब्भे (२), अप्पेगे पिट्ठिमब्भे (२), अप्पेगे उरमब्भे (२), अप्पेगे हिययमब्भे (२), अप्पेगे थणमब्भे (२), अप्पेगे खंधमब्भे (२), अप्पेगे बाहुमब्भे (२), अप्पेगे हत्थमब्भे (२), अप्पेगे अंगुलिमब्भे (२), अप्पेगे नहमब्भे (२), अप्पेगे गीवमब्भे (२), अप्पेगे हनुमब्भे (२), अप्पेगे होडुमब्भे (२), अप्पेगे दंतमब्भे (२), अप्पेगे जिब्भमब्भे (२), अप्पेगे तालुमब्भे (२), अप्पेगे गलमब्भे (२), अप्पेगे गंडमब्भे (२), अप्पेगे कण्णमब्भे (२), अप्पेगे नासमब्भे (२), अप्पेहे अच्छिमब्भे (२), अप्पेगे भमुहमब्भे (२), अप्पेगे निडालमब्भे (२), अप्पेगे सीसमब्भे (२), अप्पेगे संपमारए अप्पेगे उद्वए, एत्थ सत्थं समारंभमाणस्स इच्चेते आरंभा अपरिण्णाता भवंति ।

[१८] एत्थं सत्थं असमारंभमाणस्स इच्चेते आरंभा परिण्णाता भवंति, तं परिण्णाय मेहावी नेव सयं पुढवि-सत्थं समारंभावेज्जा, नेवऽन्नेहिं पुढवि-सत्थं समारंभावेज्जा, नेवऽन्ने पुढवि-सत्थं समारंभंते समणुजाणेज्जा, जस्सेते पुढवि-कम्म-समारंभा परिण्णाता भवंति, से हु मुनी परिण्णातकम्मे - त्ति बेमि ।

पढमे अज्झयणे बीओ उद्देसो समत्तो

◦ तइओ - उद्देसो ◦

[१९] से बेमि - से जहावि अनगारे उज्जुकडे निकायपडिवन्ने अमायं कुव्वमाणे वियाहिए ।

[२०] जाए सद्धाए निक्खंतो तमेव अनुपालिया विजहित्ता विसोत्तियं ।

[२१] पणया वीरा महावीहिं ।

[२२] लोगं च आणाए अभिसमेच्चा अकुतोभयं ।

[२३] से बेमि- नेव सयं लोगं अब्भाइक्खेज्जा नेव अत्ताणं अब्भाइक्खेज्जा, जे लोयं अब्भाइक्खइ से अत्ताणं अब्भाइक्खइ, जे अत्ताणं अब्भाइक्खइ से लोयं अब्भाइक्खइ ।

[२४] लज्जमाणा पुढो पास अनगारा मोत्ति एगे पवयमाणा जमिणं विरुवरुवेहिं सत्थेहिं उदय-कम्म-समारंभेणं उदय-सत्थं समारंभमाणे अन्ने अनेगरुवे पाणे विहिंसति । तत्थ खलु भगवता

परिण्णा पवेदिता । इमस्स चेव जीवियस्स परिवंदन-मानन-पूयणाए जाई-मरण-मोयणाए दुक्खपडिघायहेउं से सयमेव उदय-सत्थं समारंभति अन्नेहिं वा उदय-सत्थं समारंभावेति अन्ने वा उदय-सत्थं समारंभंते समणुजाणति, तं से अहियाए तं से अबोहीए, से तं संबुज्झमाणे आयाणीयं समुद्वाए सोच्चा भगवओ अनगाराणं वा अंतिए इहमेगेसिं नायं भवति ।

एस खलु गंथे एस खलु मोहे एस खलु मारे एस खलु निरए इच्चत्थं गढिए लोए जमिणं विरुवरुवेहिं सत्थेहिं उदय-कम्म-समारंभेणं उदयसत्थं समारंभमाणे अन्ने अनेगरुवे पाणे विहिंसति । से बेमि-संति पाणा उदयनिस्सिया जीवा अनेगे ।

[२५] इहं च खलु भो! अनगाराणं उदयं-जीवा वियाहिया । सत्थं चेत्थं अणुवीइ पास ।

[२६] पुढो सत्थं पवेइयं ।

[२७] अदुवा अदिन्नादाणं ।

[२८] कप्पइ णे कप्पइ णे पाउं अदुवा विभूसाए ।

[२९] पुढो सत्थेहिं विउट्ठंति ।

[३०] एत्थऽवि तेसिं नो निकरणाए ।

[३१] एत्थ सत्थं समारंभमाणस्स इच्चेते आरंभा अपरिण्णाया भवंति, एत्थ सत्थं असमारंभमाणस्स इच्चेते आरंभा परिण्णाया भवंति, तं परिण्णाय मेहावी नेव सयं उदयसत्थं समारंभेज्जा नेवऽन्नेहिं उदय-सत्थं समारंभावेज्जा उदय-सत्थं समारंभंतेऽवि अन्ने न समणुजाणेज्जा, जस्सेते उदयसत्थ-समारंभा परिण्णाया भवंति से हु मुनी परिण्णात-कम्मे, त्तिबेमि ।

पढमे अज्झयणे तइओ उद्देसो समत्तो

० चउत्थो - उद्देसो ०

[३२] से बेमि नेव सयं लोगं अब्भाइक्खेज्जा नेव अत्ताणं अब्भाइक्खेज्जा, जे लोगं अब्भाइक्खइ से अत्ताणं अब्भाइक्खइ जे अत्ताणं अब्भाइक्खइ से लोगं अब्भाइक्खइ ।

[३३] जे दीहलोगसत्थस्स खेयण्णे से असत्थस्स खेयण्णे, जे असत्थस्स खेयण्णे से दीहलोग सत्थस्स खेयण्णे ।

[३४] वीरेहिं एयं अभिभूय दिट्ठं संजतेहिं सया जत्तेहिं सया अप्पमत्तेहिं ।

[३५] जे पमत्ते गुणद्विए से हु दंडेत्ति पवुच्चति ।

[३६] तं परिण्णाय मेहावी इयाणिं नो जमहं पुव्वमकासी पमाएणं ।

[३७] लज्जमाणा पुढो पास अनगारा मोत्ति एगे पवदमाणा जमिणं विरुवरुवेहिं सत्थेहिं अगनि-कम्मसमारंभेणं अगनिसत्थं समारंभमाणे अन्ने अनेगरुवे पाणे विहिंसति, तत्थ खलु भगवता परिण्णा पवेइया, इमस्स चेव जीवियस्स परिवंदन-मानन-पूयणाए जाई-मरण-मोयणाए दुक्खपडिघायहेउं से सयमेव अगनिसत्थं समारंभइ अन्नेहिं वा अगनिसत्थं समारंभावेइ अन्ने वा अगनिसत्थं समारंभमाणे समणुजाणइ, तं से अहियाए तं से अबोहीयाए, से तं संबुज्झमाणे आयाणीयं समुद्वाए सोच्चा भगवओ अनगाराणं वा अंतिए इहमेगेसिं नायं भवति-एस खलु गंथे एस खलु मोहे एस खलु मारे एस खलु निरए इच्चत्थं गढिए लोए जमिणं विरुवरुवेहिं सत्थेहिं, अगनिकम्म-समारंभेणं अगनिसत्थं समारंभमाणे अन्ने अनेगरुवे पाणे विहिंसति ।

[३८] से बेमि संति पाणा पुढविनिस्सिया तणनिस्सिया पत्तनिस्सिया कट्टनिस्सिया गोमय-निस्सिया कयवर-निस्सिया संति संपातिमा पाणा आहच्च संपयंति, अग्निं च खलु पुट्ठा एगे संघायमावज्जंति; जे तत्थ संघायमावज्जंति, ते तत्थ परियावज्जंति, जे तत्थ परियावज्जंति ते तत्थ उदायंति ।

[३९] एत्थ सत्थं समारंभमाणस्स इच्चेते आरंभा अपरिण्णया भवंति, एत्थ सत्थं असमारंभमाणस्स इच्चेते आरंभा परिण्णया भवंति, तं परिण्णाय मेहावी नेव सयं अग्निसत्थं समारंभेज्जा नेवन्नेहिं अग्निसत्थं समारंभावेज्जा अग्निसत्थं समारंभमाणे अन्ने न समणुजाणेज्जा जस्सेते अग्नि-कम्म-समारंभा परिण्णया भवंति, से हु मुनी परिण्णाय-कम्मे - त्ति बेमि ।

पढमे अज्झयणे चउत्थो उद्देशो समत्तो

० पंचमो - उद्देशो ०

[४०] तं णो करिस्सामि समुट्ठाए मत्ता मइमं, अभयं विदित्ता, तं जे णो करए एसोवरए, एत्थोवरए एस अनगारेत्ति पवुच्चइ ।

[४१] जे गुणे से आवट्टे, जे आवट्टे से गुणे ।

[४२] उड्ढं अहं तिरियं पाईणं पासमाणे रुवाइं पासति, सुणमाणे सदाइं सुणेति ।

[४३] उड्ढं अहं तिरियं पाईणं मुच्छमाणे रुवेसु मुच्छति, सद्धेसु आवि ।

एस लोए वियाहिए एत्थ अगुत्ते अणाणाए ।

[४४] पुणो-पुणो गुणासाए, वंक्समायारे ।

[४५] पमत्तेऽगारमावसे ।

[४६] लज्जमाणा पुढो पास, अनगारा मोत्ति एगे पवदमाणा जमिणं विरुवरुवेहिं सत्थेहिं वणस्सइ-कम्मसमारंभेणं वणस्सइसत्थं समारंभमाणे अन्ने अनेगरुवे पाणे विहिंसति, तत्थ खलु भगवया परिण्णा पवेदिता, इमस्स चेव जीवियस्स परिवंदन-मानन-पूयणाए जाती-मरण-मोयणाए दुक्खपडिघायहेउं से सयमेव वणस्सइसत्थं समारंभइ अन्नेहिं वा वणस्सइसत्थं समारंभावेइ अन्ने वा वणस्सइसत्थं समारंभमाणे समणुजाणइ, तं से अहियाए, तं से अबोहीए ।

से तं संबुज्जमाणे आयाणीयं समुट्ठाए सोच्चा भगवओ अनगाराणं वा अंतिए इहमेगेसिं नायं भवति- एस खलु गंथे, एस खलु मोहे एस खलु मारे एस खलु निरए, इच्चत्थं गट्टिए लोए। जमिणं विरुवरुवेहिं सत्थेहिं वणस्सइ-कम्म-समारंभेणं वणस्सइ-सत्थं समारंभमाणे अन्ने अनेगरुवे पाणे विहिंसति ।

[४७] से बेमि इमंपि जाइधम्मयं एयंपि जाइधम्मयं इमंपि वुड्ढिधम्मयं एयंपि वुड्ढिधम्मयं इमंपि चित्तमंतयं एयंपि चित्तमंतयं इमंपि छिन्नं मिलाति एयंपि छिन्नं मिलाति इमंपि आहारगं एयंपि आहारगं इमंपि अनिच्चयं एयंपि अनिच्चयं इमंपि असासयं एयंपि असासयं [इमंपि अधुवं एयंपि अधुवं] इमंपि चयावचइयं एयंपि चयावचइयं इमंपि विपरिणामधम्मयं एयंपि विपरिणामधम्मयं ।

[४८] एत्थ सत्थं समारंभमाणस्स इच्चेते आरंभा अपरिण्णया भवंति, एत्थ सत्थं असमारंभमाणस्स इच्चेते आरंभा परिण्णया भवंति, तं परिण्णाय मेहावी नेव सयं वणस्सइ-सत्थं समारंभेज्जा नेवन्नेहिं वणस्सइ-सत्थं समारंभावेज्जा नेवन्ने वणस्सइ-सत्थं समारंभंते समणुजाणेज्जा,

जस्सेते वणस्सइ-सत्थ समारंभा परिण्णया भवन्ति, से हु मुनी परिण्णायकम्मे । त्तिबेमि ।

पढमे अज्झयणे पंचमो उद्देशो समत्तो

० छट्ठो - उद्देशो ०

[४९] से बेमि संतिमे तसा पाणा तं जहा- अंडया पोतया जराउया रसया संसेयया संमुच्छिमा उब्भिया ओववाइया एस संसारेत्ति पवुच्चति ।

[५०] मंदस्स अवियाणओ ।

[५१] निज्झाइत्ता पडिलेहित्ता पत्तेयं परिनिव्वाणं सव्वेसिं पाणाणं सव्वेसिं भूयाणं सव्वेसिं जीवाणं सव्वेसिं सत्ताणं अस्सायं अपरिनिव्वाणं महब्भयं दुक्खं, तिबेमि । तसंति पाणा पदिसो दिसासु य।

[५२] तत्थ-तत्थ पुढो पास आतुरा परितावेंति ।

[५३] संति पाणा पुढो सिया, लज्जमाणा पुढो पास अनगारा मोत्ति एगे पवयमाणा जमिणं विरुवरुवेहिं सत्थेहिं तसकाय-समारंभेणं तसकाय-सत्थं समारंभमाणे अन्ने अनेगरुवे पाणे विहिंसति, तत्थ खलु भगवया परिण्णा पवेइया, इमस्स चेव जीवियस्स परिवंदन-मानन-पूयणाए जाई-मरण-मोयणाए दुक्खपडिघायहेउं से सयमेव तसकाय-सत्थं समारंभति अन्नेहिं वा तसकाय-सत्थं समारंभावेइ अन्ने वा तसकाय-सत्थं समारंभमाणे समणुजाणइ, तं से अहियाए तं से अबोहीए, से तं संबुज्झमाणे आयाणीयं समुद्वाय सोच्चा भगवओ अनगाराणं वा अंतिए इहमेगेसिं नायं भवति, एस खलु गंथे एस खलु मोहे एस खलु मारे एस एस खलु निरए, इच्चत्थं गढिए लोए जमिणं विरुवरुवेहिं सत्थेहिं तसकाय-समारंभेणं तसकाय-सत्थं समारंभमाणे अन्ने अनेगरुवे पाणे विहिंसति ।

[५४] से बेमि-अप्पेगे अच्छाए वहंति, अप्पेगे अजिणाए वहंति, अप्पेगे मंसाए वहंति, अप्पेगे सोणियाए वहंति, अप्पेगे हिययाए वहंति, अप्पेगे पित्ताए वहंति, अप्पेगे वसाए वहंति, अप्पेगे पिच्छाए वहंति, अप्पेगे पुच्छाए वहंति, अप्पेगे बालाए वहंति, अप्पेगे सिंगाए वहंति, अप्पेगे विसाणाए वहंति अप्पेगे दंताए वहंति अप्पेगे दाढाए वहंति अप्पेगे नहाए वहंति अप्पेगे ण्हारुणीए वहंति, अप्पेगे अट्ठीए वहंति, अप्पेगे अट्ठिमिंजाए वहंति, अप्पेगे अट्ठाए वहंति, अप्पेगे अणट्ठाए वहंति, अप्पेगे हिंसिसु मेत्ति वा वहंति अप्पेगे हिंसंति मेत्ति वा वहंति अप्पेगे हिंसिस्संति मेत्ति वा वहंति ।

[५५] एत्थ सत्थं समारंभमाणस्स इच्चेते आरंभा अपरिण्णया भवन्ति, एत्थ सत्थं असमारंभमाणस्स इच्चेते आरंभा परिण्णया भवन्ति, तं परिण्णाय मेहावी नेव सयं तसकाय-सत्थं समारंभेज्जा नेवन्नेहिं तसकायसत्थं समारंभावेज्जा नेवऽन्नेहिं तसकाय-सत्थं समारंभंते समणुजाणेज्जा, जस्सेते तसकाय-सत्थ-समारंभा परिण्णया भवन्ति, से हु मुनी परिण्णायकम्मे, त्तिबेमि ।

पढमे अज्झयणे छट्ठो उद्देशो समत्तो

० सत्तमो - उद्देशो ०

[५६] पहू एजस्स दुगंछणाए ।

[५७] आयंकदंसी अहियं ति नच्चा, जे अज्झत्थं जाणइ से बहिया जाणइ जे बहिया जाणइ से अज्झत्थं जाणइ, एयं तुलमन्नेसिं ।

[५८] इह संतिगया दविया नावकंखति जीविउं ।

[५९] लज्जमाणा पुढो पास अनगारा मोत्ति एगे पवयमाणा जमिणं विरुवरुवेहिं सत्थेहिं सुयक्खंधो-१, अज्झयणं-१, उद्देसो-७

वाउकम्म-समारंभेणं वाउसत्थं समारंभमाणे अन्ने अनेगरुवे पाणे विहिंसति । तत्थ खलु भगवया परिण्णा पवेइया । इमस्स चेव जीवियस्स परिवंदन-मानन-पूयणाए जाई-मरण-मोयणाए दुक्खपडिघायहेउं से सयमेव वाउ-सत्थं समारंभति अन्नेहिं वा वाउ-सत्थं समारंभावेति अन्ने वा वाउ-सत्थं समारंभंते समणुजाणति,

तं से अहियाए तं से अबोहीए, से तं संबुज्जमाणे आयाणीयं समुद्धाए सोच्चा भगवओ अनगाराणं वा अंतिए इहमेगेसिं नायं भवति, एस खलु गंथे एस खलु मोहे एस खलु मारे एस खलु निरए इच्चत्थं गढिए लोए जमिणं विरुवरुवेहिं सत्थेहिं वाउकम्म-समारंभेणं वाउ-सत्थं समारंभमाणे अन्ने अनेगरुवे पाणे विहिंसति ।

[६०] से बेमि-संति संपाइमा पाणा आहच्च संपयंति य फरिसं च खलु पुढा एगे संघायमावज्जंति, जे तत्थ संघायमावज्जंति ते तत्थ परियावज्जंति, जे तत्थ परियावज्जंति ते तत्थ उद्दायंति, एत्थ सत्थं समारंभमाणस्स इच्चेते आरंभा अपरिण्णाया भवंति, एत्थ सत्थं असमारंभमाणस्स इच्चेते आरंभा परिण्णाया भवंति, तं परिण्णाय मेहावी नेव सयं वाउ-सत्थं समारंभेज्जा नेवन्नेहिं वाउ-सत्थं समारंभावेज्जा नेवऽन्ने वाउ-सत्थं समारंभंते समणुजाणेज्जा । जस्सेते वाउ-सत्थ-समारंभा परिण्णाया भवंति, से हु मुनी परिण्णायकम्मे, त्तिबेमि ।

[६१] एत्थं पि जाणे उवादीयमाणा जे आयारे न रमंति आरंभमाणा विनयं वियंति छंदोवणीया अज्झोववन्ना आरंभसत्ता पकरेंति संगं ।

[६२] से वसुमं सव्व-समन्नागय-पण्णाणेणं अप्पाणेणं अकरणिज्जं पावं कम्मं नो अन्नेसिं, तं परिण्णाय मेहावी नेव सयं छज्जीव-निकाय-सत्थं समारंभेज्जा नेवऽन्नेहिं छज्जीव-निकाय-सत्थं समारंभावेज्जा नेवऽन्ने छज्जीवनिकाय-सत्थं समारंभंते समणुजाणेज्जा, जस्सेते छज्जीवनिकाय-सत्थ-समारंभा परिण्णाया भवंति, से हु मुनी परिण्णायकम्मे, त्तिबेमि ।

पढमे अज्झयणे सत्तमो उद्देसो समत्तो

• मुनि दीपरत्नसागरेण संशोधितः सम्पादित्तश्च पढमं अज्झयणं समत्तं •

बीअं अज्झयणं - लोगविजओ

• पढमो - उद्देसो •

[६३] जे गुणे से मूलद्वाणे, जे मूलद्वाणे से गुणे इति, से गुणद्वी महता परियावेण पुणो पुणो वसे पमत्ते, माया मे पिया मे भाया मे भइणी मे भज्जा मे पुत्ता मे घूया मे णहुसा मे सहि-सयण-संगंथ-संथुआ मे विवित्तोवगरण-परियद्वण-भोयण-अच्छायणं मे, इच्चत्थं गढिए लोए-वसे पमत्ते अहो य राओ य परितप्पमाणे कालाकाल-समुद्धाई संजोगद्वी अद्वालोभी आलुं पे सहसाकारे विनिविद्वचित्ते एत्थ सत्थे पुणो-पुणो अप्पं च खलु आउं इहमेगेसिं मानवाणं तं जहा-

[६४] सोय-परिण्णाणेहिं परिहायमाणेहिं, चक्खु-परिण्णाणेहिं परिहायमाणेहिं, घाणपरिण्णाणेहिं परिहायमाणेहिं, रस-परिण्णाणेहिं परिहायमाणेहिं, फास-परिण्णाणेहिं परिहायमाणेहिं, अभिक्कंतं च खलु वयं सपेहाए तओ से एगया मूढभावं जनयंति ।

[६५] जेहिं वा सद्धिं संवसति तेऽवि णं एगदा नियगा पुट्ठिं परिवयंति सो वि ते नियगे

पच्छा परिवएज्जा नालं ते तव ताणाए वा सरणाए वा तुमं पि तेसिं नालं ताणाए वा सरणाए वा से न हस्साए न किड्डा न रतीए न विभूसाए ।

[६६] इच्चेवं समुद्धिए अहोविहाराए अंतरं च खलु इमं सपेहाए धीरे मुहुत्तमवि नो पमायए, वओ अच्चेति जोव्वणं च ।

[६७] जीविए इह जे पमत्ता से हंता छेत्ता भेत्ता लुंपित्ता विलुंपित्ता उद्धवित्ता उत्तासइत्ता अकडं करिस्सामित्ति मन्नमाणे जेहिं वा सद्धिं संवसति तेऽवि णं एगया नियगा तं पुव्विं पोसेंति सोऽवि ते नियगे पच्छा पोसेज्जा नालं ते तव ताणाए वा सरणाए वा तुमं पि तेसिं नालं ताणाए वा सरणाए वा ।

[६८] उवाइय-सेसेण वा सन्निहि-सन्निचओ कज्जइ इहमेगेसिं असंजयाण भोयणाए तओ से एगया रोग-समुप्पाया समुप्पज्जंति जेहिं वा सद्धिं संवसति ते वा णं एगया नियगा तं पुव्विं परिहरंति सो वा ते नियगे पच्छा परिहरेज्जा, नालं ते तव ताणाए वा सरणाए वा तुमं पि तेसिं नालं ताणाए वा सरणाए वा ।

[६९] जाणित्तु दुक्खं पत्तेयं सायं ।

[७०] अनभिककंतं च खलु वयं सपेहाए ।

[७१] खणं जाणाहि पंडिए ।

[७२] जाव सोय-परिण्णाणा अपरिहीना जाव नेत्त-परिण्णाणा अपरिहीना जाव घाण-परिण्णाणा अपरिहीना जाव जीह-परिण्णाणा अपरिहीना जाव फास-परिण्णाणा अपरिहीना इच्चेतेहिं विरु-वरुवेहिं पण्णाणेहिं अपरिहीनेहिं आयद्धं समं समणुवासिज्जासि - त्तिबेमि ।

बीए अज्झयणे पढमो उद्देसो समत्तो

◦ बीओ - उद्देसो ◦

[७३] अरइं आउट्टे से मेहावी, खणंसि मुक्के ।

[७४] अणाणाए पुट्ठा वि एगे नियट्ठंति, मंदा मोहेण पाउडा, अपरिग्गहा भविस्सामो समुद्धाए लद्धे कामे अभिगाहंति, अणाणाए मुणिणो पडिलेहंति, एत्थ मोहे पुणो पुणो सण्णा नो हव्वाए नो पाराए ।

[७५] विमुक्का हु ते जणा जे जणा पारगामिणो, लोभं अलोभेण दुगंछमाणे लद्धे कामे नाभिगाहइ ।

[७६] विणइत्तु लोभं निक्खम्म एस अकम्म जे जाणति-पासति पडिलेहाए नावकंखति एस अनगारेत्ति पवुच्चति, अहो य राओ य परितप्पमाणे कालाकालसमुद्धाई संजोगट्ठी अट्ठालोभी आलुं पे सहसक्कारे विनिविट्ठचित्ते एत्थ सत्थे पुणो-पुणो से आयबले से नाइबले से सयणबले से मित्तबले से पेच्च-बले से देव-बले से राय-बले से चोर-बले से अतिहि-बले से किवण-बले से समण-बले इच्चेतेहिं विरुवरुवेहिं कज्जेहिं दंड-समायाणं सपेहाए भया कज्जति पावमोक्खोत्ति मन्नमाणे अदुवा आसंसाए ।

[७७] तं परिण्णाय मेहावी नेव सयं एएहिं कज्जेहिं दंडं समारंभेज्जा नेवऽन्नं एएहिं कज्जेहिं दंडं समारंभावेज्जा नेवऽन्नं एएहिं कज्जेहिं दंडं समारंभंतं समणुजाणेज्जा, एस मग्गे आरिएहिं पवेइए जहेत्थ कुसले नोवलिंपिज्जासि - त्तिबेमि ।

बीए अज्झयणे बीओ उद्देसो समत्तो

◦ तइओ उद्देसो- ◦

[७८] से असइं उच्चागोए असइं नीयागोए, नो हीणे नो अइरित्ते नोऽ पीहए इति संखाय के गोयावादी ? के माणावादी ? कंसि वा एगे गिज्झो ? तम्हा पंडिए नो हरिसे नो कुज्झो ? भूएहिं जाण पडिलेह सातं ।

[७९] समिते एयाणुपस्सी तं जहा-अंधत्तं बहिरत्तं भूयत्तं काणत्तं कुटत्तं खुज्जत्तं वडभत्तं सामत्तं सबलत्तं सह पमाएणं अनेगरुवाओ जोणीओ संधावइ विरुवरुवे फासे पडिसंवेदेइ ।

[८०] से अबुज्झमाणे हतोवहते जाइ-मरणं अनुपरियट्टमाणे, जीवियं पुढो पियं इहमेगेसिं माणवाणं खेत्त-वत्थु ममायमाणाणं, आरत्तं विरत्तं मणिकुंडलं सह हिरण्णेण इत्थियाओ परिगिज्झ तत्थेव रत्ता न एत्थ तवो वा दमो वा नियमो वा दिस्सति, संपुण्णं बाले जीविउकामे लालप्पमाणे मूढे विप्परियासमुवेइ ।

[८१] इणमेव नावकंखंति जे जणा घुवच्चारिणो ।

जाती-मरणं परिण्णाय चरे संकमणे दढे ॥

[८२] नत्थि कालस्स नागमो, सव्वे पाणा पियाउया सुहसाया दुक्खपडिकूला अप्पियवहा पियजीविणो जीविउकामा, सव्वेसिं जीवियं पियं, तं परिगिज्झ दुपयं चउप्पयं अभिजुंजिया णं संसिचिया णं तिविहेणं जाऽवि से तत्थ मत्ता भवइ-अप्पा वा बहुगा वा से तत्थ गढिए चिद्धइ भोयणाए, तओ से एगया विपरिसिद्धं संभूयं महोवगरणं भवइ, तं पि से एगया दायाया वा विभयंति, अदत्तहारो वा से अवहरति, रायाणो वा से विलुपंति, नस्सति वा से विनस्सति वा से, अगारदाहेण वा से डज्झइ, इति से परस्स अट्टाए कूराइं कम्माइं बाले पकुव्वमाणे तेण दुक्खेण मूढे विप्परियासमुवेइ, मुणिणा हु एयं पवेइयं अनोहंतरा एते, नो य ओहं तरित्तए, अतीरंगमा एते नो य तीरं गमित्तए, अपारंगमा एते नो य पारं गमित्तए, आयाणिज्जं च आयाय तंमि ठाणे न चिद्धइ, वितहं पप्पऽखेयण्णे तम्मि ठाणंमि चिद्धइ ।

[८३] उद्देसो पासगस्स नत्थि, बाले पुण निहे कामसमणुण्णे असमियदुक्खे दुक्खी दुक्खाणमेव आवट्ठं अणुपरियट्टइ - त्तिबेमि ।

बीए अज्झयणो तइओ उद्देसो समत्तो

◦ चउत्थो - उद्देसो ◦

[८४] तओ से एगया रोग-समुप्पाया समुप्पज्जंति जेहिं वा सद्धिं संवसति ते वा णं एगया नियया पुव्विं परिवयंति सो वा ते नियगे पच्छा परिवएज्जा नालं ते तव ताणाए वा सरणाए वा तुमं पि तेसिं नालं ताणाए वा सरणाए वा जाणित्तु दुक्खं पत्तेयं सायं, भोगा मे व अनुसोयंति इहमेगेसिं माणवाणं ।

[८५] तिविहेण जाऽवि से तत्थ मत्ता भवइ अप्पा वा बहुगा वा से तत्थ गढिए चिद्धति भोयणाए, ततो से एगया विपरिसिद्धं संभूयं महोवगरणं भवति तं पि से एगया दायाया विभयंति अदत्तहारो वा से अवहरति रायाणो वा से विलुपंति नस्सइ वा से विणस्सइ वा से अगारडाहेण वा से डज्झइ इति से परस्स अट्टाए कूराइं कम्माइं बाले पकुव्वमाणे तेण दुक्खेण मूढे विप्परियासमुवेइ ।

[८६] आसं च छंदं च विगिंच धिरे ! तुमं चेव तं सल्लमाहट्ठु, जेण सिया तेण नो सिया इणमेव नावबुज्झंति जे जना मोहपाउडा, थीभि लोए पव्वहिए, ते भो ! वयंति - एयाइं आयतणाइं से

दुक्खाए मोहाए माराए नरगाए नरग-तिरिक्खाए सततं मूढे धम्मं नाभिजाणइ उदाहु वीरे अप्पमादो महामोहे, अलं कुसलस्स पमाएणं, संतिमरणं संपेहाए भेउरधम्मं संपेहाए नालं पास अलं ते एएहिं ।

[८७] एयं पास मुनी ! महब्भयं नाइवाएज्ज कंचणं, एस वीरे पसंसिए जे न निविज्जति आदानाए, न मे देति न कुप्पिज्जा, थोवं लद्धुं न खिंसए पडिसेहिओ परिणमिज्जा, एयं मोनं समणुवासेज्जासि - त्तिबेमि ।

बीए अज्झयणे चउत्थो उद्देसो समत्तो

० पंचमो - उद्देसो ०

[८८] जमिणं विरुवरुवेहिं सत्थेहिं लोगस्स कम्म-समारंभा कज्जंति, तं जहा-अप्पणो से पुत्ताणं धूयाणं सुण्हाणं नातीणं धातीणं राईणं दासाणं दासीणं कम्मकराणं कम्मकरीणं आएसाए पुढो पहेणाए सामासाए पायरासाए सन्निहि-सन्निचओ कज्जइ इहमेगेसिं माणवाणं भोयणाए ।

[८९] समुट्ठिए अनगारे आरिए आरियपण्णे आरियदंसी अयंसंधिति अदक्खु से नाइए नाइयावए न समणुजाणए सव्वामगंधं परिण्णाय निरामगंधो परिव्वए ।

[९०] अदिस्समाणे कय-विक्कएसु से न किणे न किणावए किणंतं न समणुजाणइ, से भिक्खू कालण्णे बलण्णे मायण्णे खेयण्णे खणयण्णे विणयण्णे ससमयण्णे परसमयण्णे भावण्णे परिग्गहं अममायमाणे कालाणुद्वाइ अपडिण्णे ।

[९१] दुहओ छेत्ता नियाइ वत्थं पडिग्गहं कंबलं पायपुंछणं उग्गहं च कडासणं एतेसु चेव जाणिज्जा ।

[९२] लद्धे आहारे अनगारे मायं जाणेज्जा, से जहेयं भगवया पवेइयं, लाभो त्ति न मज्जेज्जा, अलाभो त्ति न सोएज्जा, बहुं पि लद्धुं न निहे, परिग्गहाओ अप्पाणं अवसक्केज्जा ।

[९३] अन्नहा णं पासए परिहरेज्जा, एस मग्गे आरिएहिं पवेइए, जहेत्थ कुसले नोवलिंपिज्जासि त्ति बेमि ।

[९४] कामा दुरतिक्कमा, जीवियं दुप्पडिवूहगं, कामकामी खलु अयं पुरिसे, से सोयति जूरति तिप्पति परितप्पति ।

[९५] आयतचक्खू लोगविपस्सी लोगस्स अहो भागं जाणइ, उड्ढं भागं जाणइ, तिरयं भागं जाणइ, गढिए लोए अनुपरियट्ठमाणे संधिं विदित्ता इह मच्चिएहिं, एस वीरे पसंसिए जे बद्धे पडिमोयए, जहा अंतो तहा बाहिं जहा बाहिं तहा अंतो, अंतो अंतो पूतिदेहंतराणि पासति पुढोवि सवंताइ पंडिए पडिलेहाए ।

[९६] से मइमं परिण्णाय मा य हु लालं पच्चासी, मा तेसु तिरिच्छमप्पाणमावातए, कासंकासे खलु अयं पुरिसे, बहुमाई कडेण मूढे, पुणो तं करेइ लोभं वेरं वड्ढेति अप्पणो, जमिणं परिकहिज्जइ इमस्स चेव पडिबूहणयाए, अमरायइ महासइढी, अट्टमेतं तु पेहाए अपरिण्णाए कंदति ।

[९७] से तं जाणह जमहं बेमि, तेइच्छं पंडिते पवयमाणे से हंता छेत्ता भेत्ता लुंपइत्ता विलुंपइत्ता उद्धवइत्ता, अकडं करिस्सामित्ति मन्नमाणे, जस्स वि य णं करेइ, अलं बालस्स संगेणं, जे वा से कारेइ बाले, न एवं अनगारस्स जायति - त्तिबेमि ।

बीए अज्झयणे पंचमो उद्देसो समत्तो

० छद्दो - उद्देसो ०

[१८] से तं संबुज्झमाणे आयाणीयं समुद्वाए तम्हा पावं कम्मं नेव कुज्जा न कारवेज्जा ।

[१९] सिया तत्थ एगयरं विप्परामुसइ छसु अन्नयरंसि कप्पति सुहट्ठी लालप्पमाणे सएण दुक्खेण मूढे विप्परियासमुवेति, सएण विप्पमाणे पुढो वयं पकुव्वति, जंसिमे पाणा पव्वहिया पडिलेहाए नो निकरणाए, एस परिण्णा पवुच्चइ कम्मोवसंति ।

[१००] जे ममाइयं-मतिं जहाति से जहाति ममाइयं, से हु दिट्ठपहे मुनी जस्स नत्थि ममाइयं, तं परिण्णाय मेहावी विदित्ता लोगं वंता लोगसण्णं से मइमं परक्कमेज्जासि, त्तिबेमि ।

[१०१] नारतिं सहते, वीरे वीरे नो सहते रतिं ।

जम्हा अविमणे वीरे, तम्हा वीरे न रज्जति ॥

[१०२] सद्धे य फासे अहियासमाणे, निव्विंद नंदिं इह जीवियस्स ।

मुनी मोनं समादाय, घुणे कम्म-सरीरगं ।

[१०३] पंतं लूहं सेवंति वीरा समत्तदंसिणो एस ओघंतरे मुनी तिण्णे मुत्ते विरते वियाहिते, त्ति बेमि ।

[१०४] दुव्वसु मुनी अणाणाए तुच्छए, गिलाए वत्तए, एस वीरे पसंसिए अच्छेइ लोयसंजोयं एस नाए पवुच्चइ ।

[१०५] जं दुक्खं पवेदितं इह माणवाणं तस्स दुक्खस्स कुसला परिण्णमुदाहरंति इति कम्मं परिण्णाय सव्वसो, जे अनन्नदंसी से अनन्नारामे जे अनन्नारामे से अनन्नदंसी, जहा पुण्णस्स कत्थइ तहा तुच्छस्स कत्थइ जहा तुच्छस्स कत्थइ तहा पुण्णस्स कत्थइ ।

[१०६] अवि य हणे अनादियमाणे एत्थंपि जाण सेयंति नत्थि, के यं पुरिसे कं च नए ?, एस वीरे पसंसिए जे बद्धे पडिमोयए उड्ढं अहं तिरियं दिसासु, से सव्वतो सव्वपरिण्णचारी न लिप्पई छणपएण, वीरे से मेहावी अनुग्घायणस्स खेयण्णे जे य बंधप्पमोक्खमन्नेसी, कुसले पुण नो बद्धे नो मुक्के ।

[१०७] से जं च आरंभे जं च नारभे अनारद्धं च नारभे छणं छणं परिण्णाय लोगसण्णं च सव्वसो ।

[१०८] उद्देसो पासगस्स नत्थि, बाले पुण निहे कामसमणुण्णे असमियदुक्खे दुक्खी दुक्खाणमेव आवट्ठं अनुपरियट्ठइ - त्तिबेमि ।

बीए अज्झयणे छद्दो उद्देसो समत्तो

मुनि दीपरत्नसागरेण संशोधितः सम्पादितश्च बीअं अज्झयणं समत्तं

तइयं अज्झयणं -सीओसणिज्जं

० पढमो - उद्देसो ०

[१०९] सुत्ता अमुनी सया मुणिणो सया जागरंति ।

[११०] लोयंसि जाण अहियाय दुक्खं, समयं लोगस्स जाणित्ता एत्थ सत्थोवरए जस्सिमे सद्धा य रुवा य गंधा य रसा य फासा य अभिसमन्नागया भवंति ।

[१११] से आयवं नाणवं वेयवं धम्मवं बंभवं पण्णाणेहिं परियाणइ लोयं, मुनीति वुच्चे धम्मविउ उज्जू आवट्टसोए संगमभिजाणति ।

[११२] सीओसिणच्चाई से निग्गंथे अरइ-रइ-सहे फरुसियं नो वेदेति जागर-वेरोवरए वीरे एवं दुक्खा पमोक्खसि जरामच्चुवसोवणीए नरे सययं मूढे धम्मं नाभिजाणति ।

[११३] पासिय आउरे पाणे अप्पमत्तो परिव्वए, मंता य मइमं पास, आरंभजं दुक्खमिणं ति नच्चा, माई पमाई पुणरेइ गब्भं, उवेहमाणो सद्द-रुवेसु उज्जू माराभिसंकी मरणा पमुच्चति अप्पमत्तो

कामेहिं उवरतो पावकम्महिं वीरे आयगुत्ते खेयण्णे, जे पज्जवजाय-सत्थस खेयण्णे से असत्थस्स खेयण्णे जे असत्थस्स खेयण्णे, से पज्जवजायसत्थस्स खेयण्णं, अकम्मस्स ववहारो न विज्जइ, कम्मणा उवाही जायइ कम्मं च पडिलेहाए ।

[११४] कम्ममूलं च जं छणं, पडिलेहिय सव्वं समायाय दोहिं अंतेहिं अदिस्समाणे तं परिण्णाय मेहावी विदित्ता लोगं वंता लोगसण्णं से मेहावी परक्कमेज्जासि- त्तिबेमि ।

तइए अज्झयणे पढमो उद्देसो समत्तो

० बीओ - उद्देसो ०

[११५] जातिं च वुड्ढिं च इहज्ज! पासं भूतेहिं जाणे पडिलेह सातं ।

तम्हा तिविज्जं परमंति नच्चा समत्तदंसी न करेति पावं ॥

[११६] उम्मं च पासं इह मच्चिएहिं आरंभजीवी उभयाणुपस्सी ।

कामेसु गिद्धा निचयं करेति संसिच्चमाणा पुणरेति गब्भं ॥

[११७] अवि से हासमासज्ज हंता नंदीति मन्नति ।

अलं बालस्स संगेण वेरं वड्ढेति अप्पणो ॥

[११८] तम्हा तिविज्जो परमंति नच्चा आयंकदंसी न करेति पावं ।

अगं च मूलं च विंगिच धीरे पलिच्छिंदिया णं निक्कम्मदंसी ॥

[११९] एस मरणा पमुच्चइ, से हु दिट्ठभए मुनी लोयंसी परमदंसी विवित्तजीवी उवसंते समिते सहिते सया जए कालकंखी परिव्वए बहं च खलु पावकम्म पगडं ।

[१२०] सच्चंसि धितिं कुव्वहा एत्थोवरए मेहावी सव्वं पावकम्मं झोसेति ।

[१२१] अनेगचित्ते खलु अयं पुरिसे, से केयणं अरिहए पूरित्तए से अन्नवहाए अन्नपरियावाए अन्नपरिग्गहाए जणवयवहाए जणवयपरियावाए जनवयपरिग्गहाए ।

[१२२] आसेवित्ता एतमदं इच्चेवेगे समुट्ठिया तम्हा तं बिइयं नो सेवए निस्सारं पासिय नाणी उववायं चवणं अनन्नं चर माहणे, से न छणे न छणावए छणंतं नानुजाणइ निव्विंद नंदि अरते पयासु अनोमदंसी निसन्ने पावेहिं कम्महिं ।

[१२३] कोहाइमानं हणिया य वीरे लोभस्स पासे निरयं महंतं ।

तम्हा हि वीरे विरते वहाओ छिंदेज्ज सोयं लहुभूयगामी ॥

[१२४] गंथं परिण्णाय इहेज्ज वीरे सोयं परिण्णाय चरेज्ज दंते ।

उम्मग्ग लदधुं इह माणवेहिं नो पाणिणं पाणे समारभेज्जासि ॥

त्तिबेमि

तइए अज्झयणे बीओ उद्देसो समत्तो

सुयक्खंधो-१, अज्झयणं-३, उद्देसो-३

◦ तइओ - उद्देसो ◦

[१२५] संधिं लोगस्स जाणिता आयओ बहिया पास तम्हा न-हंता न विधायए, जमिणं अन्नमन्न वितिगिच्छाए पडिलेहाए न करेइ पावं कम्मं किं तत्थ मुनी कारणं सिया ? ।

[१२६] समयं तत्थुवेहाए अप्पाणं विप्पासयए ।

अन्नपरमं नाणी नो पमाए कयाइ वि ।

आयगुत्ते सया वीरे जायामायाए जावए ॥

[१२७] विरागं रुवेहिं गच्छेज्जा महया खुड्डएहि वा आगतिं गतिं परिण्णाय दोहिं वि अंतेहिं अदिस्समाणेहिं से न छिज्जइ न भिज्जइ न डज्जइ न हम्मइ कंचनं सव्वलोए ।

[१२८] अवरेण पुव्वं न सरंति एगे, किमस्स तीतं ? किं वागमिस्सं ? ।

भासंति एगे इह माणवा उ, जमस्स तीतं तमागमिस्सं ।

[१२९] नातीतमद्वं न य आगमिस्सं, अद्वं नियच्छंति तहागया उ ।

विधूत-कप्पे एयाणुपस्सी निज्झोसइत्ता खवगे महेसी ॥

[१३०] का अरई के आनंदे ? एत्थंपि अग्गहे चरे, सव्वं हासं परिच्चज्ज, आलीण-गुतो परिव्वए । पुरिसा ! तुममेव तुमं मित्तं किं बहिया मित्तमिच्छसि ? ।

[१३१] जं जाणेज्जा उच्चालइयं तं जाणेज्जा दूरालइयं जं जाणेज्जा दूरालइयं तं जाणेज्जा उच्चालइयं, पुरिसा अत्ताणमेव अभिनिगिज्झ एवं दुक्खा पमोक्खसि पुरिसा सच्चमेव समभिजाणाहि, सच्चस्स आणाए उवट्ठिए से मेहावी मारं तरति, सहिए धम्ममादाय सेयं समनुपस्सति ।

[१३२] दुहओ जीवियस्स परिवंदन-मानन-पूयणाए जंसि एगे पमादंति ।

[१३३] सहिए दुक्खमत्ताए पुट्ठो नो झंझाए, पासिमं दविए लोयालोय-पवंचाओ मुच्चई, त्तिबेमि ।

तइए अज्झयणे तइओ उद्देसो समत्तो

◦ चउत्थो - उद्देसो ◦

[१३४] से वंता कोहं च मानं च मायं च लोभं च एयं पासगस्स दंसणं उवरयसत्थस्स पलियंतकरस्स आयाणं सगडब्भि ।

[१३५] जे एगं जाणइ से सव्वं जाणइ जे सव्वं जाणइ से एगं जाणइ ।

[१३६] सव्वतो पमत्तस्स भयं, सव्वतो अप्पमत्तस्स नत्थि भयं, जे एगं नामे से बहुं नामे जे बहुं नामे से एगं नामे, दुक्खं लोयस्स जाणित्ता वंता लोगस्स संजोगं जंति वीरा महाजाणं परेण परं जंति, नावकंखंति जीवियं ।

[१३७] एगं विगिंचमाणे पुट्ठो विगिंचइ, पुट्ठो विगिंचमाणे एगं विगिंचइ, सइढी आणाए मेहावी लोगं च आणाए अभिसमेच्चा अकुतोभयं, अत्थि सत्थं परेण परं, नत्थि असत्थं परेण परं ।

[१३८] जे कोहदंसी से मानदंसी, जे मानदंसी से मायादंसी जे मायादंसी से लोभदंसी, जे लोभदंसी से पेज्जदंसी, जे पेज्जदंसी से दोसदंसी, जे दोसदंसी से मोहदंसी, जे मोहदंसी से गब्भदंसी, जे

गब्भदंसी से जम्मदंसी, जे जम्मदंसी से मारदंसी, जे मारदंसी से निरयदंसी, जे निरयदंसी से तिरियदंसी, जे तिरियदंसी से दुक्खदंसी ।

सुयक्खंधो-१, अज्झयणं-३, उद्देशो-४

से मेहावी अभिनिवट्टेज्जा कोहं च मानं च मायं च लोहं च पेज्जं च दोसं च मोहं च गब्भं च जम्मं च मारं च नरगं च तिरियं च दुक्खं च । एयं पासगस्स दंसणं उवरयसत्थस्स पलियंतकरस्स आयाणं निसिद्धा सगडब्भि, किमत्थि उवाही पासगस्स न विज्जइ । नत्थि, त्तिबेमि ।

तइए अज्झयणे चउत्थो उद्देशो समत्तो

मुनि दीपरत्नसागरेण संशोधितः सम्पादितश्च तइयं अज्झयणं समत्तं

चउत्थं - अज्झयणं “सम्मत्तं”

◦ पढमो - उद्देशो ◦

[१३९] से बेमि - जे अईया जे य पडुप्पन्ना जे य आगमेस्सा अरहंता भगवंतो ते सव्वे एवमाइक्खंति एवं भासंति एवं पन्नवेंति एवं परुवेंति- सव्वे पाणा सव्वे भूया सव्वे जीवा सव्वे सत्ता न हंतव्वा न अज्जावेयव्वा न परिधेतव्वा न परितावेयव्वा न उद्वेयव्वा, एस धम्मो सुद्धे निइए सासए समिच्चा लोयं खेयण्णेहिं पवेइए, तं जहा- उट्ठिएसु वा अनुट्ठिएसु वा उवट्ठिएसु वा अनुवट्ठिएसु वा उवरयदंडेसु वा अनुवरयदंडेसु वा सोवहिएसु वा अनोवहिएसु वा संजोगरएसु वा असंजोगरएसु वा तच्चं चेयं तहा चेयं, अस्सिं चेयं पवुच्चइ ।

[१४०] तं आइत्तु न निहे न निक्खिवे, जाणित्तु धम्मं जहा तहा, दिट्ठेहिं निव्वेयं गच्छेज्जा, नो लोगस्सेसणं चरे ।

[१४१] जस्स नत्थि इमा जाई अन्ना तस्स कओ सिया ? दिट्ठं सुयं मयं विण्णायं जमेयं परिकहिज्जइ, समेमाणा पलेमाणा पुणो-पुणो जातिं पकप्पेंति ।

[१४२] अहो य राओ य जयमाणे वीरे सया आगयपण्णाणे पमत्ते बहिया पास अप्पमत्ते सया परक्कमेज्जासि -त्तिबेमि । चउत्थे अज्झयणे पढमो उद्देशो समत्तो

◦ बीओ - उद्देशो ◦

[१४३] जे आसवा ते परिस्सवा जे परिस्सवा ते आसवा, जे अनासवा ते अपरिस्सवा जे अपरिस्सवा ते अणासवा, एए पए संबुज्झमाणे लोयं च आणाए अभिसमेच्चा पुढो पवेइयं ।

[१४४] आधाइ नाणी इह माणवाणं संसारपडिवन्नाणं संबुज्झमाणणं विण्णाणपत्ताणं अट्ठा वि संता अदुआ पमत्ता अहासच्चमिणं ति बेमि, नाणागमो मच्चुमुहस्स अत्थि, इच्छा पणीया वंकानिकेया कालग्गहीआ निचए निविट्ठा पुढो-पुढो जाइं पकप्पयंति ।

[१४५] इहमेगेसिं तत्थ-तत्थ संथवो भवति, अहोववाइए फासे पडिसंवेदयंति, चिट्ठं कूरेहिं कम्महेहिं चिट्ठं परिचिट्ठति, अचिट्ठं कूरेहिं कम्महेहिं नो चिट्ठं परिचिट्ठति, एगे वयंति अदुवा वि नाणी नाणी वयंति अदुवा वि एगे ।

[१४६] आवंति केयावंति लोयंसि समणा य माहणा य पुढो विवादं वदंति, से दिट्ठं च णे सुयं च णे मयं च णे विण्णायं च णे उड्ढं अहं तिरियं दिसासु सव्वतो सुपडिलेहियं च णे-सव्वे पाणा

सव्वे भूया सव्वे जीवा सव्वे सत्तां हंतव्वा । अज्जवेयव्वा परिघेतव्वा परियावेयव्वा उद्वेयव्वा, एत्थ वि जाणह नत्थित्थ दोसो, अनारियवयणमेयं, तत्थ जे ते आरिया ते एवं वयासी-

से दुद्धिदं च भे दुस्सुयं च भे दुम्मयं च भे दुव्विण्णायं च भे उड्ढं अहं तिरियं दिसासु

सुयक्खंधो-१, अज्झायणं-४, उद्देसो-२

सव्वतो दुप्पडिलेहियं च भे, जण्णं तुब्भे एवमाइक्खह एवं भासह एवं परुवेह एवं पण्णवेह- सव्वे पाणा सव्वे भूया सव्वे जीवा सव्वे सत्ता हंतव्वा अज्जावेयव्वा परिघेतव्वा परियावेयव्वा उद्वेयव्वा, एत्थ वि जाणह नत्थित्थ दोसो, अनारियवयणमेयं ।

वयं पुण एवमाइक्खामो एवं भासामो एवं परुवेमो एवं पण्णवेमो सव्वे पाणा सव्वे भूया सव्वे जीवा सव्वे सत्ता न हंतव्वा न अज्जावेयव्वा न परिघेतव्वा न परियावेयव्वा न उद्वेयव्वा एत्थ वि जाणह नत्थित्थ दोसो आरियवयणमेयं, पुव्वं निकाय समयं पत्तेयं पुच्छिस्सामो- हंभो पावादुया ! किं भे

सायं दुक्खं उदहु असायं ? समिया पडिवन्ने यावि एवं बूया- सव्वेसिं पाणाणं सव्वेसिं भूयाणं सव्वेसिं जीवाणं सव्वेसिं सत्ताणं असायं अपरिनिव्वाणं महब्भय दुक्खं, त्तिबेमि ।

चउत्थे अज्झायणे बीओ उद्देसो समत्तो

◦ तइओ - उद्देसो ◦

[१४७] उवेहि णं बहिया य लोयं से सव्वलोगंसि जे केइ विण्णू, अनुवीइ पास निक्खित्तदंडा, जे केइ सत्ता पलियं चयंति, नरा मुयच्चा धम्मविदु त्ति अंजू, आरंभजं दुक्खमिणंति नच्चा, एवमाहु संमत्तदंसिणो, ते सव्वे पावाइया दुक्खस्स कुसला परिण्णमुदाहरंति इति कम्म परिण्णाय सव्वसो ।

[१४८] इह आणाकंखी पंडिए अनिहे, एगमप्पाणं संपेहाए धुणे सरीरं कसेहि अप्पाणं जरेहि अप्पाणं जहा जुण्णाइं कट्ठाइं हव्ववाहो पमत्थति, एवं अत्तसमाहिए अनिहे विगिंच कोहं अविक्कपमाणे ।

[१४९] इमं निरुद्धाउयं संपेहाए दुक्खं च जाण अदुवागमेस्सं, पुढो फासाइं च फासे, लोयं च पास विप्फंदमाणं, जे निव्वुडा पावेहिं कम्मेहिं अनिदाणा ते वियाहिया तम्हा अतिविज्जो नो पडिसंजलिज्जासि, त्तिबेमि ।

चउत्थे अज्झायणे तइओ उद्देसो समत्तो

◦ चउत्थो - उद्देसो ◦

[१५०] आवीलए पवीलए निप्पीलए जहित्ता पुव्वसंजोगं हिच्चा उवसमं, तम्हा अविमणे वीरे सारए समिए सहिते सया जए, दुरनुचरो मग्गो वीराणं अनियट्ठगामीणं विगिंच मंस-सोणियं, एस पुरिसे दविए वीरे आयाणिज्जे वियाहिए जे धुणाइ समुस्सयं वसित्ता बंभचेरंसि ।

[१५१] नेतेहिं पलिच्छिन्नेहिं आयाणसोय-गढिए बाले अव्वोच्छिन्नबंधने अनभिककंतसंजोए तमंसि अविजाणओ आणाए लंभो नत्थि, त्तिबेमि ।

[१५२] जस्स नत्थि पुरा पच्चा मज्झे तस्स कुओ सिया ? से हुं पण्णाणमंते बुद्धे आरंभोवरए सम्ममेयंति पासह जेण बंधं वहं घोरं परितावं च दारुणं, पलिच्छिंदिय बाहिरगं च सोयं निक्कम्मदंसी इह मच्चिएहिं, कम्मुणा सफलं दहुं तओ निज्जाइ वेयवी ।

[१५३] जे खलु भो! वीरा समिता सहिता सदा जया संघडदंसिणो आतोवरया अहातहा लोयं उवेहमाणा पाईणं पडीणं दाहिणं उदीणं इति सच्चंसि परिचिद्धिंसु, साहिस्सामो नाणं वीराणं समिताणं सहिताणं सदा जयाणं संघडदंसिणं आतोवरयाणं अहा-तहा लोगं उवेहमाणाणं किमत्थि उवाधी पासगस्स ? न विज्जति ? नत्थि, त्तिबेमि ।

चउत्थे अज्झयणे चउत्थो उद्देसो समत्तो

मुनि दीपरत्नसागरेण संशोधितः सम्पादितश्च चउत्थं अज्झयणं समत्तं

सुयक्खंधो-१, अज्झयणं-५, उद्देसो-१

० पंचमं अज्झयणं - लोगसारो ०

० पढमो - उद्देसो ०

[१५४] आवंती केआवंति लोयंसि विप्परामुसंति अट्ठाए अणट्ठाए वा, एएसु चेव विप्परा-मुसंति गुरु से कामा तओ से मारस्स अंतो, जओ से मारस्स अंतो, तओ से दूरे, नेव से अंतो नेव से दूरे।

[१५५] से पासति फुसियमिव कुसग्गे पणुन्नं निवतितं वातेरितं, एवं बालस्स जीवियं मंदस्स अविजाणओ, कूराणि कम्माइं बाले पकुव्वमाणे तेण दुक्खेण मूढे विप्परियासमुवेइ, मोहेण गब्भं मरणाति एति, एत्थ मोहे पुणो-पुणो ।

[१५६] संसयं परिजाणतो संसारे परिण्णाते भवति, संसयं अपरिजाणतो संसारे अपरिण्णाते भवति ।

[१५७] जे छेए से सागारियं न सेवए, कट्ठु एवं अविजाणओ बितिया मंदस्स बालया [पा० जे खलु विसए सेवइ सेवित्ता वा नालोएइ, परेण वा पुट्ठो निण्हवइ, अहवा तं परं सएण वा दोसेण पाविट्ठयरेण वा दोसेणं उवलंपिज्जत्ति] लद्धा हुरत्था पडिलेहाए, आगमित्ता आणविज्जा अनासेवणयाए - त्तिबेमि ।

[१५८] पासह एगे रुवेसु गिद्धे परिणिज्जमाणे एत्थ फासे पुणो-पुणो आवंती केआवंती लोयंसि आरंभजीवी, एएसु चेव आरंभजीवी, एत्थ वि बाले परिपच्चमाणे रमति पावेहिं कम्मेहिं असरणे सरणं ति मन्नमाणे, इहमेगेसिं एगचरिया भवति- से बहुकोहे बहुमाने बहुमाए बहुलोए बहुए बहुनडे बहुसडे बहुसंकप्पे आसवसत्ती पलिउच्छन्ने उट्ठियवायं पवयमाणे मा मे केइ अदक्खू, अन्नाण-पमाय-दोसेणं सययं मूढे धम्मं नाभिजाणइ, अट्ठा पया माणव ! कम्मकोविया, जे अनुवरया अविज्जाए पलिमोक्खमाहु आवट्ठं एव अनुपरियट्ठंति, त्तिबेमि ।

पंचमे अज्झयणे पढमो उद्देसो समत्तो

० बीओ - उद्देसो ०

[१५९] आवंती केआवंती लोयंसि अनारंभजीविणो तेसु, एत्थोवरए तं झोसमाणे, अयं संधीति अदक्खु, जे इमस्स विग्गहस्स अयं खणेत्ति मन्नेसी, एस मग्गे आरिएहिं पवेदिते, उट्ठिए नो पमायए, जाणित्तु दुक्खं पत्तेयं सायं, पुट्ठोछंदा इह मानवा, पुट्ठो दुक्खं पवेदितं, से अविहिंसमाणे अणवयमाणे, पुट्ठो फासे विप्पणोण्णए ।

[१६०] एस समिया-परियाए वियाहिते जे असत्ता पावेहिं कम्महिं, उदाहु ते आयंका फुसंति, इति उदाहु धीरे ते फास पुढो अहियासए, से पुव्विं पेयं पच्छा पेयं भेउर-धम्मं विद्धंसण-धम्मं अधुवं अनितियं असासयं चयावचइयं विपरिणाम-धम्मं पासह एयं रुवं संधिं ।

[१६१] समुप्पेहमाणस्स एगायतण-रयस्स इह विप्पमुक्कस्स नत्थि मग्गे विरयस्स, त्तिबेमि ।

[१६२] आवंती केआवंती लोगंसि परिग्गहावंती - से अप्पं वा बहुं वा अणुं वा थूलं वा चित्तमंतं वा अचित्तमंतं वा एतेसु चेव परिग्गहावंती, एतदेवेगेसिं महब्भयं भवति लोगवित्तं च णं उवेहाए सुयक्खंधो-१, अज्झयणं-५, उद्देसो-३

एए संगे अविजाणतो ।

[१६३] से सुपडिबद्धं सूवणीयं ति नच्चा पुरिसा परमचक्खू विपरक्कमा एतेसु चेव बंभचेरं, से सुयं च मे अज्झत्थियं च मे बंध-पमोक्खो, अज्झत्थेव एत्थ विरते अनगारे दीहरायं तितिक्खए, पमत्ते बहिया पास अप्पमत्तो परिव्वए, एयं मोनं सम्मं अनुवासिज्जासि - त्तिबेमि ।

पंचमे अज्झयणे बीओ उद्देसो समत्तो

० तईओ - उद्देसो ०

[१६४] आवंती केआवंती लोयंसि अपरिग्गहावंती, एएसु चेव अपरिग्गहावंती सोच्चा वई मेहावी पंडियाण निसामिया समियाए धम्मं आरिएहिं पवेदिते जहेत्थ मए संधी झोसिए एवमण्णत्थ संधी दुज्झोसिए भवति तम्हा बेमि नो निहेज्ज वीरियं ।

[१६५] जे पुव्वुड्डाई नो पच्छानिवाई, जे पुव्वुड्डाई पच्छानिवाई, जे नो पुव्वुड्डाई नो पच्छा-निवाई, सेऽवि तारिए सिया जे परिणाय लोगमन्नेसयंति ।

[१६६] एयं नियाय मुणिणा पवेदितं- इह आणाकंखी पंडिए, अनिहे, पुव्वावरायं जयमाणे सया सीलं सुपेहाए, सुणिया भवे अकामे अझंझे, इमेणं चेव जुज्झाहि किं ते जुज्झेण बज्झओ ? ।

[१६७] जुद्धारिहं खलु दुल्लहं जहेत्थ कुसलेहिं परिण्णा-विवेगे भासिए, चुए हु बाले गब्भाइएसु रज्जइ, अस्सिं चेयं पव्वुच्चति रुवंसि वा छणंसि वा, से हु एगे संविद्धपहे मुनि अन्नहा लोगं उवेहमाणे, इति कम्मं परिण्णाय सव्वसो से न हिंसति संजमति नो पगब्भति उवेहमाणो पत्तेयं सायं, वण्णाएसी नारभे कंचनं सव्वलोए, एगप्पमुहे विदिसप्पइण्णे निव्विण्णचारी अरए पयासु ।

[१६८] से वसुमं सव्व-समन्नागय-पन्नाणेणं अप्पाणेणं अकरणिज्जं पावकम्मं तं नो अन्नेसिं, जं सम्मं ति पासहा तं मोणं ति पासहा, जं मोणं ति पासहा तं सम्मं ति पासहा, न इमं सक्कं सिदिलेहिं अदिज्जमाणेहिं गुणासाएहिं वंक्समायारेहिं पमत्तेहिं गारमावसंतेहिं, मुनी मोनं समायाए धुणे कम्म-सरीरगं, पंतं लूहं सेवंति वीरा समत्तदंसिणो, एस ओहंतरे मुनी तिण्णे मुत्ते विरए वियाहिए - त्तिबेमि ।

पंचमे अज्झयणे तईओ उद्देसो समत्तो

० चउत्थो - उद्देसो ०

[१६९] गामाणुगामं दूज्जमाणस्स दुज्जातं दुप्परक्कतं भवति अवियत्तस्स भिक्खुणो ।

[१७०] वयसा वि एगे बुइया कुप्पंति माणवा, उन्नयमाणे य नरे महता मोहेण मुज्झति, संबाहा बहवे भुज्जो-भुज्जो दुरतिक्कमा अजाणतो अपासतो, एयं ते मा होउ एयं कुसलस्स दंसणं, तदिद्वीए

तम्मोत्तीए तप्पुरक्कारे तस्सण्णी तन्नवेसणे जयं विहारी चित्तनिवाती पंथनिज्झाती, पलीबाहरे पासिय पाणे गच्छेज्जा ।

[१७१] से अभिक्कममाणे पडिक्कममाणे संकुचेमाणे पसारेमाणे विणिवट्टमाणे संपलिज्जमाणे एगया गुणसमियस्स रीयतो कायसंफासं समणुचिण्णा एगतिया पाणा उद्दायंति इहलोग-वेयण वेज्जावडियं, जं आउट्टिकयं कम्मं तं परिण्णाए विवेगमेति, एवं से अप्पमाणं विवेगं किट्ठति वेयवी ।

[१७२] से पभूयदंसी पभूयपरिन्नाणे उवसंते समिए सहिते सया जए दट्ठुं विप्पडिवेदेति अप्पाणं, किमेस जणो करिस्सति ? एस से परमारामो जाओ लोगंमि इत्थीओ, मुणिणा हु एतं पवेदितं सुयक्खंधो-१, अज्झयणं-५, उद्देसो-४

उब्बाहिज्जमाणे गामधम्महिं- अवि निब्बलासए अवि ओमोयरियं कुज्जा अवि उड्ढं ठाणं ठाज्जा अवि गामाणुगामं दूइज्जेज्जा अवि आहारं वोच्छिंदेज्जा, अवि चए इत्थीसु मण्णं, पुव्वं दंडा पच्छा फासा पुव्वं फासा पच्छा दंडा, इच्चेते कलहा संगकरा भवंति, पडिलेहाए आगमेत्ता आणवेज्जा अनासेवणाए । त्तिबेमि से नो काहिए नो पासणिए नो संपसारणिए नो मामए नो कयकिरिए वइगुत्ते अज्झप्पसंवुडे परिवज्जए सदा पावं, एतं मोणं समणुवासिज्जासि। - त्तिबेमि ।

पंचमे अज्झयणे चउत्थो उद्देसो समत्तो

० पंचमो-उद्देसो ०

[१७३] से बेमि - तं जहा अवि हरए पडिपुण्णे चिट्ठइ समंसि भोमे उवसंतरए सारक्खमाणे, से चिट्ठति सोयमज्झगए, से पास सव्वतो गुत्ते, पास लोए महेसिणो जे य पण्णाणमंता पबुद्धा आरंभोवरया, सम्ममेयंति पासह, कालस्स कंखाए परिव्वयंति, त्तिबेमि ।

[१७४] वितिगिच्छ समावन्नेणं अप्पाणेणं नो लभति समाधिं, सिया वेगे अनुगच्छंति, असिया वेगे अनुगच्छंति, अनुगच्छमाणेहिं अननुगच्छमाणे कहं न निव्विज्जे ? ।

[१७५] तमेव सच्चं नीसकं जं जिणेहिं पवेइयं ।

[१७६] सड्ढिस्स णं समणुणस्स संपव्वयमाणस्स:- समियंति मन्नमाणस्स एगया समिया होइ, समियंति मन्नमाणस्स एगया असमिया होइ, असमियंति मन्नमाणस्स एगया असमिया होइ, असमियंति मन्नमाणस्स एगया असमिया होइ, समियंति मन्नमाणस्स समिया वा असमिया वा समिया होइ उवेहाए, असमियंति मन्नमाणस्स समिया वा असमिया वा असमिया होइ उवेहाए, उवेहमाणो अणुवेहमाणं बूया उवेहाहि समियाए इच्चेवं तत्थ संधी झोसितो भवति, उट्ठियस्स ठियस्स गतिं समनुपासह, एत्थवि बालभावे अप्पाणं नो उवदंसेज्जा ।

[१७७] तुमंसि नाम सच्चेव जं हंतव्वं ति मन्नसि, तुमंसि नाम सच्चेव जं अज्जावेयव्वं ति मन्नसि, तुमंसि नाम सच्चेव जं परितावेयव्वं ति मन्नसि, तुमंसि नाम सच्चेव जं परिघेतव्वं ति मन्नसि, तुमंसि नाम सच्चेव जं उद्वेयव्वं ति मन्नसि, अंजू चेय पडिबुद्ध-जीवी तम्हा न हंता न वि घायए अणुसंवेयणमप्पाणेणं जं हंतव्वं ति नाभिपत्थए ।

[१७८] जे आया से विण्णाया जे विण्णाया से आया, जेण विजाणति से आया, तं पडुच्च पडिसंखाए एस आयावादी समियाए- परियाए वियाहिते, त्तिबेमि ।

पंचमे अज्झयणे पंचमो उद्देसो समत्तो

० छट्ठो - उद्देसो ०

[१७९] अणाणाए एगे सोवट्टाणा आणाए एगे निरुवट्टाणा एतं ते मा होउ एयं कुसलस्स दंसणं तद्धिट्ठीए तम्ममुत्तीए तप्पुरक्कारे तरसण्णी तन्निवेसणे ।

[१८०] अभिभूय अदक्खू, अणभिभूते पभू निरालंबणयाए, जे महं अबहिमणे पवाएणं पवायं जाणेज्जा सहसंमइयाए परवागरणेणं अन्नेसिं वा अंतिए सोच्चा ।

[१८१] निद्वेसं नातिवट्टेज्जा मेहावी सुपडिलेहिया सव्वतो सव्वप्पणा सम्मं समभिण्णाय, इहारामं परिण्णाय अल्लीणगुत्तो आरामो परिव्वए, निद्वियट्ठी वीरे आगमेण सदा परक्कमेज्जासि, त्तिबेमि

[१८२] उड्डं सोता अहे सोता, तिरियं सोता वियाहिया ।

सुयक्खंधो-१, अज्झयणं-५, उद्देसो-६

एते सोया वियक्खाया, जेहिं संगति पासहा ॥

[१८३] आवट्टं तुं उवेहाए एत्थ विरमेज्ज, वेयवी, विणएत्तु सोयं, निक्खम्म एस महं अकम्मा जाणति पासति पडिलेहाए नावकंखति इह आगतिं गतिं परिण्णाय ।

[१८४] अच्चेइ जाई-मरणस्स वट्टमगं विक्खाय-रए, सव्वे सरा नियट्ठंति तक्का जत्थ न विज्जइ, मई तत्थ न गाहिया, ओए अप्पतिट्ठाणस्स खेयन्ने, से न दीहे न हस्से न वट्टे न तंसे न चउरंसे न परिमंडले, न किण्हे न नीले न लोहिए न हालिद्वे न सुक्किल्ले, न सुरभिगंधे न दुरभिगंधे, न तित्ते न कडुए न कसाए न अंबिले न महुरे, न कक्खडे न मउए न गरुए न लहुए न सीए न उण्हे न णिद्वे न लुक्खे न काऊ न रुहे, न संगे न इत्थी न पुरिसे न अन्नहा, परिण्णे सण्णे उवमा न विज्जए, अरुवी सत्ता, अपयस्स पयं नत्थि ।

[१८५] से न सद्धे न रुवे न गंधे न रसे न फासे इच्चेव, त्तिबेमि ।

• पंचमे अज्झयणे छट्ठो उद्देसो समत्तो - पंचमं अज्झयणं समत्तं •

मुनि दीपरत्नसागरेण संशोधितः सम्पादितश्च चउत्थं अज्झयणं समत्तं

छट्ठं अज्झयणं - धुयं

• पढमो - उद्देसो •

[१८६] ओबुज्झमाणे इह माणवेसु आघाइ से नरे, जस्सिमाओ जाइओ सव्वओ सुपडिलेहियाओ भवन्ति, आघाइ से नाणमनेलिसं, से किट्ठति तेसिं समुट्ठियाणं निक्खित्तदंडाणं समाहियाणं पण्णाणमंताणं इह मुत्तिमगं एवं एगे महावीरा विप्परक्कमंति, पासह एगे अवसीयमाणे अणत्तपण्णे,

से बेमि- से जहा वि कुम्मे हरए विनिविट्ठचित्ते पच्छन्नपलासे उम्मगं से नो लहइ भंजगा इव सन्निवेसं, नो चयंति एवं एगे अनेगरुवेहिं कुलेहिं जाया रुवेहिं सत्ता कलुणं थणंति, नियाणाओ ते न लभंति मोक्खं, अह पास तेहिं- कुलेहिं आयत्ताए जाया ।

[१८७] गंडी अदुवा कोढी, रायंसी अवमारियं ।
काणियं झिमियं चेव, कुणियं खुज्जियं तहा ॥

[१८८] उदरिं पास मूयं च, सूणिअं च गिलासिणिं ।
वेवइं पीढसप्पिं च, सिलिवयं महुमेहणिं ॥

[१८९] सोलस एते रोगा, अक्खाया अणुपुव्वसो ।
अह णं फुसंति आयंका, फासा य असमंजसा ॥

[१९०] मरणं तेसिं संपेहाए उववायं चयणं च नच्चा। परियागं च संपेहाए । तं सुणेह जहा तहा संति पाणा अंधा तमंसि वियाहिया तामेव सइं असइं अतिअच्च उच्चावयफासे पडिसंवेदेंति, बुद्धेहिं एयं पवेदितं संति पाणा वासगा रसगा उदए उदयचरा आगासगामिणो, पाणा पाणे किलेसंति, पास लोए महब्भयं ।

[१९१] बहुदुक्खा हु जंतवो, सत्ता कामेसु माणवा, अबलेण वहं गच्छंति सरीरेण पभंगुरेण, अट्टे से बहुदुक्खे, इति बाले पगब्भइ, एते रोगे बहू नच्चा आउरा परितावए, नालं पास, अलं तवेएहिं, एयं पास मुनी ! महब्भयं नातिवाएज्ज कंचनं ।

सुयक्खंधो-१, अज्झयणं-६, उद्देसो-१

[१९२] आयाण भो, सुस्सूस, भो धूयवादं पवेदइस्सामि, इह खलु अत्तत्ताए तेहिं-तेहिं कुलेहिं अभिसेएण अभिसंभूता, अभिसंजाता अभिनिव्वट्ठा अभिसंवुड्ढा अभिसंबुद्धा अभिनिक्खंता अणुपुव्वेण ।

[१९३] महामुनी ! तं परक्कमंतं परिदेवमाणा मा चयाहि इति ते वदंति, छंदोवणीया अज्झोववन्ना अक्कंदकारी जणगा रुयंति। अतारिसे मुनी, नो ओहंतरए जणगा जेण विप्पजट्ठा, सरणं तत्थ नो समेति, किह नाम से तत्थ रमति ? एयं नाणं सया समणुवासिज्जासि - त्तिबेमि ।

छट्ठे अज्झयणे पढमो उद्देसो समत्तो

० बीओ - उद्देसो ०

[१९४] आतुरं लोयमायाए चइत्ता पुव्वसंजोगं हिच्चा उवसमं वसित्ता बंभचेरंसि वसु वा अनुवसु वा जाणित्तु धम्मं अहा तहा, अहेगे तमचाइ कुसीला ।

[१९५] वत्थं पडिग्गहं कंबलं पायपुंछणं विउसिज्जा, अनुपुव्वेण अणहियासेमाणा परीसहे दुरहियासए, कामे ममायमाणस्स इयाणिं वा मुहुत्तेण वा अपरिमाणाए भेदे, एवं से अंतराइएहिं कामेहिं आकेवलिएहिं, अवितिण्णा चेए ।

[१९६] अहेगे धम्ममादाय आयाणप्पभिइसु पणिहिए चरे अप्पलीयमाणे दढे सव्वं गेहिं परिण्णाय, एस पणए महामुनी अइअच्च सव्वतो संगं, न महं अत्थित्ति इति एगो अहं, अस्सिं जयमाणे एत्थ विरते अनगारे सव्वओ मुंडे रीयंते जे अचेले परिवुसिए संचिक्खति ओमोयरियाए, से अक्कुट्ठे वा हए वा लूसिए वा पलियं पगंथे अदुवा पगंथे अतहेहिं सद्ध-फासेहिं, इति संखाए एगतरे अन्नयरे अभिण्णाय तितिक्खमाणे परिव्वए, जे य हिरी जे य अहिरीमणा ।

[१९७] चिच्चा सव्वं विसोत्तियं फासे समियदंसणे, एते भो नगिना वुत्ता जे लोगंसि अनागमनधम्मिणो आणाए मामगं धम्मं, एस उत्तरवादे इह माणवाणं वियाहिते, एत्थोवरए तं झोसमाणे आयाणिज्जं परिण्णाय परियाएण विगिंचइ, इहमेगेसिं एगचरिया होति तत्थियराइयरेहिं कुलेहिं सुद्धेसणाए सव्वेसणाए से मेहावी परिव्वए सुब्भिं अदुवा दुब्भिं, अदुवा तत्थ भेरवा पाणा पाणे किलेसंति, ते फासे पुट्ठो धीरो अहियासेज्जासि। - त्ति बेमि ।

छट्ठे अज्झयणे बीओ उद्देसो समत्तो

० तइओ - उद्देसो ०

[१९८] एयं खु मुनी आयाणं सया सुअक्खायधम्ममे विधूतकप्पे निज्झोसइत्ता जे अचेले परिवुसिए तस्स णं भिक्खुस्स नो एवं भवइ परिजुण्णे मे वत्थे वत्थं जाइस्सामि सुत्तं जाइस्सामि सूइं

जाइस्सामि संधिस्सामि सीवीस्सामि उक्कसिस्सामि वोक्कसिस्सामि परिहिस्सामि पाउणिस्सामि, अदुवा तत्थ परक्कमंतं भुज्जो अचेलं तणफासा फुसंति सीयफासा फुसंति तेउफासा फुसंति दंसमसगफासा फुसंति एगयरे अन्नयरे विरुवरुवे फासे अहियासेति अचेले लाघवं आगममाणे तवे से अभिसमन्नागए भवति जहेयं भगवता पवेदितं तमेव अभिसमेच्चा सव्वतो सव्वत्ताए संमत्तमेव समभिजाणिया, एवं तेषिं महावीराणं चिरराइं पुव्वाइं वासाणि रीयमाणानं दवियाणं पास अहियासियं ।

[१९९] आगयपण्णाणाणं किंसा बाहवो भवन्ति पयणुए य मंससोणिए विस्सेणिं कट्टु परिण्णाए, एस तिण्णे मुत्ते विरए वियाहिए, त्तिबेमि ।

[२००] विरयं भिक्खुं रीयंतं चिररातोसियं अरती तत्थ किं विधारए ? संघेमाणे समुट्टिए, सुयक्खंधो-१, अज्झयणं-६, उद्देसो-३

जहा से दीवे असंदीणे एवं से धम्मे आयरिय-पदेसिए ते अणवकंखमाणा पाणे अणतिवाएमाणा जइया मेहाविणो पंडिया, एवं तेषिं भगवओ अणुट्ठाणे जहा से दियापोए एवं ते सिस्सा दिया य राओ य अनु-पुव्वेण वाइय - त्तिबेमि ।

छट्ठे अज्झयणे तइओ उद्देसो समत्तो

० चउत्थो - उद्देसो ०

[२०१] एवं ते सिस्सा दिया य राओ य अनुपुव्वेण वाइया तेहिं महावीरेहिं पण्णाणमंतेहिं, तेसिमंतिए पण्णाणमुवलब्भ हिच्चा उवसमं फारुसियं समादियंति वसित्ता बंभचेरंसि आणं तं नो त्ति मन्नमाणा, अग्घायं तु सोच्चा निसम्म समणुण्णा जीविस्सामो, एगे निक्खंमते असंभवन्ता विडज्झमाणा कामेहिं गिद्धा अज्झोववन्ना समाहिमाघायम झोसयन्ता सत्थारमेव फरुसं वदन्ति ।

[२०२] सीलमंता उपवसन्ता संखाए रीयमाणा, असीला अनुवयमाणा बितिया मंदस्स बालया

[२०३] नियट्टमाणा वेगे आया-गोयरमाइक्खंति, नाणभट्ठा दंसणलूसिणो ।

[२०४] नममाणा वेगे जीवितं विप्परिणामेति, पुट्ठा वेगे नियट्ठंति जीवियस्सेव कारणा, निक्खंतं पि तेषिं दुन्निक्खंतं भवति, बालवयणिज्जा हु ते नरा पुणो-पुणो जातिं पक्कप्पेति, अहे संभवन्ता विट्ठायमाणा अहमंसीति विउक्कसे उदासीने फरुसं वदन्ति, पलियं पगंथे अदुवा पगंथे अतहेहिं, तं वा मेहावी जाणिज्जा धम्मं ।

[२०५] अहम्मट्ठी तुमंसि नाम बाले आरंभट्ठी अनुवयमाणे हणमाणे घायमाणे हणओ यावि समणुजाणमाणे, घोरे घम्मे, उदीरिए उवेहइ णं अणाणाए, एस विसण्णे वितद्दे वियाहिते, त्तिबेमि ।

[२०६] किमनेन भो जणेण करिस्सामित्ति मन्नमाणा- एवं एगे वइत्ता मातरं पितरं हिच्चा नातओ य परिग्गहं वीरायमाणा समुट्ठाए अविहिंसा सुव्वया दन्ता, अहेगे पस्स दीणे उप्पइए पडिवयमाणे, वसट्ठा कायरा जना लूसगा भवन्ति, अहमेगेसिं सिलोए पावए भवइ, से समणो भवित्ता विब्भन्ते विब्भन्ते पासहेगे समन्नागएहिं सहअसमन्नागए नममाणेहिं अनममाणे विरतेहिं अविरते दविएहिं अदविए, अभिसमेच्चा पंडिए मेहावी निट्ठियट्ठे वीरे आगमेणं सया परक्कमेज्जासि, त्तिबेमि ।

छट्ठे अज्झयणे चउत्थो उद्देसो समत्तो

० पंचमो - उद्देसो ०

[२०७] से गिहेसु वा गिहंतरेसु वा गामेसु वा गामंतरेसु वा नगरेसु वा नगरंतरेसु वा जनवएसु वा जनवयंतरेसु वा गामनयरंतरे वा गामजनवयंतरे वा नगरजनवयंतरे वा संतेगइया जना लूसगा

भवन्ति अदुवा फासा फुसन्ति ते फासे पुटो वीरो अहियासए, ओए समियदंसणे, दयं लोगस्स जाणित्ता पाईणं पडीणं उदीणं आइक्खे, विभए किट्टे वेयवी,

जे खलु समणे बहुस्सुए बज्झागमे आहरणहेउकुसले धम्मकहालद्विसंपन्ने खेत्तं कालं पुरिसं समासज्ज केऽयं पुरिसे ? कं वा नए ? से उट्ठिएसु वा अनुट्ठिएसु वा सुस्सूसमाणेसु पवेदए-सन्ति विरतिं उवसमं निव्वाणं सोयवियं अज्जवियं मद्दवियं लाघवियं. अणइवत्तियं सव्वेसिं पाणाणं सव्वेसिं भूयाणं सव्वेसिं जीवाणं सव्वेसिं सत्ताणं अनुवीइ भिक्खू घम्ममाइक्खेज्जा ।

[२०८] अनुवीइ भिक्खू घम्ममाइक्खमाणे नो अत्ताणं आसाएज्जा नो परं आसाएज्जा नो अन्नाइं पाणाइं भूयाइं सत्ताइं आसाएज्जा, से अनासादए अनासादमाणे वज्झमाणे पाणाणं भूयाणं सुयक्खंधो-१, अज्झयणं-६, उट्ठेसो-५

जीवाणं सत्ताणं जहा से दीवे असंदीणे एवं से भवइ सरणं महामुनी, एवं से उट्ठिए ठियप्पा अनिहे अचले चले अबहिलेस्से परिव्वए, संखाय पेसलं धम्मं दिट्ठिमं परिनिव्वुडे, तम्हा संगं ति पासह, गंधेहिं गढिया नरा विसण्णा कामविप्पिया, तम्हा लूहाओ नो परिवित्तसेज्जा, जस्सिमे आरंभा सव्वतो सव्वत्ताए सुपरिण्णाया भवन्ति, जेसिमे लूसिणो नो परिवित्तसन्ति, से वंता कोहं च मानं च मायं च लोभं च एस तुट्ठे वियाहिते, त्तिबेमि ।

[२०९] कायस्स वियावाए एस संगामसीसे वियाहिए, से हु पारंगमे मुनी अवि हम्ममाणे फलगावयट्ठि कालोवणीते कंखेज्ज कालं जाव सरीरभेउ - त्तिबेमि ।

छट्ठे अज्झयणे पंचमो उट्ठेसो समत्तो

मुनि दीपरत्नसागरेण संशोधितः सम्पादितश्च छट्ठं अज्झयणं समत्तं

◦ सत्तमं अज्झयणं - विवन्नं ◦

अट्ठमं अज्झयणं - विमोक्खो

◦ पढमो - उट्ठेसो ◦

[२१०] से बेमि-समणुण्णस्स वा असमणुण्णस्स वा असनं वा पानं वा खाइमं वा साइमं वा वत्थं वा पडिग्गहं वा कंबलं वा पायपुंछणं वा नो पाएज्जा नो निमंतेज्जा नो कुज्जा वेयावडियं- परं आढायमाणे, त्तिबेमि ।

[२११] धुवं चेयं जाणेज्जा - असनं वा पानं वा खाइमं वा साइमं वा वत्थं वा पडिग्गहं वा पायपुंछणं वा लभिया नो लभिया भुंजिया नो भुंजिया पंथं विउत्ता विउक्कम्म विभत्तं धम्मं झोसेमाणे समेमाणे चलेमाणे पलेमाणे पाएज्जा वा निमंतेज्ज वा कुज्जा वेयावडियं परं अनाढायमाणे, त्तिबेमि ।

[२१२] इहमेगेसिं आयार-गोयरे नो सुनिसंते भवति ते इह आरंभट्ठी अनुवयमाणा हणमाणा घायमाणा हणतो यावि समणुजाणमाणा अदुवा अदिन्नमाइयन्ति अदुवा वायाओ विउंजति तं जहा- अत्थि लोए नत्थि लोए धुवे लोए अधुवे लोए साइए लोए अनइए लोए सपज्जवसिते लोए अपज्जवसिते लोए सुकडेत्ति वा दुक्कडेत्ति वा कल्लाणेत्ति वा पावेत्ति वा साहुत्ति वा असाहुत्ति वा सिद्धीत्ति वा असिद्धीत्ति वा निरएत्ति वा अनिरएत्ति वा जमिणं विप्पडिवण्णा मामगं धम्मं पन्नवेमाणा एत्थवि जाणह अकस्मात् एवं तेसिं नो सुअक्खाए धम्मे नो सुपन्नत्ते धम्मे भवति ।

[२१३] से जहेयं भगवया पवेदितं आसुपन्नेण जाणया पासया अदुवा गुत्ती वओगोयरस्स, त्तिबेमि । सव्वत्थं संमयं पावं तमेव उवाइक्कम्म एस महं विवेगे वियाहिते, गामे वा अदुवा रण्णे नेव गामे नेव रण्णे घम्ममायाणेह- पवेदितं माहणेण मईमया, जामा तिन्नि उदाहिया जेसु इमे आयरिया संबुज्झमाणा समुद्धिया, जे निव्वुया पावेहिं कम्मेहिं अनियाणा ते वियाहिया ।

[२१४] उड्ढं अहं तिरयं दिसासु सव्वतो सव्वावंति च णं पाडियक्कं जीवेहिं कम्मसमारंभेणं तं परिन्नाय मेहावी नेव सयं एतेहिं काएहिं दंडं समारंभेज्जा नेवऽन्नेहिं एतेहिं काएहिं दंडं समारंभावेज्जा नेवऽन्ने एतेहिं काएहिं दंडं समारंभंते वि समणुजाणेज्जा, जेऽवन्ने एतेहिं काएहिं दंडं समारंभंति तेसिं पि वयं लज्जामो, तं परिणाय मेहावी तं वा दंडं अन्नं वा दंडं नो दंडभी दंडं समारंभेज्जासि - त्तिबेमि ।

अद्वमे अज्झयणे पदमो उद्देसो सम्मत्तो

सुयक्खंधो-१, अज्झयणं-८, उद्देसो-२

० बीओ - उद्देसो ०

[२१५] से भिक्खू परक्कमेज्ज वा चिट्ठेज्ज वा निसीएज्ज वा तुयट्ठेज्ज वा सुसाणंसि वा सुन्नागरंसि वा गिरिगुहंसि वा रुक्खमूलंसि वा कुंभारायतणंसि वा हुरत्था वा कहिंचि विहरमाणं तं भिक्खुं उवसंकमित्तुं गाहावती बूया आउसंतो समणा ! अहं खलु तव अट्ठाए असनं वा पानं वा खाइमं वा साइमं वा वत्थं वा पडिग्गहं वा कंबलं वा पायपुंछणं वा पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्छेज्जं अनिसट्ठं अभिहडं आहट्टु चेतेमि आवसहं वा समुस्सिणोमि से भुंजह वसह आउसंतो समणा ! भिक्खू तं गाहावति समणसं सवयसं पडियाइक्खे-आउसंतो ! गाहावती नो खलु ते वयणं आढामि नो खलु ते वयणं परिजाणामि जो तुमं मम अट्ठाए असनं वा पानं वा खाइमं वा साइमं वा वत्थं वा पडिग्गहं वा कंबलं वा पायपुंछणं वा पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्छेज्जं अनिसट्ठं अभिहडं आहट्टु चेएसि आवसहं वा समुस्सिणासि, से विरतो आउसो गाहावती! एयस्स अकरणाए ।

[२१६] से भिक्खू परक्कमेज्ज वा [चिट्ठेज्ज वा निसीएज्ज वा तुयट्ठेज्ज वा सुसाणंसि वा जाव हुरत्था वा कहिंचि विहरमाणं तं भिक्खुं उवसंकमित्तुं गाहावती आयगयाए पेहाए असनं वा पानं वा खाइमं वा साइमं वा वत्थं वा पडिग्गहं वा कंबलं वा पायपुंछणं वा जाव चेएइ आवसहं वा समुस्सिणाति तं भिक्खू परिघासेउं, तं च भिक्खू जाणेज्जा- सहसंमइयाए परवागरणेणं अन्नेसिं वा अंतिए सोच्चा अयं खलु गाहावई मम अट्ठाए असनं वा पानं वा आवसहं वा समुस्सिणाति, तं च भिक्खू पडिलेहाए आगमेत्ता आणवेज्जा अनासेवणाए, त्तिबेमि ।

[२१७] भिक्खू च खलु पुट्ठा वा अपुट्ठा वा जे इमे आहच्च गंथा फुसंति से हंता हणह खणह छिंदह दहह पचह आलुं पह विलुं पह सहसाकारेह विप्परामुसह, ते फासे धीरे पुट्ठो अहियासए अदुवा आया- गोयरमाइक्खे तक्किया नमणेलिसं अदुवा वइगुत्तीए अनुपुव्वेण सम्मं पडिलेहाए आयतगुत्ते बुद्धेहिं एयं पवेदितं ।

[२१८] से समणुन्ने असमणुन्नस्स असनं वा पानं वा खाइमं वा साइमं वा वत्थं वा पडिग्गहं वा कंबलं वा पायपुंछणं वा नो पाएज्जा नो निमंतेज्जा नो कुज्जा वेयावाडियं परं आढायमाणे, त्ति बेमि ।

[२१९] घम्ममायाणह पवेइयं माहणेण मतिमया समणुण्णे समणुण्णस्स असनं वा जाव कुज्जा वेयावडियं परं आढायमाणे - त्तिबेमि ।

अद्धमे अज्झयणे बीओ उद्देसो समत्तो

◦ तइओ - उद्देसो ◦

[२२०] मज्झिमेणं वयसा वि एगे संबुज्झमाणा समुद्धिता, सोच्चा मेहावी पंडियाणं निसामिया समियाए घम्मे आरिएहिं पवेदिते, ते अनवकंखमाणा अनतिवाएमाणा अपरिग्गहमाणा नो परिग्गहावंती सच्चावंती च णं लोगंसि निहाय दंडं पाणेहिं पावं कम्मं अकुच्चमाणे एस महं अगंथे वियाहिए ओए जुतिमस्स खेयण्णे उववायं चवणं च नच्चा ।

[२२१] आहारोवचया देहा परिसह-पभंगुरा पासहेगे सत्विंदिएहिं परिगिलायमाणेहिं ।
सुयक्खंधो-१, अज्झयणं-८, उद्देसो-३

[२२२] ओए दयं दयइ, जे सन्निहाण-सत्थस्स खेयण्णे, से भिक्खू कालण्णे बलण्णे मायण्णे खणण्णे विणयण्णे समयण्णे परिग्गहं अममायमाणे कालेणुद्धाई अपडिण्णे दुहओ छेत्ता नियाइ ।

[२२३] तं भिक्खुं सीयफास-परिवेवमाणगायं उवसंकमित्तुं गाहावई बूया- आउसंतो समणा! नो खलु ते गामधम्मा उब्बाहंति ? आउसंतो गाहावई! नो खलु मम गामधम्मा उब्बाहंति, सीयफासं च नो खलु अहं संचाएमि अहियासित्तए नो खलु मे कप्पति अगनिकायं उज्जालेत्तए वा पज्जालेत्तए वा कायं आयावेत्तए वा पयावेत्तए वा अन्नेसिं वा वयणाओ, सिया स एवं वदंतस्स परो अगनिकायं उज्जालेत्ता पज्जालेत्ता कायं आयावेज्ज वा पयावेज्ज वा तं च भिक्खू पडिलेहाए आगमेत्ता आणवेज्जा अनासेवणाए - त्तिबेमि ।

अद्धमे अज्झयणे तइओ उद्देसो समत्तो

◦ चउत्थो - उद्देसो ◦

[२२४] जे भिक्खू तिहिं वत्थेहिं परिवुसिते पायचउत्थेहिं तस्स णं नो एवं भवति- चउत्थं वत्थं जाइस्सामि, से अहेसणिज्जाइं वत्थाइं जाएज्जा अहापरिग्गहियाइं वत्थाइं धारेज्जा नो धोएज्जा नो रएज्जा नो घोय-रत्ताइं वत्थाइं धारेज्जा अपलिउंचमाणे गामंतरेसु ओमचेलिए एयं खु वत्थधारिस्स सामग्गियं ।

[२२५] अह पुण एवं जाणेज्जा उवाइक्कंते खलु हेमंते गिम्हे पडिवन्ने अहापरिजुण्णाइं वत्थाइं परिद्वेज्जा अदुवा संतरुत्तरे अदुवा एगसाडे अदुवा अचेले ।

[२२६] लाघवियं आगममाणे तवे से अभिसमन्नागए भवति ।

[२२७] जमेयं भगवया पवेदितं तमेव अभिसमेच्चा सच्चतो सच्चत्ताए समत्तमेव समभिजाणिज्जा ।

[२२८] जस्स णं भिक्खुस्स एवं भवति पुट्ठो खलु अहमंसि नालमहमंसि सीय-फासं अहियासित्तए से वसुमं सच्च-समन्नागय-पण्णाणेणं अप्पाणेणं केइ अकरणाए आउट्टे तवस्सिणो हु तं सेयं जमेगे विहमाइए, तत्थावि तस्स कालपरियाए से वि तत्थ विअंतिकारए, इच्चेतं विमोहायतणं हियं सुहं खमं निस्सेयसं आनुगामियं - त्तिबेमि ।

अद्धमे अज्झयणे चउत्थो उद्देसो समत्तो

० पंचमो - उद्देशो ०

[२२९] जे भिक्खू दोहिं वत्थेहिं परिवुसिते पायतइएहिं तस्स णं नो एवं भवति तइयं वत्थं जाइस्सामि, से अहेसणिज्जाइं वत्थाइं जाएज्जा जाव एयं खु तस्स भिक्खुस्स सामग्गियं अह पुण एवं जाणेज्जा उवाइक्कंते खलु हेमंते गिम्हे पडिवन्ने, अहापरिजुण्णाइं वत्थाइं परिद्वेज्जा, अहापरिजुण्णाइं वत्थाइं परिद्वेत्ता, अदुवा संतरुत्तरे, अदुवा ओमचले अदुवा एगसाडे अदुवा अचेले, लाधवियं आगममाणे तवे से अभिसमन्नागए भवति, जमेयं भगवता पवेदितं तमेव अभिसमेच्चा सव्वतो सव्वत्ताए समत्तमेव समभिजाणिया,

जस्स णं भिक्खुस्स एवं भवति - पुट्ठो अबलो अहमंसि नालमहमंसि गिहंतरसंकमणं भिक्खायरिय-गमणाए, से एवं वदंतस्स परो अभिहडं असनं वा पानं वा खाइमं वा साइमं वा आहट्टु दलएज्जा से पुव्वामेव आलोएज्जा आउसंतो ! गाहावती नो खलु मे कप्पइ अभिहडे असनं वा पानं खाइमं सुयक्खंधो-१, अज्झयणं-८, उद्देशो-५

वा साइमं वा भोत्तए वा पायए वा अन्ने वा एयप्पगारे ।

[२३०] जस्स णं भिक्खुस्स अयं पगप्पे अहं च खलु पडिण्णत्तो अपडिण्णत्तेहिं गिलाणो अगिलाणेहिं अभिकंख साहम्मिएहिं कीरमाणं वेयावडियं सातिज्जिस्सामि अहं वा वि खलु अपडिण्णत्तो पडिण्णत्तस्स अगिलाणो गिलाणस्स अभिकंख साहम्मिअस्स कुज्जा वेयावडियं करणाए आहट्टु पइण्णं आणक्खेस्सामि आहडं च सातिज्जिस्सामि आहट्टु पइण्णं आणक्खेस्सामि आहडं च नो सातिज्जिस्सामि, आहट्टु पइण्णं नो आणक्खेस्सामि आहडं च सातिज्जिस्सामि, आहट्टु पइण्णं नो आणक्खेस्सामि आहडं च नो सातिज्जिस्सामि, एवं से अहाकिट्ठियमेव धम्मं समहिजाणमाणे संते विरते सुसमाहितलेसे तत्थावि तस्स कालपरियाए, से तत्थ विअंतिकारए, इच्चेतं विमोहायतणं हियं सुहं खमं निस्सेयसं आनुगामियं - त्तिबेमि ।

अद्धमे अज्झयणे पंचमो उद्देशो समत्तो

० छट्ठो - उद्देशो ०

[२३१] जे भिक्खू एगेण वत्थेण परिवुसिते पायबिईएण तस्स नो एवं भवइ-बिइयं वत्थं जाइस्सामि, से अनेसणिज्जं वत्थं जाएज्जा अहापरिग्गहियं वत्थं धारेज्जा जाव हेमंते गिम्हे पडिवन्ने अहापरिजुण्णं वत्थं परिद्वेज्जा अहापरिजुण्णं वत्थं परिद्वेत्ता- अदुवा अचेले लाधवियं आगममाणे जाव समत्तमेव समभिजाणिया ।

[२३२] जस्स णं भिक्खुस्स एगे भवइ- एगो अहमंसि, न मे अत्थि कोइ, न याहमवि कस्सइ, एवं से एगागिणमेव अप्पाणं समभिजाणिज्जा, लाधवियं आगममाणे तवे से अभिसमन्नागए भवइ जाव समभिजाणिया ।

[२३३] से भिक्खू वा भिक्खुणी वा असनं वा पानं वा खाइमं वा साइमं वा आहारेमाणे नो वामाओ हणुयाओ दाहिणं हणुयं संचारेज्जा आसाएमाणे, दाहिणाओ वामं हणुयाओ वामं हणुयं नो संचारेज्जा आसाएमाणे, से अनासायमाणे लाधवियं आगममाणे तवे से अभिसमन्नागए भवइ, जमेयं भगवता पवेइयं तमेव अभिसमेच्चा सव्वतो सव्वत्ताए समत्तमेव समभिजाणिया ।

[२३४] जस्स णं भिक्खुस्स एवं भवति- से गिलामि च खलु अहं इमंसि समए इमं सरीरगं अनुपुव्वेण परिवहित्तए से आनुपुव्वेणं आहारं संवट्ठेज्जा, आनुपुव्वेणं आहारं संवट्ठेत्ता कसाए पयणुए किच्चा समाहियच्चे फलगावयट्ठी उट्ठाय भिक्खू अभिनिव्वुडच्चे ।

[२३५] अनुपविसित्ता गामं वा नगरं वा खेडं वा कब्बडं वा मडंबं वा पट्टणं वा दोणमुहं वा आगरं वा आसमं वा सन्निवेसं वा निगमं वा रायहाणिं वा तणाइं जाएज्जा, तणाइं जाएत्ता से तमायाए एगंतमवक्कमेज्जा एगंतमवक्कमेत्ता अप्पंडे अप्प-पाणे अप्प-बीए अप्प-हरिए अप्पोसे अप्पोदए अप्पुत्तिंगपणग-दग मट्ठिय-मक्कडासंताणए पडिलेहिय-पडिलेहिय पमज्जिय-पमज्जिय तणाइं संधरेज्जा तणाइं संधरेत्ता एत्थ वि समए इत्तरियं कुज्जा तं सच्चं सच्चावादी ओए तिण्णे छिन्न-कहंकहे आतीतट्ठे अनातीते चिच्चाण भेउरं कायं संविहूणिय विरुवरुवे परिसहोवसग्गे अस्सिं विस्संभइत्ता भेरवमनुचिण्णे, तत्थावि तस्स कालपरियाए जाव आनुगामियं - त्तिबेमि ।

अट्ठमे अज्झयणे छट्ठो उट्ठसो समत्तो

सुयक्खंधो-१, अज्झयणं-८, उट्ठसो-७

• सत्तमो - उट्ठसो •

[२३६] जे भिक्खू अचेले परिवुसिते तस्स णं भिक्खुस्स एवं भवति- चाएमि अहं तणफासं अहियासित्तए सीयफासं अहियासित्तए तेउफासं अहियासित्तए दंस-मसगफासं अहियासित्तए एगतरे अन्नतरे विरुवरुवे फासे अहियासित्तए हिरिपडिच्छादणं चऽहं नो संचाएमि अहियासित्तए एवं से कप्पति कडिबंधणं धारित्तए ।

[२३७] अदुवा तत्थ परक्कमंतं भुज्जो अचेलं तणफासा फुसंति सीयफासा फुसंति तेउफासा फुसंति दंस-मसगफासा फुसंति एगयरे अन्नयरे विरुवरुवे फासे अहियासेति अचेले लाधवियं आगममाणे तवे से अभिसमन्नागए जाव समत्तमेव समभिजाणिया ।

[२३८] जस्स णं भिक्खुस्स एवं भवति- अहं च खलु अन्नेसिं भिक्खूणं असनं वा पानं वा खाइमं वा साइमं वा आहट्टु दलइस्सामि आहडं च नो सातिज्जिस्सामि, जस्स णं भिक्खुस्स एवं भवति- अहं च खलु अन्नेसिं भिक्खूणं असनं वा पानं वा खाइमं वा साइमं वा आहट्टु दलइस्सामि आहडं च नो सातिज्जिस्सामि, जस्स णं भिक्खुस्स एवं भवति-अहं च खलु अन्नेसिं भिक्खूणं असनं वा पानं वा खाइमं वा साइमं वा आहट्टु नो दलइस्सामि आहडं च सातिज्जास्सामि ।

जस्स णं भिक्खुस्स एवं भवति- अहं खलु अन्नेसिं भिक्खूणं असनं वा पानं वा खाइमं वा साइमं वा आहट्टु नो दलइस्सामि आहडं च नो सातिज्जिस्सामि, अहं च खलु तेण अहाइरित्तेणं अहेसणिज्जेणं अहापरिग्गहिणं असणेण वा पाणेण वा खाइमेण वा साइमेण वा अभिकंख साहम्मियस्स कुज्जा वेयावडियं करणाए, अहं वावि तेन अहातिरित्तेणं अहेसणिज्जेण अहापरिग्गहिणं असणेण वा पाणेण वा खाइमेण वा साइमेण वा अभिकंख साहम्मिएहिं कीरमाणं वेयावडियं सातिज्जिस्सामि लाधवियं आगममाणे जाव समत्तमेव समभिजाणिया ।

[२३९] जस्स णं भिक्खुस्स एवं भवति- से गिलामि च खलु अहं इमंमि समए इमं सरीरगं अनुपुव्वेण परिवहित्तए से आनुपुव्वेणं आहारं संवट्ठेज्जा आनुपुव्वेणं आहारं संवट्ठेत्ता कसाए पयणुए किच्चा समाहिअच्चे फलगावयट्ठी उट्ठाय भिक्खू अभिनिव्वुडच्चे अनुपविसित्ता गामं वा जाव रायहाणिं वा

तणाइं जाएज्जा जाव संथरेत्ता एत्थ वि समए कायं च जोगं च इरियं च पच्चक्खाएज्जा तं सच्चं सच्चावादी ओए तिन्ने छिन्न-कहंकहे आतीतद्वे अनातीते चिच्चाण भेउरं कायं संविहूणिय विरुवरुवे परिसहोवसग्गे अस्सिं विस्सं भइत्ता भेरवमनुचिण्णे तत्थवि तस्स कालपरियाए, से तत्थ विअंतिकारए, इच्चेतं विमोहायतणं हियं सुहं खमं निस्सेयसं आनुगागामियं, - त्तिबेमि ।

अइमे अज्झयणे सत्तमो उद्देसो समत्तो

• अइमो - उद्देसो •

- [२४०] आनुपुव्वी-विमोहाइं, जाइं घीरा समासज्ज ।
वसुमंतो मइमंतो, सव्वं नच्चा अनेलिसं ॥
- [२४१] दुविहं पि विदित्ताणं, बुद्धा धम्मस्स पारगा ।
अनुपुव्वीए संखाए, आरंभाओ तिउट्ठति ॥
- [२४२] कसाए पयणुए किच्चा, अप्पाहारो तित्तिक्खए ।
अह भिक्खू गिलाएज्जा, आहारस्सेव अंतियं ॥

सुयक्खंधो-१, अज्झयणं-८, उद्देसो-८

- [२४३] जीवियं नाभिकंखेज्जा, मरणं नोवि पत्थए ।
दुहुतो वि न सज्जेज्जा, जीविते मरणे तहा ॥
- [२४४] मज्झत्थो निज्जरापेही, समाहिमनुपालए ।
अंतो बहिं विउसिज्ज, अज्झत्थं सुद्धमेसए ॥
- [२४५] जं किंचुवक्कमं जाणे, आउक्खेमस्स अप्पणो ।
तस्सेव अंतरद्धाए, खिप्पं सिक्खेज्ज पंडिए ॥
- [२४६] गामे वा अदुवा रण्णो, थंडिलं पडिलेहिया ।
अप्पपाणं तु विन्नाय, तणाइं संथरे मुनि ॥
- [२४७] अणाहारो तुअट्टेज्जा, पुट्ठो तत्थहियासए ।
नातिवेलं उवचरे, माणुस्सेहिं वि पुट्ठओ ॥
- [२४८] संसप्पगा य जे पाणा, जे य उड्ढमहेचरा ।
भुंजंति मंस-सोणियं, न छणे न पमज्जए ॥
- [२४९] पाणा देहं विहिंसंति, ठाणाओ न विउब्भमे ।
आसवेहिं विवित्तेहिं, तिप्पमाणोऽहियासए ॥
- [२५०] गंथेहिं विवित्तेहिं, आउ-कालस्स पारए ॥
पग्गहियतरगं चेयं, दवियस्स वियाणतो ॥
- [२५१] अयं से अवरे धम्मे, नायपुत्तेण साहिए ।
आयवज्जं पडीयारं, विजहिज्जा तिहा तिहा ॥
- [२५२] हरिएसु न निवज्जेज्जा, थंडिलं मुणिआ सए ।
विउसिज्ज अणाहारो, पुट्ठो तत्थऽहियासए ॥
- [२५३] इंदिएहिं गिलायंते, समियं आहरे मुनी ।
तहावि से अगरिहे, अचले जे समाहिए ॥

- [२५४] अभिक्कमे पडिक्कमे, संकुचए पसारए ।
काय-साहारणद्वाए, एत्थ वाऽवि अचेयणे ॥
- [२५५] परक्कमे परिकिलंते, अदुवा चिट्ठे अहायते ।
ठाणेण परिकिलंते, निसिएज्जा य अंतसो ॥
- [२५६] आसीणेऽनेलिसं मरणं, इंदियाणि समीरए ।
कोलावासं समासज्ज, वितहं पाउरेसए ॥
- [२५७] जओ वज्जं समुप्पज्जे, न तत्थ अवलंबए ।
ततो उक्कसे अप्पाणं, सव्वे फासे तत्थऽहियासए ॥
- [२५८] अयं चायततरे सिया, जो एवं अनुपालए ।
सव्वगायनिरोधेऽवि, ठाणातो न विउब्भमे ॥
- [२५९] अयं से उत्तमे धम्मे, पुव्वद्वाणस्स पग्गहे ।
अचिरं पडिलेहित्ता विहरे चिट्ठ माहणे ॥

सुयक्खंधो-१, अज्झयणं-८, उद्देसो-८

- [२६०] अचित्तं तु समासज्ज, ठावए तत्थ अप्पगं ।
वोसिरे सव्वसो कायं, न मे देहे परीसहा ॥
- [२६१] जावज्जीवं परीसहा, उवसग्गा य संख्या ।
संवुडे देहभेयाए, इति पण्णेहियासए ॥
- [२६२] भेउरेसु न रज्जेज्जा, कामेसु बहुतरेसु वि ।
इच्छा-लोभं न सेवेज्जा, धुववन्नं सपेहिया ॥
- [२६३] सासएहिं निमंतेज्जा, दिव्वं मायं न सद्दहे ।
तं पडिबुज्झ माहणे, सव्वं नूमं विधूणिया ॥
- [२६४] सव्वट्ठेहिं अमुच्छिण, आउकालस्स पारए ।
तितिक्खं परमं नच्चा विमोहन्नतरं हितं ॥ त्ति बेमि

अद्दमे अज्झयणे अद्दमो उद्देसो समत्तो

मुनि दीपरत्नसागरेण संशोधितः सम्पादितश्च अद्दमं अज्झयणं समत्तं

◦ नवमं अज्झयणं -उवहाणसुयं ◦

◦ पढमो - उद्देसो ◦

- [२६५] अहासुयं वदिस्सामि, जहा से समणे भगवं उद्वाए ।
संखाए तंसि हेमंते, अहुणा पव्वइए रीयत्था ॥
- [२६६] नो चेविमेण वत्थेण, पिहिस्सामि तंसि हेमंते ।
से पारए आवक्काए, एयं खु अनुधम्मियं तस्स ॥
- [२६७] चत्तारि साहिए मासे, बहवे पाण-जाइया आगम्म ।
अभिरुज्झ कायं विहरिंसु, आरुसियाणं तत्थ हिंसिसु ॥
- [२६८] संवच्छरं साहियं मासं, जं न रिक्कासि वत्थगं भगवं ।

- अचेलए ततो चाई तं वोसज्ज वत्थमनगारे ॥
 [२६९] अदु पोरिसं तिरियं भित्तिं, चक्खुमासज्ज अंतसो झायइ ।
 अह चक्खु-भीया संहिया, तं हंता हंता बहवे कंदिसु ॥
 [२७०] सयणेहिं वितिमिस्सेहिं, इत्थीओ तत्थ से परिण्णाय ।
 सागारियं न सेवेइ, से सयं पवेसिया झाति ॥
 [२७१] जे के इमे अगारत्था, मीसीभावं पहाय से झाति ।
 पुढो वि नाभिभासिसु, गच्छति नाइवत्तइ अंजू ॥
 [२७२] नो सुकरमेतमेगेसिं, नाभिभासे य अभिवायमाणे ।
 हयपुव्वो तत्थ दंडेहि, लूसियपुव्वे अप्पपुण्णेहिं ॥
 [२७३] फरुसाइं दुत्तितिक्खाइं, अतिअच्च मुनी परक्कममाणे ।
 आधाय-नट्ट-गीताइं, दंडजुद्धाइं मुट्ठिजुद्धाइं ॥
 [२७४] गढिए मिहो-कहासु समयंमि, नायसुए विसोगे अदक्खू ।

सुयक्खंधो-१, अज्झयणं-९, उद्देसो-१

- एताइं से उरालाइं गच्छइ, नायपुत्ते असरणयाए ॥
 [२७५] अवि साहिए दुवे वासे, सीतोदं अभोच्चा निक्खंते ।
 एगत्तगए पिहियच्चे से, अहिण्णायदंसणे संते ॥
 [२७६] पुढविं च आउकायं, तेउकायं च वाउकायं च ।
 पणगाइं बीय-हरियाइं, तसकायं च सव्वसो नच्चा ॥
 [२७७] एयाइं संति पडिलेहे, चित्तमंताइं से अभिन्नाय ।
 परिवज्जिया न विहरित्था, इति संखाए से महावीरे ॥
 [२७८] अदु थावरा तसत्ताए, तसजीवा य थावरत्ताए ।
 अदु सव्वजोणिया सत्ता, कम्मणा कप्पिया पुढो बाला ॥
 [२७९] भगवं च एवं मन्नेसिं, सोवहिए हु लुप्पती बाले ।
 कम्मं च सव्वसो नच्चा तं, पडियाइक्खे पावगं भगवं ॥
 [२८०] दुविहं समिच्च मेहावी, किरियमक्खायऽनेलिसं नाणी ।
 आयाण-सोयमतिवाय-सोयं, जोगं च सव्वसो नच्चा ॥
 [२८१] अइवत्तियं अनाउट्टे, सयमन्नेसिं अकरणयाए ।
 जस्सित्थिओ परिण्णया, सव्वकम्मावहाओ से अदक्खू ॥
 [२८२] अहाकडं न से सेवे, सव्वसो कंमुणा य अदक्खू ।
 जं किंचि पावगं भगवं, तं अकुव्वं वियडं भुंजित्था ॥
 [२८३] नो सेवइ य परवत्थं, परपाए वि से न भुंजित्था ।
 परिवज्जियाण ओमाणं, गच्छति संखडिं असरणाए ॥
 [२८४] मायण्णे असन-पानस्स, नाणुगिद्धे रसेसु अपडिण्णे ।
 अच्छिंपि नो पमज्जिया, नोवि य कंडूयये मुनी गायं ॥
 [२८५] अप्पं तिरियं पेहाए, अप्पं पिढो उपेहाए ।

- अप्पं बुइएऽपडिभाणी, पंथपेही चरे जयमाणे ॥
 [२८६] सिसिरंसि अद्धपडिवन्ने, तं वोसज्ज वत्थमनगारे ।
 पसारित्तु बाहुं परक्कमे, नो अवलंबियाण कंधंसि ॥
 [२८७] एस विही अणुक्कंतो, माहणेण मईमया ।
 अपडिण्णेण वीरेण, कासवेण महेसिणा - त्तिबेमि ॥

नवमे अज्झयणे पढमो उद्देसो समत्तो

० बीओ - उद्देसो ०

- [२८८] चरियासणाइं सेज्जाओ, एगतियाओ जाओ बुइयाओ ।
 आइक्ख ताइं सयणासणाइं, जाइं सेवित्था से महावीरो ॥
 [२८९] आवेसण-सभा-पवासु, पणियसालासु एगदा वासो ।
 अदुवा पलियट्ठाणेसु, पलालपुंजेसु एगदा वासो ॥
 [२९०] आगंतारे आरामागारे, तह य नगरे वि एगदा वासो ।

सुयक्खंधो-१, अज्झयणं-९ उद्देसो-२

- सुसाणे सुन्नगारे वा, रुक्खमूले व एगदा वासो ॥
 [२९१] एतेहिं मुनी सयणेहिं, समणो आसी पतेरस वासे ।
 राइं दिवं पि जयमाणे, अप्पमत्ते समाहिए ज्ञाति ॥
 [२९२] निदं पि नो पगामाए, सेवइ भगवं उट्ठाए ।
 जग्गावती य अप्पाणं, ईसिं साई य अपडिन्ने ॥
 [२९३] संबुज्झमाणे पुनरवि, आसिंसु भगवं उट्ठाए ।
 निक्खम्म एगया राओ, बहिं चंकमिया मुहुत्तागं ॥
 [२९४] सयणेहिं तत्थुवसग्गा, भीमा आसी अनेगरुवा य ।
 संसप्पगाय जे पाणा, अदुवा जे पक्खिणो उवचरंति ॥
 [२९५] अदु कुचरा उवचरंति, गामरक्खा य सत्तिहत्था य ।
 अदु गामिया उवसग्गा, इत्थी एगतिया पुरिसा य ॥
 [२९६] इहलोइयाइं परलोइयाइं, भीमाइं अनेगरुवाइं ।
 अवि सुब्भि-दुब्भि-गंधाइं, सद्दाइं अनेगरुवाइं ॥
 [२९७] अहियासए सया समिए, फासाइं विरुवरुवाइं ।
 अरइं रइं अभिभूय, रीयई माहणे अबहुवाई ॥
 [२९८] स जणेहिं तत्थ पुच्छिंसु, एगचरा वि एगदा राओ ।
 अव्वाहिए कसाइत्था पेहमाणे, समाहिं अपडिण्णे ॥
 [२९९] अयमंतरंसि को एत्थ ? अहमंसित्ति भिक्खु आहट्ठु ।
 अयमुत्तमे से धम्मे, तुसिणीए स कसाइए ज्ञाति ॥
 [३००] जंसिऽप्पेगे पवेयंति, सिसिरे मारुए पवायंते ।
 तंसिऽप्पेगे अनगारा हिमवाए निवायमेसंति ॥
 [३०१] संघाडिओ पविसिस्सामो, एहा य समादहमाणा ।

- पिहिया व सक्खामो अतिदुक्खं हिमग-संफासा ॥
 [३०२] तंसि भगवं अपडिण्णे, अहे वियडे अहियासए दविए ।
 निक्खम्म एगदा राओ, चाएइ भगवं समियाए ॥
 [३०३] एस विही अणुक्कंतो, माहणेण मईमया ।
 अपडिण्णेण वीरेण, कासवेण महेसिणा - त्तिबेमि ॥

नवमे अज्झयणे बीओ उद्देसो समत्तो

० तइओ - उद्देसो ०

- [३०४] तणफासे सीयफासे य, तेउफासे य दंस-मसगे य ।
 अहियासए सया समिए, फासाइं विरुवरुवाइं ॥
 [३०५] अह दुच्चर-लाढमचारी, वज्जभूमिं च सुब्भभूमिं च ।
 पंतं सेज्जं सेविंसु, आसणगाणि चेव पंताइं ॥
 [३०६] लाढेहिं तस्सुवसग्गा, बहवे जाणवया लूसिंसु ।

सुयक्खंधो-१, अज्झयणं-९ उद्देसो-३

- अह लूहदेसिए भत्ते, कुक्कुरा तत्थ हिंसिंसु निवतिंसु ॥
 [३०७] अप्पे जने निवारेइ, लूसणए सुणए दसमाणे ।
 छुछुकारंति आहंसु समणं, कुक्कुरा डसंतुत्ति ॥
 [३०८] एलिक्खए जना भुज्जो, बहवे वज्जभूमि फरुसासी ।
 लद्धिं गहाय नालीयं, समणा तत्थ एव विहरिंसु ॥
 [३०९] एवं पि तत्थ विहरंता, पुट्टपुव्वा अहेसि सुणएहिं ।
 संलुंचमाणा सुणएहिं, दुच्चराणि तत्थ लाढेहिं ॥
 [३१०] निधाय दंड पाणेहिं, तं कायं वोसज्जमनगारे ।
 अह गामकंटए भगवं, ते अहियासए अभिसमेच्चा ॥
 [३११] नागो संगामसीसे वा, पारए तत्थ से महावीरे ।
 एवं पि तत्थ लाढेहिं, अलद्धपुव्वो वि एगया गामो ॥
 [३१२] उवसंकमंतमपडिण्णं, गामंतिंयं पि अप्पत्तं ।
 पडिनिक्खमित्तु लूसिंसु एत्तो परं पलेहित्ति ॥
 [३१३] हयपुव्वो तत्थ दंडेण, अदुवा मुट्ठिणा अदु कुंतफलेण ।
 अदु लेलुणा कवालेणं, हंता हंता बहवे कंदिंसु ॥
 [३१४] मंसाणि छिन्नपुव्वाइं, उट्ठंभिया एगया कायं ।
 परीसहाइं लुंचिसु, अहवा पंसुणा उवकिरिंसु ॥
 [३१५] उच्चालइय निहणिंसु, अदुवा आसणाओ खलइंसु ।
 वोसट्ठकाए पणयास्ससी, दुक्खसहे भगवं अपडिण्णे ॥
 [३१६] सूरुो संगामसीसे वा, संवुडे तत्थ से महावीरे ।
 पडिसेवमाणे फरुसाइं, अचले भगवं रीइत्था ॥
 [३१७] एस विही अणुक्कंतो, माहणेण मईमया ।

अपडिण्णेण वीरेण, कासवेण महेसिणा, त्ति बेमि ॥

नवमे अज्झयणे तइओ उद्देसो समत्तो

० चउत्थो - उद्देसो ०

- [३१८] ओमोदरियं चाएति अपुट्ठे वि भगवं रोगेहिं ।
पुट्ठे वा से अपुट्ठे वा नो से सातिज्जति तेइच्छं ॥
- [३१९] संसोहणं च वमनं च, गायब्भंगणं च सिणाणं च ।
संबाहणं च न से कप्पे, दंतपक्खालणं च परिण्णाए ॥
- [३२०] विरए गामधम्महिं, रीयति माहणे अबहुवाई ।
सिसिरंमि एगदा भगवं, छायाए झाइ आसी य ॥
- [३२१] आयावइ य गिम्हाणं अच्छइ उक्कुडुए अभितावे ।
अदु जाव इत्थ लूहेणं, ओयण-मंथु-कुम्मासेणं ॥
- [३२२] एयाणि तिन्नि पडिसेवे, अट्ठ मासे य जावए भगवं ।

सुयक्खंधो-१, अज्झयणं-९ उद्देसो-४

- अपिइत्थ एगया भगवं, अट्ठमासं अदुवा मासं पि ॥
- [३२३] अवि साहिए दुवे मासे, छप्पि मासे अदुवा अपिबित्ता ।
रायोवरायं अपडिण्णे, अन्नगिलायमेगया भुंजे ॥
- [३२४] छट्ठेण एगया भुंजे, अदुवा अट्ठमेण दसमेणं ।
दुवालसमेण एगया भुंजे, पेहमाणे समाहिं अपडिण्णे ॥
- [३२५] नच्चा णं से महावीरे नोऽवि य पावगं सयमकासी ।
अन्नेहिं वा न कारित्था, कीरंतं पि नाणुजाणित्था ॥
- [३२६] गामं पविसे नयरं वा, घासमेसे कडं परट्ठाए ।
सुविसुद्धमेसिया भगवं, आयत-जोगयाए सेवित्था ॥
- [३२७] अदु वायसा दिगिंछत्ता जे अन्ने रसेसिणो सत्ता ।
घासेसणाए चिट्ठंते सययं, निवतिते य पेहाए ॥
- [३२८] अदु माहणं व समणं वा गामपिंडोलगं च अतिहिं वा ।
सोवागमूसियारं वा कुक्कुरं, वाऽवि विहं ठियं पुरतो ॥
- [३२९] वित्तिच्छेदं वज्जंतो, तेसप्पत्तियं परिहरंतो ।
मंदं परक्कमे भगवं, अहिंसमाणो घासमेसित्था ॥
- [३३०] अवि सूइयं वा सुक्कं वा, सीयपिंडं पुराणकुम्मासं ।
अदु बुक्कसं पुलागं वा, लद्धे पिंडे अलद्धए दविए ॥
- [३३१] अवि झाति से महावीरे, आसणत्थे अक्कुए झाणं ।
उड्ढं अहे तिरियं च, पेहमाणे समाहिमपडिण्णे ॥
- [३३२] अकसाई विगयगेही य सदरुवेसुऽमुच्छिए झाति ।
छउमत्थेऽवि परक्कममाणे नो, पमायं सइं पि कुत्तित्था ॥
- [३३३] सयमेव अभिसमागम्म, आयतजोगमायसोहीए ।

अभिनिव्वुडे अमाइल्ले आवकहं भगवं समिआसी ॥
[३३४] एस विही अणुक्कंतो, माहणेणं मईमया ।
अपडिण्णेण वीरेण, कासवेण महेसिणा, त्तिबेमी ॥

नवमे अज्झयणे चउत्थो उद्देसो समत्तो

मुनि दीपरत्नसागरेण संशोधितः सम्पादितश्च नवमं अज्झयणं समत्तं

0 पढमो सुयक्खंधो समत्तो 0

पढमं अज्झयणं - पिंडेसणा

० पढमो - उद्देशो ०

[३३५] से भिक्खू वा भिक्खुणी वा गाहावइ-कुलं पिंडवाय-पडियाए अनुपविट्ठे समाणे सेज्जं पुण जाणेज्जा असनं वा पानं वा खाइमं वा साइमं वा पाणेहिं वा पणएहिं वा बीएहिं वा हरिएहिं वा संसत्तं उम्मिस्सं सीओदएण वा ओसित्तं रयसा वा परिघासियं तहप्पगारं असनं वा पानं वा खाइमं वा साइमं वा - परहत्थंसि वा परपायंसि वा- अफासुयं अनेसणिज्जं ति मन्नमाणे लाभेऽवि संते नो पडिग्गाहेज्जा ।

से य आहच्च पडिग्गाहिए सिया से तं आयाय एगंतमवक्कमेज्जा एगंतमवक्कमेत्ता- अहे आरामंसि वा अहे उवस्सयंसि वा अप्पंडे अप्पपाणे अप्प-बीए अप्प-हरिए अप्पोसे अप्पुदए अप्पुत्तिंग-पणग-दग-मट्ठिय-मक्कडासंताणए विगिंचिय-विगिंचिय उम्मिस्सं विसोहिय-विसोहिय तओ संजयामेव भुंजेज्ज वा पीएज्ज वा, जं च नो संचाएज्जा भुत्तए वा पायए वा से तमायाय एगंतमवक्कमेज्जा एगंतमवक्कमेत्ता- अहे झाम-थंडिलंसि वा अट्ठि-रासिंसि वा किट्ठ-रासिंसि वा तुस-रासिंसि वा गोमय-रासिंसि वा अन्नयरंसि वा तहप्पगारंसि थंडिलंसि पडिलेहिय-पडिलेहिय पमज्जिय-पमज्जिय तओ संजया-मेव परिट्ठवेज्जा ।

[३३६] से भिक्खू वा भिक्खुणी वा गाहावइ-कुलं पिंडवाय-पडियाए अणुपविट्ठे समाणे सेज्जाओ पुण ओसहीओ जाणेज्जा-कसिणाओ सासिआओ अविदलकडाओ अतिरिच्छच्छिन्नाओ अव्वोच्छिन्नाओ तरुणियं वा छिवाडिं अनभिककंताऽभज्जियं पेहाए अफासुयं अनेसणिज्जं ति मन्नमाणे लाभे संते नो पडिग्गाहेज्जा ।

से भिक्खू वा जाव पविट्ठे समाणे से जाओ पुण ओसहीओ जाणिज्जा अकसिणाओ असासियाओ विदलकडाओ तिरिच्छच्छिन्नाओ वुच्छिन्नाओ तरुणियं वा छिवाडिं अभिककंतं भज्जियं पेहाए फासुयं एसणिज्जंति मन्नमाणे लाभे संते पडिग्गाहेज्जा ।

[३३७] से भिक्खू वा भिक्खुणी वा गाहावइ जाव पविट्ठे समाणे सेज्जं पुण जाणेज्जा- पिहुयं वा बहुरजं वा भुज्जियं वा मंथुं वा चाउलं वा चाउल-पलंबं वा सइं भज्जियं अफासुयं अनेसणिज्जं ति मन्नमाणे लाभे संते नो पडिग्गाहेज्जा ।

[३३८] से भिक्खू वा भिक्खुणी वा गाहावइ-कुलं जाव समाणे सेज्जं पुण जाणेज्जा पिहुयं वा जाव चाउलं वा चाउल-पलंबं वा असइं भज्जियं दुक्खुत्तो वा भज्जियं तिक्खुत्तो वा भज्जियं फासुयं एसणिज्जं जाव पडिग्गाहेज्जा

से भिक्खू वा भिक्खुणी वा गाहावइ-कुलं [पिंडवाय-पडियाए] पविसितुकामे नो अन्नउत्थिएण वा गारत्थिएण वा परिहारिओ अपरिहारिएण वा सद्धिं गाहावइकुलं पिंडवाय-पडियाए पविसेज्ज वा निक्खमेज्ज वा ।

से भिक्खू वा भिक्खुणी वा बहिया वियारभूमिं वा विहारभूमिं वा निक्खममाणे वा पविसमाणे वा नो अन्नउत्थिएण वा गारत्थिएण वा परिहारिओ अपरिहारिएण वा सद्धिं बहिया वियार-

भूमिं वा विहार-भूमिं वा निक्खमेज्ज वा पविसेज्ज वा ।

से भिक्खू वा भिक्खुणी वा गामाणुगामं दुइज्जमाणे नो अन्न-उत्थिएण वा गारत्थिएण वा परिहारिओ अपरिहारिएण वा सद्धिं गामाणुगामं दूइज्जेज्जा ।

[३३९] से भिक्खू वा भिक्खुणी वा [गाहावइ-कुलं पिंडवाय-पडियाए अनुपविट्ठे] समाणे नो अन्नउत्थियस्स वा गारत्थियस्स वा परिहारिओ अपरिहारिअस्स वा असनं वा पानं वा खाइमं वा साइमं वा देज्जा वा अनुपदेज्जा वा ।

[३४०] से भिक्खू वा भिक्खुणी वा जाव समाणे सेज्जं पुण जाणेज्जा-असनं वा पानं वा खाइमं वा साइमं वा अस्सिंपडियाए एगं साहम्मियं समुद्धिस्स पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्छेज्जं अनिसद्धं अभिहडं आहट्टु चेएइ तं तहप्पगारं असनं वा पानं वा खाइमं वा साइमं वा पुरिसंतरकडं वा अपुरिसंतरकडं वा बहिया नीहडं वा अनीहडं वा अत्तट्ठियं वा अनत्तट्ठियं वा परिभुत्तं वा अपरिभुत्तं वा आसेवियं वा अनासेवियं वा-अफासुयं जाव नो पडिगाहेज्जा ।

एवं बहवे साहम्मिया, एगं साहम्मिणिं, बहवे साहम्मिणीओ समुद्धिस्स चत्तारि आलावगा भाणियच्चा ।

[३४१] से भिक्खू वा भिक्खुणी जाव पविट्ठे समाणे सेज्जं पुण जाणेज्जा-असनं वा पानं वा खाइमं वा साइमं वा बहवे समण-माहण-अतिहि-किवण-वणीमए पगणिय-पगणिय समुद्धिस्स पाणाइं वा भूयाइं वा जीवाइं वा सत्ताइं वा समारब्भ समुद्धिस्स जाव नो पडिगाहेज्जा ।

[३४२] से भिक्खू वा भिक्खुणी वा जाव पविट्ठे समाणे सेज्जं पुण जाणेज्जा - असनं वा पानं वा खाइमं वा साइमं वा बहवे समण-माहण-अतिहि-किवण-वणीमए समुद्धिस्स जाव चेएइ तं तहप्पगारं असनं वा पानं वा खाइमं वा साइमं वा अपुरिसंतरकडं अबहिया नीहडं अणत्तट्ठियं अपरिभुत्तं अनासेवितं- अफासुयं अनेसणिज्जं ति मन्नमाणे लाभे संते नो पडिगाहेज्जा, अह पुण एवं जाणेज्जा-पुरिसंतरकडं बहिया नीहडं अत्तट्ठियं परिभुत्तं आसेवियं - फासुय एसणिज्जं ति मन्नमाणे लाभे संते पडिगाहेज्जा ।

[३४३] से भिक्खू वा भिक्खुणी वा गाहावइ-कुलं पिंडवाय-पडियाए पविसितुकामे से जाइं पुण कुलाइं जाणेज्जा-इमेसु खलु कुलेसु नितिए पिंडे दिज्जइ नितिए अग्ग-पिंडे दिज्जइ नितिए भाए दिज्जइ नितिए अवड्ढभाए दिज्जइ तहप्पगाराइं कुलाइं नितियाइं नितिउमाणाइं नो भत्ताए वा पाणाए वा पविसेज्ज वा निक्खमेज्ज वा एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समिए सहिए सया जए, त्तिबेमि ।

बीए सुयक्खंधे पढमे अज्झयणे पढमो उद्देशो समत्तो

० बीओ - उद्देशो ०

[३४४] से भिक्खू वा भिक्खुणी वा गाहावइ-कुलं पिंडवाय-पडियाए अनुपविट्ठे समाणे सेज्जं पुण जाणेज्जा-असनं वा पानं वा खाइमं वा साइमं वा अट्ठमिपोसहिएसु वा अट्ठमासिएसु वा मासिएसु वा दोमासिएसु वा तिमासिएसु वा चाउमासिएसु वा पंचमासिएसु वा छमासिएसु वा उउसु वा उउसंधीसु वा उउपरियट्ठेसु वा बहवे समण-माहण-अतिहि-किवण-वणीमगे एगाओ उक्खाओ परिएसिज्ज-माणे पेहाए दोहिं उक्खाहिं परिएसिज्जमाणे पेहाए तिहिं उक्खाहिं परिएसिज्जमाणे पेहाए चउहिं उक्खाहिं

परिएसिज्जमाणे पेहाए कुंभीमुहाओ वा कलोवाइओ वा सन्निहि संनिचयाओ वा परिएसिज्जमाणे पेहाए तहप्पगारं असनं वा पानं वा खाइमं वा साइमं वा अपुरिसंतरकडं जाव अनासेवितं अफासुयं अनेसणिज्जं जाव पडिगाहेज्जा ।

अह पुण एवं जाणेज्जा-पुरिसंतरकडं बहिया नीहडं अत्तद्वियं परिभुत्तं आसेवियं-फासुयं एसणिज्जं ति मन्नमाणे लाभे संते पडिगाहेज्जा ।

[३४५] से भिक्खू वा जाव समाणे से जाइं पुण कुलाइं जाणेज्जा, तं जहा-उग्ग-कुलाणि वा भोग-कुलाणि वा राइण्ण-कुलाणि वा खत्तिय-कुलाणि वा इक्खाग-कुलाणि वा हरिवंस-कुलाणि वा एसिय-कुलाणि वा वेसिय-कुलाणि वा गंडाग-कुलाणि वा कोट्टाग-कुलाणि वा गामरक्ख-कुलाणि वा बोक्कासालिय-कुलाणि वा अन्नयरेसु वा तहप्पगारेसु कुलेसु अदुगुंछिएसु अगरहिएसु असनं वा पानं वा खाइमं वा साइमं वा फासुयं एसणिज्जं जाव पडिगाहेज्जा ।

[३४६] से भिक्खू वा भिक्खुणी वा गाहावइ-कुलं पिंडवाय-पडियाए अणुपविट्ठे समाणे से ज्जं पुण जाणेज्जा- असनं वा पानं वा खाइमं वा साइमं वा समवाएसु वा पिंड-नियरेसु वा इंद-महेसु वा खंद-महेसु वा रुद्ध-महेसु वा मुगुंद-महेसु वा भूय-महेसु वा जक्ख-महेसु वा नाग-महेसु वा थूभ-महेसु वा चेतिय-महेसु वा रुक्ख-महेसु वा गिरि-महेसु वा दरि-महेसु वा अगड-महेसु वा तडाग-महेसु वा दह-महेसु वा नई-महेसु वा सर-महेसु वा सागर-महेसु वा आगर-महेसु वा-अन्नयरेसु वा तहप्पगारेसु विरुवरुवेसु

महामहेसु वट्टमाणेसु बहवे समण-माहण-अतिहि-किविण-वणीमए एगाओ उक्खाओ परिएसिज्जमाणे पेहाए दोहिं जाव संनिहि-संनिचयाओ वा परिएसिज्जमाणे पेहाए-तहप्पगारं असनं वा पानं वा खाइमं वा साइमं वा अपुरिसंतरकडं जाव नो पडिगाहेज्जा, अह पुण एवं जाणेज्जा - दिन्नं जं तेसिं दायव्वं,

अह तत्थ भुंजमाणे पेहाए-गाहावइ-भारियं वा गाहावइ-भगिनिं वा गाहावइ-पुत्तं वा गाहावइ-धूयं वा सुण्हं वा धाइं वा दासं वा दासिं वा कम्मकरं वा कम्मकरिं वा से पुव्वामेव आलोएज्जा-आउसित्ति वा भगिनि त्ति वा दाहिसि मे एत्तो अन्नयरं भोयणजायं, से सेवं वदंतस्स परो असनं वा पानं वा खाइमं वा साइमं वा आहट्टु दलएज्जा-तहप्पगारं असनं वा पानं वा खाइमं वा साइमं वा सयं वा जाएज्जा परो वा से देज्जा फासुयं एसणिज्जं ति मन्नमाणे लाभे संते पडिगाहेज्जा ।

[३४७] से भिक्खू वा भिक्खुणी वा परं अद्धजोयण-मेराए संखडिं नच्चा संखडि-पडियाए नो अभिसंधारेज्जा गमणाए, से भिक्खू वा भिक्खुणी वा - पाईणं संखडिं नच्चा पडीणं गच्छे अणाढायमाणे पडीणं संखडिं नच्चा पाईणं गच्छे अणाढायमाणे, दाहिणं संखडिं नच्चा उदीणं गच्छे अणाढायमाणे उदीणे संखडिं नच्चा दाहिणं गच्छे अणाढायमाणे, जत्थेव सा संखडी सिया तं जहा-गामंसि वा नगरंसि वा खेडंसि वा कब्बडंसि वा मडंबंसि वा पट्टणंसि वा दोणमुहंसि वा आगरंसि वा निगमंसि वा आसमंसि वा सन्निवेसंसि वा रायहाणिसि वा- संखडिं संखडि-पडियाए नो अभिसंधारेज्जा गमणाए,

केवली बूया आयाणमेयं- संखडिं संखडि-पडियाए अभिसंधारेमाणे आहाकम्मियं वा उद्देशियं वा मीसजायं वा कीयगडं वा पामिच्चं वा अच्छेज्जं वा अनिसिद्धं वा अभिहडं वा आहट्टु दिज्जमाणं भुंजेज्जा, असंजए भिक्खू-पडियाए खुड्डिय-दुवारियाओ महल्लियाओ कुज्जा महल्लिय दुवारियाओ खुड्डियाओ कुज्जा, समाओ सिज्जाओ विसमाओ कुज्जा, विसमाओ सिज्जाओ समाओ कुज्जा, पवायाओ

सिज्जाओ निवायाओ कुज्जा, निवायाओ सिज्जाओ पवायाओ कुज्जा, अंतो वा बहिं वा उवस्सयस्स हरियाणि छिंदिय-छिंदिय दालिय-दालिय संधारणं संधरेज्जा ।

एस खलु भगवया सेज्जाए अक्खाए, तम्हा से संजए नियंठे तहप्पगारं पुरे-संखडिं वा पच्छा-संखडिं वा संखडिं संखडिंपडियाए नो अभिसंधारेज्जा गमणाए, एयं खलु तस्स भिक्खुस्स भिक्खुणीए वा सामग्गियं जं सव्वट्ठेहिं समिए सहए सया जए- त्तिबेमि ।

पढमे अज्झयणे बीओ उद्देसो समत्तो

० तइओ - उद्देसो ०

[३४८] से एगइओ अन्नतरं संखडिं आसित्ता पिबित्ता छड्डेज्ज वा वमेज्ज वा भुत्ते वा से नो सम्मं परिणमेज्जा अन्नतरे वा से दुक्खे रोयातंके समुप्पज्जेज्जा, केवली बूया आयाणमेयं ।

[३४९] इह खलु भिक्खू गाहावइहिं वा गाहावइणीहिं वा परिवायएहिं वा परिवाइयाहिं वा एगज्जं सद्धिं सौंडं पाउं भो वतिमिस्सं हुरत्था वा उवस्सयं पडिलेहमाणे नो लभेज्जा तमेव उवस्सयं संमिस्सि भावमावज्जेज्जा अन्नमन्ने वा से मत्ते विप्परियासियभूए इत्थिविग्गहे वा किलीबे वा तं भिक्खुं उवसंकमित्तुं बूया आउसंतो समणा अहे आरामंसि वा अहे उवस्सयंसि वा राओ वा वियाले वा गामधम्म-नियंतियं कट्टु रहस्सियं मेहुणधम्म-परियारणाए आउट्टामो, तं चेवगईओ सातिज्जेज्जा अकरणिज्जं चेयं संखाए एते आयाणा संति संविज्जमाणा पच्चावाया भवंति, तम्हा से संजए नियंठे तहप्पगारं पुरे-संखडिं वा पच्छा-संखडिं वा संखडिं संखडिंपडियाए नो अभिसंधारेज्जा गमणाए ।

[३५०] से भिक्खू वा भिक्खुणी वा अन्नयरं संखडिं सोच्चा निसम्म संपहावइ उस्सुय-भूएणं अप्पाणेणं धुवा संखडी, नो संचाएइ तत्थ इतरेतरेहिं कुलेहिं सामुदानियं एसियं वेसियं पिंडवायं पडिगाहेत्ता आहारं आहारेत्ताए, माइट्ठाणं संफासे, नो एवं करेज्जा, से तत्थ कालेण अनुपविसित्ता तत्थितरेतरेहिं कुलेहिं सामुदानियं एसियं वेसियं पिंडवायं पडिगाहेत्ता आहारं आहारेज्जा ।

[३५१] से भिक्खू वा भिक्खुणी वा सेज्जं पुण जाणेज्जा-गामं वा जाव रायहाणिं वा इमंसि खलु गामंसि वा जाव रायहाणिसि वा संखडी सिया तं पि य गामं वा जाव रायहाणिं वा संखडिं संखडिंपडियाए नो अभिसंधारेज्जा गमणाए, केवली बूया आयाणमेयं, आइण्णाऽवमाणं संखडिं अनुपविस्समाणस्स पाएण वा पाए अक्कंत पुव्वे भवइ हत्थेण वा हत्थे संचालियपुव्वे भवइ पाएण वा पाए आवडियपुव्वे भवइ सीसेण वा सीसे संघट्टियपुव्वे भवइ काएण वा काए संखोभियपुव्वे भवइ दंडेण वा अट्ठिण वा मुट्ठीण वा लेलुणा वा कवालेण वा अभिहयपुव्वे भवइ, सीओदएण वा ओसित्तपुव्वे भवइ रयसा वा परिघासिय-पुव्वे भवइ अनेसणिज्जे वा परिभुत्तपुव्वे भवइ अन्नेसिं वा दिज्जमाणे पडिगाहियपुव्वे भवइ- तम्हा से संजए निग्गंथे तहप्पागरं आइन्नावमाणं संखडिं संखडिंपडियाए नो अभिसंधारेज्ज गमणाए ।

[३५२] से भिक्खू वा भिक्खुणी वा गाहावइ-कुलं पिंडवाय-पडियाए अणुपविट्ठे समाणे सेज्जं पुण जाणेज्जा असनं वा पानं वा खाइमं वा साइमं वा एसणिज्जे सिया अनेसणिज्जे सिया- वितिगिच्छ समावण्णेणं अप्पाणेणं असमाहडाए लेस्साए तहप्पगारं असनं वा जाव लाभे संते नो पडिगाहेज्जा ।

[३५३] से भिक्खू वा भिक्खुणी वा गाहावइ-कुलं पिंडवाय-पडियाए पविसितुकामे सव्वं भंडगमायाए गाहावह-कुलं पिंडवाय-पडियाए पविसेज्ज वा निक्खमेज्ज वा, से भिक्खू वा भिक्खुणी वा सुयक्खंधो-२, अज्झयणं-१ उद्देसो-३

बहिया विहार-भूमिं वा वियार-भूमिं वा निक्खममाणे वा पविसमाणे वा सव्वं भंडगमायाए बहिया विहार-भूमिं वा वियारभूमिं वा निक्खमेज्ज वा पविसेज्ज वा, से भिक्खू वा भिक्खुणी वा गामाणुगामं दूइज्जेज्जा माणे सव्वं भंडगमायाए गामाणुगामं दूइज्जेज्जा ।

[३५४] से भिक्खू वा भिक्खुणी वा अह पुण एवं जाणेज्जा- तिक्खदेसियं वासं वासमाणं पेहाए तिक्खदेसियं वा महियं संनिचयमाणिं पेहाए महावाएण वा रयं समुद्धयं पेहाए तिरिच्छं संपाइमा वा तसा-पाणा संथडा संनिचयमाणा पेहाए, से एवं नच्चा नो सव्वं भंडगमायाए गाहावइ-कुलं पिंडवाय-पडियाए पविसेज्ज वा निक्खमेज्ज वा बहिया विहार-भूमिं वा वियार-भूमिं वा पविसेज्ज वा निक्खमेज्ज वा गामाणुगामं वा दूइज्जेज्जा ।

[३५५] से भिक्खू वा भिक्खुणी वा सेज्जाइं पुण कुलाइं जाणेज्जा तं जहा- खत्तियाण वा राईण वा कुराईण वा रायपेसियाण वा रायवंसट्ठियाण वा अंतो वा बहिं वा गच्छंताणं वा सन्निविट्ठाण वा निमंतेमाणाण वा अनिमंतेमाणाण वा असनं वा पानं वा खाइमं वा साइमं वा अफासुयं अनेसणिज्जं ति मन्नमाणे लाभे संते नो पडिगाहेज्जा, त्तिबेमि ।

पढमे अज्झयणे तइओ उद्देसो समत्तो

० चउत्थो - उद्देसो ०

[३५६] से भिक्खू वा भिक्खुणी वा गाहावइ-कुलं पिंडवाय-पडियाए अनुपविट्ठे समाणे सेज्जं पुण जाणेज्जा- मंसादियं वा मच्छादियं वा मंसखलं वा मच्छखलं वा आहेणं वा पेहेणं वा हिंगोलं वा संमेलं वा हीरमाणं पेहाए अंतरा से मग्गा बहुपाणा बहुबीया बहुहरिया बहुओसा बहुउदया बहुउत्तिंग पणग-दग-मट्ठिय-मक्कडासंताणगा बहवे तत्थ समण-माहण-अतिथि-किवण वणीमगा उवागता उवागमिस्संति तत्थाइण्णावित्ती नो पण्णस्स निक्खमणपवेसाए नो पण्णस्स वायण-पुच्छण-परियट्ठणाणुपेह-धम्मणुओगचिंताए, से एवं नच्चा तहप्पगारं पुरे-संखडिं वा पच्छा-संखडिं वा संखडिं संखडि-पडियाए नो अभिसंधारेज्ज गमणाए ।

से भिक्खु वा भिक्खुणी वा गाहावइ-कुलं पिंडवाय-पडियाए अनुपविट्ठे समाणे सेज्जं पुण जाणेज्जा मंसादियं वा मच्छादियं वा जाव हीरमाणं पेहाए अंतरां से मग्गा अप्पा पाणा जाव संताणगा नो तत्थ बहवे समण-माहण जाव उवागसमिस्संति अप्पाइण्णा वित्ती पन्नस्स निक्खमण-पवेसाए पन्नस्स वायण-पुच्छण-परियट्ठणाणुपेह-धम्मणुओगचिंताए, सेवं नच्चा तहप्पगारं पुरे-संखडिं वा पच्छा-संखडिं वा संखडिं संखडि-पडियाए अभिसंधारेज्ज गमणाए ।

[३५७] से भिक्खू वा भिक्खुणी वा गाहावइ-कुलं [पिंडवाय-पडियाए] पविसितुकामे सेज्जं पुण जाणेज्जा- खीरिणियाओ गावीओ खीरिज्जमाणीओ पेहाए असनं वा पानं वा खाइमं वा साइमं वा उवसंखडिज्जमाणं पेहाए पुरा अप्पजूहिए सेवं नच्चा नो गाहावइ-कुलं पिंडवाय-पडियाए निक्खमेज्ज वा पविसेज्ज वा, से तमायाए एगंतमवक्कमेज्जा एगंतमवक्कमेत्ता अनावायमसंलोए चिट्ठेज्जा, अह पुण एवं जाणेज्जा- खीरिणियाओ गावीओ खीरियाओ पेहाए असनं वा पानं वा खाइमं वा साइमं वा उवक्खडियं पेहाए पुरा जूहिए से एवं नच्चा तओ संजयामेव गाहावइ-कुलं पिंडवाय-पडियाए निक्खमेज्ज वा पविसेज्ज वा ।

[३५८] भिक्खागा नामेगे एवमाहंसु- समाणे वा वसमाणे वा गामाणुगामं दूइज्जमाणे-सुयक्खंधो-२, अज्झयणं-१ उद्देसो-४

खुड्डाए खलु अयं गामे संनिरुद्धाए नो महालए से हंता भयंतारो बाहिरगाणि गामाणि भिक्खायरियाए वयह, संति तत्थेगइयस्स भिक्खुस्स पुरे-संथुया वा पच्छा-संथुया वा परिवसंति, तं जहा- गाहावई वा गाहावइणीओ वा गाहावइ-पुत्ता वा गाहावइ-धूयाओ वा गाहावइ-सुण्हाओ वा धाईओ वा दासा वा दासीओ वा कम्मकरा वा कम्मकरीओ वा, तहप्पगाराइं कुलाइं पुरे-संथुयाणि वा पच्छा-संथुयाणि वा पुव्वामेव भिक्खायरियाए अनुपविसिस्सामि,

अवि य इत्थ लभिस्सामि- पिंडं वा लोयं वा खीरं वा दधिं वा नवनीयं वा घयं वा गुलं वा तेल्लं वा महुं वा मज्जं वा मंसं वा संकुलिं वा फाणियं वा पूयं वा सिहरिणिं वा, तं पुव्वामेव भोच्चा पेच्चा पडिग्गहं संलिहिय संमज्जिय तओ पच्छा भिक्खूहिं सद्धिं गाहावइ कुलं पिंडवाय-पडियाए पविसिस्सामि निक्खमिस्सामि वा माइद्वाणं संफासे, तं नो एवं करेज्जा, से तत्थ भिक्खूहिं सद्धिं कालेण अनुपविसित्ता तत्थितरेतरेहिं कुलेहिं सामुदानियं एसियं वेसियं पिंडवायं पडिगाहेत्ता आहारं आहारेज्जा, एयं खलु तस्स भिक्खुस्स वा भिक्खुणीए वा सामग्गियं [जं सव्वट्ठेहिं समिए सहिए सया जए - त्तिबेमि]

पढमे अज्झयणे चउत्थो उद्देशो समत्तो

० पंचमो - उद्देशो ०

[३५९] से भिक्खू वा जाव पविट्ठे समाणे सेज्जं पुण जाणेज्जा- अग्गपिंडं उक्खिप्पमाणं पेहाए अग्गपिंडं निक्खिप्पमाणं पेहाए अग्गपिंडं हीरमाणं पेहाए अग्गपिंडं परिभाइज्जमाणं पेहाए अग्गपिंडं परिभुज्जमाणं पेहाए अग्ग-पिंडं परिट्ठवेज्जमाणं पेहाए पुरा असिणाइ वा अवहाराइ वा पुरा जत्थण्णे समण-माहण-अतिहि-किविण वणीमगा खद्धं-खद्धं उवसंकमंति- से हंता अहमवि खद्धं उवसंकमामि, माइद्वाणं संफासे, नो एवं करेज्जा ।

[३६०] से भिक्खू वा जाव पविट्ठे समाणे- अंतरा से वप्पाणि वा फलिहाणि वा पागाराणि वा तोरणाणि वा अग्गलाणि वा अग्गल-पासणाणि वा-सइ परक्कमे संजयामेव परक्कमेज्जा, नो उज्जुयं गच्छेज्जा, केवली बूया आयाणमेय- से तत्थ परक्कममाणे पयलेज्ज वा पक्खलेज्ज वा पवडेज्ज वा से तत्थ पयलमाणे वा पक्खलमाणे वा पवडमाणे वा तत्थ से काये उच्चारणे वा पासवणेण वा खेलेण वा सिंधाणेण वा वंतेण वा पित्तेण वा पूणेण वा सुक्केण वा सोणिणेण वा उवलित्ते सिया, तहप्पगारं कायं नो अनंतरहियाए पुढवीए नो ससिणिद्वाए पुढवीए नो ससरक्खाए पुढवीए नो चित्तमंताए सिलाए नो चित्तमंताए लेलुए कोलावासंसि वा दारुए जीवपइट्ठिए सअंडे सपाणे जाव ससंताणए नो आमज्जेज्ज वा नो पमज्जेज्ज वा नो संलिहेज्ज वा नो निल्लिहेज्ज वा नो उव्वलेज्ज वा नो उवट्ठेज्ज वा नो आयावेज्ज वा नो पयावेज्ज वा, से पुव्वामेव अप्पससरक्खं तणं वा पत्तं वा कट्ठं वा सक्करं वा जाइज्जा, जाइत्ता से तमायाए एगंतमवक्कमेज्जा एगंतमवक्कमेत्ता अहे झामथंडिलंसि वा जाव अन्नयरंसि वा तहप्पगारंसि थंडिलंसि पडिलेहिय-पडिलेहिय पमज्जिय-पमज्जिय तओ संजयामेव आमज्जेज्ज वा जाव पयावेज्ज वा ।

[३६१] से भिक्खू वा [भिक्खुणी वा गाहावइ-कुलं पिंडवाय-पडियाए अणुपविट्ठे] समाणे सेज्जं पुण जाणेज्जा- गोणं वियालं पडिपहे पेहाए महिसं वियालं पडिपहे पेहाए, एवं मणुस्सं आसं हत्थिं सीहं वग्घं विगं दीवियं अच्छं तरच्छं परिसरं सियालं विरालं सुणयं कोलसुणयं कोकंतियं चित्ताचिल्लडयं-वियालं पडिपहे पेहाए सह परक्कमे संजयामेव परक्कमेज्जा, नो उज्जुयं गच्छेज्जा,

से भिक्खू वा जाव समाणे-अंतरा से ओवाओ वा खाणू वा कंटए वा घसी वा भिलुगा वा

विसमे वा विज्जले वा परियावज्जेज्जा, सति परक्कमे संजयामेव, परक्कमेज्जा नो उज्जुयं गच्छेज्जा ।

[३६२] से भिक्खू वा भिक्खुणी वा गाहावइ-कुलस्स दुवार-बाहं कंटक-बौंदियाए परिपिहियं पेहाए तेसिं पुव्वामेव उग्गहं अणुण्णविय अपडिलेहिय अपमज्जिय नो अवंगुणिज्ज वा पविसेज्ज वा निक्खमेज्ज वा तेसिं पुव्वामेव उग्गहं अणुण्णविय पडिलेहिय-पडिलेहिय पमज्जिय-पमज्जिय तओ संजयामेव अवंगुणिज्ज वा पविसेज्ज वा निक्खमेज्ज वा ।

[३६३] से भिक्खू वा जाव समाणे सेज्जं पुण जाणेज्जा- समणं वा माहणं वा गामपिंडोलगं वा अतिहिं वा पुव्वपविट्ठं पेहाए नो तेसिं संलोए सपडिदुवारे चिट्ठेज्जा [प०-केवली बूया आयाणमेयं-पुरा पेहाए तस्सद्वाए परो असनं वा पानं वा खाइमं वा साइमं वा आहट्टु दलएज्जा, अह भिक्खूणं पुव्वोवदिट्ठा एस पइण्णा एस हेऊ एस कारणं एस उवएसो जं नो तेसिं संलोए सपडिदुवारे चिट्ठेज्जा] से तमायाए एगंतमवक्कमेज्जा एगंतमवक्कमेत्ता अनावायमसंलोए चिट्ठेज्जा, से से परो अनावायमसंलोए चिट्ठमाणस्स असनं वा पानं वा खाइमं वा साइमं वा आहट्टु दलएज्जा, से य एवं वदेज्जा- आउसंतो समणा इमे भे असणे वा पाणे वा खाइमे वा साइमे वा सव्वजणाए निसिट्ठे तं भुंजह वा णं परिभाएह वा णं, तं चेगइओ पडिगाहेत्ता तुसिणीओ उवेहेज्जा, अवियाइं एयं मम मेव सिया, माइट्ठाणं संफासे, नो एवं करेज्जा, से तमायाए तत्थ गच्छेज्जा तत्थ गच्छेत्ता से पुव्वामेव आलोएज्जा-

आउसंतो समणा! इमे भे असनं वा पानं वा खाइमं वा साइमं वा सव्वजणाए निसिट्ठे तं भुंजह वा णं परिभाएह वा णं, सेणमेवं वदंतं परो वएज्जा- आउसंतो समणा, तुमं चेव णं परिभाएहि, से तत्थ परिभाएमाणे नो अप्पणो खद्धं-खद्धं डायं-डायं ऊसढं-ऊसढं रसियं-रसियं मणुण्णं-मणुण्णं निद्धं-निद्धं लुक्खं-लुक्खं से तत्थ अमुच्छिण अगिद्धे अगिद्धे अणज्झोववन्ने बहुसममेव परिभाएज्जा, से णं परिभाएमाणं परो वएज्जा- आउसंतो समणा! मा णं तुमं परिभाएहि सव्वे वेगतिया ठिया उ भोक्खामो वा, पाहामो वा से तत्थ भुंजमाणे नो अप्पणो खद्धं खद्धं डायं डायं ऊसढं उसढं रसियं रसियं मणुण्णं मणुण्णं निद्धं निद्धं लुक्खं-लुक्खं से तत्थ अमुच्छिण जाव बहुसममेव भुंजेज्ज वा पीएज्जा वा ।

[३६४] से भिक्खू वा [भिक्खुणी वा गाहावइ-कुलं पिंडवाय-पडियाए अनुपविट्ठे] समाणे सेज्जं पुण जाणेज्जा-समणं वा माहणं वा गाम-पिंडोलगं वा अतिहिं वा पुव्वपविट्ठं पेहाए नो ते उवाइक्कम्म पविसेज्ज वा ओभासेज्ज वा, से तमायाए एगंतमवक्कमेज्जा एगंतमवक्कमेत्ता अनावायं चिट्ठेज्जा अह पुणेवं जाणेज्जा- पडिसेहिए वा दिन्ने वा, तओ तंमि नियत्तिए संजयामेव पविसेज्जा वा ओभासेज्ज वा एयं सामग्गियं जाव सया जए-त्तिबेमि ।

पढमे अज्झयणे पंचमो उद्देसो समत्तो

० छट्ठो -उद्देसो ०

[३६५] से भिक्खू वा जाव समाणे सेज्जं पुण जाणेज्जा- रसेसिणो बहवे पाणा घासेसणाए संथडे सन्निवइए पेहाए तं जहा- कुक्कुड-जाइयं वा सूयर-जाइयं वा अग्गपिंडंसि वा वायसा संथडा संनिवइया पेहाए सइ परक्कमे संजयामेव परक्कमेज्जा नो उज्जुयं गच्छेज्जा ।

[३६६] से भिक्खू वा जाव समाणे-नो गाहावइ-कुलस्स वा दुवार-साहं अवलंबिय-अवलंबिय चिट्ठेज्जा, नो गाहावइ-कुलस्स दगच्छइडणमत्ताए चिट्ठेज्जा, नो गाहावइ-कुलस्स चंदनिउयए चिट्ठेज्जा,

नो गाहावइ-कुलस्स सिणाणस्स वा वच्चस्स वा संलोए सपडिदुवारे चिद्देज्जा, नो गाहावइ-कुलस्स आलोयं वा थिग्गलं वा संधिं वा दग-भवनं वा बाहाओ पगिज्झिय-पगिज्झिय अंगुलियाए वा उद्दिसिय-उद्दिसिय अवनमिय-अवनमिय उन्नमिय-उन्नमिय निज्झाएज्जा, नो गाहावइ अंगुलियाए उद्दिसिय-उद्दिसिय जाएज्जा, नो गाहावइ अंगुलियाए चालिय-चालिय जाएज्जा, नो गाहावइ अंगुलियाए तज्जिय-तज्जिय जाएज्जा, नो गाहावइ अंगुलियाए उक्खलुपिय-उक्खलुपिय जाएज्जा, नो गाहावइ वंदिय-वंदिय जाएज्जा, नो चेव णं फरुसं वएज्जा ।

[३६७] अह तत्थ कंचि भुंजमाणं पेहाए तं जहा- गाहावइ वा जाव कम्मकरिं वा से पुव्वामेव आलोएज्जा आउसो त्ति वा भइणि त्ति वा दाहिसि मे एत्तो अन्नयरं भोयणजायं ? से सेवं वयंतस्स परो हत्थं वा मत्तं वा दव्विं वा भायणं वा सीओदग-वियडेण वा उसिणोदग-वियडेण वा उच्छोलेज्ज वा पहोएज्ज वा, से पुव्वामेव आलोएज्जा-आउसो त्ति वा भइणि त्ति वा, मा एयं तुमं हत्थं वा मत्तं वा दव्विं वा भायणं वा सीओदग-वियडेण वा उसिणोदग-वियडेण वा उच्छोलेहि वा पहोएहि वा अभिकंखसि मे दाउं एवमेव दलयाहि से सेवं वयंतस्स परो हत्थं वा मत्तं वा दव्विं वा भायणं वा सीओदग-वियडेण वा उसिणोदग-वियडेण वा उच्छोलेत्ता पहोइत्ता आहट्टु दलएज्जा, तहप्पगारेण पुरेकम्मकएण हत्थेण वा मत्तेण वा दव्वीए वा भायणेण वा असनं वा पानं वा खाइमं वा साइमं वा अफासुयं [अनेसणिज्जं ति मन्नमाणे लाभे संते] नो पडिगाहेज्जा ।

अह पुण एवं जाणेज्जा- नो पुरेकम्मकएणं जाव उदउल्लेणं तहप्पगारेणं वा उदउल्लेण हत्थेण वा जाव भायणेण वा असनं वा जाव साइमं वा अफासुयं जाव नो पडिगाहेज्जा ।

अह पुण एवं जाणेज्जा- नो उदउल्लेण ससिणिद्धेण सेसं तं चेव, एवं ससरक्खे उदउल्ले, ससिणिद्धे मट्ठिया ऊसे । हरियाले हिंगुलुए, मनोसिला अंजणे लोणे । गेरुय वन्निय सेडिय सोरट्टिय पिडुकुकुस उक्कुट्ट संसट्ठेण । अह पुण एवं जाणेज्जा नो असंसट्ठे संसट्ठे तहप्पगारेण संसट्ठेण हत्थेण वा जाव भायणेण वा असनं वा जाव साइमं वा फासुयं जाव पडिगाहेज्जा ।

[३६८] से भिक्खू वा जाव समाणे से ज्जं पुण जाणेज्जा-पिहुयं वा बहुरयं वा [भज्जियं वा मंथुं वा चाउलं वा] चाउलपलंबं वा अस्संजए भिक्खु-पडियाए चित्तमंताए सिलाए जाव संताणाए कोट्टेसु वा कोट्टित्ति वा कोट्टिस्संति वा उप्फणिंसु वा उप्फणित्ति वा उप्पणिस्संति वा तहप्पगारं पिहुयं वा जाव चाउलपलंबं वा-अफासुयं [अनेसणिज्जं ति मन्नमाणे लाभे संते] नो पडिगाहेज्जा ।

[३६९] से भिक्खू वा जाव समाणे से ज्जं जाणेज्जा-बिलं वा लोणं उब्भियं वा लोणं अस्संजए भिक्खु-पडियाए चित्तमंताए सिलाए चित्तमंताए लेलुए कोलावांससि वा दारुए जीवपइट्टिए सअंडे सपाणे सबीए सहरिए सउसे सउदए सउत्तिंग-पणग-दग-मट्ठिय-मक्कडा संताणाए भिंदिसु वा भिंदित्ति वा भिंदिस्संति वा रुचिसु वा रुचित्ति वा रुचिस्संति वा-बिलं वा लोणं उब्भियं वा लोणं-अफासुयं जाव लाभे संते नो पडिगाहेज्जा ।

[३७०] से भिक्खू वा जाव समाणे सेज्जं पुण जाणेज्जा- असनं वा पानं वा खाइमं वा साइमं वा अगनिनिक्खित्तं तहप्पगारं असनं वा पानं वा खाइमं वा साइमं वा अफासुयं [अनेसणिज्जं ति मन्नमाणे] लाभे संते नो पडिगाहेज्जा केवली बूया आयाणमेयं, अस्संजए भिक्खु-पडियाए उस्सिंचमाणे वा

निस्सिंचमाणे वा आमज्जमाणे वा पमज्जमाणे वा ओयारेमाणे वा उव्वत्तेमाणे वा अगनिजीवे हिंसेज्जा, अह

सुयक्खंधो-२, अज्झयणं-१ उद्देसो-६

भिक्षूणं पुव्वोवदिट्ठा एस पइण्णा एस हेऊ एस कारणं एसुवएसे जं तहप्पगारं असनं वा जाव अगनि-
निक्खित्तं-अफासुयं अनेसणिज्जं [ति मन्नमाणे] लाभे संते नो पडिगाहेज्जा एयं खलु तस्स भिक्षुस्स वा
भिक्षुणीए वा सामग्गियं, त्तिबेमि ।

पदमे अज्झयणे छद्दो उद्देसो समत्तो

◦ सत्तमो - उद्देसो ◦

[३७१] से भिक्षू वा [भिक्षुणी वा गाहावइ-कुलं पिंडवाय-पडियाए अणुपविट्ठे] समाणे सेज्जं
पुण जाणेज्जा- असनं वा पानं वा खाइमं वा साइमं वा खंधंसि वा थंभंसि वा मंचंसि वा मालंसि वा
पासायंसि वा हम्मियतलंसि वा अन्नयरंसि वा तहप्पगारंसि अंतलिकखजायंसि उवनिक्खित्तं सिया-
तहप्पगारं मालोहडं असनं वा पानं वा खाइमं वा साइमं वा अफासुयं [अनेसणिज्जं ति मन्नमाणे लाभे
संते] नो पडिगाहेज्जा केवली बूया आयाणमेयं-अस्संजए भिक्षु-पडियाए पीढं वा फलगं वा निस्सेणिं वा
उदूहलं वा अवहट्ठु उस्सविय दुरुहेज्जा ।

से तत्थ दुरुहमाणे पयलेज्ज वा पवडेज्ज वा से तत्थ पयलमाणे वा पवडमाणे वा हत्थं वा
पायं वा बाहुं वा ऊरुं वा उदरं वा सीसं वा अन्नयरं वा कायंसि इंदिय-जालं लूसेज्ज वा पाणाणि वा
भूयाणि वा जीवाणि वा सत्ताणि वा अभिहणेज्ज वा वत्तेज्ज वा लेसेज्ज वा संघेसेज्ज वा संघट्टेज्ज वा
परियावेज्ज वा किलामेज्ज वा ठाणाओ ठाणं संकामेज्ज वा तं तहप्पगारं मालोहडं असनं वा जाव लाभे
संते नो पडिगाहेज्जा ।

से भिक्षू वा जाव समाणे सेज्जं पुण जाणेज्जा-असनं वा पानं वा खाइमं वा साइमं वा
कोट्टियाओ वा कोलज्जाओ वा अस्संजए भिक्षु-पडियाए उक्कुज्जिय अवउज्जिय ओहरिय आहट्ठु
दलएज्जा-तहप्पगारं असनं वा मालोहडं ति नच्चा लाभे संते नो पडिगाहेज्जा ।

[३७२] से भिक्षू वा जाव समाणे से ज्जं जाणेज्जा- असनं वा पानं वा खाइमं वा साइमं
वा मट्ठिओलित्तं-तहप्पगारं असनं वा जाव लाभे संते नो पडिगाहेज्जा केवली बूया आयाणमेयं-अस्संजए
भिक्षु-पडियाए मट्ठिओलित्तं असनं वा जाव उब्भिंदमाणे पुढवीकायं समारंभेज्जा तह तेउ-वाउ-वणस्सइ-
तसकायं समारंभेज्जा, पुनरवि ओलिंपमाणे पच्छाकम्मं करेज्जा, अह भिक्षूणं पुव्वोवदिट्ठा [एस पइण्णा
एस हेऊ एस कारणं एस उवएसो] जं तहप्पगारं मट्ठिओलित्तं असनं वा लाभे संते नो पडिगाहेज्जा ।

से भिक्षू वा भिक्षुणी वा जाव समाणे सेज्जं पुण जाणेज्जा-असनं वा पानं वा खाइमं वा
साइमं वा पुढविकाय-पइट्ठियं-तहप्पगारं असनं वा जाव-अफासुयं जाव नो पडिगाहेज्जा ।

से भिक्षू वा भिक्षुणी वा जाव समाणे सेज्जं पुण जाणेज्जा-असनं वा पानं वा खाइमं वा
साइमं वा आउकाय-पइट्ठियं-तहप्पगारं असनं वा जाव- अफासुयं अनेसणिज्जं ति मन्नमाणे लाभे संते नो
पडिगाहेज्जा ।

से भिक्षू वा भिक्षुणी वा गाहावइ-कुलं पिंडवाय-पडियाए अनुपविट्ठे समाणे सेज्जं पुण
जाणेज्जा असनं वा पानं वा खाइमं वा साइमं वा अगनिकाय पइट्ठियं-जाव लाभे संते नो पडिगाहेज्जा
केवली बूया आयाणमेयं- अस्संजए भिक्षु-पडियाए अगनिं ओसक्किय निस्सक्किय ओहरिय आहट्ठु

दलएज्जा अह भिक्खुणं पुव्वोवदिट्ठा [एस पइण्णा एस हेऊ एस कारणं एसउवएसे जं तहप्पगारं असनं वा जाव अगनिकाय-पइट्ठियं अफासुयं जाव नो पडिगाहेज्जा ।

सुयक्खंधो-२, अज्झयणं-१ उद्देसो-७

[३७३] से भिक्खू वा भिक्खुणी वा जाव समाणे सेज्जं पुण जाणेज्जा- असनं वा पानं वा खाइमं वा साइमं वा अच्चुसिणं अस्संजए भिक्खु-पडियाए सुप्पहेण वा विहुयणेण वा तालियंटेण वा पत्तेण

वा साहाए वा साहा-भंगेण वा पिहुणेण वा पिहुण-हत्थेण वा चेलेण वा चेलकन्नेण वा हत्थेण वा मुहेण वा फुमेज्ज वा वीएज्ज वा, से पुव्वामेव आलोएज्जा आउसो त्ति वा भगिनि त्ति वा मा एयं तुमं असनं वा पानं वा खाइमं वा साइमं वा अच्चुसिणं सूप्पेण वा जाव मुहेण वा फुमाहि वा वीयाहि वा अभिक्खसि मे दाउं एमेव दलयाहि। से सेवं वदंतस्स परो सूप्पेण वा फुमित्ता वा वीइत्ता वा आहट्ठु दलएज्जा-तहप्पगारं असनं वा जाव अफासुयं वा जाव नो पडिगाहेज्जा ।

[३७४] से भिक्खू वा भिक्खुणी वा जाव से ज्जं पुण जाणेज्जा-असनं वा पानं वा खाइमं वा साइमं वा वणस्सइकायपइट्ठियं-तहप्पगारं असनं वा जाव लाभे संते नो पडिगाहेज्जा.

[से भिक्खू वा भिक्खुणी वा गाहावइ-कुलं पिंडवाय-पडियाए अणुपविट्ठे समाणे सेज्जं पुण जाणेज्जा-असनं वा पानं वा खाइमं वा साइमं वा तसकाय पइट्ठिय-तहप्पगारं असनं वा जाव तसकाय पइट्ठियं अफासुयं अनेसणिज्जं ति मन्नमाणे लाभे संते नो पडिगाहेज्जा] ।

[३७५] से भिक्खू वा भिक्खुणी वा जाव सेज्जं पुण पानग-जायं जाणेज्जा, तं जहा-उस्सेइमं वा संसेइमं वा चाउलोदगं वा अन्नयरं वा तहप्पगारं पानग-जायं अहुणा-धोयं अणंबिलं अव्वोक्कंतं अपरिणयं अविद्धत्थं- अफासुयं अनेसणिज्जं ति मन्नमाणे लाभे संते नो पडिगाहेज्जा, अह पुण एव जाणेज्जा-चिराधोयं अंबिलं वुक्कंतं परिणयं विद्धत्थं फासुयं [एसणिज्जं ति मन्नमाणे लाभे संते] पडिगाहेज्जा.

से भिक्खू वा भिक्खुणी वा समाणे सेज्जं पुण पानग-जायं जाणेज्जा तं जहा-तिलोदगं वा तुसोदगं वा जवोदगं वा आयामं वा सोवीरं वा सुद्ध-वियडं वा-अन्नयरं वा तहप्पगारं पानगजायं पुव्वामेव आलोएज्जा-आउसो त्ति वा भगिनी त्ति वा दाहिसि मे एत्तो अन्नयरं पानग-जायं ?, से सेवं वदंतं परो वदेज्जा आउसंतो समणा तुमं चेवेदं पानग-जायं पडिग्गहेण वा उस्सिंचियाणं ओयत्तियाणं गिणहाहि- तहप्पगारं पानग-जायं सयं वा गिणहेज्जा परो वा से देज्जा, फासुयं जाव लाभे संते पडिगाहेज्जा ।

[३७६] से भिक्खू वा जाव से ज्जं पुण पानग-जायं जाणेज्जा-अनंतरहियाए पुढवीए जाव संताणए ओद्धट्ठु निविखत्ते सिया, असंजए भिक्खु-पडियाए उदउल्लेण वा ससिणिद्धेण वा सकसाएण वा मत्तेण वा सीओदएण वा संभोएत्ता आहट्ठु दलएज्जा, तहप्पगारं पानग-जायं अफासुयं लाभे संते नो पडिगाहेज्जा, एयं खलु तस्स भिक्खुस्स वा भिक्खुणीए वा सामग्गियं [जं सव्वट्ठेहिं समिए सहिए सया जए - त्तिबेमि] ।

पढमं अज्झयणे सत्तमो उद्देसो समत्तो

◦ अट्ठमो - उद्देसो ◦

[३७७] से भिक्खू वा भिक्खुणी वा [गाहावइ-कुलं पिंडवाय-पडियाए अणुपविट्ठे] समाणे सेज्जं पुण पानग-जायं जाणेज्जा तं जहा अंब-पानगं वा अंबाडग-पानगं वा कविट्ठ-पानगं वा मातुलिंग-पानगं वा

मुद्दिया-पानगं वा दाडिम-पानगं वा खज्जूर-पानगं वा नालिएर-पानगं वा करीर-पानगं वा कोल-पानगं वा आमलग-पानगं वा चिंचा-पानगं वा-अन्नयरं वा तहप्पगारं पानग-जायं सअट्ठियं सकणुयं सबीयगं अस्संजए भिक्खु-पडियाए छब्बेण वा दूसेण वा वालगेण वा आवीलियाण वा परिपीलियाण वा सुयक्खंधो-२, अज्झयणं-१ उद्देशो-८

परिस्सावियाण आहट्टु दलएज्जा, तहप्पगारं पानग-जायं-अफासुयं [अनेसणिज्जं ति मन्नमाणे] लाभे संते नो पडिगाहेज्जा ।

[३७८] से भिक्खू वा जाव समाणे से आगंतारेसु वा आरामागारेसु वा गाहावइ-कुलेसु वा परियावसहेसु वा-अन्न-गंधाणि वा पान-गंधाणि वा सुरभि-गंधाणि वा अग्घाय-अग्घाय- से तत्थ आसाय-पडियाए मुच्छिए गिद्धे गटिए अज्झोववन्ने अहोगंधो-अहोगंधो नो गंधमाधएज्जा ।

[३७९] से भिक्खू वा जाव समाणे सेज्जं पुण जाणेज्जा सालुयं वा बिरालियं वा सासवनालियं वा-अन्नतरं वा तहप्पगारं आमगं असत्थपरिणयं अफासुयं जाव नो पडिगाहेज्जा ।

से भिक्खू वा भिक्खुणी वा जाव समाणे सेज्जं पुण जाणेज्जा- पिप्पलिं वा पिप्पलि-चुण्णं वा मिरियं वा मिरिय-चुण्णं वा सिंगबेरं वा सिंगबेर-चुण्णं वा-अन्नतरं वा तहप्पगारं आमगं असत्थ-परिणयं-अफासुयं अनेसणिज्जं [ति मन्नमाणे] लाभे संते नो पडिगाहेज्जा ।

से भिक्खू वा भिक्खुणी वा जाव समाणे सेज्जं पुण पलंब-जायं जाणेज्जा, तंजहा- अंबपलंबं वा अंबाडगपलंबं वा तालपलंबं वा झिज्झिरिपलंबं वा सुरभिपलंबं वा सल्लइ पलंबं वा-अन्नयरं वा तहप्पगारं पलंबजायं आमगं असत्थपरिणयं-अफासुयं अनेसणिज्जं [ति मन्नमाणे लाभे संते] नो पडिगाहेज्जा ।

से भिक्खू वा भिक्खुणी वा जाव समाणे सेज्जं पुण पवाल-जायं जाणेज्जा, तं जहा- आसोत्थ-पवालं वा नग्गोह-पवालं वा पिलुंखु-पवालं वा नीपूर-पवालं वा सल्लइ-पवालं वा अन्नयरं वा तहप्पगारं पवाल-जायं आमगं असत्थपरिणयं अफासुयं अनेसणिज्जं जाव नो पडिगाहेज्जा ।

से भिक्खू वा जाव समाणे सेज्जं पुण सरडुयं-जायं जाणेज्जा तं जहा-अंब सरडुयं वा अंबाडग-सरडुयं वा कविट्ट सरडुयं वा दाडिम-सरडुयं वा बिल्ल-सरडुयं वा अन्नयरं वा तहप्पगारं सरडुयं-जायं आमगं असत्थपरिणयं अफासुयं जाव नो पडिगाहेज्जा ।

से भिक्खू वा भिक्खुणी वा [गाहावइ-कुलं पिंडवाय-पडियाए अनुपविट्ठे] समाणे सेज्जं पुण मंथु-जाय जाणेज्जा तं जहा-उंबर-मंथुं वा नग्गोह-मंथुं वा पिलुंखु-मंथुं वा आसोत्थ-मंथुं वा-अन्नयरं वा तहप्पगारं मंथु-जायं आमगं दुरुक्कं साणुबीयं-अफासुयं जाव लाभे संते नो पडिगाहेज्जा ।

[३८०] से भिक्खू वा जाव समाणे सेज्जं पुण जाणेज्जा-आमडागं वा पूइपिण्णागं वा महं वा मज्जं वा सप्पिं वा खोलं वा पुराण गंवा एत्थ पाणा अनुप्पसूयाइं जायाइं संवुड्ढाइं अव्वुक्कंताइं अपरिणया एत्थ पाणा अविद्धत्था-अफासुयं अनेसणिज्जं ति मन्नमाणे लाभे संते नो पडिगाहेज्जा ।

[३८१] से भिक्खू वा जाव समाणे सेज्जं पुण जाणेज्जा-उच्छु-मेरगं वा अंक-करेलुयं वा कसेरुगं वा सिंघाडगं वा पूतिआलुगं वा- अन्नयरं वा तहप्पगारं आमगं असत्थपरिणयं [अफासुयं अनेसणिज्जं ति मन्नमाणे लाभे संते] नो पडिगाहेज्जा ।

से भिक्खू वा जाव समाणे सेज्जं पुण जाणेज्जा-उप्पलं वा उप्पल-नालं वा भिसं वा भिसमुणालं वा पोक्खलं वा पोक्खल-विंभंगं वा अन्नतरं वा तहप्पगारं [आमगं असत्थपरिणयं- अफासुयं अनेसणिज्जं ति मन्नमाणे लाभे संते] नो पडिगाहेज्जा ।

[३८२] से भिक्खू वा [भिक्खुणी वा गाहावइ-कुलं जाव अनुपविट्ठे] समाणे सेज्जं पुण जाणेज्जा-अग्ग-बीयाणि वा मूल-बीयाणि वा खंधबीयाणि वा पोर-बीयाणि वा अग्ग-जायाणि वा मूल-सुयक्खंधो-२, अज्झयणं-१ उद्देशो-८

जायाणि वा खंध जायाणि वा पोर-जायाणि वा नन्नत्थ तक्कलि-मत्थएण वा तक्कलि-सीसेण वा नालि-एरि-मत्थएण वा खज्जूरि-मत्थएण वा ताल-मत्थएण वा- अन्नयरं वा तहप्पगारं आमं असत्थपरिणयं- [अफासुयं अनेसणिज्जं ति मन्नमाणे लाभे संते] नो पडिगाहेज्जा ।

से भिक्खू वा जाव समाणे सेज्जं पुण जाणेज्जा-उच्छुं वा कानगं अंगारियं संमिस्सं विग दूमियं वितग्गं वा कंदलीऊसुयं वा अन्नयरं वा तहप्पगारं आमं असत्थपरिणयं-अफासुयं जाव नो पडिगाहेज्जा ।

से भिक्खू वा जाव जाणेज्जा लसुणं वा लसुण-पत्तं वा लसुण-नालं वा लसुण-कंदं वा लसुण-चोयगं वा-अन्नयरं वा तहप्पगारं आमं असत्थपरिणयं जाव नो पडिगाहेज्जा ।

से भिक्खू वा जाव समाणे सेज्जं पुण जाणेज्जा-अत्थियं वा कुंभिपक्कं तिंदुगं वा वेलुगं वा कासवनालियं वा-अन्नतरं वा तहप्पगारं आमं असत्थपरिणयं जाव लाभे संते नो पडिगाहेज्जा ।

से भिक्खू वा समाणे सेज्जं पुण जाणेज्जा कणं वा कण-कुंडगं वा कण-पूयलियं वा चाउलं वा चाउल-पिट्ठं वा तिलं वा तिल-पिट्ठं वा तिल-पप्पडगं वा-अन्नतरं वा तहप्पगारं आमं असत्थपरिणयं अफासुयं अनेसणिज्जं ति मन्नमाणे लाभे संते नो पडिगाहेज्जा ।

एयं खलु तस्स भिक्खुस्स वा भिक्खुणीए वा सामग्गियं [जं सव्वट्ठेहिं समिए सहिए सया जए] - त्तिबेमि ।

पढमे अज्झयणे अद्दमो उद्देशो समत्तो

• नवमो - उद्देशो •

[३८३] इह खलु पाईणं वा पडीणं वा दाहिणं वा उदीणं वा संतेगइया सड्ढा भवन्ति गाहावई वा जाव कम्मकरीओ वा, तेसिं च णं एवं वुत्तपुव्वं भवइ- जे इमे भवन्ति समणा भगवंतो सीलमंता वयमंता गुणमंता संजया संवुडा बंभचारी उवरया मेहुणाओ धम्मओ, नो खलु एसिं कप्पइ आहाकम्मिए असणे वा पाणे वा खाइमे वा साइमे वा भोत्तए वा पायए वा, सेज्जं पुण इमं अम्मं अप्पणो अट्ठाए निट्ठियं तं जहा- असनं वा जाव सव्वमेय समणाणं निसिरामो, अवियाइं वयं पच्छा वि अप्पणो अट्ठाए असनं वा जाव चेइस्सामो, एयप्पगारं निग्घोसं सोच्चा निसम्म तहप्पगारं असनं वा जाव अफासुयं अनेसणिज्जं [ति मन्नमाणे] लाभे संते नो पडिगाहेज्जा ।

[३८४] से भिक्खू वा भिक्खुणी वा समाणे वा वसमाणे वा गामाणुगामं वा दूइज्जमाणे सेज्जं पुण जाणेज्जा-गामं वा [नगरं वा खेडं वा कब्बडं वा मडंबं वा पट्ठणं वा दोणमुहं वा आगरं वा निगमं वा आसमं वा सन्निवेसं वा] रायहाणिं वा इमंसि खलु, गामंसि वा जाव रायहाणिंसि वा- संतेगइयस्स भिक्खुस्स पुरेसंथुया वा पच्छासंथुया वा परिवसंति, तं जहा- गाहावई वा जाव कम्मकरीओ वा तहप्पगाराइं कुलाइं नो पुव्वामेव भत्ताए वा पाणा वा निक्खमेज्ज वा पविसेज्ज वा, केवली बूया

आयाणमेयं, पुरा पेहाए तस्स परो अद्वाए असनं वा पानं वा खाइमं वा साइमं वा उवकरेज्ज वा उवक्खडेज्ज वा, अह भिक्खूणं पुव्वोवदिद्वा एस पइण्णा एस हेऊ एस कारणं एस उवएसो जं नो तहप्पगाराइं कुलाइं पुव्वामेव भत्ताए वा पाणाए वा पविसेज्ज वा निक्खमेज्ज वा से तमायाए एगंतमवक्कमेज्जा एगंतमवक्कमेत्ता अनावायमसंलोए चिद्देज्जा ।

से तत्थ कालेण अनुपविसेज्जा अनुपविसेत्ता तत्थियरेयरेहिं कुलेहिं सामुदानियं एसियं सुयक्खंधो-२, अज्झयणं-१ उद्देसो-९

वेसियं पिंडवायं एसित्ता आहारं आहारेज्जा, सिया से परो कालेण अनुपविद्वस्स आहाकम्मियं असनं वा पानं वा खाइमं वा साइमं वा उवकरेज्ज वा उवक्खडेज्ज वा तं चेगइओ तुसिणीओ उवेहेज्जा, आहडमेव पच्चाइक्खिस्सामि, माइद्वाणं संफासे, नो एवं करेज्जा, से पुव्वामेव आलोएज्जा आउसो त्ति वा भगिनि त्ति वा, नो खलु मे कप्पइ आहाकम्मियं असनं वा जाव साइमं वा भोत्तए वा पायए वा मा उवकरेहि मा उवक्खडेहि, से सेवं वयंतस्स परो आहाकम्मियं असनं वा पानं वा खाइमं वा साइमं वा उवक्खडेत्ता आहट्टु दलएज्जा तहप्पगारं असनं वा० अफासुयं० लाभे संते नो पडिगाहेज्जा ।

[३८५] से भिक्खू वा [भिक्खुणी वा गाहावइ-कुलं पिंडवाय-पडियाए अणुपविद्दे] समाणे सेज्जं पुण जाणेज्जा- मंसं वा मच्छं वा भज्जिज्जमाणं पेहाए तेल्लपूयं वा आएसाए उवक्खडिज्जमाणं पेहाए नो खद्धं-खद्धं उवसंकमित्तु ओभासेज्जा नन्नत्थ गिलाणणीस्साए ।

[३८६] से भिक्खू वा जाव समाणे अन्नतरं भोयण-जायं पडिगाहेत्ता सुब्भिं-सुब्भिं भोच्चा दुब्भिं-दुब्भिं परिद्वेइ, माइद्वाणं संफासे, नो एवं करेज्जा, सुब्भिं वा दुब्भिं वा सव्वं भुंजे न छड्डए ।

[३८७] से भिक्खू वा जाव समाणे अन्नतरं वा पानगजायं पडिगाहेत्ता पुप्फं पुप्फं आविइत्ता कसायं कसायं परिद्वेइ, माइद्वाणं संफासे, नो एवं करेज्जा, पुप्फं पुप्फेति वा कसायं कसाए त्ति वा सव्वमेयं भुंजेज्जा, नो किंचि वि परिद्वेज्जा ।

[३८८] से भिक्खू वा भिक्खुणी वा बहुपरियावण्णं भोयण-जायं पडिगाहेत्ता बहवे साहम्मिया तत्थ वसंति संभोइया समणुण्णा अपरिहारिया अदूरगया, तेसिं अनालेइया अणामंतिया परिद्वेइ० माइद्वाणं संफासे नो एवं करेज्जा, से तमायाए तत्थ गच्छेज्जा गच्छेत्ता से पुव्वामेव आलोएज्जा- आउसंतो समणा इमे मे असणे वा पाणे वा खाइमे वा साइमे वा बहुपरियावण्णे तं भुंजह णं से सेवं वयंतं परो वएज्जा- आउसंतो समणा, आहारमेयं असनं वा जाव साइमं वा जावइयं-जावइयं परिसडइ तावइयं तावइयं भोक्खामो वा पाहामो वा सव्वमेयं परिसडइ सव्वमेयं भोक्खामो वा पाहामो वा ।

[३८९] से भिक्खू वा जाव सेज्जं पुण जाणेज्जा-असनं वा पानं वा खाइमं वा साइमं वा परं समुद्धिस्स बहिया नीहडं जं परेहिं असमणुण्णायं अनिसिद्धिं अफासुयं [अनेसणिज्जं ति मन्नमाणे लाभे संते] नो पडिगाहेज्जा जं परेहिं समणुण्णायं सम्मं निसिद्ध-फासुयं एसणिज्जं ति मन्नमाणे लाभे संते पडिगाहेज्जा, एयं खलु तस्स भिक्खुस्स वा भिक्खुणीए वा सामग्गियं [जं सव्वदेहिं समिए सहिए सया जए, त्तिबेमि] ।

पढमे अज्झयणे नवमो उद्देसो समत्तो

० दसमो उद्देसो ०

[३९०] से एगइओ साहारणं वा पिंडवायं पडिगाहेत्ता ते साहम्मिए अनापुच्छित्ता जस्स-जस्स इच्छइ तस्स-तस्स खद्धं-खद्धं दलइ, माइद्वाणं संफासे, नो एवं करेज्जा । से तमायाए तत्थ

गच्छेज्जा गच्छेत्ता एवं वएज्जा- आउसंतो समणा! संति मम पुरे-संथुया वा पच्छा-संथुया वा तं जहा-
आयरिए वा उवज्झाए वा पविस्ती वा थेरे वा गणी वा गणहरे वा गणावच्छेइए वा अवियाइं एएसिं खद्धं-
खद्धं दाहामि, से नेवं वयंतं परो वएज्जा- कामं खलु आउसो! अहापज्जत्तं निसिराहि जावइयं-जायइयं परो
वयइ तावइयं-तावइयं निसिरेज्जा, सव्वमेयं परो वयइ सव्वमेयं निसिरेज्जा ।

[३९१] से एगइओ मणुन्नं भोयण-जायं पडिगाहेत्ता पंतेण भोयणेणं पलिच्छाएति, मा मेयं
सुयक्खंधो-२, अज्झयणं-१ उद्देशो-१०

दाइयं संतं, ददूणं सयमाइए आयरिए वा जाव गणावच्छेइए वा, नो खलु मे कस्सइ किंचि वि दायव्वं सिया
माइद्वाणं संफासे, नो एवं करेज्जा । से तमायाए तत्थ गच्छेज्ज । गच्छेत्ता पुव्वामेव उत्ताणए हत्थे
पडिग्गहं कट्ठु- इमं खलु इमं खलुत्ति आलोएज्जा नो किंचि वि निगूहेज्जा । से एगइओ अन्नतरं
भोयणजायं पडिगाहेत्ता भद्वयं भद्वयं भोच्चा, विवण्णं विरसमाहरइ, माइद्वाणं संफासे नो एवं करेज्जा ।

[३९२] से भिक्खू वा० सेज्जं पुण जाणेज्जा-अंतरुच्छुयं वा उच्छु-गंडियं वा उच्छु-चोयगं वा
उच्छु-मेरुगं वा उच्छु-सालगं वा उच्छु-डगलं वा सिंबलिं वा सिंबलि थालगं वा अस्सिं खलु पडिग्गहियंसि
अप्पे सिया भोयणजाए बहुउज्झियधम्मिए तहप्पगारं अंतरुच्छुयं वा जाव सिंबलि-थालगं वा-अफासुयं
[अनेसणिज्जं ति मन्नमाणे लाभे संते] नो पडिगाहेज्जा ।

से भिक्खू वा जाव सेज्जं पुण जाणेज्जा- बहु अद्वियं वा मंसं वा मच्छं वा बहु कंटगं
अस्सिं खलु पडिग्गहियंसि अप्पेसिया भोयण-जाए बहुउज्झियधम्मिए तहप्पगारं बहु-अद्वियं वा मंसं वा
बहु कंटगं-अफासुयं अनेसणिज्जं ति मन्नमाणे लाभे संते नो पडिगाहेज्जा ।

से भिक्खू वा जाव समाणे सिया णं परो बहु- अद्विएण मंसेण वा मच्छेण वा
उवनिमंतेज्जा आउसंतो समणा ! अभिक्खसि बहु-अद्वियं मंसं पडिगाहित्तए ?, एयप्पगारं निग्घोसं सोच्चा
निसम्म से पुव्वामेव आलोएज्जा आउसो त्ति वा भइणि त्ति वा नो खलु मे कप्पइ से बहु-अद्वियं मंसं
पडिगाहित्तए, अभिक्खसि मे दाउं जावइयं तावइयं पोग्गलं दलयाहि, मा अद्वियाइं, से सेवं वयंतस्स परो
अभिहट्ठु अंतो-पडिग्गहगंसि बहु-अद्विय मंसं परिभाएत्ता निहट्ठु दलएज्जा, तहप्पगारं पडिग्गहं परहत्थंसि
वा परपायंसि वा अफासुयं अनेसणिज्जं [ति मन्नमाणे लाभे संते] नो पडिगाहेज्जा ।

से आहच्च पडिगाहिए सिया तं नो हित्ति वएज्जा नो अणहित्ति वएज्जा, से तमायाए
एगंत-

मवक्कमेज्जा एगंतमवक्कमेत्ता अहे आरामंसि वा अहे उवस्सयंसि वा अप्पंडे संताणए मंसगं मच्छगं
भोच्चा अद्वियाइं कंटए गहाय से तमायाए एगंतमवक्कमेज्जा एगंतवक्कमेत्ता अहे झामथंडिलंसि वा जाव
पमज्जिय-पमज्जिय तओ संजयामेव परिद्विज्जा ।

[३९३] से भिक्खु वा जाव समाणे सिया से परो अभिहट्ठु अंतो-पडिग्गहे बिलं वा लोणं
उब्भियं वा लोणं परिभाएत्ता नीहट्ठु दलएज्जा, तहप्पगारं पडिग्गहं परहत्थंसि वा परपायंसि वा- अफासुयं
अनेसणिज्जं [ति मन्नमाणे लाभे संते] नो पडिगाहेज्जा ।

से आहच्च पडिग्गहिए सिया तं च नाइदूरगए जाणेज्जा, से तमायाए तत्थ गच्छेज्जा
गच्छेत्ता पुव्वामेव आलोएज्जा- आउसो त्ति वा भइणि त्ति वा इमं ते किं जाणया दिन्नं उदाहु अजाणया
? से य भणेज्जा- नो खलु मे जाणया दिन्नं, अजाणया दिन्नं, कामं खलु आउसो, इदानिं निसिरामि तं
भुंजह वा णं परिभाएह वा णं, तं परेहिं समणुन्नायं समणुसिद्धं तओ संजयामेव भुंजेज्ज वा पीएज्ज वा,

जं च नो संचाएति भोत्तए वा पायए वा साहम्मिया तत्थं वसंति संभोइया समणुन्ना अपरिहारिया अदूरगया तेसिं अनुप्पदातव्वं सिया, नो जत्थ साहम्मिया सिया जहेव बहुपरियावन्ने कीरति तहेव कायव्वं सिया, एवं खलु तस्स भिक्खुस्स वा भिक्खुणीए वा सामग्गियं [जं सव्वट्ठेहिं समिए सहिए सया जए] - त्तिबेमि ।

पढमे अज्झयणे दसमो उद्देशो समत्तो

सुयक्खंधो-२, अज्झयणं-१ उद्देशो-११

० एगारसमो - उद्देशो ०

[३९४] भिक्खागा नामेगे एवमाहंसु समाणे वा वसमाणे वा गामाणुगामं वा दूइज्जमाणे मणुन्नं भोयण-जायं लभित्ता से भिक्खू गिलाइ, से हंदह णं तस्साहरह, से य भिक्खू नो भुंजेज्जा तुमं चेव णं भुंजेज्जासि, से एगइओ भोक्खामित्ति कट्ठु पलिउंचिय-पलिउंचिय आलोएज्जा तं जहा इमे पिंडे इमे लोए इमे तित्ते इमे कडुयए इमे कसाए इमे अंबिले इमे महुरे नो खलु एत्तो किंचि गिलाणस्स सयति त्ति माइट्ठाणं संफासे, नो एवं करेज्जा तहाठियं आलोएज्जा जहाठियं गिलाणस्स सदति-त्ति, तं तित्तयं तित्तएत्ति वा कडुयं कटुएत्ति वा कसायं कसाएत्ति वा अंबिलं अंबिलेत्ति वा महुरं महुरेत्ति वा ।

[३९५] भिक्खागा नामेगे एवमाहंसु समाणे वा वसमाणे वा गामाणुगामं दूइज्जमाणे वा मणुन्नं भोयण-जायं लभित्ता से य भिक्खू गिलाइ से हंदह णं तस्स आहरह, से य भिक्खु नो भुंजेज्जा आहरेज्जा, से णं नो खलु मे अंतराए आहरिस्सामि इच्चेयाइं आयतणाइं उवाइकम्म ।

[३९६] अह भिक्खू जाणेज्जा सत्त पिंडेसणाओ सत्त पाणेसणाओ, तत्थ खलु इमा पढमा पिंडेसणा-असंसट्ठे हत्थे असंसट्ठे मत्ते-तहप्पगारेण असंसट्ठेण हत्थेण वा मत्तेण वा असनं वा जाव साइमं वा सयं वा णं जाएज्जा परो वा से देज्जा-फासुयं [एसणिज्जं ति मन्नमाणे लाभे संते] पडिगाहेज्जा-पढमा पिंडेसणा ।

अहावरा दोच्चा पिंडेसणा-संसट्ठे हत्थे संसट्ठे मत्ते-[तहहप्पगारेण संसट्ठेण हत्थेण वा मत्तेण वा असनं वा पानं वा खाइमं वा साइमं वा सयं वा णं जाएज्जा परो वा से देज्जा फासुयं एसणिज्जं ति मन्नमाणे लाभे संते पडिगाहेज्जा]- दोच्चा पिंडेसणा ।

अहावरा तच्चा पिंडेसणा-इह खलु पाईणं वा पडीणं वा दाहिणं वा उदीणं वा संतेगइया सइढा भवंति- गाहावई वा जाव कम्मकरीओ वा तेसिं च णं अन्नतरेसु विरुवरुवेसु भायण-जाएसु

उवनिक्खित्तपुच्चे सिया तं जहा-थालंसि वा पिढरंसि वा सरगंसि वा परगंसि वा, वरगंसि वा, अह पुणेवं जाणेज्जा- असंसट्ठे हत्थे संसट्ठे मत्ते, संसट्ठे वा हत्थे असंसट्ठे मत्ते, से य पडिग्गहधारी सिया पाणिपडिग्गहिए वा, से पुव्वामेव आलोएज्जा आउसो त्ति वा भगिनि त्ति वा एएणं तुमं असंसट्ठेण हत्थेण संसट्ठेण मत्तेण संसट्ठेण वा हत्थेण असंसट्ठेण मत्तेण अस्सिं पडिग्गहगंसि वा पाणिंसि वा निहट्ठु उचित्तुं दलयाहि तहप्पगारं भोयण-जायं सयं वा णं जाएज्जा परो वा से देज्जा-फासुयं एसणिज्जं लाभे संते पडिगाहेज्जा । तच्चा पिंडेसणा ।

अहावरा चउत्था पिंडेसणा- से भिक्खू वा जाव से ज्जं पुण जाणेज्जा-पिहुयं वा [बहुरजं वा भुज्जियं वा मंथुं वा चाउलं वा] चाउल-पलंबं वा अस्सिं खलु पडिग्गहियंसि अप्पे पच्छाकम्मे अप्पे

पज्जवजाए, तहप्पगारं पिहुयं वा जाव चाउल-पलंबं वा सयं वा णं जाएज्जा परो वा से देज्जा-[फासुयं एसणिज्जं ति मन्नमाणे लाभे संते] पडिगाहेज्जा। चउत्था पिंडेसणा ।

अहावरा पंचमा पिंडेसणा- से भिक्खू वा जाव समाणे उग्गहितमेव भोयण-जायं जाणेज्जा तं जहा सरावंसि वा डिंडिमंसि वा कोसगंसि वा, अह पुण एवं जाणेज्जा- बहुपरियावन्ने पाणीसु दगलेवे, तहप्पगारं असनं वा पानं वा खाइमं वा साइमं वा सयं वा णं जाएज्जा [परो वा से देज्जा-फासुयं एसणिज्जं ति मन्नमाणे लाभे संते] पडिगाहेज्जा । पंचमा पिंडेसणा ।

अहावरा छट्ठा पिंडेसणा- से भिक्खु वा जाव पग्गहियमेव भोयण-जायं जाणेज्जा- जं च सुयक्खंधो-२, अज्झयणं-१ उद्देसो-११

सयद्वाए पग्गहियं जं च परद्वाए पग्गहियं, तं पाय-परियावन्नं तं पाणि परियावणं- फासुयं [एसणिज्जं ति मन्नमाणे लाभे संते] पडिगाहेज्जा । छट्ठा पिंडेसणा ।

अहावरा सत्तमा पिंडेसणा- से भिक्खु वा जाव समाणे बहुउज्झिय-धम्मियं भोयण-जायं जाणेज्जा, जं चऽन्ने बहवे दुपय-चउप्पय-समण-माहण-अतिहि-किवण-वणीमगा नावकंखंति तहप्पगारं उज्झिय-धम्मियं भोयण-जायं सयं वा णं जाएज्जा परो वा से देज्जा-[फासुयं एसणिज्जं ति मन्नमाणे लाभे संते] पडिगाहेज्जा । सत्तमा पिंडेसणा

इच्चेयाओ सत्त पिंडेसणाओ, अहावराओ सत्त पाणेसणाओ ।

तत्थ खलु इमा पढमा पाणेसणा- असंसद्वे हत्थे असंसद्वे मत्ते०

अहावरा दोच्चा पाणेसणा संसद्वे हत्थे संसद्वे मत्ते०

अहावरा तच्चा पाणेसणा- इह खलु पाईणं वा पडीणं वा दाहिणं वा उदीणं वा संतेगइया सइढा भवंति०

अहावरा चउत्था पाणेसणा-से भिक्खु वा जाव समाणे सेज्जं पुण पाणग-जायं जाणेज्जा तं जहा-तिलोदगं वा तुसोदगं वा जवोदगं वा आयामं वा सोवीरं वा सुद्धिवियडं वा अस्सिं खलु पडिग्गहियंसि अप्पे पच्छाकम्मे अप्पे पज्जवजाए तहप्पगारं तिलोदगं वा तुसोदगं वा जवोदगं वा आयामं वा सोवीरं वा सुद्धिवियडं वा सयं वा णं जाएज्जा परो वा से देज्जा-फासुयं एसणिज्जं जाव पडिगाहेज्जा ।

अहावरा पंचमा पाणेसणा- से भिक्खू वा जाव समाणे उग्गहितमेव पानग-जायं जाणेज्जा ।

अहावरा छट्ठा पाणेसणा-से भिक्खू वा जाव समाणे पग्गहियमेव पानग-जायं जाणेज्जा

अहावरा सत्तमा पाणेसणा- से भिक्खू वा भिक्खुणी वा गाहावइ-कुलं पिंडवाय-पडियाए अणुपविट्ठे समाणे बहुउज्झिय-धम्मियं पानग-जायं जाणेज्जा ।

[३९७] इच्चेयासिं सत्तण्हं पिंडेसणाणं सत्तण्हं पानेसणाणं अन्नतरं पडिमं पडिवज्जमाणे नो एवं वएज्जा- मिच्छा पडिवन्ना खलु एते भयंतारो अहमेगे सम्मं पडिवन्ने, जे एते भयंतारो एयाओ पडिमाओ पडिवज्जित्ताणं विहरंति जो य अहमंसि एयं पडिमं पडिवज्जित्ताणं विहरामि सव्वेऽवि ते उ जिणाणाए उवट्ठिया अन्नोन्नसमाहीए एवं च णं विहरंति, एयं खलु तस्स भिक्खुस्स वा भिक्खुणीए वा सामग्गियं० त्तिबेमि ।

पढमे अज्झयणे एगारसमो उद्देसो समत्तो

पढमं अज्झयणं - समत्तं

मुनि दीपरत्नसागरेण संशोधितः सम्पादितश्च पढमं अज्झयणं समत्तं

बीयं अज्झयणं - सेज्जा

◦ पढमो उद्देशो ◦

[३९८] से भिक्खू वा भिक्खुणी वा अभिक्खेज्जा उवस्सयं एसित्तए अनुपविसित्ता गामं वा [नगरं वा खेदं वा कब्बडं वा मडंबं वा पट्टणं वा दोणमुहं वा आगरं वा निगमं वा आसमं वा सन्निवेसं वा] रायहाणिं वा सेज्जं पुण उवस्सयं जाणेज्जा- सअंडं [सपानं सबीयं सहरियं सउसं सउदयं सउत्तिंग-पणग-दग-मट्ठिय-मक्कडा] संताणयं तहप्पगारे उवस्सए नो ठाणं वा सेज्जं वा निसीहियं वा चेतेज्जा ।
सुयक्खंधो-२, अज्झयणं-२ उद्देशो-१

से भिक्खू वा भिक्खुणी वा सेज्जं पुण उवस्सयं जाणेज्जा-अप्पंडं अप्पपानं जाव अप्प संताणगं तहप्पगारे उवस्सए पडिलेहिक्का पमज्जित्ता तओ संजयामेव ठाणं वा सेज्जं वा निसीहियं वा चेतेज्जा ।

सेज्जं पुण उवस्सयं जाणेज्जा- अस्सिंपडियाए एगं साहम्मियं समुद्धिस्स पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्छेज्जं अनिसट्ठं अभिहडं आहट्ठु चेतेति, तहप्पगारे उवस्सए पुरिसंतरकडे वा अपुरिसंतरकडे वा जाव अनासेविते वा नो ठाणं वा सेज्जं वा निसीहियं वा चेतेज्जा ।

[सेज्जं पुण उवस्सयं जाणेज्जा- अस्सिंपडियाए **बहवे साहम्मिया** समुद्धिस्स पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्छेज्जं अनिसट्ठं अभिहडं आहट्ठु चेतेति तहप्पगारे उवस्सए पुरिसंतरकडे वा अपुरिसंतरकडे वा अत्तट्ठिए वा अनत्तट्ठिए वा परिभुत्ते वा अपरिभुत्ते वा आसेविते वा अनासेविते वा नो ठाणं वा सेज्जं वा निसीहियं वा चेतेज्जा ।

सेज्जं पुण उवस्सयं जाणेज्जा- अस्सिंपडियाए **एगं साहम्मिणं** समुद्धिस्स पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्छेज्जं अनिसट्ठं अभिहडं आहट्ठु चेतेति तहप्पगारे उवस्सए पुरिसंतरकडे वा अपुरिसंतरकडे वा जाव अनासेविते वा नो ठाणं वा सेज्जं वा निसीहियं वा चेतेज्जा ।

सेज्जं पुण उवस्सयं जाणेज्जा- अस्सिंपडियाए **बहवे साहम्मिणीओ** समुद्धिस्स पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्छेज्जं अनिसट्ठं अभिहडं आहट्ठु चेतेति तहप्पगारे उवस्सए पुरिसंतरकडे जाव अनासेविते वा नो ठाणं वा सेज्जं वा निसीहियं वा चेतेज्जा] -

से भिक्खू वा भिक्खुणी वा सेज्जं पुण उवस्सयं जाणेज्जा- बहवे समण-माहण-अतिहि-क्विण-वणीमए पगणिय-पगणिय समुद्धिस्स पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्छेज्जं अनिसट्ठं अभिहडं आहट्ठु चेएइ तहप्पगारे उवस्सए पुरिसंतरकडे वा अपुरिसंतरकडे वा जाव अनासेविए वा नो ठाणं वा सेज्जं वा निसीहियं वा चेतेज्जा ।

से भिक्खू वा भिक्खुणी वा सेज्जं पुण उवस्सयं जाणेज्जा-बहवे समण-माहण-अतिहि-क्विण-वणीमए समुद्धिस्स पाणाइं भूयाइं जीवाइं सत्ताइं जाव अनासेविए नो ठाणं वा सेज्जं वा निसीहियं वा चेतेज्जा अह पुणेवं जाणेज्जा- पुरिसंतरकडे जाव आसेविए पडिलेहिक्का पमज्जित्ता तओ संजयामेव ठाणं वा सेज्जं वा निसीहियं वा चेतेज्जा ।

से भिक्खू वा भिक्खुणी वा सेज्जं पुणं उवस्सयं जाणेज्जा- अस्संजए भिक्खुपडियाए कडिए वा उक्कंबिए वा छन्ने वा लित्ते वा घट्टे वा मट्टे वा संमट्टे वा संपघूमिए वा तहप्पगारे उवस्सए अपुरिसंतरकडे [अनत्तट्टिए अपरिभुत्ते] अनासेविए नो ठाणं वा सेज्जं वा निसीहियं वा चेतेज्जा, अह पुणेवं जाणेज्जा पुरिसंतरकडे आसेविए पडिलेहिक्का पमज्जित्ता तओ संजयामेव ठाणं वा सेज्जं वा निसीहियं वा चेतेज्जा ।

[३९९] से भिक्खू वा भिक्खुणी वा सेज्जं पुण उवस्सयं जाणेज्जा- अस्संजए भिक्खु-पडियाए खुड्डियाओ दुवारियाओ महल्लियाओ कुज्जा, जहा पिंडेसणाए जाव संथारगं संथारेज्जा बहिया वा निन्नक्खु तहप्पगारे उवस्सए अपुरिसंतरकडे [अणत्तट्टिए अपरिभुत्ते] अनासेविते नो ठाणं वा सेज्जं वा सुयक्खंधो-२, अज्झयणं-२ उद्देसो-१

निसीहियं वा चेतेज्जा, अह पुणेवं जाणेज्जा- पुरिसंतरकडे आसेविए पडिलेहिक्का पमज्जित्ता तओ संजयामेव ठाणं वा सेज्जं वा निसीहियं वा चेतेज्जा ।

से भिक्खू वा भिक्खुणी वा सेज्जं पुण उवस्सयं जाणेज्जा- अस्संजए भिक्खु-पडियाए उदगप्पसूयाणि कंदाणि वा मूलाणि वा पत्ताणि वा पुप्फाणि वा फलाणि वा बीयाणि वा हरियाणि वा ठाणाओ ठाणं साहरति बहिया वा निन्नक्खु तहप्पगारे उवस्सए अपुरिसंतरकडे जाव नो ठाणं वा सेज्जं वा निसीहियं वा चेतेज्जा अह पुणेवं जाणेज्जा-पुरिसंतरकडे [अत्तट्टिए परिभुत्ते आसेविए पडिलेहिक्का पमज्जित्ता तओ संजयामेव ठाणं वा सेज्जं वा निसीहियं वा] चेतेज्जा ।

से भिक्खू वा भिक्खुणी वा सेज्जं पुण उवस्सयं जाणेज्जा- अस्संजए भिक्खुपडियाए पीढं वा फलगं वा निस्सेणिं वा उद्दूलं वा ठाणाओ ठाणं साहरइ बहिया वा निन्नक्खु तहप्पगारे उवस्सए अपुरिसंतरकडे जाव नो ठाणं वा सेज्जं वा निसीहियं वा चेतेज्जा अह पुणेवं जाणेज्जा- पुरिसंतरकडे जाव चेतेज्जा ।

[४००] से भिक्खू वा भिक्खुणी वा सेज्जं पुण उवस्सयं जाणेज्जा- तं जहा-खंधंसि वा मंचंसि वा मालंसि वा पासायंसि वा हम्मियतलंसि वा अन्नतरंसि वा तहप्पगारंसि अंतलिक्खजायंसि, नन्नत्थ आगाढानागाढेहिं कारणेहिं ठाणं वा सेज्जं वा निसीहियं वा चेतेज्जा । से य आहच्च चेतिते सिया नो तत्थ सीओदग-वियडेण वा उसिणोदग-वियडेण वा हत्थाणि वा पादाणि वा अच्छीणि वा दंताणि वा मुहं वा उच्छोलेज्जा वा प्होएज्जा वा। नो तत्थ ऊसढं पगरेज्जा, तं जहा-उच्चारं वा पासवणं वा खेलं वा सिंधाणं वा वंतं वा पित्तं वा पूतिं वा सोणियं वा अन्नयरं वा सरीरावयवं वा, केवली बूया आयाणमेयं,

से तत्थ ऊसढं पगरेमाणे पयलेज्ज वा पवडेज्ज वा से तत्थ पयलमाणे वा पवडमाणे वा हत्थं वा [पायं वा बाहुं वा ऊरुं वा] उदरं वा सीसं वा अन्नतरं वा कायंसि इंदिय-जालं लूसेज्ज वा पाणाणि वा भूयाणि वा जीवाणि वा सत्ताणि वा अभिहणेज्ज वा [वत्तेज्ज वा लेसेज्ज वा संघसेज्ज वा संघट्टेज्ज वा परियावेज्ज वा किलामेज्ज वा ठाणाओ ठाणं संकामेज्ज वा जीविआओ] ववरोवेज्ज वा अह भिक्खूणं पुव्वोवदिट्ठा एस पइण्णा [एस हेऊ एस कारणं एस उवएसो] जं तहप्पगारे उवस्सए अंतलिक्खजाए नो ठाणं वा सेज्जं वा निसीहियं वा चेतेज्जा ।

[४०१] से भिक्खू वा भिक्खुणी वा सेज्जं पुण उवस्सयं जाणेज्जा- सइत्थियं सखुड्डं सपसुभत्तपानं तहप्पगारे सागारिए उवस्सए नो ठाणं वा सेज्जं वा निसीहियं वा चेतेज्जा आयाणमेय भिक्खुस्स गाहावइ-कुलेण सद्धिं संवसमाणस्स अलसगे वा विसूइया वा छड्डी वा उव्वाहेज्जा अन्नतरे वा

से दुक्खे रोगातंके समुप्पज्जेज्जा, अस्संजए कलुण-पडियाए तं भिक्खुस्स गातं तेल्लेण वा घण्ण वा नवनीएण वा वसाए वा अब्भंगेज्ज वा मक्खेज्ज वा सिणाणेण वा कक्केण वा लोद्धेण वा वण्णेण वा चुण्णेण वा पउमेण वा आघंसेज्ज वा पघंसेज्ज वा उव्वलेज्ज वा उव्वट्टेज्ज वा सीओदग-वियडेण वा उसिणोदग वियडेण वा उच्छोलेज्ज वा प्होएज्ज वा सिणावेज्ज वा सिंचेज्ज वा दारुणा वा दारुपरिणामं कट्ठु अगनिकायं उज्जालेज्ज वा पज्जालेज्ज वा उज्जालेत्ता पज्जालेत्ता कायं आयावेज्ज वा पयावेज्ज वा, अह भिक्खूणं पुव्वोवदिट्ठा एस पइण्णा एस उवएसो जं तहप्पगारे सागारिए उवस्सए नो ठाणं वा सेज्जं वा निसीहियं वा चेतेज्जा ।

[४०२] आयाणमेयं भिक्खुस्स सागारिए उवस्सए संवसमाणस्स- इह खलु गाहावई वा सुयक्खंधो-२, अज्झयणं-२ उद्देशो-१

[गाहावइणीओ वा गाहावइ-पुत्ता वा गाहावइ-धूयाओ वा गाहावइ सुण्हाओ वा धाईओ वा दासा वा दासीओ वा कम्मकरा वा] कम्मकरीओ वा अन्नमन्नं अक्कोसंति वा बंधंति वा रुंभंति वा उद्वेति वा, अह भिक्खू णं उच्चावयं मणं नियच्छेज्जा- एते खलु अन्नमन्नं अक्कोसंतु वा मा वा अक्कोसंतु जाव मा वा उद्वेतु, अह भिक्खूणं पुव्वोवदिट्ठा एस पइण्णा जाव जं तहप्पगारे सागारिए उवस्सए नो ठाणं वा सेज्जं वा निसीहियं वा चेतेज्जा ।

[४०३] आयाणमेयं भिक्खुस्स गाहावईहिं सद्धिं संवसमाणस्स, इह खलु गाहावई अप्पणो सअट्ठाए अगनिकायं उज्जालेज्जा वा पज्जालेज्ज वा विज्झावेज्ज वा, अह भिक्खू उच्चावयं मणं नियच्छेज्जा- एते खलु अगनिकायं उज्जालेतु वा मा वा उज्जालेतु पज्जालेतु वा मा वा पज्जालेतु विज्झावेतु वा मा वा विज्झावेतु, अह भिक्खूणं पुव्वोवदिट्ठा एस पइण्णा जं तहप्पगारे सागारिए उवस्सए नो ठाणं वा सेज्जं वा निसीहियं वा चेतेज्जा ।

[४०४] आयाणमेयं भिक्खुस्स गाहावईहिं सद्धिं संवसमाणस्स- इह खलु गाहावइस्स कुंडले वा गुणे वा मणी वा मोत्तिए वा हिरण्णे वा सुवण्णे वा कडगाणि वा तुडियाणि वा तिसरागाणि वा पालंबाणि वा हारे वा अद्धहारे वा एगावली वा मुत्तावली वा कनगावली वा रयणावली वा तरुणियं वा कुमारिं अलंकिय-विभूसियं पेहाए, अह भिक्खू उच्चावयं मणं नियच्छेज्जा- एरिसिया वा सा नो वा एरिसिया- इति वा णं बूया इति वा णं मणं साएज्जा, अह भिक्खूणं पुव्वोवदिट्ठा [एस पइण्णा एस हेऊ एस कारणं एस उवएसो] जं तहप्पगारे उवस्सए नो ठाणं वा सेज्जं वा निसीहियं वा चेतेज्जा ।

[४०५] आयाणमेयं भिक्खुस्स गाहावईहिं सद्धिं संवसमाणस्स- इह खलु गाहावइणीओ वा गाहावइ-धूयाओ वा गाहावइ-सुण्हाओ वा गाहावइ-धाईओ वा गाहावइ-दासीओ वा गाहावइ-कम्मकरीओ वा तासिं च णं एवं वुत्तपुव्वं भवइ- जे इमे भवंति समणा, भगवंतो [सीलमंता वयमंता गुणमंता संजया संवुडा बंभचारी] उवरया मेहुणाओ धम्माओ, नो खलु एतेसिं कप्पइ मेहुणं धम्मं परियारणाए आउट्टित्तए, जा य खलु एहिं सद्धिं मेहुणं धम्मं परियारणाए आउट्टेज्जा पुत्तं खलु सा लभेज्जा-ओयस्सिं तेयस्सिं वच्चस्सिं जसस्सिं संपराइयं आलोयणदरिसणिज्जं एयप्पगारं निग्घोसं सोच्चा निसम्म तासिं च णं अन्नयरी सइढी

तं तवस्सिं भिक्खुं मेहुणं धम्मं पडियारणाए आउट्टावेज्जा, अह भिक्खूणं पुव्वोवदिट्ठा [एस पइण्णा जाव उवएसो] जं तहप्पगारे सागारिए उवस्सए नो ठाणं वा सेज्जं वा निसीहियं वा चेतेज्जा, एयं खलु तस्स भिक्खुस्स वा भिक्खुणीए वा सामग्गिय [जं सव्वट्टेहिं समिए सहिए सयाजए - त्तिबेमि]।

बीए अज्झयणे पढमो उद्देशो समत्तो

◦ बीओ - उद्देशो ◦

[४०६] गाहावई नामेगे सुइ-समायारा भवन्ति, भिक्खू य असिणाणए मोयसमायारे से तग्गंधे दुग्गंधे पडिक्खे पडिलोभे यावि भवइ, जं पुव्वकम्मं तं पच्छाकम्मं जं पच्छाकम्मं तं पुव्वकम्मं तं भिक्खु-पडियाए वट्टमाणे करेज्जा वा नो वा करेज्जा, अह भिक्खूणं पुव्वोवदिट्ठा [एस पइण्णा जाव एस उवएसो] जं तहप्पगारे उवस्सए नो ठाणं वा [सेज्जं वा निसीहियं वा] चेतैज्जा ।

[४०७] आयाणमेयं भिक्खुस्स गाहावईहिं सद्धिं संवसमाणस्स- इह खलु गाहावइस्स अप्पणो सअट्ठाए विरूवरूवे भोयण-जाए उवक्खडिए सिया अह पच्छा भिक्खु पडियाए असनं वा पानं वा खाइमं वा साइमं वा उक्खडेज्ज वा उवकरेज्ज वा तं च भिक्खू अभिक्खेज्जा भोत्तए वा पायए वा विय-सुयक्खंधो-२, अज्झयणं-२ उद्देशो-२

ट्टित्तए वा, अह भिक्खूणं पुव्वोवदिट्ठा [एस पइण्णा जाव जं] जं तहप्पगारे उवस्सए नो ठाणं वा जाव चेतैज्जा ।

[४०८] आयाणमेयं भिक्खुस्स गाहावइणा सद्धिं संवसमाणस्स- इह खलु गाहावइस्स अप्पणो सयट्ठाए विरूवरूवाइं दारुयाइं भिन्न-पुव्वाइं भवन्ति, अह पच्छा भिक्खुपडियाए विरूवरूवाइं दारुयाइं भिंदेज्ज वा किणेज्ज वा पामिच्चेज्ज वा दारुणा वा दारुपरिणामं कट्ठु अगनिकायं उज्जालेज्ज वा पज्जालेज्ज वा तत्थ भिक्खू अभिक्खेज्जा आयावेत्तए वा पयावेत्तए वा वियट्टित्तए वा, अह भिक्खूणं पुव्वोवदिट्ठा [एस पइण्णा जाव जं] जं तहप्पगारे उवस्सए नो ठाणं वा जाव चेतैज्जा ।

[४०९] से भिक्खू वा भिक्खुणी वा उच्चार-पासवणेणं उव्वाहिज्जमाणे राओ वा विआले वा गाहावइ-कुलस्स दुवारबाहं अवंगुणेज्जा, तेणे य तस्संधिचारी अनुपविसेज्जा, तस्स भिक्खुस्स नो कप्पइ एवं वडित्तए-अयं तेण पविसइ वा नो वा पविसइ उवल्लियइ वा नो वा उवल्लियइ अइपतति वा नो वा अइपतति वदति वा नो वा वदति तेण हडं अन्नेण हडं तस्स हडं अन्नस्स हडं अयं तेणे अयं उवचरए अयं हंता अयं एत्थमकासी, तं तवस्सिं भिक्खुं अतेणं तेणं ति संकति, अह भिक्खूणं पुव्वोवदिट्ठा [एस पइण्णा एस हेऊ एस कारणं एस उवएसो जं तहप्पगारे उवस्सए नो ठाणं वा सेज्जं वा निसीहियं वा] चेतैज्जा ।

[४१०] से भिक्खू वा भिक्खुणी वा सेज्जं पुण उवस्सयं जाणेज्जा-तण-पुंजेसु वा पलाल-पुंजेसु वा सअंडे [सपाणे सबीए सहरिए सउस सउदए सउत्तिंग-पणग-दग मट्ठिय-मक्कडा] संताणए तहप्पगारे उवस्सए नो ठाणं वा सेज्जं वा निसीहियं वा चेतैज्जा

से भिक्खू वा भिक्खुणी वा सेज्जं पुण उवस्सयं जाणेज्जा-तण-पुंजेसु वा पलाल-पुंजेसुं वा अप्पंडे [अप्पपाणे जाव अप्पुत्तिंग-पणग-दग-मट्ठिय-मक्कडासंताणए तहप्पगारे उवस्सए पडिलेहित्ता पमज्जित्ता तओ संजयामेव ठाणं वा सेज्जं वा निसीहियं वा] चेतैज्जा ।

[४११] से आगंतारेसु वा आरामगारेसु वा गाहावइ-कुलेसु वा परियावसहेसु वा अभिक्खणं-अभिक्खणं साहम्मिएहिं ओवयमाणेहिं नोवएज्जा ।

[४१२] से आगंतारेसु वा आरामगारेसु वा गाहावइ-कुलेसु वा परियावसहेसु वा जे भयंतारो उडुबद्धियं वा वासावासियं वा कप्पं उवातिणावित्ता तत्थेव भुज्जो संवसन्ति, अयमाउसो ! कालाइक्कंत-किरिया वि भवइ ।

[४१३] से आगंतारेसु वा आरामागारेसु वा गाहावइ-कुलेसु वा परियावसहेसु वा जे भयंतारो उडुबद्धियं वा वासावासियं वा कप्पं उवातिणावित्ता तं दुगुणा तिगुणेण वा अपरिहरित्ता तत्थैव भुज्जो संवसंति अयमाउसो ! उवट्ठाण-किरिया वि भवइ ।

[४१४] इह खलु पाइणं वा पडीणं वा दाहीणं वा उदीणं वा संतेगइया सइढा भवन्ति, तं जहा-गाहावई वा जाव कम्मकरीओ वा तेसिं च णं आयार-गोयरे नो सुनिसंते भवइ, तं सद्धमाणेहिं तं पत्तियमाणेहिं तं रोयमाणेहिं बहवे समण-माहण-अतिहि-किवण-वणीमए समुद्धिस्स तत्थ-तत्थ अगारीहिं अगाराइं चेतिताइं भवन्ति, तं जहा-आएसणाणि वा आयतणाणि वा देवकुलाणि वा सहाओ वा पवाणि वा पणिय-गिहाणि वा पणिय-सालाओ वा जाण-गिहाणि वा जाण सालाओ वा सुहकम्मंताणि वा दब्भ-कम्मंताणि वा बद्धकम्मंताणि वा वक्ककम्मंताणि वा वनकम्मंताणि वा इंगालकम्मंताणि वा कट्ठकम्मं-सुयक्खंधो-२, अज्झयणं-२ उद्देसो-२

ताणि वा सुसाणकम्मंताणि वा संतिकम्मंताणि वा गिरिकम्मंताणि वा कंदरकम्मंताणि वा सेलोवट्ठाण-कम्मंताणि वा भवणगिहाणि वा जे भयंतारो तहप्पगाराइं आएसणाणि वा जाव भवणगिहाणि वा तेहिं ओवयमाणेहिं ओवयंति अयमाउसो अभिक्कंत-किरिया वि भवइ ।

[४१५] इह खलु पाइणं वा पडीणं वा दाहीणं वा उदीणं वा संतेगइया सइढा भवन्ति तं जहा-गाहावई वा जाव कम्मकरीओ वा तेसिं च णं आयार-गोयरे नो सुनिसंते भवइ तं सद्धमाणेहिं तं पत्तियमाणेहिं] तं रोयमाणेहिं बहवे समण-माहण-अतिहि-किविण-वणीमए समुद्धिस्स तत्थ-तत्थ अगारीहिं अगाराइं चेतिताइं भवन्ति, तं जहा- आएसणाणि वा जाव भवणगिहाणि वा, जे भयंतारो तहप्पगाराइं आएसणाणि वा जाव भवणगिहाणि वा तेहिं अनोवयमाणेहिं ओवयंति अयमाउसो ! अनभिक्कंत-किरिया वि भवति ।

[४१६] इह खलु पाइणं वा जाव कम्मकरीओ वा, तेसिं च णं एवं वुत्तपुव्वं भवइ, जे इमे भवन्ति समणा भगवंतो सीलमंतो उवरया मेहुणाओ धम्माओ, नो खलु एसिं भयंताराणं कप्पइ आहाकम्मिए उवस्सए वत्थए, से जाणिमाणि अम्हं अप्पणो सअट्ठाए चेतिताइं भवन्ति, तं जहा-आएसणाणि वा जाव भवणगिहाणि वा, सव्वाणि ताणि समणाणं निसिरामो, अवियाइं वयं पच्छा अप्पणो सअट्ठाए चेतिस्सामी तं जहा- आएसणाणि वा जाव भवणगिहाणि वा एयप्पगारं निग्घोसं सोच्चा निसम्म जे भयंतारो तहप्पगाराइं आएसणाणि वा जाव भवणगिहाणि वा, उवागच्छंति उवागच्छित्ता इतरेतरेहिं पाहुडेहिं वट्ठंति, अयमाउसो ! वज्ज-किरिया वि भवइ ।

[४१७] इह खलु पाइणं वा पडीणं वा दाहीणं वा उदीणं वा संतेगइया सइढा भवन्ति, तं जहा-गाहावई वा जाव कम्मकरीओ वा, तेसिं च णं आयार-गोयरे नो सुनिसंते भवइ तं सद्धमाणेहिं तं पत्तियमाणेहिं तं रोयमाणेहिं बहवे समण-माहण-अतिहि-किवण-वणीमगे पगणिय-पगणिय समुद्धिस्स तत्थ-तत्थ अगारीहिं अगाराइं चेतिताइं भवन्ति तं जहा-आएसणाणि वा जाव भवणगिहाणि वा जे भयंतारो तहप्प-गाराइं आएसणाणि वा जाव भवणगिहाणि वा उवागच्छंति उवागच्छित्ता इतरेतरेहिं पाहुडेहिं वट्ठंति, अयमाउसो ! महावज्ज-किरिया वि भवइ ।

[४१८] इह खलु पाइणं वा पडीणं वा दाहीणं वा उदीणं वा संतेगइया सइढा भवन्ति तं जहा-गाहावई वा जाव कम्मकरीओ वा तेसिं च णं आयार-गोयरे नो सुनिसंते भवइ तं सद्धमाणेहिं तं पत्तियमाणेहिं तं रोयमाणेहिं बहवे समण-माहण-अतिहि-किवण-वणीमगे समुद्धिस्स तत्थ-तत्थ अगारीहिं

अगाराइं चेतिआइं भवन्ति, तं जहा- आएसणाणि वा जाव भवणगिहाणि वा, जे भयंतारो तहप्पगाराइं आएसणाणि वा जाव भवणगिहाणि वा उवागच्छन्ति उवागच्छित्ता इतरेतरेहिं पाहुडेहिं वट्ठन्ति, अयमाउसो! सावज्ज-किरिया वि भवइ ।

[४१९] इह खलु पाईणं वा पडीणं वा दाहीणं वा उदीणं वा संतेगइया जाव तं रोयमाणेहिं एगं समणजायं समुद्धिस्स तत्थ-तत्थ अगारीहिं अगाराइं चेतिताइं भवन्ति, तं जहा- आएसणाणि वा जाव भवणगिहाणि वा महया पुढविकाय-समारंभेणं जाव महया तसकाय-समारंभेणं महया विरूवरूवेहिं पावकम्म-किच्चेहिं तं जहा- छायणओ लेवणओ संथार-दुवार-पिहणओ सीतोदए वा परिट्ठवियपुच्चे भवइ अगनिकाए वा उज्जालियपुच्चे भवइ, जे भयंतारो तहप्पगाराइं आएसणाणि वा जाव भवणगिहाणि वा उवागच्छन्ति उवागच्छित्ता इयराइयरेहिं पाहुडेहिं० दुपक्खं ते कम्मं सेवन्ति, अयमाउसो! महासावज्ज-किरिया सुयक्खंधो-२, अज्झयणं-२ उद्देसो-२

वि भवइ ।

[४२०] इह खलु पाईणं वा पडीणं वा दाहीणं वा उदीणं वा संतेगइया सड्ढा भवन्ति तं जहा- गाहावई वा जाव कम्मकरीओ वा तेसिं च णं आयार-गोयरे नो सुनिसन्ते भवइ तं सदहमाणेहिं तं पत्तियमाणेहिं तं रोयमाणेहिं अप्पणो सअट्ठाए तत्थ-तत्थ अगारीहिं अगाराइं चेतिताइं भवन्ति तं जहा- आएसणाणि वा जाव भवणगिहाणि वा महया पुढविकाय-समारंभेणं जाव महया तसकाय-समारंभेणं महया विरूवरूवेहिं पावकम्म-किच्चेहिं तं जहा- छायणओ लेवणओ संथार-दुवार-पिहणओ सीतोदए वा परिट्ठ-वियपुच्चे भवइ अगनिकाए वा उज्जालियपुच्चे भवइ, जे भयंतारो तहप्पगाराइं आएसणाणि वा जाव भवणगिहाणि वा उवागच्छन्ति उवागच्छित्ता इयराइयरेहिं पाहुडेहिं एगपक्खं ते कम्मं सेवन्ति, अयमाउसो! अप्पसावज्ज-किरिया वा भवइ एयं खलु तस्स भिक्खुस्स वा भिक्खुणीए वा सामग्गियं [जं सव्वेडेहिं समिए तहिए सया जए - त्तिबेमि ।

बीए अज्झयणे बीओ उद्देसो समत्तो

० तइओ - उद्देसो ०

[४२१] से य नो सुलभे फासुए उंछे अहेसणिज्जे नो य खलु सुद्धे इमेहिं पाहुडेहिं, तं जहा- छायणओ लेवणओ संथार-दुवार-पिहणओ पिंडवाएसणाओ, से भिक्खु चरिया-रए ठाण-रए निसीहिया-रए सेज्जा-संथार-पिंडवाएसणा-रए संति भिक्खुणो एवमक्खाइणो उज्जुया नियाग-पडिवन्ना अमायं कुव्वमाणा वियाहिया, संतेगइया पाहुडिया उक्खित्तपुच्चा भवइ एवं निक्खित्तपुच्चा भवइ, परिभाइय पुच्चा भवइ, परिभुत्तपुच्चा भवइ, परिट्ठवियपुच्चा भवइ, एवं वियागरेमाणे समियाए वियागरेति ? हंता भवइ ।

[४२२] से भिक्खु वा भिक्खुणी वा सेज्जं पुण उवस्सयं जाणेज्जा- खुड्डियाओ खुड्डुवारियाओ निययाओ नीयाओ संनिरुद्धाओ भवन्ति, तहप्पगारे उवस्सए राओ वा विआले वा निक्खममाणे वा पविसमाणे वा पुरा हत्थेण पच्छा पाएण वा तओ संजयामेव निक्खमेज्ज वा पविसेज्ज वा, केवली बूया आयाणमेयं- जे तत्थ समणाण वा माहणाण वा छत्तए वा मत्तए वा दंडए वा लट्ठिया वा भिसिया वा नालिया वा चेलं वा चिलिमिली वा चम्मए वा चम्मकोसए वा चम्म-छेदणए वा दुब्बद्धे दुन्निक्खित्ते अनिकं पे चलाचले- भिक्खु य राओ वा वियाले वा निक्खममाणे वा पविसमाणे वा पयलेज्ज वा, पवडेज्ज वा,...

से तत्थ पयलमाणे वा पवडमाणे वा हत्थं वा पायं वा [बाहुं वा ऊरुं वा उदरं वा सीसं वा अन्नयरं वा कायंसि] इंदिय-जायं लूसेज्ज वा पाणाणि वा भूयाणि वा जीवाणि वा सत्ताणि वा अभिहणेज्ज वा [वत्तेज्ज वा लेसेज्ज वास संघसेज्ज वा संघट्टेज्ज वा परियावेज्ज वा किलामेज्ज वा ठाणाओ ठाणं संकमेज्ज वा जीवियाओ] ववरोवेज्ज वा, अह भिक्खुणं पुव्वोवदिट्ठा एस पइण्णा एस हेऊ एस कारणं एस उवएसो जं तहप्पगारे उवस्सए पुरा हत्थेणं पच्छा पाएणं तओ संजयामेव निक्खमेज्ज वा पविसेज्ज वा ।

[४२३] से आगंतारेसु वा आरामागारेसु वा गाहावइ-कुलेसु वा परियावसहेसु वा अनुवीइ उवस्सयं जाएज्जा, जे तत्थ ईसरे जे तत्थ समहिट्ठाए ते उवस्सयं अणुन्नवेज्जा- कामं खलु आउसो ! अहालंदं अहापरिण्णातं वसिस्सामो जाव आउसंतो ! जाव आउसंतस्स उवस्सए जाव साहम्मियाइं ततो उवस्सयं गिण्हिस्सामो तेण परं विहरिस्सामो ।

सुयक्खंधो-२, अज्झयणं-२ उद्देशो-३

[४२४] से भिक्खु वा भिक्खुणी वा जस्सुवस्सए संवसेज्जा तस्स पुव्वामेव नाम-गोयं जाणेज्जा, तओ पच्छा तस्स गिहे निमंतेमाणस्स वा अनिमंतेमाणस्स वा असनं वा पानं खाइमं वा साइमं वा- अफासुयं [अनेसणिज्जं ति मन्नमाणे लाभे संते] नो पडिगाहेज्जा ।

[४२५] से भिक्खु वा भिक्खुणी वा सेज्जं पुण उवस्सयं जाणेज्जा- ससागारियं सागणियं सउदयं नो पण्णस्स निक्खमण-पवेसाए नो पण्णस्स वायण-[पुच्छणपरियट्ठणानुपेह-धम्माणुओग] चिंताए तहप्पगारे उवस्सए नो ठाणं वा सेज्जं वा निसीहियं वा चेतैज्जा ।

[४२६] से भिक्खु वा भिक्खुणी वा सेज्जं पुण उवस्सयं जाणेज्जा- गाहावइ-कुलस्स मज्झमज्झेणं गंतुं पंथं पडिबद्धं वा नो पण्णस्स जाव चिंताए तहप्पगारे उवस्सए नो ठाणं वा सेज्जं वा निसीहियं वा चेतैज्जा ।

[४२७] से भिक्खु वा भिक्खुणी वा सेज्जं पुण उवस्सयं जाणेज्जा- इह खलु गाहावई वा जाव कम्मकरीओ वा अन्नमन्नमक्कोसंति वा [बंधंति वा रुंभंति वा] उद्वेति वा नो पण्णस्स निक्खमण-पवेसाए -जाव धम्माणुओग चिंताए, सेवं नच्चा तहप्पगारे उवस्सए नो ठाणं वा जाव चेतैज्जा ।

[४२८] से भिक्खु वा भिक्खुणी वा सेज्जं पुण उवस्सयं जाणेज्जा- इह खलु गाहावई वा जाव कम्मकरीओ वा अन्नमन्नस्स गायं तेल्लेण वा घएण वा नवनीएण वा वसाए वा अब्भंगे ति वा मक्खे ति वा नो पण्णस्स जाव धम्माणुओग चिंताए तहप्पगारे उवस्सए नो ठाणं वा जाव चेतैज्जा ।

[४२९] से भिक्खू वा भिक्खुणी वा सेज्जं पुण उवस्सयं जाणेज्जा इह खलु गाहावई वा जाव कम्मकरीओ वा अन्नमन्नस्स गायं सिणाणेण वा कक्केण वा लोद्धेण वा वण्णेण वा चुण्णेण वा पउमेण वा आघंसंति वा पघंसंति वा उव्वलैति वा उव्वट्ठैति वा नो पण्णस्स चिंताए तहप्पगारे उवस्सए नो ठाणं वा [सेज्जं वा निसीहियं वा] चेतैज्जा ।

[४३०] से भिक्खु वा भिक्खुणी वा सेज्जं पुण उवस्सयं जाणेज्जा- इह खलु गाहावई वा जाव कम्मकरीओ वा अन्नमन्न गायं सीओदग-वियडेण वा उसिणोदग वियडेण वा उच्छोलैति वा पधोवैति वा सिंचंति वा सिणावैति वा नो पण्णस्स चिंताए तहप्पगारे उवस्सए नो ठाणं वा जाव चेतैज्जा ।

[४३१] से भिक्खु वा भिक्खुणी वा सेज्जं पुण उवस्सयं जाणेज्जा- इह खलु गाहावई वा जाव कम्मकरीओ वा निगिणा ठिआ निगिणा उवल्लीणा मेहुणधम्मं विन्नवेति रहस्सियं वा मंतं मंतेति

नो पण्णस्स [निकखमण-पवेसाए नो पण्णस्स वायण-पुच्छण-परियट्ठणाणुपेह-धम्मणाओग] चिंताए तहप्पगारे उवस्सए नो ठाणं वा सेज्जं वा निसीहियं वा चेतेज्जा ।

[४३२] से भिक्खु वा भिक्खुणी वा सेज्जं पुण उवस्सय जाणेज्जा आइण्णसंलेख नो पण्णस्स जाव चिंताए तहप्पगारे उवस्सए नो ठाणं वा जाव चेतेज्जा ।

[४३३] से भिक्खु वा भिक्खुणी वा अभिक्खेज्जा संथारगं एसित्तए सेज्जं पुण संथारगं जाणेज्जा-सअंड [सपानं सबीअं सहरियं सउसं सउदयं सउत्तिंग-पणग-दग-मट्ठिय-मक्कडा] संताणगं तहप्पगारं संथारगं-[अफासुयं अनेसणिज्जं ति मन्नमाणे] लाभे संते नो पडिगाहेज्जा ।

से भिक्खु वा भिक्खुणी वा सेज्जं पुण संथारगं जाणेज्जा-अप्पंड अप्पपाण अप्पबीअं अप्पहरियं अप्पोसं अप्पुदयं अप्पुत्तिंग-पणग-दग-मट्ठिय-मक्कडा संताणगं गरुयं तहप्पगारं संथारगं-अफासुयं अनेसणिज्जं ति मन्नमाणे लाभे संते नो पडिगाहेज्जा ।

सुयक्खंधो-२, अज्झयणं-२ उद्देशो-३

से भिक्खु वा भिक्खुणी वा सेज्जं पुण संथारगं जाणेज्जा- अप्पंड जाव संताणगं लहुयं अपाडिहारियं तहप्पगारं संथारगं- जाव लाभे संते नो पडिगाहेज्जा ।

से भिक्खु वा भिक्खुणी वा सेज्जं पुण संथारगं जाणेज्जा- अप्पंड जाव संताणगं लहुयं पाडिहारियं नो अहाबद्धं तहप्पगारं संथारगं- जाव लाभे संते नो पडिगाहेज्जा ।

से भिक्खु वा भिक्खुणी वा सेज्जं पुण संथारगं जाणेज्जा-अप्पंड जाव अप्प संताणगं लहुयं पाडिहारियं अहाबद्धं तहप्पगारं संथारगं-[फासुयं एसणिज्जं ति मन्नमाणे] लाभे संते पडिगाहेज्जा ।

[४३४] इच्चेयाइं आयतणाइं उवाइक्कम्म अह भिक्खु जाणेज्जा इमाहिं चउहिं पडिमाहिं संथारगं एसित्तए, तत्थ खलु इमा पढमा पडिमा- से भिक्खू वा भिक्खुणी वा उट्ठिसिय-उट्ठिसिय संथारगं जाएज्जा, तं जहा-इक्कडं वा कट्ठिणं वा जंतुयं वा परगं वा मोरगं वा तणगं वा सोरगं वा कुसं वा कुच्चगं वा पिप्पलगं वा पलालगं वा, से पुव्वामेव आलोएज्जा आउसोत्ति वा भगिनित्ति वा दाहिसि मे एत्तो अन्नयरं संथारगं ?, तहप्पगारं सयं वा णं जाएज्जा परो वा से देज्जा- फासुयं एसणिज्जं [ति मन्नमाणे] लाभे संते पडिगाहेज्जा- पढमा पडिमा ।

[४३५] अहावरा दोच्चा पडिमा- से भिक्खु वा भिक्खुणी वा पेहाए संथारगं जाएज्जा, तं जहा-गाहावइं वा गाहावइ-भारियं वा गाहावइ-भगिनिं वा गाहावइ पुत्तं वा गाहावइ घूयं वा सुण्हं वा घाई वा दासं वा दासिं वा कम्मकरं वा कम्मकरिं वा से पुव्वामेव आलोएज्जा- आउसो त्ति वा भगिनि त्ति वा दाहिसि मे एत्तो ? अन्नयरं संथारगं तहप्पगारं संथारगं सयं वा णं जाएज्जा परो वा से देज्जा- फासुयं एसणिज्जं० पडिगाहेज्जा- दोच्चा पडिमा ।

अहावरा तच्चा पडिमा- से भिक्खू वा भिक्खुणी वा जस्सुवस्सए संवसेज्जा ते तत्थ अहा-समन्नागए, तं जहा- इक्कडे वा [कट्ठिणे वा जंतुए वा परगे वा मोरगे वा तणगे वा सारगे वा कुसे वा कुच्चगे वा पिप्पले वा] पलाले वा तस्स लाभे संवसेज्जा तस्स अलाभे उक्कुडुए वा नेसज्जिए वा विहरेज्जा- तच्चा पडिमा ।

[४३६] अहावरा चउत्था पडिमा- से भिक्खु वा भिक्खुणी वा अहासंथडमेव संथारगं जाएज्जा, तं जहा- पुढविसिलं वा कट्ठविसिलं वा अहासंथडमेव, तस्स लाभे संवसेज्जा तस्स अलाभे उक्कुडुए वा नेसज्जिए वा विहरेज्जा- चउत्था पडिमा ।

[४३७] इच्चेयाणं चउण्हं पडिमाणं अन्नयरं पडिमं पडिवज्जमाणे तं चेव जाव अन्नोऽन्न-समाहीए एवं च णं विहरंति ।

[४३८] से भिक्खु वा भिक्खुणी वा अभिक्खेज्जा संथारगं पच्चप्पिणित्तिए, से ज्जं पुण संथारगं जाणेज्जा- सअंडं जाव संताणगं तहप्पगारं संथारगं नो पच्चप्पिणेज्जा ।

[४३९] से भिक्खु वा भिक्खुणी वा अभिक्खेज्जा संथारगं पच्चप्पिणित्ते सेज्जं पुण संथारगं जाणेज्जा- अप्पंडं अप्पपानं जाव अप्पुत्तिंग-पणग-दग-मट्ठिय-मक्कडा संताणगं तहप्पगारं संथारगं पडिलेहिय पडिलेहिय पमज्जिय-पमज्जिय आयाविय-आयाविय विहुणिय विहुणिय तओ संजयामेव पच्चप्पिणेज्जा ।

[४४०] से भिक्खू वा भिक्खुणी वा समाणे वा वसमाणे वा गामाणुगामं दूइज्जमाणे वा पुव्वामेव णं पन्नस्स उच्चारपासवणभूमिं पडिलेहेज्जा, केवली बूया आयाणमेयं- अपडिलेहियाए उच्चार-सुयक्खंधो-२, अज्झयणं-२ उद्देशो-३

पासवणभूमीए, भिक्खू वा भिक्खुणी वा राओ वा विआले वा उच्चारपासवणं परिद्वेमाणे पयलेज्ज वा पवडेज्ज वा, से तत्थ पयलमाणे वा पवडमाणे वा हत्थं वा पायं वा लूसेज्ज वा पाणाणि वा [भूयाणि वा जीवाणि वा सत्ताणि वा अभिहणेज्ज वा वत्तेज्ज वा लेसेज्ज वा संघसेज्जं वा संघट्टेज्ज वा परिया-वेज्ज वा किलामेज्ज वा ठाणाओ ठाणं संकामेज्ज वा जीविआओ] ववरोवेज्ज वा, अह भिक्खूणं पुव्वोवदिट्ठा एस पइण्णा एस हेऊ एस कारणं एस उवएसो जं पुव्वामेव पन्नस्स उच्चारपासवणभूमिं पडिलेहेज्जा ।

[४४१] से भिक्खू वा भिक्खुणी वा अभिक्खेज्जा सेज्जा-संथारग-भूमिं पडिलेहित्ते नन्नत्थ आयरिएण वा उवज्झाएण वा [पवत्तीए वा थेरेण वा गणिणा वा गणहरेण वा] गणावच्छेइएण वा बालेण वा वुड्ढेण वा सेहेण वा गिलाणेण वा आएसेण वा अंतेण वा मज्झेण वा समेण वा विसमेण वा पवाएण वा निवाएण वा, तओ संजयामेव पडिलेहिय-पडिलेहिय पमज्जिय-पमज्जिय तओ संजयामेव बहु-फासुयं सेज्जा-संथारगं संथरेज्जा ।

[४४२] से भिक्खू वा भिक्खुणी वा बहु-फासुयं सेज्जा-संथारगं संथरेत्ता अभिक्खेज्जा बहु-फासुए सेज्जा-संथारए दुरुहित्ते ।

से भिक्खु वा भिक्खुणी वा बहु-फासुए सेज्जा-संथारए दुरूहमाणे से पुव्वामेवं ससीसोवरियं कायं पाए य पमज्जिय पमज्जिय तओ संजयामेव बहु-फासुए सेज्जा-संथारगे दुरुहेज्जा दुरुहेत्ता तओ संजयामेव बहु-फासुए सेज्जा-संथारए सएज्जा ।

[४४३] से भिक्खू वा भिक्खुणी वा बहु-फासुए सेज्जा-संथारए सयमाणे नो अन्न-मन्नस्स हत्थेण हत्थं पाएण पायं काएण कायं आसाएज्जा, से अनासायमाणे तओ संजयामेव बहु-फासुए सेज्जा-संथारए सएज्जा

से भिक्खू वा भिक्खुणी वा उस्सासमाणे वा नीसासमाणे वा कासमाणे वा छीयमाणे वा जंभायमाणे वा उड्डुए वा वायनिसग्गे वा करेमाणे पुव्वामेव आसयं वा पोसयं वा पाणिणा परिपिहित्ता तओ संजयामेव ऊससेज्ज वा नीससेज्ज वा कासेज्ज वा छीएज्ज वा जंभाएज्ज वा उड्डुयं वा वायनिसग्गं वा करेज्जा ।

[४४४] से भिक्खू वा भिक्खुणी वा- समा वेगया सेज्जा भवेज्जा, विसमा वेगया सेज्जा भवेज्जा, पवाया वेगया सेज्जा भवेज्जा, निवाता वेगया सेज्जा भवेज्जा, ससरक्खा वेगया सेज्जा भवेज्जा,

अप्प-ससरक्खा वेगया सेज्जा भवेज्जा, सदंस-मसगा वेगया सेज्जा भवेज्जा, अप्प-दंस-मसगा वेगया सेज्जा भवेज्जा, सपरिसाडा वेगया सेज्जा भवेज्जा, अपरिसाडा वेगया सेज्जा भवेज्जा, सउवसग्गा वेगया सेज्जा भवेज्जा, निरुवसग्गा वेगया सेज्जा भवेज्जा, तहप्पगाराहिं सेज्जाहिं संविज्जमाणाहिं पग्गहिततराणं विहारं विहरेज्जा, नो किंचि वि गिलाएज्जा, एयं खलु तस्स भिक्खुस्स वा भिक्खुणीए वा सामग्गियं जं सव्वदेहिं समिए सहिए सया जएज्जासि - त्तिबेमि ।

बीए अज्झयणे तइओ उद्देसो समत्तो

बीअं अज्झयणं समत्तं

मुनि दीपरत्नसागरेण संशोधितः सम्पादितश्च बिइअं अज्झयणं समत्तं

सुयक्खंधो-२, अज्झयणं-३ उद्देसो-१

तइयं अज्झयणं- इरिया

० पढमो - उद्देसो ०

[४४५] अब्भुवगए खलु वासावासे अभिपवुद्धे बहवे पाणा अभिसंभूया बहवे बीया अहुणोब्भिन्ना अंतरा से मग्गा बहुपाणा बहुबीया [बहुहरिया बहुओसा बहुउदया बहुउत्तिंगपणगदग-मट्टिय-मक्कडा] संताणगा अनभिककंता पंथा नो विण्णाया मग्गा सेवं नच्चा नो गामाणुगामं दूइज्जेज्जा, तओ संजयामेव वासावासं उवल्लिएज्जा ।

[४४६] से भिक्खू वा भिक्खुणी वा से ज्जं पुण जाणेज्जा-गामं वा [नगरं वा खेडं वा कब्बडं वा मडंबं वा पट्ठणं वा दोणमुहं वा आगरं वा निगमं वा आसमं वा सन्निवेसं वा] रायहाणिं वा इमंसि खलु गामंसि वा जाव रायहाणिसि वा नो महती विहारभूमी नो महती वियारभूमी नो सुलभे पीढ-फलग-सेज्जा संथारए नो सुलभे फासुए उंछे अहेसणिजे जत्थ बहवे समण-माहण-अतिहि किवण-वणीमगा उवागया उवागमिस्संति य अच्चाइण्णा बित्ती- नो पन्नस्स निक्खमण-पवेसाए जाव धम्मणुओग चिंताए सेवं नच्चा तहप्पगारं गामं वा नगरं वा जाव रायहाणिं वा नो वासावासं उवल्लिएज्जा ।

से भिक्खू वा भिक्खुणी वा से ज्जं पुण जाणेज्जा-गामं वा जाव रायहाणिं वा इमंसि खलु गामंसि वा जाव रायहाणिसि वा-महती विहारभूमी महती वियारभूमी सुलभे जत्थ पीढ-फलग-सेज्जा-संथारए सुलभे फासुए उंछे अहेसणिज्जे नो जत्थ बहवे समण-[माहण-अतिहि-किवण-वणीमगा] उवागया उवागमिस्संति य अप्पाइण्णा वित्ती-[पण्णस्स निक्खमण-पवेसाए पण्णस्स वायण-पुच्छण-परियट्ठणुपेह-धम्मणुओग-चिंताए सेवं नच्चा तहप्पगारं गामं वा जाव] रायहाणिं वा तओ संजयामेव वासावासं उवल्लिएज्जा ।

[४४७] अह पुणेणं जाणेज्जा-चत्तारि मासा वासावासाणं वीइक्कंता हेमंताण य पंच-दस-रायकप्पे परिवुसिए अंतरा से मग्गा बहुपाणा जाव संताणगा नो जत्थ बहवे समण जाव उवागया उवागमिस्संति, सेवं नच्चा नो गामाणुगामं दूइज्जेज्जा । अह पुणेवं जाणेज्जा- चत्तारि मासा वासाणं वीइक्कंता हेमंताण य पंच दस-रायकप्पे परिवुसिए अंतरा से मग्गे अप्पंडा जाव संताणगा बहवे जत्थं समण जाव उवागया उवागमिस्संति य, सेवं नच्चा तओ संजयामेव गामाणुगामं दूइज्जेज्जा ।

[४४८] से भिक्खू वा भिक्खुणी वा गामाणुगामं दूइज्जमाणे पुरओ जुगमायं पेहमाणे दहूण तसे पाणे- उद्धट्ट पायं रीएज्जा साहट्ट पायं रीएज्जा वित्तिरिच्छं वा कट्ट पायं रीएज्जा, सति परक्कमे संजतामेव परक्कमेज्जा, नो उज्जुयं गच्छेज्जा० तओ संजयामेव गामाणुगामं दूइजेज्जा ।

से भिक्खू वा भिक्खुणी वा गामाणुगामं दूइज्जमाणे अंतरा से पाणाणि वा बीयाणि वा हरियाणि वा उदए वा मट्टिया वा अविद्धत्थे सति परक्कमे [संजतामेव परक्कमेज्जा] नो उज्जुयं गच्छेज्जा, तओ संजयामेव गामाणुगामं दूइजेज्जा ।

[४४९] से भिक्खू वा भिक्खुणी वा गामाणुगामं दूइज्जमाणे अंतरा से विरूवरूवाणि पच्चंतिगाणि दस्सुगायतणाणि मिलक्खूणि अनायरियाणि दुस्सन्नप्पाणि दुप्पन्नवणिज्जाणि अकाल-पडिबोहीणि अकालपरिभोइणि सति लाढे विहारए संथरमाणेहिं जनवएहिं नो विहारवत्तियाए पवज्जेज्जा गमणाए, केवली बूया आयाणमेयं, ते णं बाला अयं तेणे अयं उवचए अयं तओ आगए त्ति कट्ट तं भिक्खुं अक्कोसेज्ज वा [बंधेज्ज वा रुंभेज्ज वा] उद्वेज्ज वा वत्थं पडिग्गहं कंबलं पायपुंछणं अच्छिंदेज्ज सुयक्खंधो-२, अज्झायणं-३ उद्देसो-१

वा अवहरेज्ज वा परिभवेज्ज वा अह भिक्खूणं पुव्वोवदिट्ठा [एस पइण्णा एस हेऊ एस कारणं एस उवएसो] जं नो तहप्पगाराणि विरूवरूवाणि पच्चंतियाणि दस्सुगायतणाणि विहार-वत्तियाए पवज्जेज्जा गमणाए तओ संजायामेव गामाणुगामं दूइजेज्जा ।

[४५०] से भिक्खू वा भिक्खुणी वा गामाणुगामं दूइज्जमाणे अंतरा से अरायाणि वा गणरायाणि वा जुवरायाणि वा दोरज्जाणि वा वेरज्जाणि वा विरुद्धरज्जाणि वा सति लाढे विहारए संथरमाणेहिं जनवएहिं नो विहार-वत्तियाए पवज्जेज्ज गमणाए केवली बूया आयाणमेयं- ते णं बाला तं चेव जाव गमणाए तओ संजयामेव गामाणुगामं दूइजेज्जा ।

[४५१] से भिक्खू वा भिक्खुणी वा गामाणुगामं दूइज्जमाणे अंतरा से विहं सिया, सेज्जं पुण विहं जाणेज्जा- एगाहेण वा दुयाहेण वा तियाहेण वा चउयाहेण वा पंचाहेण वा पाउणेज्ज वा नो पाउणेज्ज वा तहप्पगारं विहं अनेगाहगमणिज्जं सति लाढे [विहारए संथरमाणेहिं जनवएहिं] नो विहार-वत्तियाए पवज्जेज्जा गमणाए, केवली बूया आयाणमेयं, अंतरा से वासे सिया पाणेसु वा पणएसु वा बीएसु वा हरिएसु वा उदाएसु वा मट्टियासु वा अविद्धत्थाए, अह भिक्खुणं पुव्वोवदिट्ठा [एस पइण्णा एस हेऊ एस कारणं एस उवएसो] जं तहप्पगारं विहं अनेगाह गमणिज्जं जाव गमणाए तओ संजयामेव गामाणुगामं दूइजेज्जा ।

[४५२] से भिक्खू वा भिक्खुणी वा गामाणुगामं दूइज्जमाणे अंतरा से नावासंतारिमे उदए सिया, से ज्जं पुण नावं जाणेज्जा- अस्संजए भिक्खु-पडियाए किणेज्ज वा पामिच्चेज्ज वा नावाए वा नावं-परिणामं कट्ट थलाओ वा नावं जलंसि ओगाहेज्जा जलाओ वा नावं थलंसि उक्कसेज्जा पुण्णं वा नावं उस्सिंचेज्जा सण्णं वा नावं उप्पीलावेज्जा तहप्पगारं नावं उड्ढगामिणिं वा अहेगामिणिं वा तिरियगामिणिं वा परं जोयणमेराए अद्धजोयणमेराए वा अप्पतरो वा भुज्जतरो वा नो दुरुहेज्ज गमणाए ।

से भिक्खू वा भिक्खुणी वा पुव्वामेव तिरिच्छ-संपातिमं नावं जाणेज्जा, जाणेत्ता से तमायाए एगंतमवक्कमेज्जा एगंतमवक्कमेत्ता भंडगं पडिलेहेज्जा पडिलेहेत्ता एगओ भोयणभंडगं करेज्जा करेत्ता ससीसोवरियं कायं पाए य पमज्जेज्जा पमज्जेत्ता सागारं भत्तं पच्चक्खाएज्जा पच्चक्खाएत्ता एगं पायं जले किच्चा एगं पायं थले किच्चा तओ संजयामेव नावं दुरुहेज्जा ।

[४५३] से भिक्खु वा भिक्खुणी वा नावं दुरुहमाणे नो नावाए पुरओ दुरुहेज्जा नो नावाए मग्गओ दुरुहेज्जा नो नावाए मज्झतो दुरुहेज्जा नो बाहाओ पगिज्झय-पगिज्झय अंगुलियाए उवदंसिय-उवदंसिय ओणमिय-ओणमिय उन्नमिय-उन्नमिय निज्झाएज्जा, से णं परो नावा-गतो नावा-गयं वएज्जा-आउसंतो, समणा एयं ता तुमं नावं उक्कसाहि वा वोक्कसाहि वा खिवाहि वा रज्जुयाए वा गहाय आकसाहि, नो से तं परिणं परिजाणेज्जा, तुसिणीओ उवेहेज्जा ।

से णं परो नावा-गओ नावा-गयं वएज्जा- आउसंतो समणा नो संचाएसि तुमं नावं उक्कसित्तेण वा वोक्कसित्तेण वा खिवित्ताए वा रज्जुयाए वा गहाय आकसित्तेण आहर एतं नावाए रज्जुयं सयं चेव णं वयं नावं उक्कसिस्सामो वा वोक्कसिस्सामो वा खिविस्सामो वा रज्जुयाए वा गहाय आकसिस्सामो, नो से तं परिणं परिजाणेज्जा तुसिणीओ उवेहेज्जा ।

से णं परो नावा-गओ नावा-गयं वएज्जा- आउसंतो समणा एयं ता तुमं नावं अलित्तेण वा पिहएण वा वंसेण वा वलएण वा अवल्लएण वा वाहेहि नो से तं परिणं परिजाणेज्जा तुसिणीओ सुयक्खंधो-२, अज्झयणं-३ उद्देसो-१

उवेहेज्जा से णं परो नावा-गओ नावा-गयं वदेज्जा-आउसंतो समणा एयं ता तुमं नावाए उदयं हत्थेण वा पाएण वा मत्तेण वा पडिग्गहेण वा नावा-उस्सिंचणेण वा उस्सिंचाहि नो से तं परिणं परिजाणेज्जा तुसिणीओ उवेहेज्जा ।

से णं परो नावा-गओ नावा-गयं वएज्जा- आउसंतो समणा एतं ता तुमं नावाए उत्तिंगं हत्थेण वा पाएण वा बाहुणा वा ऊरुणा वा उदरेण वा सीसेण वा काएण वा नावा- उस्सिंचणेण वा चेलेण वा मट्ठियाए वा कुसपत्तएण वा कुविंदएण वा पिहेहि नो से तं परिणं परिजाणेज्जा तुसिणीओ उवेहेज्जा

से भिक्खू वा भिक्खुणी वा नावाए उत्तिंगेण उदयं आसवमाणं पेहाए उवरुवरि नावं कज्जलावेमाणं पेहाण नो परं उवसंकमित्तु एवं बूया-आउसंतो ! गाहावई एयं ते नावाए उदयं उत्तिंगेण आवसति उवरुवति वा नावा कज्जलावेति, एतप्पगारं मणं वा वायं वा नो पुरओ कट्ठु विहरेज्जा, अप्पुस्सुए अबहिलेस्से एगंतगएण अप्पाणं विउसेज्जा समाहीए, तओ संजयामेव नावा-संतारिमे उदए अहारियं रीएज्जा, एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समिए सहिए सदा जइज्जासि - त्तिबेमि ।

तइए अज्झयणे पढमो उद्देसो समत्तो

◦ बीओ - उद्देसो ◦

[४५४] से णं परो नावा-गओ नावा-गयं वदेज्जा- आउसंतो ! समणा एयं ता तुमं छत्तगं वा [मत्तगं वा दंडगं वा लट्ठियं वा भिसियं वा नालियं वा चेवं वा चिलिमिलिं वा चम्मगं वा चम्म-

कोसगं वा] चम्म-छेयणगं वा गेणहाहि एयाणि तुमं विरूवरूवाणि सत्थ-जायाणि धारेहि० एयं ता तुमं दारगं वा दारिगं वा पज्जेहि, नो से तं परिणं परिजाणेज्जा तुसिणीओ उवेहेज्जा ।

[४५५] से णं परो नावा-गए नावा-गयं वदेज्जा- आउसंतो ! एस णं समणे नावाए भंडभारिए भवइ, से णं बाहाए गहाय नावाओ उदगंसि पक्खिवह एतप्पगारं निग्घोसं सोच्चा निसम्म से य चीवरधारी सिया खिप्पामेव चीवरामि उव्वेइडिज्ज वा निव्वेइडिज्ज वा उप्फेसं वा करेज्जा अह पुणेवं जाणेज्जा अभिक्कंत कूरकम्मा खलु बाला बाहाहिं गहाय नावाओ उदगंसि पक्खिवेज्जा से पुव्वामेव वएज्जा-आउसंतो ! गाहावइ मा मेत्तो बाहाए गहाय नावाओ उदगंसि पक्खिवह, सयं चेव णं अहं नावातो उदगंसि

ओगाहिस्सामि, से नेवं वयंतं परो सहसा बलसा बाहाहिं गहाय नावाओ उदगंसि पक्खिवेज्जा तं नो सुमणे सिया नो दुम्मणे सिया नो उच्चावयं मणं नियच्छेज्जा नो तेषिं बालाणं घाताए वहाए समुद्देज्जा अप्पुस्सुए [अबहिलेस्से एगंत-गएणं अप्पाणं वियोसेज्ज] समाहीए तओ संजयामेव उदगंसि पवेज्जा ।

[४५६] से भिक्खू वा भिक्खुणी वा उदगंसि पवमाणे नो हत्थेण हत्थं पाएण पायं काएण कायं आसाएज्जा, से अनासायमाणे तओ संजयामेव उदगंसि पवेज्जा ।

से भिक्खू वा भिक्खुणी वा उदगंसि पवमाणे नो उम्मग्ग-निमग्गियं करेज्जा, मामेयं उदगं कण्णेसु वा अच्छीसुं वा नक्कंसि वा मुहंसि वा परियावज्जेज्जा, तओ संजयामेव उदगंसि पवेज्जा ।

से भिक्खू वा भिक्खुणी वा उदगंसि पवमाणे दोब्बलियं पाउणेज्जा खिप्पामेव उवहिं विगिंचेज्ज वा विसोहेज्ज वा नो चेव णं सातिज्जेज्जा, अह पुणेवं जाणेज्ज-पारए सिया उदगाओ तीरं पाउणित्तए, तओ संजयामेव उदउल्लेण वा ससिणिद्धेण वा काएण उदगतीरे चिद्देज्जा ।

सुयक्खंधो-२, अज्झयणं-३ उद्देसो-२

से भिक्खू वा भिक्खुणी वा उदउल्लं वा ससिणिद्धं वा कायं नो आमज्जेज्ज वा पमज्जेज्ज वा संतिहेज्ज वा निल्लिहेज्ज वा उव्वलेज्ज वा उव्वट्ठेज्ज वा आयावेज्ज वा पयावेज्ज वा अह पुण एवं जाणेज्जा- विगओदए मे काए वोच्छिन्न सिणेहे काए तहप्पगारं कायं आमज्जेज्ज वा पयावेज्ज वा तओ संजयामेव गामाणुगामं दूइज्जेज्जा ।

[४५७] से भिक्खू वा भिक्खुणी वा गामाणुगामं दूइज्जमाणे नो परेहिं सद्धिं परिजविय परिजविय गामाणुगामं दूइज्जेज्जा, तओ संजयामेव गामाणुगामं दूइज्जेज्जा ।

[४५८] से भिक्खू वा भिक्खुणी वा गामाणुगामं दूइज्जमाणे अंतरा से जंघासंतारिमे उदगे सिया, से पुव्वामेव ससीसोवरियं कायं पादे य पमज्जेज्जा, पमज्जेत्ता सागारं भत्तं पच्चक्खाएज्जा, पच्च-क्खाएत्ता एगं पायं जले किच्चा एगं पायं थले किच्चा तओ संजयामेव जंघासंतारिभे उदए अहारियं रीएज्जा ।

से भिक्खू वा भिक्खुणी वा जंघासंतारिमे उदगे अहारियं रीयमाणे नो हत्थेण हत्थं पाएण पायं काएण कायं आसाएज्जा से अनासायमाणे तओ संजयामेव जंघासंतारिमे उदए अहारियं रीएज्जा ।

से भिक्खू वा भिक्खुणी वा जंघासंतारिमे उदए अहारियं रीयमाणे नो सायं वडियाए नो परदाह-वडियाए महइमहालयंसि उदगंसि कायं विउसेज्जा, तओ संजयामेव जंघासंतारिमे उदए अहारियं रीएज्जा, अह पुणेवं जाणेज्जा-पारए सिया उदगाओ तीरं पाउणित्तए, तओ संजयामेव उदउल्लेण वा ससिणिद्धेण वा काएण दगतीरए चिद्देज्जा ।

से भिक्खू वा भिक्खुणी वा उदउल्लं वा कायं ससिणिद्धं वा कायं नो आमज्जेज्ज वा पमज्जेज्ज वा, अह पुणेवं जाणेज्जा- विगतोदए मे काए छिन्नसिनेहे मे काए तहप्प-गारं कायं आमज्जेज्ज वा जाव पयावेज्ज वा तओ संजयामेव गामाणुगामं दूइज्जेज्जा ।

[४५९] से भिक्खू वा भिक्खुणी वा गामाणुगामं दूइज्जमाणे नो मट्ठियागएहिं पाएहिं हरियाणि छिंदिय-छिंदिय विकुज्जिय-विकुज्जिय विफालिए-विफालिय उम्मग्गेणं हरिय-वहाए गच्छेज्जा, जमेयं पाएहिं मट्ठियं खिप्पामेव हरियाणि अवहरंतुं, माइट्ठाणं संफासे, नो एवं करेज्जा, से पुव्वामेव अप्पहारियं मग्गं पडिलेहेज्जा तओ संजयामेव गामाणुगामं दूइज्जेज्जा ।

से भिक्खू वा भिक्खुणी वा गामाणुगामं दूइज्जमाणे अंतरा से वप्पाणि वा फलिहाणि वा पागाराणि वा तोरणाणि वा अग्गलाणि वा अग्गल-पासगाणि वा गइडाओ वा दरीओ वा सइ परक्कमे संजयामेव परक्कमेज्जा, नो उज्जुय गच्छेज्जा केवली बूया आयाणमेयं, से तत्थ परक्कममाणे पयलेज्ज वा पवडेज्ज वा से तत्थ पयलमाणे वा पवडमाणे वा रुक्खाणि वा गुच्छाणि वा गुम्माणि वा लयाओ वा वल्लीओ वा तणाणि वा गहणाणि वा हरियाणि वा अवलंबिय-अवलंबिय उत्तरेज्जा जे तत्थ पाडिपहिया उवागच्छंति ते पाणी जाएज्जा तओ संजयामेव अवलंबिय(२) उत्तरेज्जा तओ गामाणुगामं दूइज्जेज्जा ।

से भिक्खू वा भिक्खुणी वा गामाणुगामं दूइज्जमाणे अंतरा से जवसाणि वा सगडाणि वा रहाणि वा सचक्काणि वा परचक्काणि वा सेणं वा विरूवरूवं सन्निविट्ठं पेहाए सइ परक्कमे संजयामेव परक्कमेज्जा नो उज्जुयं गच्छेज्जा, से णं परो सेणागओ वएज्जा- आउसंतो, एस णं समणे सेणाए अभिनिवारियं करेइ, से णं बाहाए गहाय आगसह, से णं परो बाहाहिं गहाय आगसेज्जा, तं नो सुमणे सिया नो दुम्मणे सिया नो उच्चवयं मणं नियच्छेज्जा नो तेसिं बालाण घाताए वहाए समुट्ठेज्जा, अप्पु-सुयक्खंधो-२, अज्झायणं-३ उद्देसो-२

स्सुए अबहिलेस्से एगंतगएणं अप्पाणं वियोसेज्ज समाहीए, तओ संजयामेव गामाणुगामं दूइज्जेज्जा ।

[४६०] से भिक्खू वा भिक्खुणी वा गामाणुगामं दूइज्जमाणे अंतरा से पाडिपहिया उवागच्छेज्जा, ते णं पाडिपहिया एवं वदेज्जा- आउसंतो समणा, केवइए एस गामे वा जाव रायहाणी वा केवइया एत्थ आसा हत्थी गामपिंडोलगा मणुस्सा परिवसंति ? से बहुभत्ते बहुउदए बहुजने बहुजवसे से अप्पभत्ते अप्पुदए अप्पजणे अप्पजवसे ?, एयप्पगाराणि पसिणाणि नो पुच्छिज्जा, एयप्पगाराणि पसिणाणि पुट्ठो वा अपुट्ठो वा नो आइक्खेज्जा एवं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं [समिए सहिए सया जएज्जासि - त्ति बेमि] ।

तइए अज्झायणे बीओ उद्देसो समत्तो

• तइओ - उद्देसो •

[४६१] से भिक्खू वा भिक्खुणी वा गामाणुगामं दूइज्जमाणे अंतरा से वप्पाणि वा [फलिहाणि वा पागाराणि वा तोरणाणि वा अग्गलाणि वा अग्गल-पासागाणि वा गइडाओ वा] दरीओ वा कूडागाराणि वा पासादाणि वा नूम-गिहाणि वा रुक्ख-गिहाणि वा पव्वय-गिहाणि वा रुक्खं वा चेइय-कडं थूभं वा चेइयकडं आएसणाणि वा [आयतणाणि वा देवकुलाणि वा सहाओ वा पवाओ वा पणिय-गिहाणि वा पणिय-सालाओ वा जाण-गिहाणि वा जाण-सालाओ वा सुहा-कम्मंताणि वा दब्भ-कम्मंताणि वा वद्ध-कम्मंताणि वा वक्क-कम्मंताणि वा वण-कम्मंताणि वा इंगाल-कम्मंताणि वा कट्ठ-कम्मंताणि वा सुसाण-कम्मंताणि वा संति-कम्मंताणि वा गिरि-कम्मंताणि वा कंदर-कम्मंताणि वा सेलोवट्ठाण-कम्मंताणि वा] भवनगिहाणि वा नो बाहाओ पगिज्झिय-पगिज्झिय अंगुलियाए उद्धिसिय-उद्धिसिय ओण-

मिय-ओणमिय उन्नमिय-उन्नमिय निज्झाएज्जा तओ संजयामेव गामाणुगामं दूइज्जेज्जा ।

से भिक्खू वा भिक्खुणी वा गामाणुगामं दूइज्जमाणे अंतरा से कच्छाणि वा दवियाणि वा नूमाणि वा वलयाणि वा गहणाणि वा गहण-विदुग्गाणि वा वनानि वा वन-विदुग्गाणि वा पव्वयाणि वा पव्वय-विदुग्गाणि वा अगडाणि वा तलागाणि वा दहाणि वा नदीओ वा वावीओ वा पोक्खरिणीओ वा दीहियाओ वा गुंजालियाओ वा सराणि वा सर-पंतियाणि वा सर-सरपंतियाणि वा नो बाहाओ पगिज्झिय-पगिज्झिय जाव निज्झाएज्जा, तओ संजयामेव गामाणुगामं दूइज्जेज्जा, केवली बूया आयाणमेयं जे तत्थ

मिगा वा पसुया वा पक्खी वा सरीसिवा वा सीहा वा जलचरा वा थलचरा वा खहचरा वा सत्ता ते उत्तसेज्ज वा वित्तसेज्ज वा वाडं वा सरणं वा कंखेज्ज चारे त्ति मे अयं समणे, अह भिक्खूणं पुव्वोवदिट्ठा जाव जं नो बाहाओ पगिज्झिय-पगिज्झिय जाव निज्झाएज्जा तओ संजयामेव आयरिय-उवज्झाएहिं सद्धिं गामाणु-गामं दूइज्जेज्जा ।

[४६२] से भिक्खू वा भिक्खुणी वा आयरिय-उवज्झाएहिं सद्धिं गामाणुगामं दूइज्जमाणे नो आयरिय-उवज्झायस्स हत्थेण हत्थं [पाएण पायं काएण काय आसाएज्जा से] अनासायमाणे तओ संजयामेव आयरिय-उवज्झाएहिं सद्धिं गामाणुगामं दूइज्जेज्जा ।

से भिक्खू वा भिक्खुणी वा आयरिय-उवज्झाएहिं सद्धिं दूइज्जमाणे अंतरा से पाडिपहिया उवागच्छेज्जा, ते णं पाडिपहिया एवं वएज्जा- आउसंतो समणा के तुब्भे ? कओ वा एह ? कहिं वा गच्छि-हिह ? जे तत्थ आयारिए वा उवज्झाए वा से भासेज्ज वा वियागरेज्जा वा, आयरिय-उवज्झायस्स भास-माणस्स वा वियागरेमाणस्स वा नो अंतराभासं करेज्जा, तओ संजयामेव आहारातिणिए वा० दूइज्जेज्जा ।
सुयक्खंधो-२, अज्झायणं-३ उद्देशो-३

से भिक्खू वा भिक्खुणी वा आहारातिणियं गामाणुगामं दूइज्जमाणे नो रातिणियस्स हत्थेण हत्थं जाव अनासायणाणे तओ संजयामेव आहारातिणियं गामाणुगामं दूइज्जेज्जा ।

से भिक्खू वा भिक्खुणी वा आहारातिणियं गामाणुगामं दूइज्जमाणे अंतरा से पाडिपहिया उवागच्छेज्जा, ते णं पाडिपहिया एवं वदेज्जा- आउसंतो समणा ! के तुब्भे ?, कओ वा एह ? कहिं वा गच्छिहिह ? जे तत्थ सव्वरातिणिए से भासेज्ज वा वियागरेज्ज वा, रातिणियस्स भासमाणस्स वा वियागरेमाणस्स वा नो अंतराभासं भासेज्जा, तओ संजयामेव गामाणुगामं दूइज्जेज्जा ।

[४६३] से भिक्खू वा भिक्खुणी वा गामाणुगामं दूइज्जमाणे अंतरा से पाडिपहिया उवागच्छेज्जा, ते णं पाडिपहिया एवं वदेज्जा- आउसंतो समणा अवियाइं एत्तो, पडिपहे पासह, तं जहा-मणुस्सं वा गोणं वा महिसं वा पसुं वा पक्खिं वा सरीसिवं वा जलयरं वा से आइक्खह दंसेह, तं नो आइक्खेज्जा नो दंसेज्जा, नो तेसिं तं परिणं परिजाणेज्जा, तुसिणीओ उवेहेज्जा, जाणं वा नो जाणंति वएज्जा, तओ संजयामेव गामाणुगामं दूइज्जेज्जा ।

से भिक्खू वा भिक्खुणी वा गामाणुगामं दूइज्जमाणे अंतरा से पाडिपहिया उवागच्छेज्जा, ते णं पाडिपहिया एवं वएज्जा- आउसंतो समणा! अवियाइं एत्तो पडिपहे पासह-उदगपसूयाणि कंदाणि वा मूलाणि वा तयाणि वा पत्ताणि वा पुप्फाणि वा फलाणि वा बीयाणि वा हरियाणि वा उदगं वा संनिहियं अगनिं वा संनिक्खित्तं से आइक्खह जाव दूइज्जेज्जा ।

से भिक्खू वा भिक्खुणी वा गामाणुगामं दूइज्जमाणे अंतरा से पाडिपहिया उवागच्छेज्जा, ते णं पाडिपहिया एवं वएज्जा- आउसंतो समणा! अवियाइं एत्तो पडिपहे पासह- जवसाणि वा [सगडाणि वा रहाणि वा सच्चक्काणिं वा परचक्काणि वा] सेणं वा विरूवरूवं संनिविट्ठं से आइक्खह [दंसेह तं नो आइक्खेज्जा नो दंसेज्जा नो तेसिं तं परिणं परिजाणेज्जा तुसिणीओ उवेहेज्जा जाणं वा नो जाणंति वएज्जा तओ संजयामेव गामाणुगामं] दूइज्जेज्जा ।

से भिक्खू वा भिक्खुणी वा गामाणुगामं दूइज्जमाणे अंतरा से पाडिपहिया [उवागच्छेज्जा तेणं पाडिपहिया एवं वदेज्जा]- आउसंतो समणा! केवइए एत्तो गामे वा जाव रायहाणी वा से आइक्खह जाव दूइज्जेज्जा ।

से भिक्खु वा० गामाणुगाम दूइज्जेज्जा० अंतरा से पाडिपहिया० आउसंतो समणा! केवइए इत्तो गामस्स वा नगरस्स वा जाव रायहाणीए वा मग्गे से आइक्खह० तहेव जाव दूइज्जेज्जा ।

[४६४] से भिक्खू वा भिक्खुणी वा गामाणुगाणं दूइज्जमाणे अंतरा से गोणं वियालं पडिपहे पेहाए [महिसं वियालं पडिपहे पेहाए एवं-मणुस्सं आसं हत्थि सीहं वग्धं विगं दीवियं अच्छं तरच्छं परिसरं सियालं विरालं-सुणयं कोल-सुणयं कोकंतियं] चित्ताचिल्लडं-वियालं पडिपहे पेहाए नो तेसिं भीओ उम्मग्गेणं गच्छेज्जा नो मग्गाओ उम्मग्गं संकमेज्जा नो गहणं वा वनं वा दुग्गं वा अनुपविसेज्जा नो रुक्खंसि दुरुहेज्जा नो महइमहालयंसि उदयंसि कायं विउसेज्जा नो वाडं वा सरणं वा सेणं वा सत्थं वा कंखेज्जा अप्पुस्सुए [अबहिलेस्से एगंतएणं अप्पाणं वियोसेज्ज] समाहीए तओ संजयामेव गामाणुगामं दूइज्जेज्जा ।

से भिक्खू वा भिक्खुणी वा गामाणुगामं दूइज्जमाणे अंतरा से विहं सिया, सेज्जं पुण विहं जाणेज्जा- इमंसि खलु विहंसि बहवे आमोसगा उवगरण पडियाए संपिडिया० गच्छेज्जा, नो तेसिं भीओ उम्मग्गेणं गच्छेज्जा जाव समाहीए तओ संजयामेव गामाणुगामं दूइज्जेज्जा ।

सुयक्खंधो-२, अज्झयणं-३ उद्देसो-३

[४६५] से भिक्खू वा भिक्खुणी वा गामाणुगामं दूइज्जमाणे अंतरा से आमोसगा संपिडिया गच्छेज्जा ते णं आमोसगा एवं वदेज्जा- आउसंतो समणा! आहार एयं वत्थं वा पायं वा कंबलं वा पायपुंछणं वा देहि निक्खिवाहि० तं नो देज्जा नो निक्खिवेज्जा नो वंदिय-वंदिय जाएज्जा नो अंजलिं कट्ठु जाएज्जा नो कलुण-पडियाए जाएज्जा धम्मियाए जायणाए जाएज्जा तुसिणीय-भावेण वा उवेहेज्जा ते णं आमोसगा सयं करणिज्जं ति कट्ठु अक्कोसंति वा जाव उद्वंति वा वत्थं वा पायं वा कंबलं वा पायपुंछणं वा अच्छंदेज्ज वा अवहरेज्ज वा परिभवेज्ज वा, तं नो गामसंसारियं कुज्जा, नो रायसंसारियं कुज्जा, नो परं उवसंकमित्तु बूया- आउसंतो! गाहावइ एए खलु आमोसगा उवगरण-पडियाए सयं करणिज्जं ति कट्ठु अक्कोसंति वा जाव परिद्वंति वा० एयप्पगारं मणं वा वइं वा नो पुरओ कट्ठु विहरेज्जा, अप्पुस्सुए जाव समाहीए तओ संजयामेव गामाणुगामं दूइज्जेज्जा । एयं खलु तस्स भिक्खुस्स वा भिक्खुणीए वा सामग्गियं, जं सव्वद्वेहिं समिते सहिए सया जएज्जासि - त्तिबेमि ।

तइए अज्झयणो तइओ उद्देसो-समत्तो

तइअं अज्झयणं समत्तं

मुनि दीपरत्नसागरेण संशोधितः सम्पादितश्च तइयं अज्झयणं समत्तं

चउत्थं अज्झयणं - भासज्जातं

० पढमो - उद्देसो ०

[४६६] से भिक्खू वा भिक्खुणी वा इमाइं वइ-आयाराइं सोच्चा निसम्म इमाइं अनायाराइं अनायरियपुव्वाइं जाणेज्जा- जे कोहा वा वायं विउजंति जे माणा वा वायं विउजंति जे मायाए वा वायं विउजंति जे लोभा वा वायं विउजंति जाणओ वा फरुसं वयंति अजाणओ वा फरुसं वयंति सव्वं चेयं सावज्जं वज्जेज्जा विवेगमायाए, धुवं चेयं जाणेज्जा अधुवं चेयं जाणेज्जा- असनं वा पानं वा खाइमं वा साइमं वा लभिय नो लभिय भुंजिय नो भुंजिय अदुवा आगए अदुवा नो आगए अदुवा एइ अदुवा नो एइ

अदुवा एहिति अदुवा नो एहिति एत्थवि आगए एत्थवि नो आगए एत्थवि एइ एत्थवि नो एइ एत्थवि एहिति एत्थवि नो एहिति० अनुवीइ निट्ठाभासी समियाए संजए भासं भासेज्जा तं जहा-

एगवयणं दुवयणं बहुवयणं इत्थीवयणं पुरिसवयणं नपुंसगवयणं अज्झत्थवयणं उवनीय-वयणं अवनीयवयणं उवनीयअवणी-यवयणं अवनीय-उवनीयवयणं तीयवयणं पडुप्पन्नवयणं अनागयवयणं पच्चक्खवयणं परोक्खवयणं, से एगवयणं वदिस्सामीति एगवयणं वएज्जा जाव परोक्खवयणं वदिस्सामीति परोक्खवयणं वएज्जा, इत्थी वेस पुरिस वेस नपुंसग वेस एयं वा चेयं अन्नं वा चेयं अनुवीइ निट्ठाभासी समियाए संजए भासं भासेज्जा इच्चेयाइं आयतणाइं उवातिकम्म ।

अह भिक्खू जाणेज्जा चत्तारि भासज्जायाइं तं जहा-सच्चमेगं पढमं भासजायं बीयं मोसं तइयं सच्चामोसं जं नेव सच्चं नेवमोसं नेव सच्चामोसं-असच्चामोसं नामं तं चउत्थं भासज्जातं ।

से बेमि- जे अतीता जे य पडुप्पन्ना जे य अनागया अरहंता भगवतो सव्वे ते एयाणि चेव चत्तारि भासज्जायाइं भासिंसु वा भासंति वा भासिस्संति वा पन्नविसुं वा पन्नवैति वा पन्नविस्संति वा सव्वाइं च णं एयाणिं अचित्ताणि वण्णमंताणि गंधमंताणि रसमंताणि फासमंताणि चयोवचइयाइं विपरि-णामधम्माइं भवंतीति अक्खायाइं ।

सुयक्खंधो-२, अज्झयणं-४ उद्देशो-१

[४६७] से भिक्खु वा भिक्खुणी वा से ज्जं पुण जाणेज्जा-पुवं भासा अभासा भासिज्जमाणी भासा भासा भासासमयविइक्कंता च णं भासिया भासा अभासा ।

से भिक्खू वा० से ज्जं पुण जाणेज्जा- जा य भासा सच्चा, जा य भासा मोसा, जा य भासा सच्चामोसा, जा य भासा असच्चामोसा, तहप्पगारं भासं सावज्जं सकिरियं कक्कसं कडुयं निदुरं फरुसं अण्हयकरिं छेयणकरिं भेयणकरिं परितावणकरिं उद्ववणकरिं भूतोवघाइयं अभिक्खं नो भासेज्जा ।

से भिक्खू वा भिक्खुणी वा से ज्जं पुण जाणेज्जा- जा य भासा सच्चा सुहुमा जा य भासा असच्चामोसा तहप्पगारं भासं असावज्जं अकिरियं अक्कसं अकडुयं अनिदुरं अफरुसं अण्हयकरिं अछेयणकरिं अभेयणकरिं अपरितावणकरिं अनुद्ववणकरिं अभूतोवघाइयं अभिक्खं भासं भासेज्जा ।

से भिक्खू वा भिक्खुणी वा पुमं आमंतेमाणे आमंतिते वा अपडिसुणेमाणे नो एवं वएज्जा- होले त्ति वा गोले त्ति वा वसुले त्ति वा कुपक्खे त्ति वा धडदासे त्ति वा साणे त्ति वा तेणे त्ति वा चारिए त्ति वा माई त्ति वा मुसावाई त्ति वा, एयाइं तुम ते जणगा वा, एतप्पगारं भासं सावज्जं सकिरियं जाव भूतो- वघाइयं अभिक्खं नो भासेज्जा ।

[४६८] से भिक्खू वा भिक्खुणी वा पुमं आमंतेमाणे आमंतिए वा अपडिसुणेमाणे एवं वएज्जा- अमुगे त्ति वा आउसो त्ति वा आउसंतो त्ति वा सावगे त्ति वा उपासगे त्ति वा धम्मिए त्ति वा धम्मपिये त्ति वा- एयप्पगारं भासं असावज्जं जाव अभूतोवघाइयं अभिक्खं भासेज्जा ।

से भिक्खू वा भिक्खुणी वा इत्थिं आमंतेमाणे आमंतिए य अपडिसुणेमाणिं नो एवं वएज्जा- होले त्ति वा गोले त्ति वा [वसुले त्ति वा कुपक्खे त्ति वा धडदासी त्ति वा साणे त्ति वा तेणे त्ति वा चारिए त्ति वा माई त्ति वा मुसावाई त्ति वा इच्चेयाइं तुम एयाइं ते जणगा वा- एतप्पगारं भासं सावज्जं जाव भूतोवघाइयं अभिक्खं नो भासेज्जा] ।

से भिक्खू वा भिक्खुणी वा इत्थियं आमंतेमाणे आमंति ए य अपडिसुणेमाणी एवं वएज्जा-आउसो त्ति वा भगिनी त्ति वा भगवई त्ति वा साविगे त्ति वा उवासिए त्ति वा धम्मिए त्ति वा धम्मपिये त्ति वा, एतप्पगारं भासं असावज्जं जाव अभिकंख भासेज्जा ।

[४६९] से भिक्खू वा भिक्खुणी वा नो एवं वएज्जा- नभोदेवे त्ति वा गज्जदेवे त्ति वा विज्जुदेवे त्ति वा पवुड्ढदेवे त्ति वा निवुड्ढदेवे त्ति वा पडउ वा वासं मा वा पडउ निप्फज्जउ वा सस्सं मा वा निप्फज्जउ विभाउ वा रयणी मा वा विभाउ उदेउ वा सूरिए मा वा उदेउ सो वा राया जयउ मा वा जयउ- नो एतप्पगारं भासं भासेज्जा पन्नवं ।

से भिक्खू वा भिक्खुणी वा अंतलिक्खे त्ति वा गुज्झाणुचरिए त्ति वा संमुच्छिए त्ति वा निवइए त्ति वा पओए वएज्ज वा वुड्ढबलाहगे त्ति वा, एयं खलु तस्स भिक्खुस्स वा भिक्खुणीए वा सामग्गियं जं सव्वइहिं समिए सहिए सया जएज्जासि - त्तिबेमि ।

चउत्थे अज्झयणे पढमो उद्देसो समत्तो

० बीओ - उद्देसो ०

[४७०] से भिक्खू वा भिक्खुणी वा जहा वेगइयाइं रूवाइं पासेज्जा तहावि ताइं नो एवं वएज्जा तं जहा- गंडी गंडी ति वा, कुट्ठी कुट्ठी ति वा, [रायंसी रायंसी ति वा, अवमारियं अवमारिए ति वा, काणियं काणिए ति वा, झिमियं झिमिए ति वा, कुणियं कुणिए ति वा, खुज्जियं खुज्जिए ति वा, सुयक्खंधो-२, अज्झयणं-४ उद्देसो-२

उदरी उदरी ति वा, मूयं मूए ति वा, सूणियं सूणिए ति वा, गिलासिणी गिलासिणी ति वा, वेवई वेवई ति वा, पीढसप्पी पीढसप्पी ति वा, सिलिवयं सिलिवए ति वा], महुमेहणी महुमेहणी ति वा, हत्थछिन्न हत्थछिन्ने ति वा, पादछिन्ने पादछिन्ने ति वा, नक्कछिन्नं नक्कछिन्ने ति वा, कण्णछिन्नं कण्णछिन्ने ति वा, ओढ्ढ छिन्नं ओढ्ढछिन्ने ति वा, जे यावण्णे तहप्पगारे तहप्पगाराहिं भासाहिं बुइया बुइया कुप्पंति माणवा ते यावि तहप्पगाराहिं भासाहिं अभिकंख नो भासेज्जा ।

से भिक्खू वा भिक्खुणी वा जहा वेगइयाइं रूवाइं पासेज्जा तहावि ताइं एवं वएज्जा, तं जहा- ओयंसी ओयंसी ति वा, तेयंसी तेयंसी ति वा, वच्चंसी वच्चंसी ति वा, जसंसी जसंसी ति वा, अभिरूवं अभिरूवे ति वा, पडिरूवं पडिरूवे ति वा, पासाइयं पासइए ति वा, दरिसणिज्जं दरिसणीए ति वा, जे यावन्ने तहप्पगारा तहप्पगाराहिं भासाहिं बुइया-बुइया नो कुप्पंति माणवा ते यावि तहप्पगारा भासाहिं अभिकंख भासेज्जा ।

से भिक्खू वा भिक्खुणी वा जहा वेगइयाइं रूवाइं पासेज्जा, तं जहा-वप्पाणि वा [फलिहाणि वा पागाराणि वा तोरणाणि वा अग्गलाणि वा अग्गल पासगाणि वा गड्ढाओ वा दरीओ वा कूडागाराणि वा पासादाणि वा नूमगिहाणि वा रुक्ख-गिहाणि वा पव्वय-गिहाणि वा रुक्खं वा चेइय-कडं थूभं वा चेइय-कडं आएसणाणि वा आयतणाणि वा देवकुलाणि वा सहाओ वा पवाओ वा पणिय-गिहाणि वा पणिय-सालाओ वा जाण-गिहाणि वा जाण सालाओ वा सुहा-कम्मंताणि वा दब्भ-कम्मंताणि वा बद्ध-कम्मंताणि वा वक्क कम्मंताणि वा वन-कम्मंताणि वा इंगाल-कम्मंताणि वा कट्ठ-कम्मंताणि वा सुसाण-कम्मंताणि वा संति-कम्मंताणि वा गिरि-कम्मंताणि वा कंदर-कम्मंताणि वा सेलोवट्ठाण-कम्मंताणि वा] भवनगिहाणि वा-तहावि ताइं नो एवं वएज्जा, तं जहा-सुकडे ति वा सुट्ठुकडे ति वा साहुकडे ति वा कल्लाणे ति वा करणिज्जे ति वा- एयप्पगारं भासं सावज्जं जाव नो भासेज्जा ।

से भिक्खू वा भिक्खुणी वा जहा वेगइयाइं रूवाइं पासेज्जा, तं जहा वप्पाणि वा जाव भवनगिहाणि वा- तहावि ताइं एवं वएज्जा, तं जहा आरंभकडे ति वा सावज्जकडे ति वा पयत्तकडे ति वा पासादियं पासादिए ति वा दरिसणीयं दरिसणीए ति वा अभिरूवं अभिरूवे ति वा पडिरूवं पडिरूवे ति वा- एयप्पगारं भासं असावज्जं जाव भासेज्जा ।

[४७१] से भिक्खू वा भिक्खुणी वा असनं वा पानं वा खाइमं वा साइमं वा उवक्खडियं पेहाए तहावि तं नो एवं वएज्जा तं जहा- सुकडे ति वा सुडुकडे ति वा साहुकडे ति वा कल्लाणे ति वा करणिज्जे ति वा, एयप्पगारं भासं सावज्जं जाव नो भासेज्जा ।

से भिक्खू वा भिक्खुणी वा असनं वा पानं वा खाइमं वा साइमं वा उवक्खडियं पेहाए एवं वएज्जा- तं जहा-आरंभकडे ति वा सावज्जकडे ति वा पयत्तकडे ति वा भद्दयं भद्दए ति वा ऊसढं ऊसढे ति वा रसियं रसिए ति वा मणुण्णं मणुण्णे ति वा- एयप्पगारं भासं असावज्जं जाव अभूतोवधाइयं अभिकंख भासेज्जा ।

[४७२] से भिक्खू वा भिक्खुणी वा मणुस्सं वा गोणं वा महिसं वा मिगं वा पसुं वा पक्खिं वा सरीसिवं वा जलयरं वा से त्तं परिवूढकायं पेहाए नो एवं वएज्जा- थूले ति वा पमेइले ति वा वट्टे ति वा वज्झे ति वा पाइमे ति वा- एयप्पगारं भासं सावज्जं जाव भूतोवधाइयं अभिकंख नो भासेज्जा ।
सुयक्खंधो-२, अज्झयणं-४ उद्देशो-२

से भिक्खू वा भिक्खुणी वा मणुस्सं जाव जलयरं वा से त्तं परिवूढकायं पेहाए एवं वएज्जा तं जहा- परिवूढकाए ति वा उवचियकाए ति वा थिरसंघयणे ति वा चियमंससोणिए ति वा बहुपडिपुन्नइंदिए ति वा- एयप्पगारं भासं असावज्जं जाव अभूतोवधाइयं अभिकंख भासेजा ।

से भिक्खू वा भिक्खुणी वा विरूवरूवाओ गाओ पेहाए नो एवं वएज्जा, तं जहा- गाओ दोज्झाओ त्ति वा दम्मे त्ति वा गोरहे त्ति वा वाहिमा त्ति वा रहजोग्गात्ति वा- एयप्पगारं भासं सावज्जं जाव भूतोवधाइयं अभिकंख नो भासेज्जा ।

से भिक्खू वा भिक्खुणी वा विरूवरूवाओ गाओ पेहाए एवं वएज्जा तं जहा- जुवंगवे त्ति वा घेनु त्ति वा रसवती त्ति वा हस्से त्ति वा महल्लए त्ति वा महव्वए त्ति वा संवहणे त्ति वा- एयप्पगारं भासं असावज्जं जाव अभूतोवधाइयं अभिकंखे भासेज्जा ।

से भिक्खू वा भिक्खुणी वा तहेव गंतुमुज्जाणाइं पव्वयाइं वनानि य रुक्खा महल्ला पेहाए नो एवं वएज्जा तं जहा- पासायजोग्गा ति वा गिहजोग्गा ति वा तोरणजोग्गा ति वा फलिहजोग्गा ति वा अग्गल-नावा-उदग-दोणि-पीढ-चंगबेर-नंगल-कुलिय-जंतलट्टी-नाभि-गंडी-आसण-सयण-जाण-उवस्सयजोग्गा ति वा, एयप्पगारं भासं सावज्जं जाव भूतोवधाइयं अभिकंख नो भासेज्जा ।

से भिक्खू वा भिक्खुणी वा तहेव गंतुभुज्जाणाइं पव्वायाणि वनानि य रुक्खा महल्ला पेहाए एवं वएज्जा, तं जहा-जातिमंता ति वा दीहवट्ठा ति वा महालया ति वा पयायसाला ति वा विडिमसाला ति वा पासाइया ति वा दरिसणीया ति वा अभिरूवा ति वा पडिरूवा ति वा- एयप्पगारं भासं असावज्जं जाव अभूतोवधाइयं अभिकंख भासेज्जा ।

से भिक्खू वा भिक्खुणी वा बहुसंभूया वनफला पेहाए तहावि ते नो एवं वएज्जा, तं जहा- पक्का ति वा पायखज्जा ति वा वेलोचियाति वा टाला ति वा वेहिया ति वा, एयप्पगारं भासं सावज्जं जाव भूतोवधाइयं अभिकंख नो भासेज्जा ।

से भिक्खू वा भिक्खुणी वा बहुसंभूया वनफला अंबा पेहाए एवं वएज्जा तं जहा-असंथडा ति वा बहुनिवट्टिमफला ति वा बहुसंभूया ति वा भूयरूवा ति वा- एयप्पगारं भासं असावज्जं जाव अभूतोवघाइयं अभिकंख भासेज्जा ।

से भिक्खू वा भिक्खुणी वा बहुसंभूयाओ ओसहीओ पेहाए तहावि ताओ नो एवं वएज्जा तं जहा-पक्का ति वा नोलिया ति वा छवीया ति वा लाइमा ति वा भज्जिमा ति वा बहुखज्जा ति वा- एयप्पगारं भासं सावज्जं जाव भूतोवघाइयं अभिकंख नो भासेज्जा ।

से भिक्खू वा भिक्खुणी वा बहुसंभूयाओ ओसहीओ पेहाए एवं वएज्जा, तं जहा-रूढा ति वा बहुसंभूया ति वा थिरा ति वा ऊसढा ति वा गब्भिया ति वा पसूया ति वा ससारा ति वा, एयप्पगारं भासं असावज्जं जाव अभूतोवघाइयं अभिकंख भासेज्जा ।

[४७३] से भिक्खू वा भिक्खुणी वा जहा वेगइयाइं सद्दाइं सुणेज्जा तहावि ताइं नो एवं वएज्जा, तं जहा- सुसद्धे ति वा दुसद्धे ति वा, एयप्पगारं भासं सावज्जं जाव नो भासेज्जा ।

से भिक्खू वा भिक्खुणी वा जहा वेगइयाइं सद्दाइं सुणेज्जा ताइं एवं वएज्जा, तं जहा-सुसद्धं सुसद्धे ति वा दुसद्धं दुसद्धे ति वा, एयप्पगारं भासं असावज्जं जाव भासेज्जा ।

एवं रूवाइं- कण्हे ति वा नीले ति वा लोहिए ति वा हालिद्धे ति वा, सुकिल्ले ति वा; सुयक्खंधो-२, अज्झयणं-४ उद्देसो-२

गंधाइं- सुब्भिगंधे ति वा दुब्भिगंधे ति वा; रसाइं- तित्ताणि वा कडुयाणि वा कसायाणि वा अंबिलाणि वा महराणि वा; फासाइं- कक्खडाणि वा मउयाणि वा गुरुयाणि वा लहुयाणि वा सीयाणि वा उसिणाणि वा निद्धाणि वा रुक्खाणि वा ।

[४७४] से भिक्खू वा भिक्खुणी वा वंता कोहं च माणं च मायं च लोभं च अनुवीड निट्ठाभासी निसम्मभासी अतुरियभासी विवेगभासी समियाए संजए भासं भासेज्जा । एयं खलु तस्स भिक्खुस्स वा० सामग्गियं जं सव्वट्ठेहिं समिए सहिए सया जएज्जासि - त्तिबेमि ।

चउत्थे अज्झयणे बीओ उद्देसो समत्तो

मुनि दीपरत्नसागरेण संशोधितः सम्पादितश्च चउत्थं अज्झयणं समत्तं

पंचमं अज्झयणं - वत्थेसणा

० पढमो - उद्देसो ०

[४७५] से भिक्खू वा भिक्खुणी वा अभिकंखेज्जा वत्थं एसित्तए सेज्जं पुण वत्थं जाणेज्जा, तं जहा- जंगियं वा भंगियं वा साणयं वा पोत्तगं वा खोमियं वा तूलकडं वा, तहप्पगारं वत्थं वा जे निग्गंथे तरुणे जुगवं बलवं अप्पायंके थिरसंघयणे से एगं वत्थं धारेज्जा, नो बितियं, जा निग्गंथी सा चत्तारि संघाडीओ धारेज्जा, एगं दुहत्थवित्थारं दो तिहत्थवित्थाराओ एगं चउहत्थवित्थारं, तहप्पगारेहिं वत्थेहिं असंघिज्जमाणेहिं, अह पच्छा एगमेगं संसीवेज्जा ।

[४७६] से भिक्खू वा० परं अद्धजोयण-मेराए वत्थ-पडियाए नो अभिसंधारेज्जा गमणाए ।

[४७७] से भिक्खू वा भिक्खुणी वा सेज्जं पुण वत्थं जाणेज्जा- अस्सिंपडियाए एगं साहम्मियं समुद्दिस्स पाणाइं जाव लाभे संते नो पडिगाहेज्जा । एवं बहवे साहम्मिया एगं साहम्मिणिं बहवे साहम्मिणीओ० तहेव पुरिसंतरकडा जहा पिंडेसणाए ।

से भिक्खू वा भिक्खुणी वा से ज्जं पुण वत्थं जाणेज्जा-बहवे समण-माहण-अतिहि-किवण-वणीमए पगणिय-पगणिय समुद्धिस्स पाणाइं जाव तहप्पगारं वत्थं पुरिसंतरकडं वा अपुरिसंतरकडं वा बहिया नीहडं वा अनीहडं वा अत्तद्धियं वा अणत्तद्धियं वा परिभुत्तं वा अपरिभुत्तं वा आसेवियं वा अनासेवियं वा-अफासुय अनेसणिज्जं ति मन्नमाणे लाभे संते नो पडिगाहेज्जा ।

से भिक्खू वा भिक्खुणी वा सेज्जं पुण वत्थं जाणेज्जा-बहवे समण-जाव समुद्धिस्स पाणाइं जाव समारब्भ समुद्धिस्स कीयं जाव आहट्टु चेएइ तं तहप्पगारं वत्थं अपुरिसंतरकडं जाव अनेसणिज्जं ति मन्नमाणे लाभे संते नो पडिगाहेज्जा अह पुण एवं जाणेज्जा-पुरिसंतरकडं बहिया नीहडं जाव एसणिज्जं ति मन्नमाणे लाभे संते पडिगाहेज्जा ।

[४७८] से भिक्खू वा भिक्खुणी वा से ज्जं पुण वत्थं जाणेज्जा-असंजए भिक्खु-पडियाए कीयं वा धोयं वा रत्तं वा घट्ठं वा मट्ठं वा संमट्ठं वा संपधूमियं वा तहप्पगारं वत्थं अपुरिसंतरकडं नो पडिगाहेज्जा अह पुणेवं जाणेज्जा-पुरिसंतरकडं [बहिया नीहडं अत्तद्धियं परिभुत्तं आसेवियं-फासुयं एसणिज्जं ति मन्नमाणे लाभे संते] पडिगाहेज्जा ।

[४७९] से भिक्खू वा भिक्खुणी वा से जाइं पुण वत्थाइं जाणेज्जा विरूवरूवाइं महद्धणमोल्लाइं तं जहा- आजिनगाणि वा सहिणाणि वा सहिण-कल्लाणाणि वा आयकाणि वा कायाणि वा सुयक्खंधो-२, अज्झयणं-५ उद्देसो-१

खोमियाणि वा दुगुल्लाणि वा पट्टाणि वा मलयाणि वा पन्नन्नाणि वा अंसुयाणि वा चीणंसुयाणि वा देसरागाणि वा अभिलाणि वा गज्जलाणि वा फालियाणि वा कोयवाणि वा कंबलगाणि वा पावाराणि वा, अन्नयराणि वा तहप्पगाराइं वत्थाइं महद्धणमोल्लाइं-[अफासुयाइं अनेसणिज्जाइं ति मन्नमाणे] लाभे संते नो पडिगाहेज्जा ।

से भिक्खू वा से ज्जं पुण आईणपाउरणाणि वत्थाणि जाणेज्जा, तं जहा-उद्धाणि वा पेसाणि वा पेसलाणि वा किण्हमिगाईणगाणि वा नीलमिगाईणगाणि वा गोरमिगाईणगाणि वा कनगाणि वा कनगकताणि वा कनगपट्टाणि वा कनगखइयाणि वा कनगफुसियाणि वा वग्घाणि वा विवग्घाणि वा आभारणाणि वा आभरणविचित्ताणि वा अन्नयराणि वा तहप्पगाराइं आईणपाउरणाणि वत्थाणि-अफासुयाइं अनेसणिज्जाइं ति मन्नमाणे लाभे संते नो पडिगाहेज्जा ।

[४८०] इच्चेइयाइं आयतणाइं उवाइकम्म अह भिक्खू जाणेज्जा चउहिं पडिमाहिं वत्थं एसित्तए, तत्थ खलु इमा पढमा पडिमा- से भिक्खू वा भिक्खुणी वा उद्धिसिय-उद्धिसिय वत्थं जाएज्जा तं जहा-जंगियं वा भंगियं वा साणयं वा पोत्तयं वा खोमियं वा तूलकडं वा-तहप्पगारं वत्थं सयं वा णं जाएज्जा परो वा से देज्जा फासुयं एसणिज्जं ति मन्नमाणे लाभे संते पडिगाहेज्जा- पढमा पडिमा ।

अहावरा दोच्चा पडिमा से भिक्खू वा भिक्खुणी वा पेहाए वत्थं जाएज्जा तं जहा-गाहावइं वा [गाहावइ-भारियं वा गाहावइ-भगिनिं वा गाहावइ-पुत्तं वा गाहावइ-धूयं वा सुणहं वा धाइं वा दासं वा दासिं वा कम्मकरं वा] कम्मकरिं वा से पुव्वामेव आलोएज्जा - आउसो त्ति वा भगिनि त्ति वा दाहिसि मे एत्तो अन्नतरं वत्थं तहप्पगारं वत्थं सयं वा णं जाएज्जा परो वा से देज्जा-फासुयं [एसणिज्जं ति मन्नमाणे] लाभे संते पडिगाहेज्जा- दोच्चा पडिमा ।

अहावरा तच्चा पडिमा से भिक्खू वा भिक्खुणी वा सेज्जं पुण वत्थं जाणेज्जा तं जहा-
अंतरिज्जगं वा उत्तरिज्जगं वा तहप्पगारं वत्थं सायं वा णं जाएज्जा [परो वा से देज्जा फासुयं एसणिज्जं
ति मन्नमाणे लाभे संते] पडिगाहेज्जा- तच्चा पडिमा ।

अहावरा चउत्था पडिमा-से भिक्खू वा भिक्खुणी वा उज्झिय-धम्मियं वत्थं जाएज्जा जं
चऽन्ने बहवे समण-माहण-अतिहि-किवण-वणीमगा नावकंखंति तहप्पगारं उज्झिय-धम्मियं वत्थं सयं वा
णं जाएज्जा परो वा से देज्जा फासुयं जाव पडिगाहेज्जा- चउत्था पडिमा ।

इच्चेयाणं चउण्हं पडिमाणं [अन्नयरं पडिमं पडिवज्जमाणे नो एवं वएज्जा मिच्छा
पडिवन्ना खलु एते भयंतारो अहमेगे सम्मं पडिवन्ने जे एते भयंतारो एयाओ पडिमाओ पडिवज्जित्ताणं
विहरंति, जो य अहमंसि एयं पडिमं पडिवज्जित्ताणं विहरामि सव्वे वे ते उ जिणाणाए उवट्ठिया
अन्नोन्नसमाहीए एवं च णं विहरंति]

सिया णं एयाए एसणाए एसमाणं परो वएज्जा- आउसंतो समणा ! एज्जाहि तुमं मासेण
वा दसराएण वा पंचराएण वा सुए वा सुयतरे वा तो ते वयं आउसो अन्नयरं वत्थं दाहामो, एयप्पगारं
निग्घोसं सोच्चा निसम्म से पुव्वामेव आलोएज्जा- आउसो त्ति वा भइणि त्ति वा!, नो खलु मे कप्पइ
एयप्पगारे संगार-वयणे पडिसुणित्तए, अभिकंखसि मे दाउं इयाणिमेव दलयाहि, से सेवं वयंतं परो
वएज्जा- आउसंतो समणा अनुगच्छाहि तो ते वयं अन्नतरं वत्थं दाहामो से पुव्वामेव आलोएज्जा- आउसो
त्ति वा भइणि त्ति वा!, नो खलु मे कप्पइ एयप्पगारे संगार-वयणे पडिसुणित्तए अभिकंखसि मे दाउं
इयाणिमेव

सुयक्खंधो-२, अज्झयणं-५ उद्देशो-२

दलयाहि से सेवं वयंतं परो नेत्ता वदेज्जा- आउसो त्ति वा भइणि त्ति वा!, आहरेयं वत्थं समणस्स
दाहामो, अवियाइं वयं पच्छावि अप्पणो सयद्वाए पाणाइं भूयाइं जीवाइं सत्ताइं समारब्भ समुद्दिस्स वत्थं
चेइस्सामो, एयप्पगारं निग्घोसं सोच्चा निसम्म तहप्पगारं वत्थं- अफासुयं अनेसणिज्जं ति मन्नमाणे
लाभे संते नो पडिगाहेज्जा ।

सिया णं परो नेत्ता वएज्जा- आउसो त्ति वा भइणि त्ति वा आहरेयं वत्थं-सिणाणेण वा
[कक्केण वा लोद्धेण वा जाव पउमेण वा] आघंसित्ता वा पधंसित्ता वा समणस्स णं दासामो एयप्पगारं
निग्घोसं सोच्चा निसम्म से पुव्वामेव आलोएज्जा-आउसो त्ति वा भइणि त्ति वा मा एयं तुमं वत्थं
सिणाणेण वा जाव आघंसाहि वा पधंसाहि वा अभिकंखसि मे दाउं एमेव दलयाहि से सेवं वयंतस्स परो
सिणाणेण वा जाव आधंसित्ता वा पधंसित्ता वा दलएज्जा तहप्पगारं वत्थं-अफासुयं जाव नो पडिगाहेज्जा
।

से णं परो नेत्ता वएज्जा- आउसो त्ति वा! भइणि त्ति वा आहरेयं वत्थं-सीओदग-वियडेण
वा उसिणोदग-वियडेण वा उच्छोलेत्ता वा पधोवेत्ता वा समणस्स णं दाहामो, एयप्पगारं निग्घोसं सोच्चा
निसम्म से पुव्वामेव आलोएज्जा- आउसो त्ति वा भइणि त्ति वा!, मा एयं तुमं वत्थं सिओदग-वियडेण
वा उसिणोदग-वियडेण वा उच्छोलेहि वा पधोवेहि वा अभिकंखसि [मे दाउं एमेव दलयाहि, से सेवं
वयंतस्स परो सीओदग-वियडेण वा उसिणोदग-वियडेण वा उच्छोलेत्ता वा पधोवेत्ता वा दलएज्जा
तहप्पगारं वत्थं-अफासुयं अनेसणिज्जं ति मन्नमाणे लाभे संते] नो पडिगाहेज्जा ।

से णं परो नेत्ता वएज्जा- आउसो त्ति वा भइणि त्ति वा!, आहरेयं वत्थं कंदाणि वा [मूलाणि वा तयाणि वा पत्ताणि वा पुप्फाणि वा फलाणि वा बीयाणि वा] हरियाणि वा विसोहित्ता समणस्स णं दाहामो, एयप्पगारं निग्घोसं सोच्चा निसम्म से पुव्वामेव आलोएज्जा- आउसो एयप्पगारं निग्घोसं सोच्चा निसम्म से पुव्वामेव आलोएज्जा- आउसो त्ति वा भइणि त्ति वा!, मा एयं तुमं वत्थं सिओदग-वियडेण वा उसिणोदग-वियडेण वा उच्छोलेहि वा पधोवेहि वा अभिकंखसि [मे दाउं एमेव दलयाहि से सेवं वयंतस्स परो सीओदग-वियडेण वा जाव लाभे संते] नो पडिगाहेज्जा ।

से णं परो नेत्ता वएज्जा- आउसो त्ति वा भइणि त्ति वा!, आहरेयं वत्थं- कंदाणि वा जाव हरियाणि वा विसोहित्ता समणस्स णं दाहामो एयप्पगारं निग्घोसं सोच्चा निसम्म से पुव्वामेव आलोएज्जा- आउसो त्ति वा भइणि त्ति वा!, मा एयाणि तुमं कंदाणि वा जाव हरियाणि वा विसोहेहि नो खलु मे कप्पइ एयप्पगारे वत्थे पडिगाहित्तए से सेवं वयंतस्स परो कंदाणि वा जाव हरियाणि वा विसोहित्ता दलएज्जा तहप्पगारं वत्थं अफासुयं जाव नो पडिगाहेज्जा ।

सिया से परो नेत्ता वत्थं निसिरेज्जा, से पुव्वामेव आलोएज्जा- आउसो त्ति वा भइणि त्ति वा!, तुमं चेव णं संतियं वत्थं अंतोअंतेणं पडिलेहिस्सामि, केवली बूया आयाणमेयं- वत्थंतेण उ बद्धे सिया कुंडले वा गुणे वा मणी वा [मोत्तिए वा हिरण्णे वा सुवण्णे वा कडगाणि वा तुडयाणि वा तिसरगाणि वा पालंबाणि वा हारे वा अद्धहारे वा एगावली वा मुत्तावली वा कनगावली वा] रयणावली वा, पाणे वा बीए वा हरिए वा, अह भिक्खूणं पुव्वोवदिट्ठा [एस पइण्णा एस हेउ एस कारणं एस उवएसो] जं पुव्वामेव वत्थं अंतोअंतेण पडिलेहिज्जा ।

[४८९] से भिक्खू वा भिक्खुणी वा सेज्जं पुण वत्थं जाणेज्जा- सअंडं [सपानं सबीयं सहरियं सउसं सउदयं सउत्तिंग- पणग- दग-मट्ठिय-मक्कडा] संताणगं तहप्पगारं वत्थं- अफासुय सुयक्खंधो-२, अज्झयणं-५ उद्देसो-१

[अनेसणिज्जं ति मन्नमाणे लाभे संते] नो पडिगाहेज्जा ।

से भिक्खू वा भिक्खुणी वा सेज्जं पुण वत्थं जाणेज्जा अप्पंडं [अप्पपानं अप्पबीयं अप्पहरियं अप्पोसं अप्पुदयं अप्पुत्तिंग-पणग-दग-मट्ठिय-मक्कडा] संताणगं अनलं अथिरं अधुवं आधारणिज्जं रोइज्जंतं न रुच्चइ तहप्पगारं वत्थं अफासुयं जाव नो पडिगाहेज्जा ।

से भिक्खू वा भिक्खुणी वा सेज्जं पुण वत्थं जाणेज्जा अप्पंडं जाव संताणगं अलं थिरं धुवं धारणिज्जं रोइज्जंतं रुच्चइ तहप्पगारं वत्थं फासुयं [एसणिज्जं ति मन्नमाणे लाभे संते] पडिगाहेज्जा ।

से भिक्खू वा भिक्खुणी वा नो नवए मे वत्थे त्ति कट्ठु नो बहुदेसिएण सीणाणेण वा जाव आघंसेज्ज वा पघंसेज्ज वा । से भिक्खू वा भिक्खुणी वा नो नवए मे वत्थे त्ति कट्ठु नो बहुदेसिएण सीओदग-वियडेण वा जाव पधोएज्ज वा ।

से भिक्खू वा भिक्खुणी वा दुब्भिगंधे मे वत्थे त्ति कट्ठु नो बहुदेसिएण सिणाणेण वा जाव आघंसेज्ज वा, पघंसेज्ज वा । से भिक्खू वा भिक्खुणी वा दुब्भिगंधे मे वत्थे त्ति कट्ठु नो बहुदेसिएण सीओदग-वियडेण जाव पधोएज्ज वा ।

[४९०] से भिक्खू वा भिक्खुणी वा अभिकंखेज्जा वत्थं आयावेत्तए वा पयावेत्तए वा तहप्पगारं वत्थं नो अनंतरहियाए पुढवीए नो ससणिद्धाए पुढवीए नो ससरक्खाए पुढवीए नो चित्तमंताए

सिलाए नो चित्तमंताए लेलुए कोलावासंसि वा दारुए जीवपइट्टिए सअंडे सपाणे सबीए सहरीए सउसे सउदए सउत्तिंग-पणग-दग-मट्टिय-मक्कडा संताणए आयावेज्ज वा पयावेज्ज वा ।

से भिक्खू वा भिक्खुणी वा अभिक्खेज्जा वत्थं आयावेत्तए वा पयावेत्तए वा तहप्पगारं वत्थं थूणंसि वा गिहेलुगंसि वा उसुयालंसि वा कामजलंसि वा अन्नयरे वा तहप्पगारे अंतलिक्खजाए दुब्बद्धे दुन्निक्खित्ते अनिकंपे चलाचले नो आयावेज्ज वा नो पयावेज्ज वा ।

से भिक्खू वा भिक्खुणी वा अभिक्खेज्जा वत्थं आयावेत्तए वा पयावेत्तए वा तहप्पगारं वत्थं कुलियंसि वा भित्तिंसि वा सिलंसि वा लेलुंसि वा अन्नतरे वा तहप्पगारे अंतलिक्खजाए दुब्बद्धे दुन्निक्खित्ते अनिकंपे चलाचले नो आयावेज्ज वा नो पयावेज्ज वा ।

से भिक्खू वा भिक्खुणी वा अभिक्खेज्जा वत्थं आयावेत्तए वा पयावेत्तए वा तहप्पगारं वत्थं खंधंसि वा मंचंसि वा मालंसि वा पासायंसि वा हम्मियतलंसि वा अन्नयरे वा तहप्पगारे अंतलिक्खजाए जाव नो आयावेज्ज वा नो पयावेज्ज वा ।

से तमादाए एगतमवक्कमेज्जा एगतमवक्कमेत्ता अहे झामथंडिलंसि वा अट्टिरासिंसि किट्टिरासिंसि वा तुसरासिंसि वा गोमयरासिंसि वा अन्नयरंसि वा तहप्पगारंसि थंडिलंसि पडिलेहिय-पडिलेहिय पमज्जिय पमज्जिय तओ संजयामेव वत्थं आयावेज्ज वा पयावेज्ज वा, एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समिए सहिए सया जएज्जासि, त्तिबेमि ।

पंचमे अज्झयणे पदमो उद्देशो समत्तो

• बीओ - उद्देशो •

[४८३] से भिक्खू वा भिक्खुणी वा अहेसणिज्जाइं वत्थाइं जाएज्जा अहापरिग्गहियाइं वत्थाइं धारेज्जा नो धोएज्जा नो रएज्जा नो धोयरत्ताइं वत्थाइं धारेज्जा अपलिउंचमाणे गामंतरेसु० ओम-

सुयक्खंधो-२, अज्झयणं-५ उद्देशो-२

चेलिए एयं खलु वत्थधारिस्स सामग्गियं ।

से भिक्खू वा भिक्खुणी वा गाहावइ-कुलं पिंडवाय-पडियाए पविसिउकामे सव्वं चीवरमायाए गाहावइ-कुलं पिंडवाय-पडियाए निक्खमेज्ज वा पविसेज्ज वा० ।

से भिक्खू वा भिक्खुणी वा बहिया वियार-भूमि वा विहार-भूमिं वा निक्खममाणे वा पविसमाणे वा सव्वं चीवरमायाए बहिया वियार-भूमिं वा विहारभूमिं वा निक्खमेज्ज वा पविसेज्ज वा० ।

से भिक्खू वा० गामाणुगामं दूइज्जमाणे सव्वं चीवरमायाए गामाणुगामं दूइज्जेज्जा अह पुणेवं जाणेज्जा- तिव्वदेसियं वा वासं वासमाणं पेहाए तिव्वदेसियं वा महियं सन्नियमाणिं पेहाए महावाएण वा रयं समुदघुयं पेहाए तिरिच्छं संपाइमा वा तसा-पाणा संथडा सन्नियमाणा पेहाए से एवं नच्चा नो सव्वं चीवरमायाए गाहावइ-कुलं पिंडवाय-पडियाए निक्खमेज्ज वा पविसेज्ज वा बहिया वियार-भूमिं वा विहार-भूमिं वा निक्खमेज्ज वा पविसेज्ज वा गामाणुगामं वा दूइज्जेज्जा ।

से भिक्खू वा भिक्खुणी वा एगइओ मुहुत्तगं-मुहुत्तगं पाडिहारियं वत्थं जाएज्जा जाव एगाहेण वा दुयाहेण वा तियाहेण वा चउयाहेण वा पंचाहेण वा विप्पवसिय-विप्पवसिय उवागच्छेज्जा, नो तहप्पगारं वत्थं अप्पणा गिणहेज्जा नो अन्नमन्नस्स देज्जा, नो पामिच्चं कुज्जा, नो वत्थेण वत्थ-परिणामं करेज्जा, नो परं उवसंकमित्तु एवं वदेज्जा- आउसंतो समणा! अभिक्खसि वत्थं धारेत्तए वा

परिहरित्तए वा थिरं वा णं संतं नो पलिच्छिंदिय-पलिच्छिंदिय परिद्वेज्जा, तहप्पगारं वत्थं ससांधियं तस्स चेव निसिरेज्जा नो णं साइज्जेज्जा ।

[४८४] से एगइओ एयप्पगारं निग्घोसं सोच्चा निसम्म जे भयंतारो तहप्पगाराणि वत्थाणि संसंधियाणि मुहुत्तगं-मुहुत्तगं जाइत्ता एगाहेण वा दुयाहेण वा तियाहेण वा चउयाहेण वा पंचाहेण वा विप्पवसिय-विप्पवसिय उवागच्छंति तहप्पगाराणि वत्थाणि नो अप्पणा गिण्हंति नो अन्नमन्नस्स दलयंति नो अनुवयंति नो पामिच्चं करंति नो वत्थेण वत्थ-परिणामं करंति नो परं उवसंकमित्तुं एवं वदंति- आउसंतो समणा अभिकंखसि वत्थं धारेत्तए वा परिहरेत्तए वा थिरं वा णं संतं नो पलिच्छिंदिय-पलिच्छिंदिय परिद्वेवंति तहप्पगाराणि वत्थाणि संसंधियाणि तस्स चेव निसिरेतिं नो णं सातिज्जति, से हंता अहमवि मुहुत्तगं पाडिहारियं वत्थं जाइत्ता एगाहेण वा दुयाहेण वा जाव पंचाहेण वा विप्पवसिय-विप्पवसिय उवागच्छिस्सामि, अविआइं एयं ममेव सिया, माइद्वाणं संफासे, नो एवं करेज्जा ।

[४८५] से भिक्खू वा भिक्खुणी वा नो वण्णमंताइं वत्थाइं विवण्णाइं करेज्जा विवण्णाइं नो वण्णमंताइं करेज्जा, अन्नं वा वत्थं लभिस्सामि त्ति कट्ठु नो अन्नमन्नस्स देज्जा, नो पामिच्चं कुज्जा, नो वत्थेण वत्थ-परिणामं करेज्जा नो परं उवसंकमित्तुं एवं वदेज्जा- आउसंतो समणा! समभिकंखसि मे वत्थं धारेत्तए वा परिहरेत्तए वा ?, थिरं वा णं संतं नो पलिच्छिंदिय-पलिच्छिंदिय परिद्वेज्जा, जहा चेयं वत्थं पावगं परो मन्नइ, परं च णं अदत्तहारिं पडिपहे पेहाए तस्स वत्थस्स निदाणाए नो तेसिं भीओ उम्मग्गेणं गच्छेज्जा, नो मग्गाओ मग्गं संकमेज्जा, नो गहनं वा वनं वा दुग्गं वा अनुपविसेज्जा, नो रुक्खंसि दुरुहेज्जा, नो महइमहालयंसि उदयंसि कायं विउसेज्जा, नो वाडं वा सरणं वा सेणं वा सत्थं वा कंखेज्जा अप्पुस्सुए अबहिलेस्से एगंतगएणं अप्पाणं वियोसेज्ज समाहीए तओ संजयामेव गामाणुगामं दूइज्जेज्जा ।

से भिक्खू वा भिक्खुणी वा गामाणुगामं दूइज्जमाणे अंतरा से विहं सिया, सेज्जं पुण विहं सुयक्खंधो-२, अज्झयणं-५ उद्देसो-२

जाणेज्जा- इमंसि खलु विहंसि बहवे आमोसगा वत्थ-पडियाए संपिडिया गच्छेज्जा, नो तेसिं भीओ उम्मग्गेणं गच्छेज्जा जाव गामाणुगामं दूइज्जेज्जा ।

से भिक्खू वा भिक्खुणी वा गामाणुगामं दूइज्जमाणे अंतरा से आमोसगा संपिडिया गच्छेज्जा, ते णं आमोसगा एवं वदेज्जा- आउसंतो समणा! आहरेयं वत्थं देहि निक्खिवाहि तं नो देज्जा नो निक्खिवेज्जा नो वंदिय वंदिय जाएज्जा नो अंजलिं कट्ठु जाएज्जा नो कलुण-पडियाए जाएज्जा धम्मियाए जायणाए जाएज्जा तुसिणीय-भावेण वा उवेहेज्जा ते णं आमोसगा सयं करणिज्जं ति कट्ठु अक्कोसंति वा बंधंति वा रुंभंति वा उद्वंति वा वत्थं अच्छिंदेज्ज वा अवहरेज्ज वा परिभवेज्ज वा, तं नो गाम संसारियं कुज्जा नो रायसंसारियं कुज्जा नो परं उवसंकमित्तुं बूया आउसंतो गाहावइ एए खलु आमोसगा वत्थ-पडियाए सयं करणिज्जं ति कट्ठु अक्कोसंति वा बंधंति वा रुंभंति वा उद्वंति वा वत्थं अच्छिंदंति वा अवहरंति वा परिभवेंति वा, एयप्पगारं मणं वा वइं वा नो पुरओ कट्ठु विहरेज्जा अप्पुस्सुए अबहिलेस्से एगंतगएणं अप्पाणं वियोसेज्ज समाहीए तओ संजयामेव गामाणुगामं दूइज्जेज्जा, एयं खलु तस्स भिक्खुस्स वा भिक्खुणीए वा सामग्गियं जं सव्वेद्वेहिं समिए सहिए सया जएज्जासि, त्तिबेमि ।

पंचमे अज्झयणे बीओ उद्देसो समत्तो

• पंचमं अज्झयणं समत्तं •

छट्ठं अज्झयणं - पाएसणा

० पढमो - उद्देशो ०

[४८६] से भिक्खू वा भिक्खुणी वा अभिक्खेज्जा पायं एसित्तए, से ज्जं पुण पायं जाणेज्जा, तं जहा-अलाउपायं वा दारुपायं वा मट्टियापायं वा- तहप्पगारं पायं जे निग्गंथे तरुणे जुगवं बलवं अप्पायंके थिरसंघयणे से एगं पायं धारेज्जा नो बीयं ।

से भिक्खू वा० परं अद्धजोयण-मेराए पाय-पडियाए नो अभिसंघारेज्जा गमणाए ।

से भिक्खू वा भिक्खुणी वा सेज्जं पुण पायं जाणेज्जा-अस्सिंपडियाए एगं साहाम्मियं समुद्धिस्स पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्चेज्जं अनिसट्ठं अभिहडं आहट्ठु चेएति तं तहप्पगारं पायं पुरिसंतरकडं वा अपुरिसंतरकडं वा बहिया नीहडं वा अनीहडं वा अत्तट्ठियं वा अणत्तट्ठियं वा परिभुत्तं वा अपरिभुत्तं वा आसेवियं वा अनासेवियं वा- अफासुयं अनेसणिज्जं ति मन्नमाणे लाभे संते नो पडिगाहेज्जा । जहा पिंडेसणाए [तहा] चत्तारि आलावगा [भाणियव्वा] पंचमे बहवे समण० पगणिय पगणिय तहेव ।

से भिक्खू वा भिक्खुणी वा सेज्जं पुण पायं जाणेज्जा-अस्संजए भिक्खु-पडियाए कीयं वा धोयं वा रत्तं वा घट्ठं वा मट्ठं वा संमट्ठं वा संपधूमियं वा-तहप्पगारं पायं अपुरिसंतरकडं अबहिया नीहडं अणत्तट्ठियं अपरिभुत्तं अनासेवियं- अफासुयं अनेसणिज्जं ति मन्नमाणे लाभे संते नो पडिगाहेज्जा अह पुण एवं जाणेज्जा-पुरिसंतरकडं बहिया नीहडं अत्तट्ठियं परिभुत्तं आसेवियं-फासुयं एसणिज्जं ति मन्नमाणे लाभे संते पडिगाहेज्जा ।

से भिक्खू वा भिक्खुणी वा सेज्जाइं पुण पायाइं जाणेज्जा विरूवरूवाइं महद्धणमुल्लाइं, तं सुयक्खंधो-२, अज्झयणं-६ उद्देशो-१

जहा- अय-पायाणि वा तउ-पायाणि वा तंब-पायाणि वा सीसग-पायाणि वा हिरण्ण-पायाणि वा सुवण्ण-पायाणि वा रीरिय-पायाणि वा हारपुड-पायाणि वा मणि-कायं-कंस-पायाणि वा संख-सिंग-पायाणि वा दंत-चेल-सेल-पायाणि वा चम्म-पायाणि वा-अन्नयराइं वा तहप्पगाराइं विरूवरूवाइं महद्धणमुल्लाइं पायाइं- अफासुयाइं अनेसणिज्जाइं ति मन्नमाणे लाभे संते नो पडिगाहेज्जा ।

से भिक्खू वा भिक्खुणी वा सेज्जाइं पुण पायाइं जाणिज्जा विरूवरूवाइं महद्धणधणाइं तं जहा-अयबंधणाणि वा जाव चम्मबंधणाणि वा, अन्नयराइं वा तहप्पगाराइं महद्धणबंधणाइं- अफासुयं अनेसणिज्जाइं ति मन्नमाणे लाभे संते नो पडिगाहेज्जा । इच्चेयाइं आयतणाइं उवातिकम्म अह भिक्खू जाणेज्जा चउहिं पडिमाहिं पायं एसित्तए तत्थ खलु इमा पढमा पडिमा- से भिक्खू वा भिक्खुणी वा उद्धिसिय-उद्धिसिय पायं जाएज्जा तं जहा-अलाउय-पायं वा दारु-पायं वा मट्टिया-पायं वा तहप्पगारं पायं सयं वा णं जाएज्जा जाव पडिगाहेज्जा- पढमा पडिमा ।

अहावरा दोच्चा पडिमा- से भिक्खू वा भिक्खुणी वा पेहाए पायं जाएज्जा तं जहा- गाहावइं वा गाहावइं-भारियं वा गाहावइ-भगिनिं वा गाहावइ-पुत्तं वा गाहावइ-धूयं वा सुण्हं वा धाइं वा दासं वा दासिं वा कम्मकरं वा कम्मकरिं वा, से पुव्वामेव आलोएज्जा आउसो त्ति वा भइणि त्ति वा, दाहिसि मे

एत्तो अन्नयरे पायं तं जहा-लाउय-पायं वा दारु-पायं वा मट्टिया-पायं वा तहप्पगारं पायं सयं वा णं जाएज्जा परो वा से देज्जा- फासुयं एसणिज्जं ति मन्नमाणे लाभे संते पडिगाहेज्जा- दोच्चा पडिमा ।

अहावरा तच्चा पडिमा- से भिक्खू वा भिक्खुणी वा सेज्जं पुण पायं जाणेज्जा संगतियं वा वेजयंतियं वा-तहप्पगारं पायं सयं वा णं जाएज्जा जाव पडिगाहेज्जा- तच्चा पडिमा ।

अहावरा चउत्था पडिमा- से भिक्खू वा भिक्खुणी वा उज्झय-धम्मियं पायं जाएज्जा जं चऽन्ने बहवे समण-माहण-अतिहि-किवण-वणीमगा नावकंखंति तहप्पगारं उज्झय-धम्मियं पायं सयं वा णं जाएज्जा जाव पडिगाहेज्जा- चउत्था पडिमा ।

इच्चेयाणं चउण्हं पडिमाणं अन्नयरं पडिमं पडिवज्जमाणे नो एवं वएज्जा मिच्छा पडिवन्ना खलु एते भयंतारो अहमेगे सम्मं पडिवन्ने जे एते भयंतारो एयाओ पडिमाओ पडिवज्जित्ताणं विहरंति जो य अहमंसि एयं पडिमं पडिवज्जित्ताणं विहरामि सव्वे वे ते उ जिणाणाए उवट्ठिया अन्नोन्नसमाहीए एवं च णं विहरंति ।

से णं एताए एसणाए एसमाणं परो पासित्ता वएज्जा- आउसंतो समणा एज्जासि तुमं मासेण वा दसराएण वा पंचराएण वा सुए वा सुयतरे वा तो ते वयं आउसो अन्नयरं पायं दाहामो एयप्पगारं निग्धोसं सोच्चा निसम्म से पुव्वामेव आलोएज्जा- आउसो त्ति वा भइणि त्ति वा नो खलु मे कप्पइ एयप्पगारे संगार-वयणे पडिसुणित्तए अभिकंखसि मे दाउं इयाणिमेव दलयाहि से सेवं वयंतं परो वएज्जा आउसंतो समणा अनुगच्छाहि तो ते वयं अन्नतरं पायं दाहामो से पुव्वामेव आलोएज्जा-आउसो त्ति वा भइणि त्ति वा नो खलु मे कप्पइ एयप्पगारे संगार-वयणे पडिसुणित्तए अभिकंखसि मे दाउं इयाणिमेव दलयाहि से सेवं वयंतं परो नेत्ता वदेज्जा- आउसो त्ति वा भइणि त्ति वा आहरेयं पायं समणस्स दाहामो अवियाइं वयं पच्छावि अप्पणो सयट्ठाए पाणाइं भूयाइं जीवाइं सत्ताइं समारब्भ समुद्धिस्स पायं चेइस्सामो एयप्पगारं निग्धोसं सोच्चा निसम्म तहप्पगारं पायं-अफासुयं जाव नो पडिगाहेज्जा ।

से णं परो नेत्ता वएज्जा- आउसो त्ति वा भइणि त्ति वा आहरेयं पायं तेल्लेण वा घएण वा

सुयक्खंधो-२, अज्झयणं-६ उद्देशो-१

नवनीएण वा वसाए वा अब्भंगेत्ता वा तहेव सिणाणादि तहेव सीओदगाई कंदाइ तहेव ।

से णं परो नेत्ता वएज्जा- आउसंतो समणा! मुहुत्तगं-मुहुत्तगं अच्छाहि जाव ताव अम्हे असनं वा पानं वा खाइमं वा साइमं वा उवकरेसुं वा उवक्खडैसु वा, तो ते वयं आउसो! सपानं सभोयणं पडिग्गहगं दाहामो, तुच्छए पडिग्गहए दिन्ने समणस्स नो सुडु साहु भवइ, से पुव्वामेव आलोएज्जा- आउसो त्ति वा भइणि त्ति वा, नो खलु मे कप्पइ आहाकम्मिए असणे वा पाणे वा खाइमे वा साइमे वा भोत्तए वा पायए वा मा उवकरेहि मा उवक्खडेहि अभिकंखसि मे दाउं एमेव दलयाहि, से सेवं वयंतस्स परो असनं वा० उवकरेत्ता उवक्खडेत्ता सपानगं सभोयणं पडिग्गहगं दलएज्जा तहप्पगारं पडिग्गहगं अफासुयं अनेसणिज्जं ति मन्नमाणे लाभे संते नो पडिगाहेज्जा ।

सिया से परो नेत्ता पडिग्गहं निसिरेज्जा से पुव्वामेवं आलोएज्जा- आउसो त्ति वा भइणि त्ति वा, तुमं चेव णं संतियं पडिग्गहगं अंतोअंतेणं पडिलेहिस्सामि, केवली बूया आयाणमेय- अंतो पडिग्गहंसि पाणाणि वा बीयाणि वा हरियाणि वा, अह भिक्खूणं पुव्वोवदिट्ठा एस पइण्णा एस हेऊ एस

कारणं एस उवएसो जं पुव्वामेव पडिग्गहगं अंतोअंतेणं पडिलेहिज्जा । सअंडाइं सव्वे आलावगा भाणियव्वा जहा वत्थेसणाए, नाणत्तं तिल्लेण वा घयं वा नवनीएण वा वसाए वा सिणाणादि जाव अन्नयरंसि वा तहप्पगारं थंडिलंसि, पडिलेहिय पडिलेहिय पमज्जिय पमज्जिय तओ० संजयामेव आमज्जिज्जा ।

एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समिए सहिए सया जएज्जासि - त्तिबेमि ।

छट्ठे अज्झयणे पढमो उद्देशो समत्तो

० बीओ - उद्देशो ०

[४८७] से भिक्खू वा भिक्खुणी वा गाहावइ-कुलं पिंडवाय-पडियाए पविट्ठे समाणे पुव्वामेव पेहाए पडिग्गहगं अवहट्ठ पाणे पमज्जियं रयं ततो संजयामेव गाहावइ-कुलं पिंडवाय-पडियाए निक्खमेज्ज वा पविसेज्ज वा केवली बूया आयाणमेयं- अंतो पडिग्गहगंसि पाणे वा बीए वा हरिए वा परियावज्जेज्जा० अह भिक्खूणं पुव्वोवदिट्ठा एस पइण्णा एस हेऊ एस कारणं एस उवएसो जं पुव्वामेव पेहाए पडिग्गहं अवहट्ठ पाणे पमज्जियं रयं तओ संजयामेव गाहावइ-कुलं पिंडवाय-पडियाए पविसेज्ज वा निक्खमेज्ज वा ।

[४८८] से भिक्खू वा० [गाहावइ-कुलं पिंडवाय-पडियाए अनुपविट्ठे] समाणे सिया से परो आहट्ठ अंतो पडिग्गहगंसि सीओदगं परिभाएत्ता नीहट्ठ दलएज्जा तहप्पगारं पडिग्गहगं परहत्थंसि वा परपायंसि वा- अफासुयं जाव नो पडिगाहेज्जा, से य आहच्च पडिग्गहिए सिया खिप्पामेव उदगंसि साहरेज्जा० से पडिग्गहमायाए पानं परिट्ठवेज्जा ससणिद्धाए वा णं भूमीए नियमेज्जा ।

से भिक्खू वा भिक्खुणी वा उदउल्लं वा ससणिद्धं वा पडिग्गहं नो आमज्जेज्ज वा

[पमज्जेज्ज वा निलिहेज्ज वा उव्वलेज्ज वा उवट्ठेज्ज वा आयावेज्ज वा पयावेज्ज वा अह पुण एवं जाणेज्जा- विगतोदए मे पडिग्गहए छिन्न-सिनेहे मे पडिग्गहए तहप्पगारं पडिग्गहं तओ संजयामेव आमज्जेज्ज वा पयावेज्ज वा ।

से भिक्खू वा भिक्खुणी वा गाहावइ-कुलं पिंडवाय-पडियाए पविसिउकामे सपडिग्गहमायाए गाहावइ-कुलं पिंडवाय-पडियाए पविसेज्ज वा निक्खमेज्ज वा । एवं बहिया वियार भूमिं विहारभूमिं वा सुयक्खंधो-२, अज्झयणं-६ उद्देशो-२

गामा दूइज्जेज्जा० तिव्वदेसीयाए जहा बिइयाए वत्थेसणाए नवरं इत्थ पडिग्गहे ।

एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समिए सहिए सया जएज्जासि - त्ति बेमि ।

छट्ठे अज्झयणे बीओ उद्देशो समत्तो

मुनि दीपरत्नसागरेण संशोधितः सम्पादितश्च छट्ठं अज्झयणं समत्तं

सत्तमं अज्झयणं - ओग्गहपडिमा

० पढमो उद्देशो ०

[४८९] समणे भविस्सामि अनगारे अकिंचणे अपुत्ते अपसू परदत्तभोइ पावं कम्मं नो करिस्सामि त्ति समुट्ठाए सव्वं भंते । अदिन्नादाणं पच्चक्खामि, से अनुपविसित्ता गामं वा नगरं वा खेडं वा [कब्बडं वा मडंबं वा पट्ठणं वा दोणमुहं वा आगरं वा निगमं वा आसमं वा सन्निवेसं वा रायहाणिं वा]-

नेव सयं अदिन्नं गिणहेज्जा नेवऽन्नेणं अदिन्नं गिणहावेज्जा नेवऽन्नं अदिन्नं गिणहंते वि समणुजाणेज्जा, जेहिं वि सद्धिं संपव्वइए तेसिं पि याइं भिक्खू छत्तयं वा मत्तयं वा दंडगं वा जाव चम्मछेदणं वा- तेसिं पुव्वामेव ओग्गहं अणुणुणविय अपडिलेहिय अपमज्जिय नो गिणहेज्ज वा पगिणहेज्ज वा तेसिं पुव्वामेव ओग्गहं अणुणुणविय पडिलेहिय पमज्जिय तओ संजयामेव ओगिणहेज्ज वा पगिणहेज्ज वा ।

[४९०] से भिक्खू वा भिक्खुणी वा० आगंतारेसु वा आरामागारेसु वा गाहावइ-कुलेसु वा परियावसहेसु वा अनुवीइ ओग्गहं जाएज्जा० जे तत्थ ईसरे जे तत्थ समहिद्वाए ते ओग्गहं अणुणुणवेज्जा कामं खलु आउसो० अहालंदं अहापरिण्णातं वसामो जाव आउसो ! जाव आउसंतस्स ओग्गहे जाव साहम्मिया एत्ता ताव ओग्गहं ओगिण्हिस्सामो तेण परं विहरिस्सामो? से किं पुण ? तत्थोग्गहंसि एवोग्गहियंसि जे तत्थ साहम्मिया संभोइया समणुण्णा उवागच्छेज्जा जे तेण सयमेसियाए असणे वा पाणे वा खाइमे वा साइमे वा तेण ते साहम्मिया संभोइया समणुण्णा उवनिमंतेज्जा, नो चेव णं पर-पडियाए उगिज्झिय-उगिज्झिय उवनिमंतेज्जा ।

[४९१] से आगंतारेसु वा जाव वसामो जाव आउसो जाव आउसंतस्स ओग्गहे जाव साहम्मिया एत्ता ताव ओग्गहं ओगिण्हिसामो तेण परं विहरिस्सामो से किं पुण ? तत्थोग्गहंसि एवोग्गहियंसि जे तत्थ साहम्मिया अन्नसंभोइया समणुण्णा उवागच्छेज्जा जे तेणं सयमेसियाए पीढे वा फलए वा सिज्जा वा संथारए वा तेण ते साहम्मिए अन्नसंभोइए समणुण्णे उवनिमंतेज्जा, नो चेव णं पर-वडियाए उगिज्झिय-उगिज्झिय उवनिमंतेज्जा ।

से आगंतारेसु वा जाव से किं पुण ? तत्थोग्गहंसि एवोग्गहियंसि जे तत्थ गाहावइण वा गाहावइपुत्ताण वा० सूई वा पिप्पलए वा कण्णसोहणए वा नहच्छेयए वा तं अप्पणो एगस्स अद्वाए पाडिहारियं जाइत्ता नो अन्नमन्नस्स देज्ज वा अनुपदेज्ज वा, सयं करणिज्जं ति कट्ठु से तमादाए तत्थ गच्छेज्जा गच्छत्ता पुव्वामेव उताणए हत्थे कट्ठु भूमीए वा ठवेत्ता इमं खलु त्ति आलोएज्जा, नो चेव णं सयं पाणिणा परपाणिंसि पच्चप्पिणेज्जा ।

[४९२] से भिक्खू वा भिक्खुणी वा सेज्जं पुण ओग्गहं जाणिज्जा- अनंतरहियाए पुढवीए सुयक्खंधो-२, अज्झयणं-७ उद्देशो-१

ससणिद्वाए पुढवीए ससरक्खाए पुढवीए चित्तमंताए सिलाए चित्तमंताए लेलुए कोलावासंसि वा दारुए जीव-

पइट्ठिए सअंडे सपाणे सबीए सहरिए सउसे सउदए सउत्तिंग-पणग-दग-मट्ठिय-मक्कडा संताणए तहप्पगारं ओग्गहं नो ओगिणहेज्ज वा पगिणहेज्ज वा ।

से भिक्खू वा भिक्खुणी वा सेज्जं पुणं ओग्गहं जाणिज्जा थूणंसि वा गिहेलुगंसि वा उसुयालंसि वा कामजलंसि वा अन्नयरे वा तहप्पगारे अंतलिक्खजाए दुब्बद्धे [दुन्निक्खित्ते अनिकं पे चलाचले] नो ओग्गहं ओगिणहेज्ज पगिणहेज्ज वा ।

से भिक्खू वा भिक्खुणी वा सेज्जं पुण ओग्गहं जाणेज्जा कुलियंसि वा भित्तिंसि वा सिलंसि वा लेलुंसि वा अन्नयरे वा तहप्पगारे अंतलिक्खजाए दुब्बद्धे दुन्निक्खित्ते अनिकं पे चलाचले नो ओग्गहं ओगिणहेज्ज वा पगिणहेज्जा वा ।

से भिक्खू वा भिक्खुणी वा सेज्जं पुण ओग्गहं जाणेज्जा-खंधंसि वा मंचंसि वा मालंसि वा पासायंसि वा हम्मियतलंसि वा अन्नयरे वा तहप्पगारे अंतलिक्खजाए दुब्बद्धे दुन्निक्खित्ते अनिकं पे चलाचले नो ओग्गहं ओगिण्हेज्ज वा पगिण्हेज्ज वा ।

से भिक्खू वा भिक्खुणी वा सेज्जं पुण ओग्गहं जाणेज्जा-ससागारियं सागणियं सउदयं सइत्थिं सखुइडुं सपसुं सभत्तपानं नो पण्णस्स निक्खमण-पवेसाए [नो पण्णस्स वायण-पुच्छण-परियट्ठणाणुपेह धम्माणुओग] चिंताए, सेवं नच्चा तहप्पगारे उवस्सए ससागारिए जाव सखुइड-पलु-भत्तपाणे नो ओग्गहं ओगिण्हेज्ज वा पगिण्हेज्ज वा ।

से भिक्खू वा भिक्खुणी वा सेज्जं पुण ओग्गहं जाणेज्जा-गाहावइ-कुलस्स मज्झमज्झेणं गंतुं पंथे पडिबद्धं वा नो पण्णस्स निक्खमण-पवेसाए नो पण्णस्स वायण-पुच्छण-परियट्ठणाणुपेह-धम्माणुओग चिंताए सेवं नच्चा तहप्पगारे उवस्सए नो ओग्गहं ओगिण्हेज्ज वा पगिण्हेज्ज वा ।

से भिक्खू वा भिक्खुणी वा सेज्जं पुण ओग्गहं जाणेज्जा- इह खलु गाहावई वा गाहावइणीओ वा गाहावइ-पुत्ता वा गाहावइ-धूयाओ वा गाहावइ-सुण्हाओ वा धाईओ वा दासा वा दासीओ वा कम्मकरा वा कम्मकरीओ वा अन्नमन्नं अक्कोसंति वा बंधंति वा रंभंति वा उद्वेतिं वा नो पण्णस्स जाव चिंताए सेवं नच्चा तहप्पगारे उवस्सए नो ओग्गहं ओगिण्हेज्ज वा पगिण्हेज्ज वा ।

से भिक्खू वा भिक्खुणी वा सेज्जं पुण ओग्गहं जाणेज्जा- इह खलु गाहावई वा जाव कम्मकरीओ वा अन्नमन्नस्स गायं तेल्लेण वा घएण वा नवनीएण वा वसाए वा अब्भंगंति वा मक्खेति वा नो पण्णस्स निक्खमण-पवेसाए नो पण्णस्स वायण-पुच्छण-परियट्ठणाणुपेह-धम्माणुओग-चिंताए सेवं नच्चा तहप्पगारे उवस्सए नो ओग्गहं ओगिण्हेज्ज वा पगिण्हेज्ज वा ।

से भिक्खू वा भिक्खुणी वा सेज्जं पुण ओग्गहं जाणेज्जा- इह खलु गाहावई वा जाव कम्मकरीओ वा अन्नमण्णस्स गायं सिणाणेण वा कक्केण वा लोद्धेण वा वण्णेण वा चुण्णेण वा पउमेण वा आघंसंति वा पघंसंति वा उव्वलेंति वा उव्वट्ठेंति वा नो पण्णस्स जाव चिंताए सेवं नच्चा तहप्पगारे उवस्सए नो ओग्गहं ओगिण्हेज्ज वा पगिण्हेज्ज वा ।

से भिक्खू वा भिक्खुणी वा सेज्जं पुण ओग्गहं जाणेज्जा-इह खलु गाहावई वा जाव कम्म-करीओ वा अन्नमन्नस्स गायं सीओदग-वियडेग वा उसिणोदग वियडेण वा उच्छोलेंति वा पधोवेंति वा सिंचंति वा सिणावेंति वा नो पण्णस्स निक्खमण-पवेसाए नो पण्णस्स वायण-पुच्छण-परियट्ठणाणुपेह-सुयक्खंधो-२, अज्झयणं-७ उद्देसो-१

धम्माणुओगचिंताए सेवं नच्चे तहप्पगारे उवस्सए नो ओग्गहं ओगिण्हेज्ज वा पगिण्हेज्ज वा ।

से भिक्खू वा भिक्खुणी वा सेज्जं पुण ओग्गहं जाणेज्जा-इह खलु गाहावई वा जाव कम्मकरीओ वा निगिणा ठिआ निगिणा उवल्लीणा मेहुणधम्मं विन्नवंति रहस्सियं वा मंतं मंतंति नो पण्णस्स निक्खमण-पवेसाए ।

से भिक्खू वा भिक्खुणी वा से ज्जं पुण ओग्गहं जाणेज्जा- आइण्णसंलेक्खं नो पण्णस्स निक्खमण-पवेसाए जाव - धम्माणुओग चिंताए सेवं नच्चा तहप्पगारे उवस्सए नो ओग्गहं ओगिण्हेज्ज वा पगिण्हेज्ज वा ।

एयं खलु [तस्स भिक्खुस्स वा भिक्खुणीए वा सामग्गियं] जं सव्वट्ठेहिं समिए सहिए सया जएज्जासि, त्तिबेमि ।

सत्तमे अज्झयणे पढमो उद्देशो समत्तो

◦ बीओ - उद्देशो ◦

[४९३] से आगंतारेसु वा आरामागारेसु वा गाहावइ-कुलेसु वा परियावसहेसु वा अनुवीइ ओग्गहं जाएज्जा जे तत्थ ईसरे, जे तत्थ समहिद्वाए, ते ओग्गहं अणुण्णविज्जा कामं खलु आउसो ! अहालंदं अहापरिण्णायं वसामो जाव आउसो! जाव आउसंतस्स ओग्गहो जाव साहम्मियाए ताव ओग्गहं ओगिण्हिसामो तेण परं विहरिस्सामो से किं पुण ?, तत्थ ओग्गहंसि एवोग्गहियंसि जे तत्थ समणाण वा माहणाण वा छत्तए वा मत्तए वा दंडए वा लद्धिया वा मिसिया वा नालिया वा चेलं वा चिलिमिली वा चम्मए वा चम्मकोसए वा चम्मछेदणए वा तं नो अंतोहिंतो बाहिं नीणेज्जा बहियाओ वा नो अंतो पवेसेज्जा, नो सुत्तं वा णं पडिबोहेज्जा, नो तेसिं किंचि वि अप्पत्तियं पडिनीयं करेज्जा ।

[४९४] से भिक्खू वा भिक्खुणी वा अभिकंखेज्जा अंबवनं उवागच्छित्तए जे तत्थ ईसरे जे तत्थ समहिद्वाए ते ओग्गहं अणुजाणावेज्जा कामं खलु आउसो जाव विहरिस्सामो, से किं पुण तत्थ ओग्गहंसि एवोग्गहियंसि० अह भिक्खू इच्छेज्जा अंबं भोत्तए वा पायए वा सेज्जं पुण अंबं जाणेज्जा-सअंडं सपानं सबीयं सहरियं सउसं सउदयं सउत्तिंग-पणग-दग-मट्टिय-मक्कडा संताणगं तहप्पगारं अंब-अफासुयं अनेसणिज्जं ति मन्नमाणे लाभे संते नो पडिगाहेज्जा ।

से भिक्खू वा भिक्खुणी वा सेज्जं पुण अंबं जाणेज्जा- अप्पंडं जाव संताणगं अतिरिच्छच्छिन्नं अवोच्छिन्नं- अफासुयं अनेसणिज्जं ति मन्नमाणे लाभे संते नो पडिगाहेज्जा ।

से भिक्खू वा भिक्खुणी वा सेज्जं पुण अंबं जाणेज्जा अप्पंडं जाव संताणगं तिरिच्छच्छिन्नं वोच्छिन्नं - फासुयं एसणिज्जं ति मन्नमाणे लाभे संते पडिगाहेज्जा ।

से भिक्खू वा भिक्खुणी वा अभिकंखेज्जा अंबभित्तगं वा अंबेपेसियं वा अंबचोयगं वा अंबसालगं वा अंबडगलं वा भोत्तए वा पायए वा सेज्जं पुण जाणेज्जा- अंबभित्तगं वा जाव अंबडगलं वा सअंडं जाव संताणगं अफासुयं अनेसणिज्जं ति मन्नमाणे लाभे संते नो पडिगाहेज्जा ।

से भिक्खू वा भिक्खुणी वा से ज्जं पुण जाणेज्जा- अंबभित्तगं वा जाव अंबडगलं वा अप्पंडं जाव अप्पत्तिंग पणग-दग-मट्टिय-मक्कडा संताणगं अतिरिच्छच्छिन्नं अवोच्छिन्नं-अफासुयं अनेसणिज्जं ति मन्नमाणे लाभे संते नो पडिगाहेज्जा ।

से भिक्खू वा भिक्खुणी वा से ज्जं पुण जाणेज्जा अंबभित्तगं वा जाव अंबडगलं वा अप्पंडं सुयक्खंधो-२, अज्झयणं-७ उद्देशो-२

जाव संताणगं तिरिच्छच्छिन्नं वोच्छिन्नं-फासुयं जाव लाभे संते पडिगाहेज्जा ।

से भिक्खू वा भिक्खुणी वा अभिकंखेज्जा उच्छुवनं उवागच्छित्तए, जे तत्थ ईसरे [जे तत्थ समहिद्वाए ते ओग्गहं अणुजाणावेज्जा कामं खलु आउसो अहालंदं अहापरिण्णायं वसामो जाव आउसो जाव आउसंतस्स ओग्गहो जाव साहम्मियाए ताव ओग्गहं ओगिण्हिस्सामो तेण परं विहरिस्सामो]

से किं पुण तत्थ ओग्गहंसि एवोग्गहियंसि अह भिक्खू इच्छेज्जा उच्छुं भोत्तए वा पायए वा सेज्जं पुण उच्छुं जाणेज्जा सअंडं जाव मक्कडा संताणगं तहप्पगारं उच्छुं-अफासुयं अनेसणिज्जं ति मन्नमाणे लाभे संते नो पडिगाहेज्जा । अतिरिच्छच्छिन्नं तहेव, तिरिच्छच्छिन्नेऽवि तहेव ।

से भिक्खु वा भिक्खुणी वा अभिकंखेज्जा अंतरुच्छुयं वा उच्छुगंडियं वा उच्छुचोयगं वा उच्छुसालगं वा उच्छुडगलं वा भोत्तए वा पायए वा सेज्जं पुण जाणेज्जा- अंतरुच्छुयं वा जाव डगलं वा

सअंडं सपानं सबीयं सहरियं सउसं सउदयं सउत्तिंग-पणग-दग-मट्टिय-मक्कडासंताणगं- अफासुयं अनेसणिज्जं ति मन्नमाणे लाभे संते नो पडिगाहेज्जा ।

से भिक्खू वा भिक्खुणी वा सेज्जं पुण जाणेज्जा- अंतरुच्छुयं वा जाव डगलं मट्टिय-मक्कडासंताणगं अतिरिच्छच्छिन्नं अवोच्छिन्नं- अफासुयं अनेसणिज्जं ति मन्नमाणे लाभे संते नो पडिगाहेज्जा ।

से भिक्खू वा भिक्खुणी वा सेज्जं पुणा जाणेज्जा - अंतरुच्छुयं वा जाव डगलं वा अप्पंडं जाव तिरिच्छच्छिन्नं वोच्छिन्नं- फासुयं एसणिज्जं ति मन्नमाणे लाभे संते पडिगाहेज्जा ।

से भिक्खू वा भिक्खुणी वा अभिकंखेज्जा ल्हसुणवनं उवागच्छित्तए, तहेव तिन्नि वि आलावगा, नवरं ल्हसुणं ।

से भिक्खू वा० अभिकंखेज्जा ल्हसुणं वा ल्हसुण-कंदं वा ल्हसुण चोयगं वा ल्हसुण-नालगं वा भोत्तए वा पायए वा सेज्जं पुण जाणेज्जा ल्हसुणं वा जाव ल्हसुण-नालगं वा सअंडं [सपानं सबीयं सहरियं सउसं सउदयं सउत्तिंग-पणग-दग-मट्टिय-मक्कडासंताणगं-अफासुयं अनेसणिज्जं मन्नमाणे लाभे संते] नो पडिगाहेज्जा । एवं अतिरिच्छच्छिन्नेऽवि तिरिच्छच्छिन्ने जाव पडिगाहेज्जा ।

[४९५] से भिक्खू वा भिक्खुणी वा आगंतारेसु वा [आरामागारेसु वा गाहावड कुलेसु वा परियावसहेसु वा अनुवीड ओग्गहं जाणेज्जा- जाव एवोग्गहियंसि, जे तत्थ गाहावडं वा गाहावडपुत्ताण वा इच्चेयाइं आयतणाइं उवाइक्कमं अह भिक्खू जाणेज्जा, इमाहिं सत्तहिं पडिमाहिं ओग्गहं ओगिण्हित्तए तत्थ खलु इमा पढमा पडिमा :-

से आगंतारेसु वा आरामागारेसु वा गाहावड कुलेसु वा परियावसहेसु वा अणुवीड ओग्गहं जाएज्जा-जे तत्थ ईसरे जे तत्थ समहिट्ठए ते ओग्गहं अणुणविज्जा कामं खलु आउसो अहालंदं अहापरिणायं वसामो जाव आउसो जाव आउसंतस्स ओग्गहो जाव साहम्मिया एत्ता ताव ओग्गहं ओगिण्हिस्सामो तेण परं विहरिस्सामो- पढमा पडिमा ।

अहावरा दोच्चा पडिमा- जस्स णं भिक्खुस्स एवं भवइ अहं च खलु अन्नेसिं भिक्खूणं अट्ठाए ओग्गहं ओगिण्हिस्सामि, अन्नेसिं भिक्खूणं ओग्गहे ओग्गहिए उवल्लिस्सामि- दोच्चा पडिमा ।

अहावरा तच्चा पडिमा-जस्स णं भिक्खुस्स एवं भवइ अहं च खलु अन्नेसिं भिक्खूणं अट्ठाए ओग्गहं ओगिण्हिस्सामि अन्नेसिं भिक्खूणं च ओग्गहे ओग्गहिए नो उवल्लिस्सामि-तच्चा पडिमा।

सुयक्खंधो-२, अज्झयणं-७ उद्देसो-२

अहावरा चउत्था पडिमा- जस्स णं भिक्खुस्स एवं भवइ अहं च खलु अन्नेसिं भिक्खूणं अट्ठाए ओग्गहं नो ओगिण्हिस्सामि अन्नेसिं च ओग्गहे ओग्गहिए उवल्लिस्सामि- चउत्था पडिमा ।

अहावरा पंचमा पडिमा- जस्स णं भिक्खुस्स एवं भवइ अहं च खलु अप्पणो अट्ठाए ओग्गहं ओगिण्हिस्सामि नो दोण्हं नो तिण्हं नो चउण्हं नो पंचण्हं- पंचमा पडिमा ।

अहावरा छट्ठा पडिमा- से भिक्खू वा भिक्खुणी वा जस्सेव ओग्गहे उवल्लिएज्जा जे तत्थ अहासमन्नागए तं जहा-इक्कडे वा [कट्ठिणे वा जंतुए वा परगे वा मोरगे वा तणे वा जाव पिप्पले वा] पलाले वा तस्स लाभे संवसेज्जा, अलाभे उक्कुडुए वा नेसज्जिए वा विहरेज्जा- छट्ठा पडिमा ।

अहावरा सत्तमा पडिमा- से भिक्खू वा भिक्खुणी वा अहासंथडमेव ओग्गहं जाएज्जा तंजहा-पुढविसिलं वा कट्ठसिलं वा अहासंथडमेव तस्स लाभे संवसेज्जा, तस्स- अलाभे उक्कुडुओ वा नेसज्जिओ वा विहरेज्जा- सत्तमा पडिमा ।

इच्चेतासिं सत्तण्हं पडिमाणं अन्नयरं जहा पिंडेसणा ।

[एयं खलु तस्स भिक्खुस्स वा भिक्खुणी वा सामग्गियं जं सव्वट्ठेहिं समिए सहिए सया जएज्जासि-त्ति बेमि] ।

सत्तमे अज्झयणे बीओ उद्देसो समत्तो

मुनि दीपरत्नसागरेण संशोधितः सम्पादितश्च सत्तमं अज्झयणं समत्तं

* पढमा चूला समत्ता *

अद्धमं अज्झयणं - ठाण सत्तिक्कयं

० बीया चूला-पढमं सत्तिक्कयं ०

[४९७] से भिक्खू वा भिक्खुणी वा अभिक्खेज्जा ठाणं ठाइत्तए, से अनुपविसेज्जा गामं वा नगरं वा [खेडं वा कब्बडं वा मडंबं वा पट्टणं वा दोणमुहं वा आगरं वा निगमं वा आसमं वा सन्निवेसं वा] रायहाणिं वा से अनुपविसित्ता गामं वा जाव रायहाणिं वा, सेज्जं पुण ठाणं जाणेज्जा- सअंडं [सपानं सबीयं सहरियं सउसं सउदयं सउत्तिंग-पणग-दग-मट्ठिय-मक्कडा] संताणयं तं तहप्पगारं ठाणं- अफासुयं अनेसणिज्जं ति मन्नमाणे लाभे संते नो पडिगाहेज्जा ।

एवं सिज्जागमेण नेयव्वं जाव उदयपसूयाइंति ।

इच्चेयाइं आयातणाइं उवातिकम्मे अह भिक्खू इच्छेज्जा चउहिं पडिमाहिं ठाणं ठाइत्तए, तत्थिमा पढमा पडिमा । अचित्तं खलु उवसज्जिस्सामि अवलंबिस्सामि काएण विपरिक्कमिस्सामि सवियारं ठाणं ठाइस्सामि त्ति पढमा पडिमा ।

अहावरा दोच्चा पडिमा- अचित्तं खलु उवसज्जिस्सामि अवलंबिस्सामि काएण विपरिक्कमिस्सामि नो सवियारं ठाणं ठाइस्सामि त्ति दोच्चा पडिमा ।

अहावरा तच्चा पडिमा- अचित्तं खलु उवसज्जिस्सामि नो अवलंबिस्सामि नो काएण विपरिक्कमिस्सामि नो सवियारं ठाणं ठाइस्सामि त्ति तच्चा पडिमा ।

अहावरा चउत्था पडिमा- अचित्तं खलु उवसज्जिस्सामि नो अवलंबिस्सामि नो काएण विपरिक्कमिस्सामि नो सवियारं ठाणं ठाइस्सामि त्ति वोसट्ठकाए वोसट्ठ केस-मंसु-लोम-नहे सन्निरुद्धं वा सुयक्खंधो-२, अज्झयणं-८ [सत्तिक्कयं-१]

ठाणं ठाइस्सामि त्ति चउत्था पडिमा ।

इच्चेयासिं चउण्हं पडिमाणं अन्नयरं पडिमं पडिवज्जमाणे नो एवं वएज्जा मिच्छा पडिवन्ना जाव पग्गहियतरागं विहरेज्जा नेव किंचि वि वएज्जा, एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समिए सहिए सया जएज्जासि - त्ति बेमि ।

अद्धमं अज्झयणं समत्तं

मुनि दीपरत्नसागरेण संशोधितः सम्पादितश्च बीयाए चूलाए पढमं सत्तिक्कयं समत्तं

नवमं अज्झयणं - निसीहियासत्तिककयं

० बीयाए चूलाए - बीअं सत्तिककयं ०

[४९८] से भिक्खू वा भिक्खुणी वा अभिक्खेज्जा निसीहियं फासुयं गमणाए, से ज्जं पुण निसीहियं जाणेज्जा-सअंडं [सपानं सबीयं सहरियं सउसं सउदयं सउत्तिंग पणग-दग-मट्टिय-] मक्कडासंताणयं तहप्पगारं निसीहियं-अफासुयं अनेसणिज्जं ति मन्नमाणे लाभे संते नो चेतस्सामि ।

से भिक्खू वा भिक्खुणी वा अभिक्खेज्जा निसीहियं गमणाए सेज्जं पुण निसीहियं जाणेज्जा- अप्पडं अप्पपाणं जाव मक्कडासंताणयं तहप्पगारं निसीहियं- फासुयं एसणिज्जं ति मन्नमाणे लाभे संते चेइस्सामि ।

एवं सिज्जागमेणं नेयव्वं जाव उदयप्पसूयाइं । जे तत्थ दुवग्गा तिवग्गा चउवग्गा पंच वग्गा वा अभिसंधारिंति निसीहियं गमणाए ते नो अन्नमन्नस्स कायं आलिंजिज्ज वा विलिंजिज्ज वा चुंबिज्ज वा दंतेहिं वा नहेहिं वा अच्छिंदिज्ज वा वुच्छिं०,

एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समिए सहिए सया जएज्जा, सेयमिणं मणेज्जासि - त्तिबेमि ।

नवमं अज्झयणं समत्तं

मुनि दीपरत्नसागरेण संशोधितः सम्पादितश्च बीयाए चूलाए बीअं सत्तिककयं समत्तं

दसमं अज्झयणं - उच्चारपासवणसत्तिककयं

० बीयाए चूलाए - तइयं सत्तिककयं ०

[४९९] से भिक्खू वा भिक्खुणी वा उच्चारपावसण-किरियाए उब्बाहिज्जमाणे सयस्स पायपुंछणस्स असईए तओ पच्छा साहम्मियं जाएज्जा ।

से भिक्खू वा भिक्खुणी वा सेज्जं पुण थंडिलं जाणेज्जा- सअंडं सपानं [सबीअं सहरियं सउसं सउदयं सउत्तिंग-पणग-दग-मट्टिय-] मक्कडासंताणयं तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा से ज्जं पुण थंडिलं जाणेज्जा- अप्पडं अप्पपाणं जाव संताणयं तहप्पगारंसि थंडिलंसि उच्चार पासवण वोसिरेज्जा ।

से भिक्खू वा भिक्खुणी वा सेज्जं पुण थंडिलं जाणेज्जा- अस्सिंपडियाए एगं साहम्मिया समुद्धिस्सं पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्छेज्जं अवोसट्ठं अभिहडं सुयक्खंधो-२, अज्झयणं-१०, [सत्तिककयं-३]

आहट्ठु उद्देसियं चेएइ तहप्पगारं थंडिलं पुरिसंतरकडं वा अपुरिसंतरकडं वा अत्तट्ठियं वा अनत्तट्ठियं वा परिभुत्तं वा अपरिभुत्तं वा आसेवियं वा अनासेवियं वा अन्नयरंसि वा तहप्पगारंसि थंडिलंसि नो उच्चार-पासवणं वोसिरेज्जा ।

से भिक्खू वा भिक्खुणी वा से ज्जं पुण थंडिलं जाणेज्जा- अस्सिंपडियाए बहवे साहम्मिया समुद्धिस्सा पाणाइं० समारब्भ समुद्धिस्स कीयं जाव अच्छेज्जं अनिसट्ठं अभिहडं आहट्ठु उद्देसियं चेएइ

तहप्पगारं थंडिलं पुरिसंतरकडं वा जाव अनासेवियं वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा० वा से ज्जं पुण थंडिलं जाणेज्जा- अस्सिंपडियाए एगं साहम्मिणिं समुद्धिस्स पाणाइं समारब्भ समुद्धिस्स कीयं जाव चेएइ तहप्पगारं थंडिलं पुरिसंतरकडं वा जाव अनासेवियं वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा० से ज्जं पुण थंडिलं जाणेज्जा- अस्सिंपडियाए बहवे साहम्मिणीओ समुद्धिस्स पाणाइं समारब्भ समुद्धिस्स कीयं जाव आहट्टु उद्देसियं चेएइ तहप्पगारं थंडिलं पुरिसंतरकडं वा जाव अनासेवियं वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा से ज्जं पुण थंडिलं जाणेज्जा- अस्सिंपडियाए बहवे समण जाव वणीमए पगणिय-पगणिय समुद्धिस्स पाणाइं० समारब्भ समुद्धिस्स कीयं० आहट्टु उद्देसियं चेइए तहप्पगारं थंडिलं पुरिसंतरकडं वा जाव बहिया नीहडं वा अनासेवियं वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा सेज्जं पुण थंडिलं जाणेज्जा- बहवे समण माहण० समुद्धिस्स पाणाइं भूयाइं जीवाइं सत्ताइं जाव उद्देसियं चेएइ तहप्पगारं थंडिलं पुरिसंतरकडं जाव बहिया अनीहडं अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा,

अह पुणेवं जाणेज्जा-अपुरिसंतरकडं जाव बहिया नीहडं अन्नयरंसि वा तहप्पगारंसि थंडिलंसि उच्चारपासवणं वोसिरेज्जा ।

से भिक्खू वा भिक्खुणी वा से ज्जं पुण थंडिलं जाणेज्जा- अस्सिंपडियाए कयं वा कारियं वा पामिच्चयं वा छन्नं वा घट्ठं वा मट्ठं वा लित्तं वा संमट्ठं वा संपधूमियं वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा सेज्जं पुण थंडिलं जाणेज्जा, इह खलु गाहावई वा गाहावइ-पुत्ता वा कंदाणि वा मूलाणि वा जाव हरियाणि वा अंतरातो वा बाहिं नीहरंति बहियाओ वा अंतो साहरंति अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा० से ज्जं पुण थंडिलं जाणेज्जा- खंधंसि वा पीढंसि वा मंचंसि वा मालंसि वा अट्ठंसि वा पासायंसि वा अन्नयरंसि वा तहप्पागरंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा सेज्जं पुण थंडिलं जाणेज्जा- अनंतरहियाए पुढवीए ससिणिद्धाए पुढवीए ससरक्खाए पुढवीए मट्ठियामकडाए चित्तमंताए सिलाए चित्तमंताए लेलुयाए कोलावासंसि वा दारुयंसि जीवपइट्ठियंसि सअंडंसि सपानंसि सबीअंसि सहरियंसि सउसंसि सउदयंसि सउत्तिंग-पणग-दग-मट्ठिय-मक्कडासंताणयंसि अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

सुयक्खंधो-२, अज्झयणं-१०, [सत्तिककयं-३]

[५००] से भिक्खू वा भिक्खुणी वा से ज्जं पुण थंडिलं जाणेज्जा- इह खलु गाहावई वा गाहावइ-पुत्ता वा कंदाणि वा [मूलाणि वा तयाणि वा जाव फलाणि वा] बीयाणि वा परिसाडैसु वा परिसाडित्ति वा परिसाडिस्संति वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा सेज्जं पुण थंडिलं जाणेज्जा- इह खलु गाहावई वा गाहावइ-पुत्ता वा० सालीणि वा वीहीणि वा मुग्गाणि वा मासाणि वा तिलाणि वा कुलत्थाणि वा जवाणि वा

जवजवाणि वा पतिरिंसुं वा पतिरिंति वा पतिरिस्संति वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा सेज्जं पुण थंडिलं जाणेज्जा- आमोयाणि वा घासाणि वा मिलुयाणि वा विज्जुलयाणि वा खाणुयाणि वा कडयाणि वा पगडाणि वा दरीणि वा पदुग्गाणि वा समाणि वा विसमाणि वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू भिक्खुणी वा से ज्जं पुण थंडिलं जाणेज्जा-माणुसरंधणाणि वा महिस-करणाणि वा वसभ-करणाणि वा अस्स-करणाणि वा कुक्कुड-करणाणि वा लावय-करणाणि वा वट्टय-करणाणि वा तित्तिर-करणाणि वा कवोय करणाणि वा कपिंजल-करणाणि वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा सेज्जं पुण थंडिलं जाणेज्जा- वेहाणस-द्वाणेषु वा गिद्धपिद्ध-द्वाणेषु वा तरुडण-द्वाणेषु वा मेरुपडण-द्वाणेषु वा विसभक्खण-द्वाणेषु वा अगनिपडण-द्वाणेषु वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा सेज्जं पुण थंडिलं जाणेज्जा-आरामाणि वा उज्जाणाणि वा वनानि वा वनसंडाणि वा देवकुलाणि वा सभाणि वा पवाणि वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा से ज्जं पुण थंडिलं जाणेज्जा अट्टालयाणि वा चरियाणि वा दाराणि वा गोपुराणि वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा से ज्जं पुण थंडिलं जाणेज्जा- तियाणि वा चउक्काणि वा चच्चराणि वा चउमुहाणि वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा से ज्जं पुण थंडिलं जाणेज्जा- इंगालडाहेसु वा खारडाहेसु वा मडयडाहेसु वा मडयथूभियासु वा मडयचेइएसु वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा से ज्जं पुण थंडिलं जाणेज्जा- नदीआययणेषु वा पंकाययणेषु वा ओघाययणेषु वा सेयणपहंसि वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा सेज्जं पुण थंडिलं जाणेज्जा- नवियासु वा मट्टिय-खाणियासु नवियासु वा गोप्पलेहियासु गवायणीसु वा खाणीसु वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा ।

से भिक्खू वा भिक्खुणी वा से ज्जं पुण थंडिलं जाणेज्जा- डागवच्चंसि वा सागवच्चंसि वा मूलगवच्चंसि वा हत्थंकरवच्चंसि वा अन्नयरंसि वा तहप्पगारंसि थंडिलंसि नो उच्चारपासवणं वोसिरेज्जा सुयक्खंधो-२, अज्झयणं-१०, [सत्तिक्कयं-३]

से भिक्खू वा भिक्खुणी वा से ज्जं पुण थंडिलं जाणेज्जा- असणवनंसि वा सणवनंसि वा धायइवनंसि वा केयइवनंसि वा अंबवनंसि वा असोगवनंसि वा नागवनंसि वा पुन्नागवनंसि वा अन्नयरसु वा तहप्पगारसु पत्तोवएसु वा पुप्फोवएसु वा फलोवएसु वा बीओबएसु वा हरिओवएसु वा नो उच्चार पासवणं वोसिरेज्जा ।

[५०१] से भिक्खू वा भिक्खुणी वा सपाययं वा परपाययं वा गहाय से तमायाए एगंतमवक्कमेज्जा अनावायंसि असंलोयंसि अप्पपानंसि मक्कडासंताणयंसि अहारामंसि वा उवस्सयंसि तओ संजयामेव उच्चारपासवणं वोसिरेज्जा, से तमायाए एगंतमवक्कमे अनावायंसि जाव मक्कडा-संताणयंसि अहारामंसि वा झामथंडिलंसि वा अन्नयरंसि वा तहप्पगारंसि थंडिलंसि अचित्तंसि तओ संजयामेव उच्चारपासवणं वोसिरेज्जा ।

एयं खलु तस्स भिक्खुस्स वा भिक्खुणीए वा सामग्गियं जं सव्वेद्वेहिं समिए सहिए सया जएज्जासि - त्तिबेमि ।

दसमं अज्झयणं समत्तं

मुनि दीपरत्नसागरेण संशोधितः सम्पादितश्च बीयाए चूलाए तइयं सत्तिककयं समत्तं

एगारसमं अज्झयणं - सद्धसत्तिककयं

० बीयाए चूलाए- चउत्थं सत्तिककयं ०

[५०२] से भिक्खू वा भिक्खुणी वा अहावेगइयाइं सद्दाइं सुणेइ, तं जहा- मुइंगसद्दाणि वा नंदीसद्दाणि वा झल्लरीसद्दाणि वा अन्नयराणि वा तहप्पगाराणि विरूवरूवाणि वितताइं सद्दाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सद्दाइं सुणेइ, तं जहा- वीणा-सद्दाणि वा विपंची-सद्दाणि वा बद्धीसग-सद्दाणि वा तुणय-सद्दाणि वा पणव-सद्दाणि वा तुंबवीणिय-सद्दाणि वा ढंकुण-सद्दाणि वा अन्नयराइं वा तहप्पराइं विरूवरूवाइं सद्दाइं वितताइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सद्दाइं सुणेति तं जहा- ताल-सद्दाणि वा कंसताल-सद्दाणि वा लत्तिय-सद्दाणि वा गोहिय-सद्दाणि वा किरकिरिय-सद्दाणि वा अन्नयराणि वा तहप्पगाराइं विरूवरूवाइं तालसद्दाइं कण्णसोय पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सद्दाइं सुणेति तं जहा-संख-सद्दाणि वा वेणु-सद्दाणि वा वंस-सद्दाणि वा खरमुहि-सद्दाणि वा पिरिपिरिय-सद्दाणि वा अन्नयराइं वा तहप्पगाराइं विरूवरूवाइं सद्दाइं झुसिराइं कण्णसोयपडियाए नो अभिसंधारेज्जा गमणाए ।

[५०३] से भिक्खू वा भिक्खुणी वा अहावेगइयाइं सद्दाइं सुणेति तं जहा-वप्पाणि वा फलिहाणि वा उप्पलाणि वा पल्ललाणि वा उज्झराणि वा निज्झराणि वा वावीणि वा पोक्खराणि वा दीहियाणि वा गुंजालियाणि वा सराणि व सागराणि वा सरपंतियाणि वा सरसरपंतियाणि वा अन्नयराइं वा तहप्पगाराइं विरूवरूवाइं सद्दाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सद्दाइं सुणेति तं जहा- कच्छाणि वा नूमाणि वा गहनानि वा वनानि वा वनदुग्गाणि वा पव्वयाणि वा पव्वयदुग्गाणि वा अन्नयराइं वा तहप्पगाराइं सुयक्खंधो-२, अज्झयणं-११, [सत्तिककयं-४]

विरूवरूवाइं सद्दाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सदाइं सुणेति तं जहा-गामाणि वा नगराणि वा निगमाणि वा रायहाणीणि वा आसाम-पट्टण-सन्निवेसाणि वा अन्नयराइं वा तहप्पगाराइं विरूवरूवाइं सदाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सदाइं सुणेति तं जहा-आरामाणि वा उज्जाणाणि वा वनानि वा वनसंडाणि वा देवकुलाणि वा सभाणि वा पवाणि वा अन्नयराइं वा तहप्पगाराइं विरूवरूवाइं सदाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सदाइं सुणेति तं जहा-अट्टाणि वा अट्टालयाणि वा चरियाणि वा दाराणि वा गोपुराणि वा अन्नयराइं वा तहप्पगाराइं विरूवरूवाइं सदाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सदाइं सुणेति तं जहा-तियाणि वा चउक्काणि वा चच्चराणि वा चउम्मुहाणि वा अन्नयराइं वा तहप्पगाराइं विरूवरूवाइं सदाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सदाइं सुणेति तं जहा- महिसद्वाण-करणाणि वा वसभद्वाण-करणाणि वा अस्सद्वाण-करणाणि वा हत्थिद्वाण-करणाणि वा [कुक्कुडद्वाण-करणाणि वा मक्कडद्वाण-करणाणि वा लावयद्वाण-करणाणि वा वट्ठयद्वाण-करणाणि वा तित्तिरद्वाण-करणाणि वा कवोयद्वाण-करणाणि वा] कविंजलद्वाण-करणाणि वा अन्नयराइं वा तहप्पगाराइं विरूवरूवाइं सदाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सदाइं सुणेति तं जहा- महिस-जुद्धाणि वा वसभ-जुद्धाणि वा अस्स-जुद्धाणि वा हत्थि-जुद्धाणि वा कुक्कुड-जुद्धाणि वा मक्कड-जुद्धाणि वा लावय-जुद्धाणि वा वट्ठय-जुद्धाणि वा तित्तिर-जुद्धाणि वा कवोय-जुद्धाणि वा] कविंजल-जुद्धाणि वा अन्नयराइं वा तहप्पगाराइं [विरूवरूवाइं सदाइं कण्ण-सोय-पडियाए] नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सदाइं सुणेति तं जहा-जूहिय-द्वाणाणि वा हयजूहिय-द्वाणाणि वा गयजहिय-द्वाणाणि वा अन्नयराइं वा तहप्पगाराइं विरूवरूवाइं सदाइं कण्णसोय-पडियाए नो अभिसंधारेज्जा गमणाए ।

[५०४] से भिक्खू वा० अहावेगइयाइं सदाइं सुणेति तं जहा- अक्खाइयद्वाणाणि वा माणुम्माणिय-द्वाणाणि वा महयाहय-नट्ट-गीय-वाइय-तंति-तल-ताल-तुडिय-पडुप्पवाइय-द्वाणाणि वा अन्नयराइं वा तहप्पगाराइं विरूवरूवाइं सदाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सदाइं सुणेति तं जहा- कलहाणि वा डिंबाणि वा डमराणि वा दोरज्जाणि वा वेरज्जाणि वा विरुद्धरज्जाणि वा अन्नयराइं वा तहप्पगाराइं विरूवरूवाइं सदाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अहावेगइयाइं सदाइं सुणेति तं जहा-खुड्डियं दारियं परिभुतं-मंडियं अलंकियं निबुज्झमाणिं पेहाए एगं वा पुरिसं वहाए नीणिज्जमाणं पेहाए अन्नयराइं वा तहप्पगाराइं विरूवरूवाइं सदाइं कण्णसोय-पडियाए नो अभिसंधारेज्जा गमणाए ।

सुयक्खंधो-२, अज्झयणं-११, [सत्तिक्कयं-४]

से भिक्खू वा भिक्खुणी वा अन्नयराइं विरूवरूवाइं महासवाइं एवं जाणेज्जा तं जहा- बहुसगडाणि वा बहुरहाणि वा बहुमिलक्खूणि वा बहुपच्चंताणि वा अन्नयराइं वा तहप्पगाराइं विरूवरूवाइं महासवाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा अन्नयराइं विरूवरूवाइं महुस्सवाइं एवं जाणेज्जा तं जहा- इत्थीणी वा पुरिसाणि वा थेराणि वा डहराणि वा मज्झिमाणि वा आभरण-विभूसियाणि वा गायंताणि वा वायंताणि वा नच्चंताणि वा हसंताणि वा रमंताणि वा मोहंताणि वा विउलं असनं पानं खाइमं साइमं परिभुंजंताणि वा परिभाइंताणि वा विच्छिडयमाणाणि वा विगोवयमाणाणि वा अन्नयराइं वा तहप्पगाराइं विरूवरूवाइं महुस्सवाइं कण्णसोय-पडियाए नो अभिसंधारेज्जा गमणाए ।

से भिक्खू वा भिक्खुणी वा नो इहलोइएहिं सदेहिं नो परलोइएहिं सदेहिं नो सुएहिं सदेहिं नो असुएहिं सदेहिं नो दिट्ठेहिं सदेहिं नो अदिट्ठेहिं सदेहिं नो इट्ठेहिं सदेहिं नो कंतेहिं सदेहिं सज्जेज्जा नो रज्जेज्जा नो गिज्जेज्जा नो मुज्जेज्जा नो अज्झोववज्जेज्जा ।

एयं खलु तस्स भिक्खुस्स वा भिक्खुणीए वा सामग्गियं [जं सव्वट्ठेहिं समिए सहिए सया] जएज्जासि - त्तिबेमि ।

एगारसमं अज्झयणं समत्तं

मुनि दीपरत्नसागरेण संशोधितः सम्पादितश्च बीयाए चूलाए चउत्थं सत्तिक्कयं समत्तं

बारसमं अज्झयणं - रूव सत्तिक्कयं

० बीयाए चूलाए पंचमं सत्तिक्कयं ०

[५०५] से भिक्खू वा भिक्खुणी वा अहावेगइयाइं रूवाइं पासइ तं जहा- गंधिमाणि वा वेढिमाणि वा पूरिमाणि वा संघाइमाणि वा कट्ठकम्माणि वा पोत्थकम्माणि वा चित्तकम्माणि वा मणिकम्माणि वा दंतकम्माणि वा पत्तच्छेज्जकम्माणि वा विविहाणि वा वेढिमाइं वा अन्नयराइं वा तहप्पगाराइं विरूवरूवाइं रूवाइं चक्खुदंसण-पडियाए नो अभिसंधारेज्जा गमणाए ।

एवं नेयव्वं जहा सद्दपडिमा सव्वा वाइत्तवज्जा रूवपडिमा वि ।

[एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समिए सहिए सया जएज्जासि] - त्तिबेमि ।

बारसमं अज्झयणं समत्तं

मुनि दीपरत्नसागरेण संशोधितः सम्पादितश्च बीयाए चूलाए पंचमं सत्तिक्कयं समत्तं

तेरसमं अज्झयणं - परकिरियासत्तिक्कयं

० बीयाए चूलाए-छट्ठमं सत्तिक्कयं ०

[५०६] परकिरियं अज्झत्थियं संसेसियं- नो तं साइए नो तं नियमे, से सिया परो पादाइं आमज्जेज्ज वा पमज्जेज्ज वा- नो तं साइए नो तं नियमे । से सिया परो पादाइं संबाहेज्ज वा पलिमद्देज्ज वा - नो तं साइए नो तं नियमे । से सिया परो पादाइं फूमेज्ज वा रएज्ज वा- नो तं साइए नो तं नियमे । से सिया परो पादाइं तेल्लेण वा घएण वा वसाए वा मक्खेज्ज वा भिलिंगेज्ज वा - नो तं सुयक्खंधो-२, अज्झयणं-१३, [सत्तिक्कयं-६]

कायंसि गंडं वा अरइयं वा पिडयं वा भगंदलं वा अन्नयरेणं सत्थ-जाएणं अच्छिंदेज्ज वा विच्छिंदेज्ज वा-
नो तं साइए नो तं नियमे ।

से सिया परो कायंसि गंडं वा अरइयं वा पिडयं वा भगंदल वा अन्नयरेणं सत्थजाएणं
अच्छिंदिज्ज वा विच्छिंदिज्ज वा अन्नयरेणं सत्थजाएणं अच्छिंदित्ता वा विच्छिंदित्ता वा पूयं वा सोणियं
वा नीहरेज्ज वा विसोहेज्ज वा- नो तं साइए नो तं नियमे । से सिया परो कायाओ सेयं वा जल्लं वा
नीहरेज्ज वा विसोहेज्ज-वा- नो तं साइए नो तं नियमे । से सिया परो अच्छिमलं वा कण्णमलं वा
दंतमलं वा नहमलं वा नीहरेज्ज वा विसोहेज्ज वा- नो तं साइए नो तं नियमे । से सिया परो दीहाइं
बालाइं दीहाइं रोमाइं दीहाणं भभुहाइं दीहाइं कक्खरोमाइं दीहाइं वत्थिरोमाइं कप्पेज्ज वा संठवेज्ज वा- नो
तं साइए नो तं नियमे । से सिया परो सीसाओ लिक्खं वा जूयं वा नीहरेज्ज वा विसोहेज्ज वा- नो तं
साइए नो तं नियमे ।

से सिया परो अंकंसि वा पलियंकंसि या तुयट्ठावेत्ता पादाइं आमज्जेज्ज वा पमज्जेज्ज वा-
नो तं साइए नो तं नियमे । एवं हिट्ठिमो गमो पायाइ भाणियव्वो ।

से सिया परो अंकंसि वा पलियंकंसि वा तुयट्ठावित्ता हारं वा अद्धहारं वा उरत्थं वा गेवेयं
वा मउडं वा पालंबं वा सुवण्णसुत्तं वा आविधेज्ज वा पिणिधेज्ज वा-नो तं साइए नो तं नियमे । से
सिया परो आरामंसि वा उज्जाणंसि वा नीहरेत्ता वा पविसेता वा पायाइं आमज्जेज्ज वा पमज्जेज्ज वा
नो तं साइए नो तं नियमे । एवं नेयव्वा अन्नमन्नकिरिया वि ।

[५०७] से सिया परो सुद्धेणं वा वड्ढ-बलेणं तेइच्छं आउट्टे, से सिया परो असुद्धेणं वा वड्ढ-
बलेणं तेइच्छं आउट्टे, से सिया परो गिलाणस्स सचित्ताणि वा कंदाणि वा मूलाणि वा तयाणि वा
हरियाणि वा खणित्तु वा कड्ढेत्तु वा कड्ढावेत्तु वा तेइच्छं आउट्टेज्ज- नो तं साइए नो तं नियमे ।
कडुवेयणा पाण-भूय-जीव-सत्ता वेदणं वेदंति ।

एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समित्ते सहिते सदा
जए सेयमिणमन्नेज्जासि - त्तिबेमि ।

तेरसमं अज्झयणं समत्तं

मुनि दीपरत्नसागरेण संशोधितः सम्पादितश्च बीयाए चूलाए छड्डं सत्तिककयं समत्तं

चउट्टसमं अज्झयणं - अन्नोन्नकिरियासत्तिककयं

० बीयाए चूलाए-सत्तमं सत्तिककयं ०

[५०८] से भिक्खु वा भिक्खुणी वा अन्नमन्नकिरियं अज्झत्थियं संसेसियं-नो तं साइए
नो तं नियमे । से अन्नमन्नं पादाइं आमज्जेज्ज वा पमज्जेज्ज वा-नो तं साइए नो तं नियमे । सेसं
तं चेव । एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समित्ते सहिते सदा जए
सेयमिणं मन्नेज्जासि-त्तिबेमि ।

चउट्टसमं अज्झयणं समत्तं

मुनि दीपरत्नसागरेण संशोधितः सम्पादितश्च बीयाए चूलाए सत्तमं सत्तिककयं समत्तं

बीया चूला समत्ता

सुयक्खंधो-२, अज्झयणं-१३, [सत्तिककयं-६]

पनरसमं अज्झयणं - भावणा

• तइया चूला •

[५०९] तेणं कालेणं तेणं समएणं समणे भगवं महावीरे पंचहत्थुत्तरे यावि होत्था, हत्थुत्तराहिं चुए चइत्ता गब्भं वक्कंते, हत्थुत्तराहिं गब्भाओ गब्भं साहरिए, हत्थुत्तराहिं जाए, हत्थुत्तराहिं सव्वओ सव्वत्ताए मुंडे भवित्ता अगाराओ अनगारियं पव्वइए, हत्थुत्तराहिं कसिणे पडिपुण्णे अच्चाघाए निरावरणे अनंते अनुत्तरे केवलवरनाणदंसणे समुप्पण्णे, साइणा भगवं परिनिव्वुए ।

[५१०] समणे भगवं महावीरे इमाए ओसप्पिणीए- सुसमसुसमाए समाए वीइक्कंताए सुसमाए समाए वीइक्कंताए सुसमदुसमाए समाए वीइतक्कंताए दुसुमसुसमाए समाए बहु वीइक्कंताए-

पण्हत्तरीए वासेहिं मासेहिं य अद्धनवमेहिं सेसेहिं जे गिम्हाणं चउत्थे मासे अट्टमे पक्खे- आसाढसुद्धे तस्स णं आसाढसुद्धस्स छट्ठीपक्खेणं हत्थुत्तराहिं नक्खत्तेणं जोगमुवागएणं महाविजय सिद्धत्थपुप्फुत्तर-पवर-पुंडरीय-दिसाओवत्थिय-वद्धमाणाओ महाविमाणओ वीसं सागरोवमाइं आउयं पालइत्ता आउक्खएणं भवक्खएणं ठिइक्खएणं चुए चइत्ता इह खलु जंबुदीवे दीवे भारहे वासे दाहिणइद्धभरहे दाहिणमाहणकुंडपुर सन्निवेसंसि उसभदत्तस्स माहणस्स कोडाल-सगोत्तस्स देवानंदाए माहणीए जालंधरायण-सगोत्ताए सीहोब्भभवभूएणं अप्पाणेणं कुच्छंसि गब्भं वक्कंते ।

समणे भगवं महावीरे तिन्नाणोवगए यावि होत्था- चइस्सामित्ति जाणइ, चुएमित्ति जाणइ, चयमाणे न जाणेइ, सुहुमे णं से काले पन्नत्ते ।

तओ णं समणस्स भगवओ महावीरस्स अनुकंपए णं देवे णं जीयमेयं ति कट्टु जे से वासाणं तच्चे मासे पंचमे पक्खे- आसोयबहुले तस्स णं आसोयबहुलस्स तेरसीपक्खेणं हत्थुत्तराहिं नक्खत्तेहिं जोगमुवागएणं बासीतिहिं राइंदिएहिं वीइक्कंतेहिं तेसीइमस्स राइंदियस्स परियाए वट्टमाणे दाहिणमाहण-कुंडपुर-सन्निवेसाओ उत्तरखत्तियकुंडपुर-सन्निवेसंसि नायाणं खत्तियाणं सिद्धत्थस्स खत्तियस्स कासवगोत्तस्स तिसलाए खत्तियाणीए वासिद्ध-सगोत्ताए असुभाणं पुग्गलाणं अवहारं करेत्ता सुभाणं पुग्गलाणं पक्खेवं करेत्ता कुच्छंसि गब्भं साहरइ, जेवि य से तिसलाए खत्तियाणीए कुच्छंसि गब्भे तंपि य दाहिणमाहणकुंडपुर-सन्निवेसंसि उसभदत्तस्स माहणस्स कोडाल-सगोत्तस्स देवानंदाए माहणीए जालंधरायण-सगोत्ताए कुच्छंसि साहरइ ।

समणे भगवं महावीरे तिन्नाणोवगए यावि होत्था- साहरिज्जिस्सामित्ति जाणइ, साहरिएमित्ति जाणइ, साहरिज्जमाणे वि न जाणइ समणाउसो!

तेणं कालेणं तेणं समएणं तिसलाखत्तियाणी अह अन्नया कयाइ नवण्हंमासाणं बहुपडि-पुण्णाणं अद्धट्टमाणं राइंदियाणं वीतिकंताणं जे से गिम्हाणं पढमे मासे दोच्चे पक्खे- चेत्तसुद्धे तस्सणं चेत्तसुद्धस्स तेरसीपक्खेणं हत्थुत्तराहिं नक्खत्तेणं जोगोवगएणं समणं भगवं महावीरं अरोगा अरोगं पसूया ।

जं णं राइं तिसला खत्तियाणी समणं भगवं महावीरं अरोगा अरोगं पसूया तण्णं राइं भवणवइ-वाणमंतर-जोइसिय-विमाणवासिदेवेहिं य देवीहि य ओवयंतेहि य उप्पयंतेहि य एगे महं दिव्वे देवुज्जोए देव-सन्निवाते देवकहक्कहे उप्पिंजलगभूए यावि होत्था ।

सुयक्खंधो-२, अज्झयणं-१५, [चूला-३]

जं णं रयणिं तिसला खत्तियाणी समणं भगवं महावीरं अरोगा अरोगं पसूया तण्णं रयणिं बहवे देवा य देवीओ य एगं महं अमयवासं च गंधवासं च चुण्णवासं च पुप्फवासं च हिरण्णवासं च रयणवासं च वासिंसु ।

जं णं रयणिं तिसला खत्तियाणी समणं भगवं महावीरं अरोगा अरोगं पसूया तण्णं रयणिं भवणवड्-वाणमंतर-जोइसिय-विमाणवासिणो देवा य देवीओ य समणस्स भगवओ महावीरस्स सूइकम्माइं तित्थयराभिसेयं च करिंसु ।

जओ णं पभिइ समणे भगवं महावीरे तिसलाए खत्तियाणीए कुच्छिंसि गब्भं आगए तओ णं पभिइ तं कुलं विपुलेणं हिरण्णेणं सुवण्णेणं धणेणं धन्नेणं माणिक्केणं मोत्तिएणं संख-सिल-प्पवालेणं अईव-अईव परिवड्ढइ ।

तओ णं समणस्स भगवओ महावीरस्स अम्मापियरो एयमड्ढं जाणेत्ता निव्वत्त-दसाहंसि वोक्कंतंसि सुचिभूयंसि विपुलं असनं-पानं-खाइमं-साइमं उवक्कखडावेति, उवक्कखडावेत्ता मित्त-नाति-सयण-संबंधिवग्गं उवनिमंतेति मित्त-नाति-सयण-संबंधिवग्गं उवनिमंतेत्ता बहवे समण-माहण-किवण-वणिमग-भिच्छुडग-पंडरगातीण विच्छड्ढेति विगोवंति विस्साणेति दायारेसु दानं पज्जभाएति विच्छड्ढित्ता विगोवित्ता विस्साणित्ता दायारेसु णं दायं पज्जभाएत्ता मित्त-नाइ-सयण-संबंधिवग्गं भुंजावेंति, भुंजावेत्ता मित्त-नाइ-सयण-संबंधिवग्गेणं इमेयारूवं नामधेज्जं कारविति ।

जओ णं पभिइ इमे कुमारे तिसलाए खत्तियाणीए कुच्छिंसि गब्भे आहुए तओ णं पभिइ इमं कुलं विउलेणं हिरण्णेणं सुवण्णेणं धणेणं धन्नेणं माणिक्केणं मोत्तिएणं संख-सिल-प्पवालेणं अईव-अईव परिवड्ढइ तो होउ णं कुमारे वद्धमाणे० ।

तओ णं समणे भगवं महावीरे पंचधातिपरिवुडे, तं जहा-खीरधाईए मज्जणधाईए मंडणधाईए खेल्लावणधाईए अंकधाईए अंकाओ अंकं साहरिज्जमाणे रम्मे मणिकोट्टिमतले गिरिकंदर-समुल्लीणे व चंपयपायवे अहानुपुव्वीए संवड्ढइ ।

तओ णं समणे भगवं महावीरे विण्णायपरिणये विणियत्तबालभावे अप्पुस्सुयाइं उरालाइं माणुस्सागाइं पंचलक्खणाइं कामभोगाइं सद्द-फरिस-रस-रूव-गंधाइं परियारेमाणे एवं च णं विहरइ ।

[५११] समणे भगवं महावीरे कासवगोत्ते तस्स णं इमे तिन्नि नामधेज्जा एवमाहिज्जंति तं जहा-अम्मापिउसंतिए वद्धमाणे, सह-सम्मड्ढए समणे, भीमं भयभेरवं उरालं अचेलयं परिसहं सहइ त्ति कट्ठु देवेहिं से नामं कयं समणे भगवं महावीरे ।

समणस्स णं भगवओ महावीरस्स पिआ कासवगोत्तेण तस्स णं तिन्नि नामधेज्जा एवमाहिज्जंति तं जहा-सिद्धत्थे ति वा, सेज्जंसे ति वा, जसंसे ति वा ।

समणस्स णं भगवओ महावीरस्स अम्मा वासिड्ढ-सगोत्ता तीसे णं तिन्नि नामधेज्जा एवमाहिज्जंति तं जहा-तिसला ति वा विदेहदिन्ना ति वा पियकारिणी ति वा ।

समणस्स णं भगवओ महावीरस्स पित्तियए सुपासे कासवगोत्तेणं, समणस्स णं भगवओ महावीरस्स जेड्ढे भाया नंदिवद्धणे कासवगोत्तेणं, समणस्स णं भगवओ महावीरस्स जेड्ढा भइणी सुदंसणा कासवगोत्तेणं, समणस्स णं भगवओ महावीरस्स भज्जा जसोया कोडिण्णागोत्तेणं ।

समणस्स णं भगवओ महावीरस्स धूया कासवगोत्तेणं तीसे णं दो नामधेज्जा एवमाहिज्जंति

तं जहा-अनोज्जा ति वा, पियंदसणा ति वा । समणस्स णं भगवओ महावीरस्स नत्तुई कोसियगोत्तेणं, तीसे णं दो नामधेज्जा एवमाहिज्जंति तं जहा- सेसवंती ति वा जसवती ति वा ।

[५१२] समणस्स णं भगवओ महावीरस्स अम्मापियरो पासावच्चिज्जा समणोवासगा यावि होत्था, ते णं बहूइं वासाइं समणोवासगपरियागं पालइत्ता छण्हं जीवनिकायाणं संरक्खणनिमित्तं आलोइत्ता निंदित्ता गरहित्ता पडिक्कमित्ता अहारिहं उत्तरगुणं पायच्छित्तं पडिवज्जित्ता कुससंधारं दुरुहित्ता भत्तं पच्चक्खाइंति भत्तं पच्चक्खाइत्ता अपच्छिमाए मारणंतियाए सरीर-संलेहणाए झोसियसरीरा कालमासे कालं किच्चा तं सरीरं विप्पजहित्ता अच्चुए कप्पे देवत्ताए उववण्णा, तओ णं आउक्खएणं भवक्खएणं ठिइक्खएणं चुए चइत्ता महाविदेहवासे चरिमेणं उस्सासेणं सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ।

[५१३] तेणं कालेणं तेणं समएणं समणे भगवं महावीरे नाते नायपुत्ते नायकुल-विनिव्वत्ते-विदेहे विदेहदिन्ने विदेहजच्चे विहेहसुमाले तीसं वासाइं विदेहत्ति कट्ठु अगारमज्झे वसित्ता अम्मापिरुहिं कालगएहिं देवलोगमनुपत्तेहिं समत्तपइण्णे चिच्चा हिरण्णं चिच्चा सुवण्णं चिच्चा बलं चिच्चा वाहणं चिच्चा घण-घन्न-कनग-रयण-संत-सार-सावदेज्जं विच्छइडेत्ता विगोवित्ता विस्साणित्ता दायारेसु दानं दाइत्ता परिभाएत्ता संवच्छरं दलइत्ता जे से हेमंताणं पढमे मासे पढमे पक्खे-मग्गसिरबहुले तस्स णं मग्गसिरबहुलस्स दसमीपक्खेणं हत्थुत्तराहिं नक्खत्तेणं जोगोवगएणं अभिनिक्खमणाभिप्पाए यावि होत्था ।

[५१४] संवच्छरेण होहिति अभिनिक्खमणं तु जिनवरिंदस्स ।

तो अत्थ-संपदाणं पव्वत्तई पुव्वसूराओ ॥

[५१५] एगा हिरण्णकोडी अट्ठेव अनूनया सयसहस्सा ।

सूरोदयमाईयं दिज्जइ जा पायरासो त्ति ॥

[५१६] तिन्नेव य कोडिसया अट्ठासीतिं च होंति कोडीओ ।

असिंति च सयसहस्सा एयं संवच्छरे दिन्नं ॥

[५१७] वेसमणकुंडलधरा देवा लोगंतिया महिइदीया ।

बोहिंति य तित्थयरं पन्नरससु कम्म-भूमिसु ॥

[५१८] बंभंमि य कप्पंमि य बोद्धव्वा कणहराइणो मज्झे ।

लोगंतिया विमाणा अट्ठसु वत्था असंखेज्जा ॥

[५१९] एए देवनिकाया भगवं बोहिंति जिनवरं वीरं ।

सव्वजगजीवहियं अरहं ! तित्थं पव्वत्तेहि ॥

[५२०] तओ णं समणस्स भगवओ महावीरस्स अभिनिक्खमणाभिप्पायं जाणेत्ता भवणवइ-वाणमंतर-जोइसिय-विमाणवासिणो देवा य देवीओ य सएहिं-सएहिं रूवेहिं सएहिं-सएहिं नेवत्थेहिं सएहिं-सएहिं चिंधेहिं सव्विइदीए सव्वजुतीए सव्वबलसमुदएणं सयाइं-सयाइं जाण विमाणाइं दुरुहंति सयाइं-सयाइं जाणविमाणाइं दुरुहित्ता अहाबादराइं पोग्गलाइं परिसाडंति, अहाबादराइं पोग्गलाइं परिसाडेत्ता अहासुहुमाइं पोग्गलाइं परियाइंति, अहा-सुहुमाइं पोग्गलाइं परियाइत्ता उड्ढं उप्पयंति उड्ढं उप्पइत्ता ताए उक्किट्ठाए

सिग्धाए चवलाए तुरियाए दिव्वाए देवगईए अहेणं ओवयमाणा-ओवयमाणा तिरिएणं असंखेज्जाइं दीवसमुद्दाइं वीतिककममाणा-वीतिककममाणा जेणेव जंबुद्धीये दीवे तेणेव उवागच्छंति तेणेव उवागच्छित्ता सुयक्खंधो-२, अज्झयणं-१५, [चूला-३]

जेणेव उत्तरखत्तियकुंडपुर-सन्निवेसे तेणेव उवागच्छंति तेणेव उवागच्छित्ता जेणेव उत्तरखत्तियकुंडपुर-सन्निवेस्स उत्तरपुरत्थिमे दिसीभाए तेणेव भत्तिवेगेण उवट्ठिया ।

तओ णं सक्के देविंदे देवराया सणियं-सणियं जाणविमाणं ठवेति सणियं-सणियं जाणविमाणं ठवेत्ता सणियं-सणियं जाणविमाणाओ पच्चोत्तरति सणियं-सणियं जाणविमाणाओ पच्चोत्तरित्ता एगंतमवक्कमेति एगंमवक्कमेत्ता महया वेउव्विएणं समुग्घाएणं समोहण्णति महया वेउव्विएणं समुग्घाएणं समोहणित्ता एगं महं नानामणिकनयरयणभत्तिचित्तं सुभं चारु कंत रूवं देवच्छंदयं विउव्वति ।

तस्स णं देवच्छंदयस्स बहुमज्झदेसभाए एगं महं सपायपीढं नानामणिकनगरयणभत्तिचित्तं सुभं चारुकंतरूवं सिहासनं विउव्वइ, विउव्वित्ता जेणेव समणे भगवं महावीरे तेणेव उवागच्छति, तेणेव उवागच्छित्ता समणं भगवं महावीरं तिकखुत्तो आयाहिणं पयाहिणं करेइ, समणं भगवं महावीरं तिकखुत्तो आयाहिणं पयाहिणं करेत्ता समणं भगवं महावीरं वंदति नमंसति ।

वंदित्ता नमंसित्ता समणं भगवं महावीरं गहाय जेणेव देवच्छंदए तेणेव उवागच्छति, उवागच्छित्ता सणियं-सणियं पुरत्थाभिमुहे सीहासने निसीयावेइ, निसीयावेत्ता सयपाग-सहस्सपागेहिं तेल्लेहिं अब्भंगेति, अब्भंगेत्ता गंधकसाएहिं उल्लोलेति उल्लोलित्ता सुद्धोदएणं मज्जावेइ, मज्जावित्ता जस्स णं मुल्लं सयसहस्से णं तिपडोलतित्तिएणं साहिएणं सीतएणं गोसीसरत्तचंदणेणं अनुलिपति, अनुलिपित्ता ईसिं निस्सासवातवोज्झं वरनगरपट्टणुगयं कुसलनरपसंसितं अस्स-लालापेलवं छेयारियकनगखचियंत कम्मं हंसलक्खकणं पट्टजुयलं नियंसावेइ नियंसावेत्ता हारं अद्धहारं उरत्थं नेवत्थं एगावलिं पालंबसुत्त-पट्ट-मउड-रयणमालाइं आविंधावेति, अविंधावेत्ता गंधिम वेढिम पूरिम संघातिमेणं मल्लेणं कप्परुक्खमिव समालंकरेति समालंकरेता दोच्चंपि महया वेउव्वियसमुग्घाएणं समोहण्णइ ।

समोहणित्ता एगं महं चंदप्पभं सिबियं सहस्सवाहिणि विउव्वइ, तं जहा- ईहामिय-उसभ-तुरग-नर-मकर-विहग-वानर-कुंजर-रुरु-सरभ-चमर-सदूलसीह-वनलय-भत्ति चित्त लय विज्जाहर-मिहुण-जुयलजंत-जोगजुत्तं अच्चीसहस्समालिणीयं सुनिरुवितं-मिसिमिसितं-रुवगसहस्सकलियं ईसिं भिसमाणं भिब्भिसमाणं चक्खुल्लोयण-लेस्सं मुत्ताहल-मुत्ताजालंतरोवियं तवनीय-पवरलंबूस-पलंबंत मुत्तदामं हारद्धहार-भूसणसमोणयं अहियपेच्छणिज्जं पउमलयभत्तिपितं असोगलयभत्तिचित्तं कुंदलयभत्तिचित्तं नानालयभत्ति० विरइयं सुभं चारुकंतरूवं नानामणि-पंचवण्णघंटापडाय-परिमंडियग्गसिहरं पासादीयं दरिसणीयं सुरूवं ।

[५२१] सीया उवणीया जिनवरस्स जरमरणविप्पमुक्कस्स ।

ओसत्तमल्लदामा जलथलयदिव्वकुसुमेहिं ॥

[५२२] सिबियाए मज्झयारे दिव्वं वररयणरूवचिंचइयं ।

सीहासनं महरिहं सपादपीढं जिनवरस्स ॥

[५२३] आलइयमालमउडो भासुबोदी वराभरणधारी ।

खोमयवत्थनियत्थो जस्स य मोल्लं सयसहस्सं ॥

- [५२४] छट्टेण उ भत्तेणं अज्झवसाणेण सोहणेण जिने ।
लेसाहिं विसुज्झंतो आरुहइ उत्तमं सीयं ॥
- [५२५] सीहासने निविट्ठो सक्कीसाणा य दोहिं पासेहिं ।
वीयंति चामराहिं मणिरयणविचित्तदंडाहिं ॥

सुयक्खंधो-२, अज्झयणं-१५, [चूला-३]

- [५२६] पुत्विं उक्खित्ता मानुसेहिं साहदुरोमकूवेहिं ।
पच्छा वहंति देवा सुरअसुरगरुलनागिंदा ॥
- [५२७] पुरओ सुरा वहंती असुरा पुण दाहिणंमि पासंमि ।
अवरे वहंति गरुला नागा पुण उत्तरे पासे ॥
- [५२८] वनसंडं व कुसुमियं पउमसरो वा जहा सरयकाले ।
सोहइ कुसुमभरेणं इय गगनयलं सुरगणेहिं ॥
- [५२९] सिद्धत्थवनं वा जहा कणियारवनं व चंपगवनं वा ।
सोहइ कुसुमभरेणं इय गगनयलं सुरगणेहिं ॥
- [५३०] वरपडहभेरिज्झल्लरि-संखसयसहस्सिएहिं तूरेहिं ।
गगनतले घरणितले तूर-निनाओ परमरम्मो ॥
- [५३१] ततविततं घनझुसिरं आउज्जं चउविहं बहुविहीयं ।
वायंति तत्थ देवा बहूहिं आनट्टगसएहिं ॥

[५३२] तेणं कालेणं तेणं समणं जे से हेमंताणं पढमे मासे पढमे पक्खे- मग्गसिर-बहुले तस्स णं मग्गसिरबहुलस्स दसमीपक्खेणं सुव्वणं दिवसेणं विजएणं मुहुत्तेणं हत्थुत्तराहिं नक्खत्तेणं जोगोवगएणं पाईणगामिणीए छायाए वियत्ताए पोरिसीए छट्टेणं भत्तेणं अपाणएणं एगसाडगमायाए चंदप्पहाए सिबियाए सहस्सवाहिणीए सदेवमणुयासुराए परिसाए समण्णिज्जमाणे- समण्णिज्जमाणे उत्तरखत्तियकुंडपुर-संनिवेसस्स मज्झंमज्झेणं निगच्छइ निगच्छित्ता...

जेणेव नायसंडे उज्जाणे तेणेव उवागच्छइ उवागच्छित्ता ईसिं रयणिप्पमाणं अच्छुप्पेणं भूमिभागेणं सणियं-सणियं चंदप्पभं सिबियं सहस्सवाहिणिं ठवेइ ठवेत्ता सणियं-सणियं चंदप्पभाओ सिबियाओ सहस्सवाहिणीओ पच्चोयरइ पच्चोयरित्ता सणियं-सणियं पुरत्थाभिमुहे सीहासने निसीयइ आभरणालंकारं ओमुयइ ।

तओ णं वेसमणे देवे जन्नुव्वायपडिए समणस्स भगवओ महावीरस्स हंसलक्खणेणं पडेणं आभरणालंकारं पडिच्छइ ।

तओ णं समणं भगवं महावीरे दाहिणेणं दाहिणं वामेणं वामं पंचमुट्ठियं लोयं करेइ ।

तओ णं सक्के देविदे देवराया समणस्स भगवओ महावीरस्स जन्नुव्वायपडिए वयरामएणं थालेणं केसाइं पडिच्छइ पडिच्छित्ता अनुजाणेसि भंते त्ति कट्टु खीरोयसायरं साहरइ ।

तओ णं समणे भगवं महावीरे दाहिणेणं दाहिणं वामेणं वामं पंचमुट्ठियं लोयं करेत्ता सिद्धाणं नमुक्कारं करेइ करेत्ता सव्वं मे अकरणिज्जं पावकम्मं ति कट्टु सामाइयं चरित्तं पडिवज्जइ, सामाइयं चरित्तं पडिवज्जेत्ता देवपरिसं मनुयपरिसं च आलिक्ख-चित्तभूयमिव ड्वेइ ।

[५३३] दिव्वो मनुस्सघोसो तुरियनिनाओ य सक्कवयणेण ।

खिप्पामेव निलुक्को जाहे पडिवज्जइ चरित्तं ।।

[५३४] पडिवज्जित्तु चरित्तं अहोनिंसं सव्वपाणभूतहितं ।

साहट्टु लोमपुलया पयया देवा निसामिंति ।।

[५३५] तओ णं समणस्स भगवओ महावीरस्स सामाइयं खाओवसमियं चरित्तं पडिवन्नस्स सुयक्खंधो-२, अज्झयणं-१५, [चूला-३]

मनपज्जवनाणे नामं नाणे समुप्पन्ने- अड्ढाइज्जेहिं दीवेहिं दोहि य समुद्देहिं सन्नीणं पंचेदियाणं पज्जत्ताणं वियत्तमणुसाणं मनोगयाइं भावाइं जाणेइ ।

तओ णं समणे भगवं महावीरे पव्वइते समाणे मित्त-नाति-सयण-संबंधिवग्गं पडिविसज्जेति पडिविसज्जेत्ता, इमं एयारूवं अभिग्गहं अभिगिण्हइ, बारस-वासाइं वोसट्ठकाए चियत्तदेहे जे केइ उवसग्गा उप्पज्जंति तं जहा- दिव्वा वा मानुसा वा तेरिच्छिया वा ते सव्वे उवसग्गे समुप्पन्ने समाणे सम्मं सहिस्सामि खमिस्साभि अहियासइस्सामि ।

तओ णं समणे भगवं महावीरे इमं एयारूवं अभिग्गहं अभिगिण्हेत्ता वोसट्ठकाए चत्तदेहे दिवसे मुहुत्तसेसे कुमार गामं समणुपत्ते, तओ णं समणे भगवं महावीरे वोसट्ठचत्तेदेहे अनुत्तरेणं आलएणं अनुत्तरेणं विहारेणं अनुत्तरेणं संजमेणं अनुत्तरेणं पग्गहेणं अनुत्तरेणं संवरेणं अनुत्तरेणं तवेणं अनुत्तरेणं बंधेचरवासेणं अनुत्तराए खंतीए अनुत्तराए मोत्तीए अनुत्तराए तुट्ठीए अनुत्तराए समितीए अनुत्तराए गुत्तीए अनुत्तरेणं ठाणेणं अनुत्तरेणं कम्मणेणं अनुत्तरेणं सुचरियफलनिव्वाणमुत्तिमग्गेणं अप्पाणं भावेमाणे विहरइ ।

एवं विहरमाणस्स जे केइ उवसग्गा समुपज्जिंसु, तं जहा- दिव्वा वा माणुसा वा तेरिच्छिया वा ते सव्वे उवसग्गे समुप्पन्ने समाणे अनाउले अव्वहिए अदीन मानसे तिविह मणवयणकायगुत्ते सम्मं सहइ खमइ तितिकखइ अहियासेइ ।

तओ णं समणस्स भगवओ महावीरस्स एएणं विहारेणं विहरमाणस्स बारसवासा विड्कंता तेरसमस्स य वासस्स परियाए वट्ठमाणस्स जे से गिम्हाणं दोच्चे मासे चउत्थे पक्खे- वइसाहसुद्धे तस्स णं वइसाहसुद्धस्स दसमीपक्खेणं सुव्वएणं दिवसेणं विजएणं मुहुत्तेणं हत्थुत्तराहिं नक्खत्तेणं जोगोवगतेणं पाईणं-गामिणीए छायाए वियत्ताए पोरिसीए जंभियगामस्स नगरस्स बहिया नईए उजुवालिया उत्तरे कूले सामागस्स गाहावइस्स कट्ठकरणंसि उड्ढं जाणू-अहोसिरस्स ज्ञाणकोट्ठोवगयस्स वेयावत्तस्स चेइयस्स उत्तरपुरत्थिमे दिसीभाए सालरुक्खस्स अदूरसामंते उक्कुडुयस्स गोदोहियाए आयावणाए आयावेमाणस्स छट्ठेणं भत्तेणं अपाणएणं सुक्कज्झाणंतरियाए वट्ठमाणस्स निव्वाणे कसिणे पडिपुण्णे अव्वाहए निरावरणे अनंते अनुत्तरे केवलवरनाणंदंसणे समुप्पन्ने ।

से भगवं अरहं जिने जाए केवली सव्वन्नू सव्वभावदरिसी सदेवमणुयासुरस्स लोयस्स पज्जाए जाणइ, तं जहा-आगत्तिं गतिं ठितिं चयणं उववायं भुत्तं पीयं कडं पडिसेवियं आवीकम्मं रहोकम्मं लवियं कहियं मनोमानसियं सव्वलोए सव्वजीवाणं सव्वभावाइ जाणमाणे पासमाणे एवं च णं विहरइ ।

जं णं दिवसं समणस्स भगवओ महावीरस्स निव्वाणे कसिणे पडिपुण्णे अव्वाहए निरावरणे अनंते अनुत्तरे केवलवरनाणंदंसणे समुप्पन्ने तण्णं दिवसं भवणवइ-वाणमंतर-जोइसिय-विमाणवासिदेवेहि

य देवीहि य ओवयंतेहि य जाव उप्पिंजलगभूए यावि होत्था, तओ णं समणे भगवं महावीरे उप्पन्ननाण-
दंसणधरे अप्पाणं च लोगं च अभिसमेक्ख पुवं देवाणं धम्ममाइक्खति, तओ पच्छा मणुस्साणं,...

तओ णं समणे भगवं महावीरे उप्पन्ननाणदंसणधरे गोयमाईणं समणाणं निग्गंथाणं पंच
महव्वयाइं सभावणाइं छज्जीवनिकायाइं आइक्खइ भासइ० परूवेइ, तं जहा- पुढविकाए आउकाए तेउकाए
वाउकाए वणस्सइकाए तसकाए ।

[५३६] पढमं भंते! महव्वयं-पच्चक्खामि सव्वं पाणाइवायं- से सुहुमं वा बायरं वा तसं वा
थावरं वा-नेव सयं पाणाइवायं करेज्जा नेवऽन्नेहिं पाणाइवायं कारवेज्जा नेवऽन्नं पाणाइवायं करंतं समणु
सुयक्खंधो-२, अज्झयणं-१५, [चूला-३]

जाणेज्जा जावज्जीवाए तिविहं तिविहेणं- मणसा वयसा कायसा तस्स भंते, पडिक्कमामि निंदामि
गरिहामि अप्पाणं वोसिरामि ।

तस्सिमाओ पंच भावनाओ भवंति, तत्थिमा पढमा भावना- इरियासमिए से निग्गंथे नो
इरियाअसमिए त्ति, केवली बूया इरियाअसमिए से निग्गंथे पाणाइं भूयाइं जीवाइं सत्ताइं अभिहणेज्ज वा
वत्तेज्ज वा परियावेज्ज वा लेसिज्ज वा उद्वेज्ज वा, इरियासमिए से निग्गंथे नो इरियाअसमिए त्ति
पढमा भावना, ।

अहावरा दोच्चा भावना- मणं परिजाणाइ से निग्गंथे, जे य मणे पावए सावज्जे सकिरिए
अण्हयकरे छेयकरे भेदकरे अधिकरणिए पाओसिए पारिताविए पाणाइवाइए भूओवघाइए- तहप्पगारं मणं नो
पधारेज्जा गमणाए मणं परिजाणाति से निग्गंथे, जे य मणे अपावए त्ति दोच्चा भावना ।

अहावरा तच्चा भावना- वइं परिजाणइ से निग्गंथे, जा य वई पाविया सावज्जा सकिरिया
जाव भूओवघाइया तहप्पगारं वइं नो उच्चारिज्जा, जे वयं परिजाणइ से निग्गंथे, जा य वई अपावियत्ति
तच्चा भावना ।

अहावरा चउत्था भावना- आयाणभंडमत्तनिकखेवणा समिए से निग्गंथे नो आयाणभंडमत्त-
निकखेवणा असमिए केवली बूया- आयाणभंडमत्तनिकखेवणाअसमिए से निग्गंथे पाणाइं भूयाइं जीवाइं
सत्ताइं अभिहणेज्ज वा जाव उद्वेज्ज वा तम्हा आयाणभंडमत्तनिकखेवणा समिए से निग्गंथे नो
आयाणभंडमत्त-निकखेवणा असमिए त्ति चउत्था भावना ।

अहावरा पंचमा भावना- आलोइयपानभोयणभोइ से निग्गंथे, नो अनालोइय पानभोयणभोई,
केवली बूया-अनालोइयपानभोयणभोई से निग्गंथे पाणाइं भूयाइं जीवाइं सत्ताइं अभिहणेज्ज वा उद्वेज्ज
वा तम्हा आलोइयपानभोयणभोई से निग्गंथे, नो अनालोइयपानभोयणभोई त्ति पंचमा भावना ।

एतावताव पढमे महव्वए सम्मं काएण फासिए पालिए तीरिए किट्टिए अवट्टिए आणाए
आराहिए यावि भवइ, पढमे भंते! महव्वए पाणाइवायाओ वेरमणं ।

[५३७] अहावरं दोच्चं भंते महव्वयं-पच्चक्खामि सव्वे मुसावायं वइदोसं- से कोहा वा लोहा
वा भया वा हासा वा नेव सयं मुसं भासेज्जा नेवऽन्नेणं मुसं भासावेज्जा अन्नं पि मुसं भासंतं न
समणुजाणेज्जा जावज्जीवाए तिविहं तिविहेणं- मणसा वयसा कायसा तस्स भंते पडिक्कमामि निंदामि
गरिहामि अप्पाणं वोसिरामि ।

तस्सिमाओ पंच भावनाओ भवन्ति तत्थिमा पढमा भावना- अनुवीइभासी से निग्गंथे, नो अनुवीइभासी केवली बूया-अननुवीइभासी से निग्गंथे, समावदेज्जा मोसं वयणाए, अनुवीइभासी से निग्गंथे नो अननुवीइभासित्ति पढमा भावना ।

अहावरा दोच्चा भावना- कोहं परिजाणइ से निग्गंथे नो कोहणे सिया, केवली बूया-कोहपत्ते कोही समावदेज्जे मोसं वयणाए, कोहं परिजाणइ से निग्गंथे न ये कोहणे सियत्ति दोच्चा भावना ।

अहावरा तच्चा भावना- लोभं परिजाणइ से निग्गंथे नो य लोभणए सिया, केवली बूया-लोभपत्ते लोभी समावदेज्जा मोसं वयणाए लोभं परिजाणइ, से निग्गंथे नो य लोभणए सियत्ति तच्चा भावना ।

अहावरा चउत्था भावना- भयं परिजाणइ से निग्गंथे नो भयभीरुए सिया, केवली बूया-सुयक्खंधो-२, अज्झयणं-१५, [चूला-३]

भयप्पत्ते भीरु समावदेज्जा मोसं वयणाए, भयं परिजाणइ से निग्गंथे, नो य भयभीरुए सियत्ति चउत्था भावना ।

अहावरा पंचमा भावना- हासं परिजाणइ से निग्गंथे नो य हासणए सिया, केवली बूया-हासपत्ते हासी समावदेज्जा मोसं वयणाए, हासं परिजाणइ से निग्गंथे, नो य हासणए सियत्ति पंचमा भावना ।

एतावताव दोच्चे महव्वए सम्मं काएण फासिए पालिए तीरिए किट्टिए अवट्टिए आणाए आराहिए यावि भवत्ति, दोच्चे भंते! महव्वए मुसावायाओ वेरमणं ।

[५३८] अहावरं तच्चं भंते! महव्वयं- पच्चक्खामि सव्वं अदिन्नादाणं- से गामे वा नगरे वा अरण्णे वा अप्पं वा बहुं वा अणुं वा थूलं वा चित्तमंतं वा अचित्तमंतं वा नेव सयं अदिन्नं गेण्हज्जा नेवन्नेहिं अदिन्नं गेण्हावज्जा अन्नंपि अदिन्नं गेण्हंतं न समणुजाणिज्जा जावज्जीवाए तिविहं तिविहेणं- मणसा वयसा कायसा तस्स भंते! पडिक्कमामि निंदामि गरिहामि अप्पाणं वोसिरामि ।

तस्सिमाओ पंच भावणाओ भवन्ति, तत्थिमा पढमा भावना- अनुवीइ मिओग्गहजाई से निग्गंथ नो अननुवीइमिओग्गहजाई, केवली बूया-अननुवीइमिओग्गहजाई त्ति पढमा भावना ।

अहावरा दोच्चा भावना- अणुन्नवियपानभोयणभोई से निग्गंथ नो अणणुन्नवियपान-भोयभोई केवली बूया- अणणुन्नवियपानभोयणभोई से निग्गंथे अदिन्न भुंजेज्जा, तम्हा अणणुन्नवियपान-भोयणभोई से निग्गंथे नो अणणुन्नवियपानभोइणभोई त्ति, दोच्चा भावना ।

अहावरा तच्चा भावना- निग्गंथे णं ओग्गहंसि ओग्गहियंसि एतावताव ओग्गहणसीलए सिया केवली बूया- निग्गंथे णं ओग्गहंसि अनोग्गहियंसि एतावताव अनोग्गहणसीलो अदिन्नं ओगिण्हेज्जा, निग्गंथे णं ओग्गहंसि ओग्गहियंसि एतावताव ओग्गहणसीए सियत्ति तच्चा भावना ।

अहावरा चउत्था भावना- निग्गंथे णं ओग्गहंसि ओग्गहियंसि अभिक्खणं अभिक्खणं ओग्गहणसीलए सिया, केवली बूया- निग्गंथे णं ओग्गहंसि ओग्गहियंसि अभिक्खणं-अभिक्खणं अणोग्गहणसीले अदिन्नं गिण्हेज्जा निग्गंथे ओग्गहंसि ओग्गहियंसि अभिक्खणं-अभिक्खणं ओग्गहणसीलए सियत्ति चउत्था भावना ।

अहावरा पंचमा भावना- अनुवीइमितोग्गहजाई से निग्गंथे साहम्मिएसु, नो अननुवीइ-
मिओग्गहजाई, केवली बूया अननुवीइमिओग्गहजाई से निग्गंथे साहम्मिएसु अदिन्नं ओगिण्हेज्जा अनुवीइ
मिओग्गहजाई से निग्गंथे साहम्मिएसु नो अननुवीइमिओग्गहजाई- इइ पंचमा भावना ।

एतावताव तच्चे महव्वए सम्मं काएण फासिए पालिए तीरिए किट्टिए अविट्टिए अपाए
आराहिए यावि भवइ, तच्चे भंते! महव्वए अदिन्नादाणाओ वेरमणं ।

[५३९] अहावरं चउत्थं भंते! महव्वयं पच्चक्खामि सव्वं मेहुणं, से दिव्वं वा माणुसं वा
तिरिक्खजोणियं वा नेव सयं मेहुणं गच्छेज्जा नेवऽन्नेहिं मेहुणं गच्छावेज्जा अन्नंपि मेहुणं गच्छंतं न
समणुज्जाणेज्जा जावज्जीए तिविहं तिविहेणं- मणसा वयसा कायसा तस्स भंते! पडिक्कमामि निंदामि
गरिहामि अप्पाणं वोसिरामि ।

तस्सिमाओ पंच भावनाओ भवंति, तत्थिमा पढमा भावना- नो निग्गंथे अभिक्खणं-
अभिक्खणं इत्थीणं कहं कहित्तए सिया, केवली बूया- निग्गंथे णं अभिक्खणं-अभिक्खणं इत्थीणं कहं
सुयक्खंधो-२, अज्झयणं-१५, [चूला-३]

कहमाणे संतिभेदा संतिविभंगा संतिकेवली- पन्नत्ताओ धम्माओ भंसेज्जा, नो निग्गंथे अभिक्खणं-
अभिक्खणं इत्थीणं कहं कहित्तए सियत्ति पढमा भावना ।

अहावरा दोच्चा भावना- नो निग्गंथे इत्थीणं मनोहराइं इंदियाइं आलोएत्तए निज्झाइत्तए
सिया केवली बूया- निग्गंथे णं इत्थीणं मनोहराइं इंदियाइं आलोएमाणे निज्झाएमाणे संतिभेया संतिविभंगा
संतिकेवलीपन्नत्ताओ धम्माओ भंसेज्जा नो निग्गंथे इत्थीणं मनोहराइं इंदियाइं आलोएत्तए निज्झाइत्तए
सियत्ति दोच्चा भावना ।

अहावरा तच्चा भावना- नो निग्गंथे इत्थीणं पुव्वरयाइं पुव्वकीलियाइं सुमरित्तए सिया,
केवलीबूया- निग्गंथे णं इत्थीणं पुव्वरयाइं पुव्वकीलियाइं सरमाणे संतिभेया संतिविभंगा संतिकेवलीपण्ण-
त्ताओ धम्माओ भंसेज्जा नो निग्गंथे इत्थीणं पुव्वरयाइं पुव्वकीलियाइं सरित्तए सियत्ति तच्चा भावना ।

अहावरा चउत्था भावना- नाइमत्तपानभोयणभोई से निग्गंथे नो पणीयरसभोयणभोई केवली
बूया-अइमत्तपानभोयणभोई से निग्गंथे पणीयरसभोयणभोई त्ति संतिभेदा संतिविभंगा
संतिकेवलीपन्नत्ताओ धम्माओ भंसेज्जा नो अतिमत्तपानभोयणभोई से निग्गंथे नो पणीय-रसभोयणभोई
त्ति चउत्था भावना ।

अहावरा पंचमा भावना- नो निग्गंथे इत्थीपसुपंडगसंसत्ताइं सयणासणाइं सेवित्तए, सिया
केवलीबूया- निग्गंथे णं इत्थीपसुपंडगसंसत्ताइं सयणासणाइं सेवेमाणे संतिभेया संतिविभंगा संतिकेवली-
पन्नत्ताओ धम्माओ भंसेज्जा नो निग्गंथे इत्थीपसुपंडगसंसत्ताइं सयणासणाइं सेवित्तए सियत्ति
पंचमाभावना

एतावताए चउत्थे महव्वए सम्मं काएण फासिए पालिए तीरिए किट्टिए अवट्टिए आणाए
आराहिए यावि भवइ चउत्थे भंते महव्वए मेहुणाओ वेरमणं ।

[५४०] अहावर पंचमं भंते! महव्वयं- सव्वं परिग्गहं पच्चक्खामि- से अप्पं वा बहुं वा अणुं
वा थूलं वा चित्तमंतं वा अचित्तमंतं वा नेव सयं परिग्गहं गिण्हेज्जा नेवऽन्नेहिं परिग्गहं गिण्हावेज्जा
अन्नंपि परिग्गहं गिण्हंतं न समणुजाणिज्जा जावज्जीवाए तिविहं तिविहेणं- मणसा वयसा कायसा तस्स
भंते! पडिक्कमामि निंदामि गरिहामि अप्पाणं वोसिरामि ।

तस्सिमाओ पंच भावनाओ भवन्ति तत्थिमाः- पढमा भावना- सोयओ जीवे मणुण्णामणुण्णाइं सद्दाइं सुणेइ मणुण्णामणुण्णेहिं सद्देहिं नो सज्जेज्जा नो रज्जेज्जा नो गिज्झेज्जा नो मुज्झेज्जा नो अज्झोववज्जेज्जा नो विनिग्घायमावज्जेज्जा केवली बूया-निग्गंथे णं मणुण्णामणुण्णेहिं सद्देहिं सज्जमाणे रज्जमाणे गिज्झमाणे मुज्झमाणे अज्झोववज्जमाणे विनिग्घायमावज्जमाणे संतिभेया संतिविभंगा संतिकेवलिपन्नत्ताओ धम्माओ भंसेज्जा- ।

न सक्का न सोउं सद्दा सोयविसयमागता । रागदोसा उ जे तत्थ ते भिक्खू परिवज्जए ।

सोयओ जीवो मणुण्णामणुण्णाइं सद्दाइं सुणेइं सुणेइ त्ति पढमा भावणा ।

अहावरा दोच्चा भावना- चक्खूओ जीवो मणुण्णामणुण्णाइं रूवाइं पासइ मणुण्णा-मणुण्णेहिं रूवेहिं नो सज्जेज्जा नो रज्जेज्जा नो गिज्झेज्जा नो मुज्झेज्जा नो अज्झोववज्जेज्जा नो विनिग्घायं आवज्जेज्जा केवली बूया निग्गंथे णं मणुण्णामणुण्णेहिं रूवेहिं सज्जमाणे रज्जमाणे गिज्झमाणे मुज्झमाणे अज्झोववज्जमाणे विनिग्घायमावज्जमाणे संतिभेया संतिविभंगा संतिकेवलि-पन्नत्ताओ धम्माओ भंसेज्जा ।

न सक्का रूवमददुं चक्खुविसयमागयं । रागदोसा उ जे त्थ ते भिक्खू परिवज्जए ।

चक्खूओ जीवो मणुण्णामणुण्णाइ रूवाइं पासइ त्ति दोच्चा भावना ।

सुयक्खंधो-२, अज्झयणं-१५, [चूला-३]

अहावरा तच्चा भावना- घाणओ जीवो मणुण्णामणुण्णाइं गंधाइं अग्घायइ मणुण्णामणुण्णेहिं गंधेहिं नो सज्जेज्जा नो रज्जेज्जा नो गिज्झेज्जा नो मुज्झेज्जा नो अज्झोववज्जेज्जा नो विनिग्घाय-मावज्जेज्जा केवली बूया- निग्गंथे णं मणुण्णामणुण्णेहिं गंधेहिं सज्जमाणे रज्जमाणे गिज्झमाणे मुज्झमाणे अज्झोववज्जमाणे विनिग्घायमावज्जमाणे संतिभेदा संतिविभंगा संतिकेवली पन्नत्ताओ धम्माओ भंसेज्जा ।

न सक्का न गंधमग्घाउं नासाविसयमागयं । रागदोसा उ जे तत्थ ते भिक्खू परिवज्जए ।।

घाणओ जीवो मणुण्णामणुण्णाइं गंधाइं अग्घायति त्ति तच्चा भावना ।

अहावरा चउत्था भावना- जिब्भाओ जीवो मणुण्णामणुण्णाइं रसाइं अस्सादेइ मणुण्णा-मणुण्णेहिं रसेहिं नो सज्जेज्जा नो रज्जेज्जा नो गिज्झेज्जा नो भुज्झेज्जा नो अज्झोववज्जेज्जा नो विनिग्घायमावज्जेज्जा केवली बूया निग्गंथे णं मणुण्णामणुण्णेहिं रसेहिं सज्जमाणे रज्जमाणे गिज्झमाणे मुज्झमाणे अज्झोववज्जमाणे विनिग्घायमावज्जमाणे संतिभेदा संतिविभंगा संतिकेवलीपन्नत्ताओ धम्माओ भंसेज्जा ।

न सक्का रसमनासाउं जीहाविसयमागयं । रागदोसा उ जे तत्थ ते भिक्खू परिवज्जए ।

जीहाओ जीवो मणुण्णामणुण्णाइं रसाइं अस्सादेइ त्ति चउत्था भावना ।

अहावरा पंचमा भावना फासओ जीवो मणुण्णामणुण्णाइं फासाइं पडिसंवेदेइं मणुण्णामणुण्णेहिं फासेहिं नो सज्जेज्जा नो रज्जेज्जा नो गिज्झेज्जा नो मुज्झेज्जा नो अज्झोववज्जेज्जा नो विनिग्घाय-मावज्जेज्जा, केवली बूया- निग्गंथे णं मणुण्णामणुण्णेहिं फासेहिं सज्जमाणे रज्जमाणे गिज्झमाणे मुज्झमाणे अज्झोववज्जमाणे विनिग्घायमावज्जमाणे संतिभेदा संतिविभंगा संतिकेवलि-पन्नताओ धम्माओ भंसेज्जा ।

न सकका न संवेदेउं फासविसयमागयं । रागदोसा उ जे तत्थ ते भिक्खू परिवज्जए ।
 फासओ जीवो मणुण्णामणुण्णाई फासाइं पडिसंवेदेति त्ति पंचमा भावणा ।
 एतावताव पंचमे महव्वए सम्मं काएण फासिए पालिए तीरिए किट्टिए अवट्टिए आणाए
 आराहिए यावि भवइ पंचमे भंते महव्वए परिग्गहाओ वेरमणं ।

इच्चेतेहिं पंच महव्वएहिं पणवीसाहि य भावणाहिं संपन्ने अनगारे अहासुयं अहाकप्पं
 अहामग्गं सम्मं काएण फासित्ता पालित्ता तीरित्ता किट्टित्ता आणाए आराहित्ता यावि भवइ ।

पनरसमं अज्झयणं समत्तं

मुनि दीपरत्नसागरेण संशोधिताः सम्पादिताश्च च तइया चूला समत्ता

सोलसमं अज्झयणं - विमुत्ती

० चउत्था चूला ०

- [५४१] अनिच्चमावासमुर्वेति जंतुणो, पलोयए सोच्चमिदं अनुत्तरं ।
 विऊसिरे विण्णु अगारबंधणं अभीरु, आरंभपरिग्गहं चए ॥
 [५४२] तहागअं भिक्खुमनंतसंजयं, अनेलिसं विण्णु चरंतमेसणं ।
 तुदंति वायाहिं अभिद्धवं नरा, सरेहिं संगामगयं व कुंजरं ॥

सुयक्खंधो-२, अज्झयणं-१६ [चउत्था चूला]

- [५४३] तहप्पगारेहिं जनेहिं हीलिए, ससद्धफासा फरुसा उदीरिया ।
 तित्तिक्खए नाणि अदुडुचेयसा, गिरिव्व वाएण न संपवेयए ॥
 [५४४] उवेहमाणे कुसलेहिं संवसे, अकंतदुक्खी तसथावरा दुही ।
 अलूसए सव्वसहे महामुनी, तहा हि से सुस्समणे समाहिए ॥
 [५४५] विदू नते धम्मपयं अनुत्तरं, विनीयतण्हस्स मुनिस्स झायओ ।
 समाहियस्सग्गिसिहा व तेयसा, तवो य पण्णा य जसो य वड्ढइ ॥
 [५४६] दिसोदिसंनंतजिणेण ताइणा महव्वया खेमपदा पवेदिता ।
 महागुरु निस्सयरा उदीरिया, तमेव तेजो तिदिसं पगासया ॥
 [५४७] सितेहिं भिक्खू असिते परिव्वए, असज्जमित्थीसु चएज्ज पूयणं ।
 अनिस्सिओ लोगमिणं तहा परं, न मिज्जति कामगुणेहिं पंडिए ॥
 [५४८] तहा विमुक्कस्स परिण्णचारिणो, धिईमओ दुक्खखमस्स भिक्खुणो ।
 विसुज्झई जंसि मलं पुरेकडं समीरियं रूप्पमलं व जोइणा ॥
 [५४९] से हु परिण्णा समयंमि वट्टई, निराससे उवरय-मेहुणे चरे ।
 भुजंगमे जुण्णतयं जहा चए, विमुच्चइ से दुहसेज्ज माहणे ॥
 [५५०] जमाहु ओहं सलिलं अपारगं, महासमुद्धं व भुयाहि दुत्तरं ।
 अहे य णं परिजाणाहि पंडिए से हु मुनी अंतकडे त्ति वुच्चइ ॥
 [५५१] जहा हि बद्धं इह मानवेहिं जहा य तेसिं तु विमोक्ख आहिए ।
 अहा तहा बंधविमोक्ख जे विऊ, से हु मुनी अंतकडे त्ति वुच्चइ ॥

[५५२] इमंमि लोए परए य दोसुवि, न विज्जइ बंधणं जस्स किंचिवि ।
से हु निरालंबणे अप्पइट्ठिए, कलंकली भावपहं विमुच्चइ त्ति बेमि ॥

सोलसमं अज्झयणं-समत्तं

मुनि दीपरत्नसागरेण संशोधिता सम्पादिता चउत्था चूला सम्मत्ता

◦ बीओ सुयकखंधो समत्तो ◦

मुनि दीपरत्नसागरेण संशोधितः सम्पादितश्च “आयारो पढम अंगसुत्तं” सम्मत्तं

१	आयारो-पढमं अंगसुत्तं सम्मत्तं
---	----------------------------------